


K. J. 2 d.

E. K 2

d: 42



K. d. 42

f^a. 2^a.

2011

vv. o. ti.







ANTONII BONONIAE
BECCATELLI COGNOMEN-
TO PANHORMITAE
EPISTOLARVM
LIBRI V.

EIVSDEM ORATIONES II.

CARMINA PRAETEREA QVAE
DAM QVAE EX MVLTIS AB
EO SCRIPTIS ADHVC
COLLIGI PO-
TVERE.



CVM PRIVILEGIO.

VENETIIS M D LIII.

Un

THE
LIBRARY OF THE
MUSEUM OF NATURAL HISTORY
AND
ZOOLOGY
OF THE
CITY OF LONDON

THE
LIBRARY OF THE
MUSEUM OF NATURAL HISTORY
AND
ZOOLOGY
OF THE
CITY OF LONDON

THE
LIBRARY OF THE
MUSEUM OF NATURAL HISTORY
AND
ZOOLOGY
OF THE
CITY OF LONDON

THE
LIBRARY OF THE
MUSEUM OF NATURAL HISTORY
AND
ZOOLOGY
OF THE
CITY OF LONDON

EX ELOGIIS PAVLI IOVII

EPISCOPI NVGERINI.



ANTONIUS Bononia, Panhormita dictus, Equestri familia natus, qui à Pontano alumno elegantiarum pater appellatur, elatè genus suum ab ultimis Britannis, Beccatellaq; familia Bononia celebri repetebat, præclaro gētis insigniū argumēto; quòd isdem militari in scuto pictis alis uteretur. sed maiorem profectò sibi ex laude optimorū studiorum nobilitatē cōparasse uideri potest: moribus enim, ac literis præstātibus exornatus, quum Philippo Mediolanēsum Principi fertilis ingenij industriam obtulisset, tanta liberalitate susceptus est, ut Principē noscendæ historia cupidū familiariter doceret, et publicè octingētis annis aureis elegantiores literas profiteretur. Verum, eo grauius bellis occupato, Panhormita Alphōso Regi adhæsit secretoris scriniij magister, et studiorū, expeditionumq; omniū terra, mariq; perpetuus comes. Scripsit epistolas candidiore stylo, sed maximè iucundo uictoris Regis triūphū, et de factis, dictisq; etus optimi Regis aureū libellū: quē Pius Pontifex exemplis paribus intertextis nobilitore reddidisse uidetur. Vxorē duxit Arcelliam sibi magnopere dilectā: liberosq; suscepit, quorū honesta soboles Neapoli uisitur. Postremo

annos natus LXXVIII urinae difficultate labo-
rans eadem in urbe magno sui apud omnes relicto desi-
derio moritur M. CCCC. LXXI. VIII.
Idus Ianuarij.

Ex quarto Bartholomaei Facij libro de re-
bus gestis Alphonsi.



ISIT Ottolinus ad Alphonsum, qui pete-
ret ad se mitti unum ex ijs, quibus fidelioribus
uteretur, quicum de deditione ageret: et nomi-
natim petijt Antonium Beccatellum, Panhormitam
appellatum, quem poetam nō insuauem Mediolani apud
Philippum in magna gratia ac dignitate cognorat:
eumq; non tantum propter prudentiae, sed multo etiam
magis propter aequitatis opinionem, & quod illum ab
Alphonso adprimè diligi acceperat. Hic prater exi-
miam doctrinam excellenti ingenio praeditus, & carmi-
ne, & soluta oratione, quod est perrarum, propè aequè
ualuit. In suadendo, aut dissuadendo perfacundus habi-
tus: iudicio quoq; acerrimus, atque in primis facetus, ta-
centem tempestate nostra elegiam excitauit.

Qui plura de Antonio scire desiderat, ipsius percurr-
rat epistolas, & maxime primam ad Cambium.

INDEX EPISTOLARVM



Loisio Crotto. folio.44

Aloisio Campo. 95

Alphonso Regi. 92.94.99.100.

101.104.108.111.114.115.118.

120.121.

Andrea Palatio. 31.32.34.35.36.

Andrea Theologo. 66

Angelo Carazulo. 121

Antonio Cremona, 8.9.10.11.12.13.14.

15.16.17.18.19.20.21.22.23.

Antonio Theologo. 37

Antonio Beccaria. 41

Antonio Petrucio. 87

Antonio Panhor. 115

Aurispæ. 96.97.108.110.112.

Baptista Platamonio. 102.104.

Bartholomæo Guasco. 7

Bartholomæo Senensi. 37

Bartholomæo Pontifici. 38.39.40.61.

Bartholomæo Facio. 104

Cambio Zambicario. 47.48.49.50.51.52.

53.54.55.56.57.58.60.

Carolo Aretino. 84.85

Carolo Nauaria Principi. 120

INDEX

Cathalano Lafela.	65
Caroni.	89
Christophoro Lampugnano.	40
Cosmo.	117
Dauidi.	63
Dominico Feruffino.	70.71.72.
Episcopo Stabienfi.	121
Ergoteli.	98.102.103.
Francisco Arcellio.	1
Francisco Piccinino.	24.26.27.28.29.30.
Francisco Barbauaria.	88
Francisco Xanthilio.	94
Francisco Barbaro.	106.116.
G. Pontifici Laudensi.	42
Gaspari Barbaro.	114
Gaudentio.	68
Grillio.	102
Guarino Veronensi.	73.76.78.
Henrigetto Astenfi.	89
Iacobo Abbati.	64
Iannotio Manetto.	118
Ioanni Feruffino.	73

EPISTOLARVM

Ioanni Lamola.	84
Iphicleo.	90
Leonardo.	91
Luchino.	43
Marcolino Barbauario.	66
Martorello.	100.113.120
Marcetto.	67
Miniato.	90
Nardo.	8.37
Nicolao Quarstori.	43
Nicolao Nicocli.	85.121.122
Nicolao Buczuto.	92.
Oldrado.	43
Olzinio.	94
Petro Raimo.	109
Philippo Duci.	1.3.4.33
Poggio Florentino.	78.79.83
Riccardo.	65
Vgolino Parmensi.	103
Viterbioni.	64
Xanthio.	62.63

MEMORANDUM

TO :

FROM :

SUBJECT :

DATE :

BY :

FOR :

RE :

NOTE :

1. The purpose of this memorandum is to provide information regarding the proposed changes to the company's policy on employee conduct.

2. It is recommended that the proposed changes be implemented as soon as possible.

3. The proposed changes are as follows:

4. The proposed changes are as follows:

5. The proposed changes are as follows:

6. The proposed changes are as follows:

7. The proposed changes are as follows:

8. The proposed changes are as follows:

9. The proposed changes are as follows:

10. The proposed changes are as follows:

11. The proposed changes are as follows:

12. The proposed changes are as follows:

13. The proposed changes are as follows:

14. The proposed changes are as follows:

POMPONIVS BECCATELLVS

Bononiensis Reuerendissimo in Christo

Patri Domino Hieronymo Bo

nonia, Beccatello Sicu-

lo, Siracusarum

Episcopo

Domino suo obseruandissimo.



VPERIORIBVS *men*
sibus cum Venetias me contulif
sem, ut Patrum meum Episco-
pum Rauellen: summi Pont:
in ciuitate celeberrima Nuntium
inuiserem, ab eo benigne acce-
ptus multa, & præclara uidi,
quæ summa affecere me uoluptate: sed illud in primis,
quòd Patruus, cum me ad studia bonarum literarum
adhortaretur, suam mihi ostendit bibliothecam, bonis
authoribus & Græcis, & Latinis refertam: quorum
libros cum ego curiosè euoluerem, in uolumen quod-
dam manuscriptum incidi, cuius erat titulus. Anto-
nij Beccatelli, cognomento Panhormitæ opera.
Quod nomè cum mihi ignotum esset, rogaui Patrum
ut exponeret quis ille, & quando fuisset, & cur Pa-

A

inhormita cognominaretur . Tum ille, Gentilis fuit
hic noster , inquit , ex eisq; Beccatellis ortus, qui olim
Bononia discedentes Panhormium se contulere : u-
bi numero, & opibus aucti apud Principem, & o-
mnes, etiam nunc gratia, & auctoritate florent.
Verum hic Antonius dum liberalibus disciplinis o-
peram nauare cuperet, Sicilia posthabita Italiae
gymnasia petijt, in quibus tantum profecit, ut inter
primos, qui ea tempestate literas coluere latinas,
summa cum laude annumeraretur : carmineq; ita ex-
celluit, ut absque controuersia ab omnibus illi pal-
ma deferretur . Quo factum est ut principibus
uiris, qui tunc in Italia regnabant, fuerit summè cha-
rus, cum illisq; familiarissimè uixerit, & maximè
cum Alphonso Neapolis, & Siciliae Rege, qui e-
ius opera non tantum in Studijs literarum, quibus
mirificè delectabatur, sed etiam in his, quæ ad cu-
ram, atq; administrationem regnorum suorum spe-
ctabant, sæpe sit usus : adeoq; illum amauit, ut ordi-
ni Patritio in Vrbe Neapolitana adscribi iusse-
rit . ubi Antonius nobili ducta uxore aliam qua-
si coloniam gentis nostræ in ciuitatem nobilissimam
transtulit : illamq; celebrem excitauit Academiam,
ex qua tanquam ab altero Socrate Philosophi A-

thenis, excellentissimi prodire Poëtæ, & præcipuè
Iouianus Pontanus, qui memor, & gratus Anto-
nij nomen pluribus ornuuit in locis. Quod non tan-
tum à Iouiano, quantum ab alijs quoq; doctis uiris, qui
eadem ætate uixerunt, factum est: quibus ferè omnibus
charissimus fuit ob ingenij præstantiam, & animi can-
dorem, et præsertim Theodoro Gaza, qui *Aeliani*
librum, de instruendis aciebus, quem latinum fecit ad
Antonium scripsit. qui cum *Panhormij* natus
esset, facile apud exteras nationes *Panhormitæ* co-
gnomen est adeptus, quo postea semper est appel-
latus: uerum hæc fusius ab ipsomet *Antonio* intel-
liges, si epistolas eius, quas nunc in manu habes, euol-
ueris, diligenterq; leges: in illis enim quis ipse fue-
rit, quibuscum uixerit, & de patria & gente no-
stra aliqua addisces, quæ in te quoque desiderium ex-
citare poterunt, maiorum tuorum uestigijs inhaeren-
di, qui quandoque clariores fuere, quàm eorum nomen
nunc apud nos præseferre uideatur. Quæ cum *Pa-
truus* dixisset, desiderio incensus, scripta *Antonij*,
quæ habebam audissimè legi: erant enim epistolæ plu-
rimæ, & carmina quædam, quæ cum paucis interie-
ctis diebus summa cum uoluptate percurrissem, *Pa-
truum* rogare insteti, ut illa saltè *Beccatellis* omni-

bus, qui & Panhormij, & Neapoli, & Bononiæ degunt legenda traderet: ne gentis antiquus amor, & patriæ priscæ origo in ipsis locorum, & temporum longinquitate seiunctis aboleretur. Quod cum ille se maximè cupere diceret, tibiq; Prasul amplissime eo nomine iam diu obligatum esse: mihi recensuit, quemadmodum te superioribus annis Tridenti uidisset, cum iluc conuenissetis, tu ad sacrum Concilium Episcoporum a Regno Siciliæ missus, ille à secretis Reuerendissimorū Cardinalium Legatorū Sedis Apostolicæ, & Concilij à Paulo III Pont: Max: destinatus, quo in loco tanta se dixit à te humanitate exceptum, ut non ex eadem gente, sed utero etiam nati uideremini: multosq; inter uos habitos esse sermones de urbe Bononia, & gentis nostræ in ea uetustate, & de Beccatellis Siculis. cum que desiderio flagrares anti quam matrem, & affines arcta beneuolentia complectendi, illum rogasti, quando omnia uidebantur situ obducta, ut memoriam familiæ nostræ qua posset ex parte renouaret, scriptisq; mandaret ea, quæ in annalibus Bononiensibus de ea leguntur. quod ille se curaturum promisit, ut qui cuperet, & tuo honestissimo desiderio, et familiæ in urbe Bononia ferè labenti aliquam opem afferre, sperans aliquando futurum, ut ex

nepotibus aliquis posset maiorum quasi imagines con-
templans, eos quoq; imitari. Verum cum id exequi cu-
peret, post eius à Tridento discessum, tuis maximè ex-
citus literis Antonij nostri scripta avidissimè per-
quisiuit, cum illius epistolam, quam à te acceperat le-
gisset: in qua de origine nostra ad Cambium scribit, cu-
piens sic gentis, et gentilis etiam consulere nomini: sed
nescio quo fato (ut ipse referebat) Antonij opera,
quæ multa fuere, adhuc in lucem non prodierunt: præ-
ter enim libellos illos de dictis, et triumpho Alphon-
si, nihil impressum reperit, cum ille multa, & soluta, et
pedestri oratione scripserit. Epistolas tantum, et car-
mina nonnulla in bibliothecis quorundam doctorum,
& proborū uirorum inuenit, Angeli scilicet Colotij.
Episcopi Nucerni, & Danielis Barbari Patritij
Veneti, cuius proauus Franciscus Barbarus uir do-
ctissimus ipsdem cum Antonio floruit temporibus,
eumq; summoperè dilexit, & Ioannis Baptiste Cyn-
thij Giraldi Ferrariensis, ac Pauli Ramnusi Vene-
ti adolescentis bonarum literarum studiosi: qui omnes
patruo meo perbenignè illorum copiam fecere. Quæ
cum ipse diligentissimè conseruaret, & alia interim
Antonii scripta perquireret, ut tuo uberius satis
faceret desiderio, annales quosdam patriæ nostræ

àCCCC. et supra annis se legisse dicebat: ex quibus
quædam annotauerat, quæ & Ciuitatis Bononiensis,
& gentis etiam nostræ fluctuationes notas facere pos-
sent, illaq; si per negotia licuisset paulò accuratius,
& distinctius scripta ad te missurū fuisse, ni perpetua
eius occupatio cogitationem hāc ne dum in dies differ-
re, sed etiam abiicere penè cogeret. Quæ cum au-
diuissem non mediocri animi dolore tactus, cum memo-
riam maiorū nostrorum quasi perire uiderem, Pa-
trio supplicaui, ne prouinctam hanc deponeret, eamq;
si nō ut cupiebat, saltem ut poterat exequi conaretur.
Tunc ille hilari ad me conuersus vultu, tuæ dixit erunt
Pomponi partes hæ, tuum erit hoc munus, & ueluti
uas pro me factus Reuerendissimo Siracusano Epi-
scopo id persolues, quod ego iamdiu debeo: quod ut
commodius præstes, nunc tibi quicquid hoc nomine in
arcu meo est, trado, simulq; fasciculum chartarum ma-
nu eius scriptarū è scrinio, quos adseruabantur, defer-
ri iussit: quibus obseruationes illæ ex annalibus decer-
ptæ, quæ paulò ante commemorauī, mandatæ erant.
quæ cum manu teneret, sume inquit materiam quæ
ædificiū nostræ domus, quam ego animo exadifica-
tam habebam, construere possis, pium enim, & laudabi-
le patriæ et agnatis opem ferre: nec dubito tua hac di-

līgētia (nī me spēs fallit, quam de studijs, & indole
tua concepī) futurum, ut quemadmodum ego, & Reue
rendissimus Siracusanus archissimo amoris uinculo
tenemur, sic uos qui deinceps succrescitis eiusdem gen
tis adolescentes, eodem beneuolentiæ nodo deuinciāmi
ni. Temere (fateor) mihi facere uidebar, si munus mihi
à Patruo demandatum subirem, quippe qui & ætate,
& ingenio oneri impar essem: sed tamen cum illud us
que adeo cupere uiderem, quod non tantum uerbis,
quam fronte significabat, desiderio flagrans illi obse
quendi, tuam gratiam promerendi, et gentiliū omnium
nostrorum amorem in antiquam patriam excitandi, li
bentissimè obtemperaturum me dixi. cumq; rem omnē
diligentius considerassem, Antonij scripta, quæ ha
beamus edere, Patruo sic permittente decreui: &
quando ita tibi placere intellexi breui, & in summa
quæ de gente nostra, non solum ab Antonio tradita
sunt, sed apud alios etiam leguntur, illis præfigere:
rem tibi non ingratam, cæterisq; Beccatellis omnibus
facturum me sperans, uberiùs alias, si dabitur, id pro
sequuturus.

Beccatellæ familiæ originem, quæ et alio nomine in anna
libus nostris Artenisia quandoque uocatur, Anto
nius noster in epistola ad Cābiū, ab Anglis repetit ab

octingentis, & supra annis, id unde hauserit non scribit: quo in argumento ego aliquid affirmare non auserim, cum superiorum temporum obscuras, & obcæcitas admodum uideam rerum memorias. Tenuerunt Italiam supra mille annos Barbaræ uariæ nationes, Gothi, Lōgobardi, Vngari, Normādi, Saraceni, et alii, modò hanc, modò illam peruagantes regionem: ex quorū seminibus familias extare quamplurimas haud dubiè existimādum est. quarum qui requirit originem, idem facit, ac si in obscurissima nocte lucem adipisci se posse confidat. referre tamen quæ ab aliis intelliguntur non est nisi æqui, ac synceri scriptoris, ut hic Antonius fuit. Quo in proposito non ego illud tacebo, quod in aliis traditū est annalibus, in quibus scribitur diruta penè urbe Bononia à Theodosio primo, cum secundus Theodosius non multis à primo interpositis annis imperiū assequutus esset, missum ab eo Constantinopoli Romam Petronium pietate insignem, & Imperatori affinitate coniunctum, de quo Celestinus. I. Pontifex, qui tūc Petri Cathedram tenebat, uisione diuina præmonitus Petronium Bononiensibus Episcopum dedit: qui Pontifici parens, ad ciuitatem sibi commissam est profectus, cum eoq̃, ut erat genere nobili, multi sunt è Græcia profecti, qui domici-

lio Bononiæ contracto authores XVIII. fuisse familiarum traduntur, inter quas & nostram quoque connumerant: hoc an ita se habeat, cum eadem occurrant, quæ de Britannica Antonij origine dixi, confirmare non possum. utcūq; tamen res ipsa se habeat, illud constātissimè asseueratur, nostram gentem inter antiquiores, quarum memoria extet, in urbe Bononia receptam semper fuisse, cumq; annales Bononienses ab anno M. C. citra suam ordiantur historiam, non potero, si uerax esse uoluero, supra illud tempus aliquid certi referre, nec sanè mirum, fuit enim totos quingentos annos Italia orba & literis, & bonis artibus, ut nihil, aut parum de illorum temporum historia etiam publica sciri possit.

Imperij Romani dignitate è Gracia in occidentè trās lata, tandemq; apud Germanos Pont: Max: auctoritate collocata, Italiæ magna pars Berengarijs expulsis, Impatoribus parebat: Hetruria præcipuè, & ea Galliæ pars, quæ Lombardia hodie dicitur, quas in prouincias Imperatores suos mittebant Vicarios, qui ius dicerent, quinimmò & ipsi interdum cum uel hostes arcendos, uel Imperij coronam Romæ à Pont: Max: peterent, uel aliquid in melius reformare cogitarent, in Italiam ueniebant. Sed cum

B

aliquando electores Imperatoris electionem differ-
 rent, uel ipsi negligentes in prouincia administranda
 essent, euenit ut nonnulli populi, qui eorum parebant
 Imperio, partim in Tyrannorũ potentiam uenirent,
 partim in libertatis speciem quandam se uindicarent:
 quorum in numero & Bononia patria nostra repo-
 nitur. Quæ cum Reipublicæ formam accepisset,
 pratoresq; et magistratus sibi deligeret, ita uires au-
 xit, ut interdum et sæpe alijs Ciuitatibus terrori fue-
 rit, finitimosq; parere coegerit: qua in commemora-
 tione cum annales nostri plurimorum Ciuium mentio-
 nem faciant, domum quoq; nostram silentio non præ-
 tereunt: & quando præcipuè scribere proposui, quæ
 de gentilibus nostris in eis tradita sunt, serie tempo-
 rũ obseruata breui, et dilucidè ea conabor exponere.

Tempestate, qua Innocentius II. Pont. Max. in
 Gallias, & in Germaniam concesserat, ut auxilium à
 Philippo Rege, et à Lotario II. Imperatore pe-
 teret aduersus Petrum Leonem Ciuem Romanum,
 qui illum ut ex Vrbe, sic etiam à sede Beati Petri
 deicere conabatur, suffecto in eius locum Agape-
 tofilio, Bononiensium Ciuitas suos creauit Cõsules,
 qui Reipub. præessent, quorum primus renunciatus
 est Artemsius Beccatellus, ut annales nostri,

& acta testantur publica . Deinde turbulen-
 tissimis temporibus illis , quibus Imperator Fede-
 ricus Barbarussa bellum in Italia concitaret ad-
 uersus Alex. III. Pont. Max. et Ciuitates,
 quæ illi , et Gulielmo Sicilia Regi adhærebant , Bo-
 nonia opibus, et milite florens partes aduersus Fede I I 70
 ricū tuebatur. Cumq; nōnullæ Ciuitates Flaminia in
 ter se dissiderent, aduersarenturq; Fauentini Rauē-
 natibus, quibus Bononienses fauebant, Ciuitas ut illis
 auxilio esset, copias aduersus Fauētinis eduxit: quibus
 alter præfectus est Artenisius Beccatellus, eaq; in
 expeditione primo anno nōnulla sūt ab hostibus dāna
 illata, multiq; è Bononiensibus capti: sed æstate sub-
 sequenti, hostes fusi, captiuiq; recepti sunt, & magna
 cum pōpa primū eduxere Carrocium, quo exercitus
 præfectos, & uexilla uehebant, magnoq; erat dedeco-
 ri, si illud in prælio deseruissent: quod & nonnullæ
 Ciuitates Lombardia postea imitatae sunt .

Rebus tandem inter Pont. Max. & Federicum Im-
 peratorem cōpositis, Bononia quoq; in Federici gra-
 tiam uenit, qui cum in Orientem ad bellum Hieroso-
 lymitanum proficisceretur, Bononiam pacifice adiit, I I 85
 ibiq; est magnificè exceptus, copijsq; illius alias ad-
 iunxit Ciuitas, quas ad bellum pium suis misit sti-
 pendijs . Ea q; in expeditione defuncto Federico

Henricus VI. Federici filius, antea Imperator designatus, qui in Germania resederat, Imperium est adeptus: inde pacifice Italiam ingressus, ut Romæ à summo Pont: diademate Imperij ornaretur, Bononiam uenit, ciuitatiq; priuilegia monetæ cudendæ largitus est, utq; XII. sibi crearet Consules, qui urbi præessent, permisit, qui ex optimatibus ciuium delecti sunt: inter quos Thomas Beccatellus adnumeratus est. & fortassis hic est ille Thomas, qui tanta fuit auctoritate, ut inuitis etiam Magistratibus in urbe permaneret. quod Alberius de Roxate Doctor celebris, & antiquus, in quæstionibus suis scriptum reliquit, de eoq; non semel mentionem facit.

I 2 I 2 *Adepto Imperio Federico II. Sicilia Rege, & Henrici VI. filio, & primi Federici Imperatoris nepote, magnæ in Italia turbæ sunt exortæ: cum Federicus auitis inhærens uestigijs summos Pontifices, & Ecclesiam magno prosequeretur odio, et bello, ita ut ciuitates bisariam diuisæ, multaq; ex his, quæ ante Imperatoribus parebant, contra ipsum fœdus inierint, armaq; sumpserint: ut Mediolanum, Vincentia, Bononia, & aliæ: Tunc enim primum horrificum & pestilens nomen auditum est Guelforum, & Ghibellinorum, quod totam Italiam peruasit, altaq; adeò fixit*

radices, ut & ad nostra peruenerit tempora, non sine magna clade nedum prouinciarum, & urbium, sed etiam cognationum ipsarum. qui enim Pontificibus fauebant Guelfi, qui uerò Imperatori Ghibellini dicebantur. Hac peste ciuitas quoq; Bononiæ infecta, magnas passa est seditiones, quæ tamen opera optimorum ciuium sedatæ sunt, nobiliumq; ordo Rempublicam administrauit cum magna uniuersæ ciuitatis lætitia, qua in regentis nostræ annalium scriptores multam fecere commemorationem.

Sed non multò post Federicus Imperator bello ciuita- I 248
tes inimicas petens Parmam obsedit, quæ ab illo defecerat opera Guelfæ factionis, quam cum biennio arcta cinxisset obsidione, nouamq; urbem propè Parmam ædificasset, quã Victoriæ appellauit, eruptione subita Parmensium fusus est, urbsq; Victoria incensa. quare perculsus Federicus ut exercitum reficeret, in Appuliam accessit, præfecto copijs, quæ superfuerunt, Entio filio, quem Regem Sardinie fecerat, cui cum adhererent Mutinenses, & Bononienses ex aduerso Guelfis fauerent, magnum inter eas ciuitates exortum est bellum, cum alijs sæpe de finibus inter se contendissent. Et cum utrinq; magnæ essent coactæ copię, adessetq; Mutinensibus Entius Rex,

I 249

propè Mutinam prælium est commissum: in quo uictores euasere Bononienses nõ sine laude gentiliũ nostrorum, fufisq; Mutinensibus Rex Entius captus. Qui postea dum uixit, captiuus fuit in Vrbe Bononia per annos XXII. sepultus est in templo Diui Domini.

I 250

Federicus Imperator Entij pater. nuncio audito de captiuitate filij, & strage sociorum, mœrore confectus in Apulia obiit: tuncq; Bononiensium opera Flaminia pars, quæ Federico adhærebatur, sub ditionem uenit Ecclesiæ.

I 260

Crescebat Guelfa, & Ghibellina factionis seditio, ita ut nobilium familiæ plurimæ ad arma concurrerent, cum nostri pro Guelfis aduersus Ghibellinos pugnarent: sed bellum externum, quod imminabat, & Ciuitatem diu occupatam tenuit, pestem hanc per aliquot annos ab Vrbe distulit. nam cum Veneti, qui latè mari Adriatico, & Aegeo imperabant, portoria à Bononiensibus exigeret, qui per Padum in mare Adriaticum nauigarent, ea res ita Ciuitatem commouit, ut Venetis bellum, ni ab incepto desisterent, denunciarent. quo factum est ut Veneti classe instructa ad Bononienses arcendos, qui ad primariũ in Padi ostio castellum muniebant profecti sint. Bellum id fuit magnum, & difficile, cum Bononienses to-

to illo triennio sub signis haberet militū XL. millia,
ut etiam Venetorum historia testatur, saepius que
de Venetis uictoriam reportarint: cum quibus tan-
dem rebus compositis, & oppido disiecto domum re-
dierunt. Ea in expeditione unum ex familia no-
stra copijs praefectum nonnulli tradidere annalium
scriptores.

O bsidente postmodum Bononiensium exercitu Forum I 270
Liuji in Flaminia, Edoardus Angliae Rex à bello
rediens, quod Christiani cum Saracenis in Syria ge-
rebant, in castris Bononiensium benignè exceptus,
nonnullos praefectorum Equestri dignitate ornauit:
quorum in numero Galeatium Beccatellum fuisse com-
memorant. Crescebant interim Ciuitatis di- I 273
scordiae, ita ut magna Ciuium pars, qui Ghibelli-
nis fauebant, sint à Guelfis in exilium missi, non si-
ne caede multorum, quae strages uires affluxit Ci-
uitatis: quae non multo post tuendam se sacrosan-
ctae Romanae Ecclesiae tradidit, quando per se id
amplius facere non ualebat, sedem Beati Petri te-
nente Nicolao. III. Pontifice Maximo.
Ciuiles tamen ob hoc non quievere seditiones, odio I 279
so illo nomine Guelforum, & Ghibellinorum: quo
nomine frequenter in Vrbe Bononia modò hi,

modo illi erant oppressi. & cum Bertoldus Comes
 Flaminia, & nepos Nicolai summi Pont: Ghibelli
 nis faueret, nonnulli ex nobilibus Azoni Esten-
 si amici facti sunt, cum alijs bellum cum eo ciuitas ges-
 sisset. Mortuo itaque Bonifacio VIII. Pont:
 Max: sedeq; Petri diu uacante, amici Azonis
 ab aduersarijs oppressi sunt, exilioque & morte mul-
 tati, eorumq; domus & turres solo æquata, quorum
 in numero Ricardum Beccatellum reponunt.

Translata deinde per Clementem V. Curia Roma-
 na in Galliam, ciuitates, quæ in potestate Ecclesie
 erant in Italia, magnis afficiebatur incommodis, ut-
 pote quæ frano & rectore carerent: quo factum est,
 ut Bononia se in libertatem Pepulorum authorita-
 te, & nostrorum etiam uindicare conata sit, itaq; ab
 Ecclesia descuerit. Sed cum Pepuli diuitijs, &
 opibus alijs præstarent, uerita ciuitas eorum poten-
 tiam, Beccatellorum auxilio nixa Romeum Pepulum
 ciuem primarium, & tota Italia celebrem ex urbe
 depulit: cuius rei ne dum Bononienses annales, sed hi
 storici etiam externi mentionem fecerunt, Ioannes
 scilicet Villanus Florentina historia scriptor anti-
 quus, & locuples. & Beatus Antoninus. factaq;
 est gens Beccatella & domi, & foris conspicua.

Tūcꝫ Nicolaus Carrarius Paduæ Dominus Pol
lioni Beccatello præturam eius Ciuitatis detulit, qui
eo in magistratu seu inimicorum fraude, seu ciuium
conspiratione interfectus est.

Reipub. Bononiensis præfecti, ut se ab exulibus defen-
derent, qui opibus, & auxilijs Passerini Domini
Mantua, & Mutina iuuabantur, suis præfecerunt
copijs Gasparem Radicosani Dominum. quatuor
uirosꝫ rei militaris crearunt, quorum unus fuit Ia-
cobus Beccatellus, uique præsidia exulibus immi-
nuerent, octo miserunt oratores Florentiam ad Ca-
rolum Calabria Ducem Ruberti Regis filium, cui
Respub. Florentinorum metu Ludouici Bauari Im-
peratoris se tradiderat, horum in numero unus fuit
Beccadinus Beccatellus. Fluctuabat Ciuitatis
Bononiensis status, nam in Italia Ghibellini in dies
magis præualebāt: Ludouicus Bauarus Imperator
qui in Italiam cum exercitu aduenerat, Mediolani
Vicecomites in uincula cōiecerat, Hetruriaꝫ formi-
dolosus Romam cum Castrucio petierat: quare Bo-
nonienses, ut rebus suis cōsulerent, cum Ludouici Im-
perium odio haberent, habitis comitijs summo Pon-
tifici, & Ecclesiastica potestati denuo se tradide- I 3 2 7
runt. Beltramusꝫ Cardinalis Ostiensis Lega-

tus Ioannis Pont. Max. summa omnium alacritate in urbem est receptus, ita ut Magistratus obuiam illi prodierint cum Carroccio elegantissime ornato, & multi nobiles uestibus induti pretiosis, inter quos familia nostra non ultimas tulit partes.

I 3 2 8 **L**egatus Pontificis Ciuitatis Dominio potitus Tadeum Pepulum, & fratres, qui in exilio erāt, Ciuitati restituit, tresq; legatos ad summum Pont. misit, qui fuerunt D. Io. Andreas Calderinus. & D. Bornius Samaritanus, et Beccadinus Beccatellus.

I 3 2 9 **C**iuitas interim curam oppidorū Domino Mino Beccatello D. Nicolai filio demandauit, ut cum octo nobilibus, & probis uiris ea loca inuideret, ibiq; quod ē Rep. illis esse uideretur statuerent. Et anno insequenti prædictus Dominus Minus in Magistratu, quem Antianorum appellarunt, est adscriptus.

Sed non quiescente Ciuitate nobiles nonnulli, ut Pepuli, Gizardini, Bentiuoli, et alij conspiratione facta Legatum Pontificis ex Vrbe eiecere, arcemq; quam ille munierat, solo æquarunt, nouaq; Reip. forma induta. Vexiliferum enim iustitiæ, ut appellāt, cum XX Dominis Antianis crearūt, quo in numero duo ex familia nostra fuere, Beccadinus scilicet, et D. Colatius Beccatelli: sed diu nō hæc stetere, anno enim sub

sequenti Schachesia factio, illi scilicet qui Populis faue-
bant, armati subito forum occuparunt, mortem Ghi-
bellinis, & Maltrauersijs omnibus denunciantes, in-
duas enim à principio factiones diuisa erat Ciuitas,
ut iam dictum est, Guelfam scilicet, & Ghibellinam: ex
quibus postmodum tertium quoddam genus exortum est,
quod Maltrauersum est appellatum, nam cum cædi-
bus, & incendijs ob Guelfos, & Ghibellinos Ciuitas
deformaretur, ex hisq; factionibus qui principes erant
facile tyrannidem consequerentur, multi conspirarunt
Ciues pacis & Reipub. amantes, qui hanc, & illam
reprimentes partem, incolumitatem, & libertatem
Reip. conseruabant: appellatiq; sunt à Guelfis, &
Ghibellinis Maltrauersij, quasi hi qui impedimento
essent illis. Huius tertiæ factionis Beccatelli ma-
gna pars erat, aduersus quos (ut dixi) tumultus exci-
tatus est, cumq; Maltrauersij impræmeditati domi-
bus se continerent suis, et inde aduersarijs resisterent,
ui oppressi, urbe ferè omnes cesserunt. Beccatelli tan-
tum suas tutati sunt partes, cum Diui Stephani pla-
team, & regiones finitimas, quæ eorum nomini addi-
ctæ erant, defenderent. sed rebus sedatis, & spe pa-
cis Colatius Beccatellus deceptus, qui tunc gentis no-
stræ caput erat, cum illi permissum esset, ut quos uellet

ipse è gentilibus suis ab urbe remoueret, donec Res-
publica in melius reformaretur, bona fide nixus, &
patriæ pacis amans octo ex his, qui magis ad turbas
excitandas propensi erant, ablegauit. quo factò non
multis interiectis mensibus cum pars aduersa uires
in dies magis colligeret, ut Colatium magis deprime-
ret, edici à Magistratibus curauit, ut nemo qui affi-
nes exules haberet, in forum accederet: quod & si in
genere cautum fuit, hoc tamen præcipue Colatij cau-
sa factum est, ut annotant annalium scriptores: in-
terimq; Rempub. factio, quæ prauauerat, ut ei uide-
batur, reformabat, urbisq; mœnia, & portas munie-
bat: opibus, & authoritate in dies aucta magis.

I 336

Quare anno subsequenti qui fuit I 336 die V.
Aprilis Colatium Beccatellum cum reliquis genti-
libus suis in exilium miserunt, & quercus, quæ forum
Beccatellorum ornabat, ab aduersarijs succisa est:
& in oppido sancti Ioannis li, qui Beccatellis faue-
bant, qui multi erant, in exilium missi sunt: & ita maxi-
mum passa est domus Beccatella naufragium. hincq;
multi è gentilibus nostris fessi tantis luctationibus &
dissidijs in alias, & pacatiores se recepere partes.
Ab hoc tempore arbitror Vanninum familiæ Bec-
catellorum Siculæ authorem Panhormium applicuis-

se, quod satis liquidò constat ex ea epistola, quã *Antonius Panhormita* ad *Cambium* scribit, cum annos supputet nonaginta ferme ab eo, quo illam scribebat epistolam ad *Vannini* aduentum in *Siciliam*. erat autem *Antonius* tunc *Papiae Philippo Mariae Mediolanensium Duci* inseruiens anno circiter 1430 ita ut enumeratio annorum, quam ille refert, ab annalibus *Bononiensibus* cladem hanc referentibus non dissentiat. Sed ad institutum reuertor meum. Colatio ab urbe pulso, omnes sunt *Beccatelli* ut dixi eiectioni, eoque in exilio Colatius mortuus est, & *Imolae* adhuc eius uisitur sepulchrum in templo sancti *Dominici* magnificis literis, & titulo exornatum.

Nouam erat *Resp. Bononiensium* formam adepta, nouaeque quotidie fiebant leges, fixusque initum est in quinquennium cum *Rep. Venetorum*, & *Florentinis*, et *Viccomitibus*, & *Dominis Mantuae*, & *Ferrariae*. sentiebant enim omnes hi contra *Ludouicũ Bauarum*, qui *Imperatoris* nomine multas excitauerat in Italia turbas, *Ghibellinamque factionem* maxime fovebat. Sed tandem cum *Tadei Pepuli* uirtus, & nomen notum, & illustre esset, amicorum studio, & populi, die XXVIII. *Augusti* 1337. comi 1337

tijſ habitis Dominus Bononiæ declaratus eſt, cuius honori ne obeſſent aliqui in exilium miſſi ſunt .

E t cum ſummus Pontifex, qui A uinioni reſidebat, ægre ferret Legati A poſtolici ab V rbe deiectionē, illā ſacris interdixit, multosq; ciues ad ſe citari iuſſit.

S ed Tadeus Pepulus , qui domi quotidie magis ſibi beneuolentiam comparabat , foris etiam amicos , & clientes inuenit , à ſummo Pontifice uenia impetrata, eius etiam permiſſu in Dominio tam tradito perſeuerauit , quin immo nuncio ob id à ſummo Pont. Clemente VI. Bononiam miſſo Vicarius generalis ſanctæ Eccleſiæ in V rbe Bononia , & territorio eius declaratus eſt, cui pacifice præſuit dum uiuit.

I 347 S ed in ſequentibus annis cum peſtis, quæ poſtea uniuerſam uastauiſſet Italiam, graſſari inciperet, duobus reliſtis filiis Ioanne ſcilicet, & Iacobo , mortuus eſt: qui, cum ſe impares tanto oneri regendo ob ciuium uoluntates uarias , & Italiæ fluctuationes uiderent , (mortuo enim Ludouico Bauaro in Imperiū ſucceſſerat Carolus Rex Boemiæ, qui in Italiā uenerat, ut coronā de more acciperet, uires que auxerat Ioannes Vicecomes Mediolani Archiepiſcopus , qui magnam ſibi Italiæ partem adiecerat, mariq; bellum acerrimè gerebant Ianuenſes , & Veneti , & In-

nocentius VI. Pont. factus, Egidium Cardina-
lem cum exercitu in Italiam miserat, ita ut omnia mi-
nis, & cade ardere uiderentur & populo id ra-
tum habente Ioanni Archiepiscopo Urbem
Bononiam tradidere, centum millibus Florenorum
acceptis, quatuor oppidis sibi retentis, sancti scili-
cet Ioannis, sanctæ Agathæ, Creualcorij, &
Nonantulae.

Adopto Ciuitatis Dominio Ioannes Archiepisco- 1350
pus, exules omnes reuocauit cuiuscunq; factionis es-
sent, quare Beccatellorum multi, quibus id placuit, in
patriam sunt reuersi: & anno insequenti cum Ar-
chiepiscopus Innocentium VI. Pont. Max. ami-
cum habere cuperet, quatuor ex præstantioribus ci-
uibus, qui Auinionem peterent, ad summum Pont.
legatos delegit, fuerunt hi Dominus Riccardus de
Saliceto, Antonius de Gallucijs, Beccadinus Bec-
catellus & Minottus de Angelellis.

Vicarium Archiepiscopus in Ciuitate constituit suū
Dominum Ioannem de Valegio illi affinitate coniu-
ctum, qui arcem construxit, & ad tutelam Urbis fos-
sas, et mœnia muniuit cumq; in illum multi nobiles con-
spirassent, re patefacta XXIII. uno die securi 1354
percuti mandauit.

*I*nterim exercitus confœderatorum, quæ magna dice-
batur societas, agrum Bononiensium ingressus, omnia
ferro, & rapinis uastauit. erant autem fœderati
*V*eneti, *F*lorētini, *P*ataui, *V*eronenses, *M*antua
ni, & *F*errarienses, qui potentiam *I*oannis *A*rchi-
episcopi timentes, cum illi *I*anuenses se dedissent, fœ-
dus aduersus illum inierant: sed non multo post octo-
bris mense *I*o. *A*rchiepiscopus interijt, tribus reli-
ctis nepotibus, *B*arnaba, *G*aleatio, & *M*attheo, cui
*D*ominium obigit *B*ononia. sed anno insequenti *I*o.
*V*alegius, qui præerat urbi, ut diximus, auxilio plu-
rimorum, inter quos nostri quoq; adnumerantur, *D*o-
minium urbis adeptus est excluso *M*attheo, qui ei bel-
lum intulit: sed non multos post annos cum fortasse ui-
ribus suis *I*o. diffideret, *B*ononiam *E*gidio *C*ardi-
nali *L*egato tradidit pacto interposito ut illi *F*irmū
in *M*archia *A*nconitana à *L*egato *A*postolico
daretur, quod re ipsa præstitit, eoq; in loco *I*oannes
diem extremum obiit. I 366.

I 377 *P*aruit *E*cclésiæ deinceps *B*ononiæ *C*initas per ali-
quot annos, quo tempore è *G*allia *G*regorius *X*I.
*P*ont. *M*ax. in *I*taliā redijt: sed cum adhuc rerū
nouarum aliqui cupidi essent *D*. *B*artholomæo de *S*a-
*l*iceto i agente, *S*clachesium factio, & *M*altra-

uerſa, ut appellabant, in amicitiam rediere: ſingulos
enim domi D. Bartholomæus cōuenit, ita ut multos,
& Beccatelloſ præcipuè Pepuliſ amicos fecerit. pa
ceq; hac firmata, Legatus Apoſtolicus, qui urbi
præerat, eſt eiectus, noui q; ſunt Magiſtratus crea
ti. XII enim ciues qui Antianorum nomine urbi
præſſent, ſingulis bimeſtribus ſunt delecti: ex quibus
qui caput aliorum erat, Vexillifer iuſtitie appella
batur: fuit q; primus eo in ordine D. Tadeus Becca
tellus. facti q; ſunt etiam Tribuni plebis, quorum in
numero Lippus Beccatellus traditur.

Verum cum multis ſtatuſ is Reip. non placeret, ægre q;
ferrent ſe ab Eccleſia diſceſſiſſe, conſilium inierunt de
Ciuitate Pont. Max. reſtituenda: quod cum innotuiſ
ſet, multi nobiles, qui in id conſenſerant, capitali ſup
plicio ſunt affecti: quorum in numero Mattheus, &
Lippus Beccatelliſ uere.

Paucis deinde interiectis meſſibus, exercitu q; Pontifi
cio, qui è militibus Britanniſ maxime conſtabat, ad
urbem accedente cum Legato Pontificiſ Cardinali,
et Ioãne Acuto Anglo copiarũ Præfecto, nō nul
la oppida in eorũ poteſtatem uenere. At cū ciuiũ ſu
etio, quæ Eccleſiæ aduerſabatur, amicos Eccleſiæ in
urbe timeret, multos ex hiſ in exilium miſit, inter quos

quinq; ex gente nostra fuisse commemorant, ita sensim
labefactata domus pristinas vires & splendorem
amittebat.

Sed cum interim nobiles, qui in urbe remanserant, ita
Remp. administrarent, ut populo non satisfacerent,
plebs indignatione commota arma capescens, omnes
ferè ab urbe expulit, & quosdam carceri addixit, sta-
tumq; Reip. reformauit, quatuor Legatis ad summū
Pont. Romam missis, res omnes cōtrouersæ cum Ec-
clesia sedatæ sunt: receptaq; sunt oppida, quæ ab ex-
ercitu fuerant occupata.

I 378

Mortuo interea Romæ Gregorio Pont. Max. schis-
ma ortum est, cū duo creati fuerint Pōtiffices, *V*rba
nus scilicet VI. Romæ, & Clemens VII. Fundis:
quæ diuisio multos durauit annos, magno cum de trimē-
to Reip. Christianæ. Parebat *T*huscia, & *L*ombar-
dia Romano Pont. alteri uerò reliqua Italia: cumq;
*B*ononiensibus suos misisset Clemens Papa Lega-
tos magnis cum pollicitationibus, & præmijs, si suas
partes sequi uoluissent: Bononienses, qui *V*rbanum,
ut uerum Pont. agnoscebant, Clementis Legatos
non admiserunt. & cum è Repub. omnia administra-
rentur, missus est Ioannes Beccatellus, qui oppidis,
& agro omni *I*molensi præesset. Bellum deinde illa-

tum est *V*baldis, qui in *A*pennini iugo Bononien-
sum fines infestabāt. *A*ffuit ea in expeditione *V*e-
xillifer iustitiæ cum nōnullis copiarum præfectis, quo-
rum unus fuit *T*artarus *B*eccatellus. 1386

*L*atè tūc in Italia *I*o. *G*aleatius *V*icecomes *D*ux pri-
mus *M*ediolani dominabatur, *B*ononiamq; ditioni
suæ adiungere cupiebat: cui cum multi ex nobilibus fa-
uerent, consilio eorum detecto, nonnulli in carcerem
conecti, alij in exilium missi sunt: quidam uerò ultimo
supplicio affecti. *B*ello deinde subsecuto inter *V*ice-
comes, et *B*ononienses, *T*artarus *B*eccatellus, qui
in suspitionem Magistratibus uenerat obuerba quæ-
dam magnificè dicta in quinquennium apud *I*adrenses 1391
est relegatus.

*P*ace deinde cum *I*o. *G*aleatio facta *C*iuitas cum *B*oni-
facio *I*X. *P*ont. *M*ax. pacto conuenit, ut in singulos
annos census nomine sanctæ *E*cclesiæ *R*omanæ flo-
renorum quinque millia persolueret. Ita rebus compo-
sitis læti omnes utuebant, & eò maximè quod *P*onti-
fex priuilegia, & indulgentias benignè *C*iuitati fue-
rat elargitus.

*S*ed hæc *R*eip. quies diuturna non fuit: nam conspiran-
tibus pluribus ex nobilibus, adscitisq; exulibus *R*em-
pub. oppressere, & libros publicos combusserunt.

Itaq; Carolus Zambicarius, qui tunc auctoritate
ceteris præstabat, Bononiæ Dominus factus est,
qui statim ab exilio plurimos reuocauit, in primis que
D. Bartholomæum de Saliceto, qui Ferrariæ ius ci-
uile publicè docebat.

Sed anno insequenti, qui pestilens maximè fuit, cum po-
puli albis uestibus induti, supplicationibus publicè de-
cretis ad alios accederent, ueniam à Deo Optimo de-
lictorum poscentes, Carolus mortem obiit. Ciuitasq;
libertatem nacla, exules, quos Carolus fecerat, reuo-
cauit: formamq; Reip. denuo renouare tentauit: sed
fatis nescio quibus exagitata, id assequi non potuit.

Vivebat tunc Io. Galeatius Vicecomes Dux Medio-
lani, formidabilis principibus omnibus, in Italia præ-
sertim, et eò maxime, quòd Rubertum Imperatorem,
qui in Italiam à Florentinis accersitus aduersus illū
cum exercitu uenerat, ad lacum Benacum fuderat.
ratusq; se posse Florentinos facile in potestatem re-
digere, in eos castra mouit: statimq; Bononienses est
aggressus, qui cum Florentinis sentiebant. Erat tunc
in urbe Bononia Io. Bentiuolus potens, & ciuium se-
rè princeps, qui auxilijs Florentinorum nixus cum co-
pijs Galeatij, quarum Dux erat Albericus Cunij
Comes, cōgredi propè Bononiam est ausus, sed præ-

lio uictus in urbem se recepit, in quam & hostes unâ
sunt ingressi, biduoq; urbe potiti; Ioannes, qui latita-
bat, in forum est perductus, ubi seditione populari uul-
neribus confossus occubuit. sicq; in potestatem Ioan-
nis Galeatii Ciuitas deuenit. Qui eodem anno mor-
tuus est relictis filiis, à dominio quorum Ciuitas se
exemit, et Balthassari Cossæ Cardinali Legato tra-
didit: qui arcem propè Galeriæ portam renouari ius-
sit, nobilesq; quosdam, quorum potentiam suspectam
habebat, exilio mulctauit.

Cōcilium interim, ut schisma tolleretur, Pisis à Cardi-
nalibus est conuocatum, in quo Alexander V. re-
nunciatus est Pontifex, cum alij duo tunc etiā super-
essent Pontifices, Gregorius scilicet XII. in Italia,
& Benedictus in Gallia. Qui Pont. Alexander
anno insequenti Bononiam uenit, maximo à Ciuitate
exceptus concursu: sed non multo post mortuus ope-
ra, ut creditur, Balthassaris Cossæ Apuli Car-
dinalis, qui Bononiæ ab alijs Cardinalibus, qui cum
Alexandro erant, factus est Pontifex, dictus-
que Ioannes XXIII. & anno insequenti in-
de decedēs ut Romam peteret, Legatum urbi præ-
fecit, quem Ciuitas populari commota seditione cie-
cit. Quod diu nobiles non ferentes, iterum sponte sub-

1413

ditionem Ecclesiæ uenere. Nec multo post Ioannes Pontifex Bononiam redijt, cum ad Concilium Constantiense proficisceretur: ubi deniq; cum alijs duobus qui tunc uiuebant Pontificibus, dignitate Pontificia est priuatus: creaturq; Pont. Max. summo totius Concilij consensu Martinus V. Columna.

1417

Cum interim Ciuitas Bononiæ ab Ecclesia descisisset, arcemq; illam iam multoties instauratam euertisset: potentes in urbe tum præualebant Bentiuoli, & Caneduli, urbsq; libertatis speciem præferebat, & Magistratus creabat, qui Reip. præessent: in quibus nostrorum nulla fit mentio, nisi quod quatuoruiros, qui luxu, & pompis præessent, creatos commemorat, quorum unum Philippum Beccatellum tradunt.

Sed in Italiam cum redisset Martinus Pont. Mantuaq; substitisset, et exercitum cogeret, ut Bononiam obsideret, illa quibusdam apposis conditionibus, in potestatem Ecclesiæ uenit:

1428 At non multis interiectis annis, cum Caneduli principatum in Ciuitate appeterent, Antonio Bentiuolo expulso, Legatum Pontificis eiecerunt: quo nouum bellum est exortum, cum ad urbem obsidendam exercitus Pontificis cum Antonio Bentiuolo accessisset, re tamen frustra pluries tentata. Sed uita functo

1432

Martino Pont. in eius q̄ locum subrogato Eugenio V. pax Bononiensibus data est, qui sub potestate Ecclesiæ redierunt, missi q̄ publicè Romam ad summum Pont. Legati IX. quorum unus fuit Beccatellus de Beccatellis. Hæc aliquantò prolixius quam proposueram recensui, ut in crebris mutationibus patriæ nostræ, quas paulo ante commemoravi, modicam, aut nullam nostrorum mentionem fieri animaduert^{tur}erem, cum illi superioribus cladibus, ut puto, debilitati, recentioribus in turbis quiescerent.

Canedulorum factio, quæ Ecclesiæ Dominium agrè ferebat, urbem sub potestate Philippi Mariæ Ducis Mediolani redegit: cuius exercitus copias Ecclesiæ, & Venetorum ad Imolam fudit. sed non multo post Mediolani Dux pace cum Eugenio Pont. facta, urbem illi Bononiam restituit, à qua Caneduli recessere, & Eugenius in illam suum misit Præfectum, ^{I 435} qui arcem disiectam denuò construi mandauit, & nobiles quosdam neci dedit, quod uniuersam conturbauit Ciuitatem.

Anno insequenti Eugenius Pontifex Bononiam uenit, cum Ferrariam Concilij causa peteret: sed postea Concilio Florentiam translato, factionum quorundam potentia Ciuitas ab Ecclesiâ discessit, iterumq̄

in potestatem Ducis Mediolani uenit, qui suū ad illā
misit Praefectum Nicolaum Piccininum : cuius filius
Franciscus Annibalem Bentiuolum, & altos nobi-
les captos in oppidis quibusdam agri Parmensis car-
ceri tradidit. Sed Annibale amicorum ope clam li-
berato, ciuitas à Vicecomite defecit, nouaq; liberta-
tis forma introducta arcem est demolita.

1443

Erant Bentiuoli, & Caneduli amicitia, & affinitate
coniuncti : sed cum utriq; principatum appeterent,
per insidias Caneduli interfecere Annibalem Ben-
tiuolum, quem amici statim ultisunt, Caneduliq; in exi-

1445

lium missi. Et inde Bentiuolorum domus uiribus au-
cta, principatum facile in urbe obtinuit, ita ut Ioan-
nes Annibalis filius in ea ueluti Dominus multos

1506

perseuerauerit annos, donec Iulius II. Pōt. Max.
ascito Gallorum exercitu, qui Mediolanum Duce ca-
pto obtinebant, illum ui expulit: à quo tēpore ferē sem-
per Ciuitas Bononiæ Ecclesiæ paruit, & gētiles no-
stri, qui superfuerant, in pace longum quieuerē tēpus:
nec Remp. attigerunt, nisi quatenus eis more aliorū
Ciuium aliqui Magistratus traditi sunt. sed rem suā
priuatam procurantes in otio honesto, quæ laude di-
gna uisa sunt, non intermisere. aliqui enim uarijs li-
terarum studijs se applicuere: alij foris magis quā in

domi militiæ operam nauarunt, ut Ludouicus auus, et Carolus pater meus: qui cum ab adolescentia Regis Gallorum stipendia meruisset, & cum Lautreco eius exercitus Imperatore esset, quo tempore Neapolim infelicissime obsedit, mari in Galliam reuertens à piratis captus, Tunetum productus est: ubi in Muleass Regis potestate per XVI. menses fuit, donec ab avarissimo Rege multa uel pecuniæ se redemit. Qua in captiuitate, ut ab illo sæpe audiui, multum uobis Beccatellis Siculis, & præcipue Colæ Panhormij secreto debere se dixit, cum illi in omnium rerum inopia apud Barbaros constituto non defuisset. No uistis etiam, ut arbitror, Paulum Beccatellum, qui apud uos in Sicilia superioribus annis fuit, cum Illustriss. Ferdinandus Gonzaga Regno illi pro Regis nomine præfesset: qui adeo Paulum obsidem, et eius in re bellica uirtutem amauit, ut illum ueteranorum militum cohorti præficeret in bello, quod in Africa gessit: ubi Paulus se maiori etiam honore dignum ostendit, quo certè illum Ferdinandus ornasset, nisi immatura morte præuentus diem obiisset extremum. Non defuerunt etiam ex nostris, nec desunt adhuc, qui religioni, & pietati Christianæ dediti, sacris literis operam dantes, uitam sanctissime in monasterijs degant,

E

aterno potius Regi famulari, quàm terrenis principibus eligentes. Fuere & alij, qui dignitates Ecclesiasticas in patria sint sequuti: & qui etiam in curia Romana cum laude uixerint. nam patrum memoria sub Alexandro VI. & Iulio II. Pontificibus Max. Casar Beccatellus Federico Sansuerinnatt Cardinali Illustriss. à secretis, & familiaris charissimus, ingenij præstantia & uirtute nedum patro no, & uniuersæ Romanæ Curia acceptus, sed apud Principes Italiae omnes gratiosus fuit, magnoq; semper habitus in honore. Et nostra ætate Ludouicus patruus meus, qui à Paulo III. Pont. Max. Episcopali dignitate ornatus, à Iulio III. postmodum Legatus ad Remp. Venetam missus est: quo in munere quartum iam agit annum, & ni fallor, nō sine laude & gentis, & patriæ nostræ. Sed quando Beccatellorum historiam, & originem qua potui breuitate, sum complexus, non ab re mihi facere uidebor, si aliqua etiam de insignibus eiusdem gentis, quibus omnes utimur, ut à doctis uiris quandoq; audiui, breuiter attingam.

Memoriæ proditum est apud ueteres in usu fuisse, ut qui aliqua laude præstabāt, pro ingenij cuiusq; captu scuto quo in bellis utebātur, symbolum affigerent, quo ab

alijs dignoscerentur: hincq; factum est, ut ad posteros
cuiusq; gentis insignia deuenerint, uaria, & diuersa,
ut eorum fuerunt authores. Nostri alam Aquilæ
auream cruri, & pedi innixam in campo cœruleo ge-
stârunt: cuius rei duplex tradita est significatio.

Putant nonnulli hoc symbolo id contineri, quod alijs
alibi sæpe in prouerbio usurpatum est, Tarde scilicet
festinandum: hoc est omnia maturè agendum, cū alam
celeritatem, pedem uerò moram, & lentitudinem in-
nuere sit manifestum. alij uerò significationem aliam
afferunt, cum dicant hoc emblemate illud ostendi, No-
bis scilicet à terrenis ad cœlestia mentem leuandam,
cum pedem terra ingredi, alam uerò cœlum uersus tē-
dere solitam uideamus. Vtrum hoc sit, an illud, uel
tertium quoddam author intenderit: sanè constat insi-
gnia hæc gentis nostræ semper fuisse, quod & adhuc
columnæ marmoreæ sepulchra uetusta in urbe Bono-
niæ præse ferunt.

Hæc in summa qualiacunq; sint de gente nostrâ tibi Re-
uerendiſſ. Pater exposui, dum Patruï magis monita,
quàm meas uires considero. Potuiſſem multa addere,
& familias plurimas in patria nostrâ nobilitate,
& rebus gestis insignes adnumerare: at non Bono-
niæ històriam, sed gentis nostræ casus tantùm attin-

gere uolui. Sunt illa ab alijs scriptoribus illustrata, e-
quorum libris facile perdisci possunt.

S uperesset nunc, si Beccatellorum ornamenta, & soli-
das laudes complecti possem, gentis uestrae, quae Pa-
nholmij residet, & uirorum praestantia, & diuitijs,
& dignitatibus ornata refulget, historiam ut adnecte-
rem. sed maiori illa uolumine, & stylo grauiore indi-
gent: non enim exigua, aut leuia sunt, quae ducentis iam
transactis annis, Siciliae in Regno gens uestra gessit,
quae nedum familiae, sed patriae etiam, à cuius nomine
nunc cognominatur, splendorem affert eximium.

Fuere in ea, et sunt hodie Regni eius dignitates prae-
cipuae, adeoque ampla, & gratiosa est, ut ferè nemo in
Sicilia sit illustri sanguine natus, qui illi non sit affini-
tate coniunctus. Protulit haec semper omni in genere
laudum egregios uiros, ut Simonem olim Archiepi-
scopum Panhormitanum, & Bernardinum Messa-
nae Archiepiscopum, & alios innumeros Ecclesia-
sticis dignitatibus ornatos. Omitto Consiliarios Re-
gios, & praestantem fratrem tuum Ioannem Iaco-
bum, Regni Siciliae Regentem penès Carolum V.
Imperatorem semper Augustum, qui illum charissi-
mum habuit: & tuam hic tacebo uirtutem, cuius splen-
dore domus nostra illustrata refulget, nedum Siciliae

¶ Italiae omni, sed Hispanijs etiam, libet q̄ sperare
maiora, modo supersit uita. Sed hæc, ut dixi, meis sunt
imparia uiribus, uobis altero opus erit Antonio, et
fortasse non deerit, qui ut meriti estis uos, et maiores
uestros laudibus exornet dignis. Mihi sat erit dum
Patruo obtempero meo, si hæc tibi non ingrata fuisse
intellexero, propinquorumq̄ nostrorum, qui & Pa
nhormij, & Neapoli degunt, amorem excitauero, ut
patriæ antiquæ non obliuiscantur, nosq̄ ut ex eadem
radice ortos, licet felicius plantæ uestre creuerint,
charos semper habeant, & ament. quod nos ut bo
nos decet agnatos erga uos omnes facere non inter
mittemus. Vale sacrorum Antistitum, & domus
Beccatellæ decus egregium, & scriptis Antonij
nostri, quæ nunc edimus, fruere.

Bononiæ Calendis Octobris M D LIII.

Handwritten text in a cursive script, likely a letter or document. The text is written in dark ink on aged, slightly stained paper. The handwriting is dense and fills most of the page. There is a significant tear or fold on the left side of the page, partially obscuring the text. The text appears to be in a historical or literary context, possibly a letter of introduction or a personal correspondence. The ink is somewhat faded in places, and the paper shows signs of wear and discoloration.

THE UNIVERSITY OF CHICAGO

LIBRARY

1184

CHICAGO, ILL.

1911

THE UNIVERSITY OF CHICAGO

LIBRARY

1184

CHICAGO, ILL.

1911

THE UNIVERSITY OF CHICAGO


LIBRARY

1184

CHICAGO, ILL.

1911

THE UNIVERSITY OF CHICAGO



ANTONII BECCATELLI
SICVLI COGNOMENTO PANHORMI
TAE EPISTOLARVM GALLICARVM
LIBER PRIMVS.

*Antonius Panhormita Francisco Arcellio
sororio suo S. P. D.*



X HIS literis, quas olim iuue-
nis conscripsi in Gallia Cisalpina
sub optimo omniũ Principe Phi-
lippo Maria, paucas admodum,
quæ penès me remanserunt, vel
postea in manus peruenerunt in
vnum coniectas tibi mitto Fran-
ciscæ Arcelli decus adolescentiæ. Non quòd existimẽ
te qui Ciceronis epistolas legẽdo conteras, à meis elo-
quẽtiam desideraturum, sed quòd magnã te volupta-
tem percepturum credam, cum ex earum lectione
iuuentæ meæ historiam colliges, atq; deprehendes.
Quales enim Principes, quales amicos, quales mo-
res, qualia deniq; literarum studia in ea ætate colue-
rim, facile inspicies: quo facilius possis dignoscere, cui
Lauram sororem tuam, forma, genere, agnatione, &
in primis morum sanctimonia insignem nuptui collo-
caueris. Nam cum sim ego in tua ista inclÿta ciuitate

Neapolitana peregrinus, non potui tibi vitæ meæ promptiores testes proferre, quàm epistolæ meas: in quibus non tantum ingenii vim, aut doctrinæ lumen, si quod modò inest, sed animi, ac probitatis specimen intueri licet. Præclarè Socrates, Mētis effigies extat oratio. Posito itaq; aliquantisper Cicerone familiares interim meas vise, & quod accidit lectione graui, & seria fastiditis nugæ lege, & si tibi quoq; videbitur Ioanni Pontano Poëtæ, & viro suauissimò legendas imparti. Vale,

*Philippo Mariæ Inclÿto Mediolanensium Duci
Antonius Panhor. S. P. D.*



Si maiores mei omnes Illustrissime Princeps erga diuum tuum genitorem, nec minus in te semper, atq; vehementissime fuerint incensi, & qui supersunt quasi hæreditaria quadā beneuolentia omnes te vnicè prosequantur: ego non solum patrio, & auito amore, sed etiam tuarum diuinarum virtutum admiratione te iam pridem vnicè, ac religiosissimè colo. Nam siue quotidiana exempla clementiæ tuæ audiam, siue humanitatem, atq; pietatem, siue excelsi, atq; inuictissimi animi fortitudinem, grauitatem, iustitiam, non possum erga te non inflammar etiam supra modum. Sæpe vel maximè cogitavi quanta animi prudentia, sapientiâq; polleres cum in cæteris rebus, tum rei militaris potissimum disci-

plina, vt de te rectè dici posse iudicauerim, quod de Romanis viris illis illustribus veteri prouerbio dicebatur, Romanus sedendo vincit. His atque aliis Princeps dignissime ornamentis adlectus, iam dudum ad te ire constitui, vt si quid ingenio, doctrina, aut industria valerem, id tuo iure quodammodo vti posses: quasi re quadam tibi debita pro diui tui parentis in meos immortalibus beneficiis. ego autem, vt de me aliquid à me ipso intelligas, vsq; huc sacra poësi atq; humanitatis studiis meam omnem operam nauaui: in quibus si quid euasisse me fortasse senseris, id quantum est, tuæ laudi, tuæq; gloriæ oblatum, atq; dedicatum esse scias: idq; à me munusculum, quod tanti est, quanti tu feceris, suscipias, foueasq; te oro, atq; obsecro. Summæ quidam auctoritatis uir semel interrogatus, quid nautis opus esset, respōdit ventis; rursum quid colonis opus esset, respondit pluuia, tertio quid Principibus, respondit, poëtis. Et recte mea quidem sententia, nam vt nautas, & colonos omittam, quo per immortalem Deum Princeps indigere potest, nisi immortalitate, quam non pecunia, non potentia, non deniq; virtute ipsa comparare quis potest, absq; poëtarum auxilio? Quot putas extitisse viros domi, militiaeq; præstantissimos, quorū quia doctis scriptoribus calsi fuerint, nulla extat apud homines laus, neq; memoria? Cōtrā quot existimas, non dico summos, sed ne mediocres quidē viros extitisse: quos ta-

men immortalī laude perspicuos poëta reddiderūt,
 & exempla quādam fortitudinis reliquerunt apud
 posteros. Poëta primum ex hominibus Deos intro-
 duxisse proditum est. Magnam me herculè, & admi-
 rabilem poëtarum vim, siquidem homines humo fa-
 ctos, modò velint, cœlo penè dixerim donant, tum po-
 steros illustant, & exemplo maiorum incendunt ad
 immortalitatem, & vt mortui etiam prosint, efficiunt.
 Et sanè vtī aqua, atq; igni necessariò indigemus in vi-
 ta, ita post demigrationem virtuti omnino pernecessa-
 ria sunt monumenta literarum, alioqui quod diffi-
 cile dictū est, virtus interit. Hæc ego Princeps huma-
 nissime non idè ad te scribo, vt velim, aut possim tibi
 persuadere me vnum esse, qui egregia tua, & quidem
 vtriusq; fortunæ facinora pro dignitate queam per-
 petuitati commendare: non adè quidem insolens,
 aut mei amans sum, sed vt intelligeres, me vnum esse,
 qui tuæ laudis, ac gloriæ percupidus existerem: quiq;
 si quid in me virtutis esse iudicaueris, id, vt dixi, tibi
 vni offero, tibi vni deuoueo, tibi vni trado. Mihi verò
 pro felicitate maximè erit, si quando tuam gratiam
 iniuisse me sensero, & dēnumerari vel inter pēdisse:
 quos celsitudinis tuæ: magna quidem coniectura pro-
 bitatis est, & laus non vltima, Principi, summo q; viro
 collibuisse. Vale decus Principum.

*Philippus Maria Anglus Dux Mediolani, Pa-
pia, Angleriaeq; Comes, Antonio Panhor-
mita Siculo pro excellentia sua Poëta
non minus admirando, quàm in-
signi. Salutem.*

R Eddita nobis epistola, quam ex te nuper ha-
buimus, eo verborum ornatu, eaq; suauita-
te, & poëtica grauitate præualuit, vt animū
nostrum aliis, & non leuibus quidem laborantem cu-
ris, sicut Principibus interdum accidit dulcedine mul-
ta repleuerit, & antiqui amoris vires, quem tu in no-
stram profapiam, & in tuam olim nostra gesserit; su-
scitauerit. Non est Antoni nobis ea virtutum copia,
quibus maiores nostri claruerunt: verum etsi in eo
longè dispares sumus, non abest animus, non intentio
eos ipsos, & aliorum vestigia quo melius poterimus
imitari. Patriam ipsi tuam quantacunque est, sed am-
plius qui tibi coniuncti essent continua beneuolentia
prosequuti fuerunt, itidem ergo à nobis agendum es-
se censemus, eaq; firma, & immutabilis dispositio est
nobis. Sed cum ipsi, quibus amplior erat auctoritas,
& potestas, progenitores tuos in seruitores haberent:
nos maioribus nostris inferiores te ipsum in filium ha-
bere disponimus: nec sanè immeritò, cum & tu non
modò tuos, sed insuper alios huius ætatis nostra vi-
ros tua virtute dicaris excellere: quæ dignissimè fa-

cit, vt & aliis in dilectione nostra præponendus sis. Multas nobis laudes attribuis, quæ nec ex meritis nostræ dictæ sunt, nec rebus à nobis gestis certè conueniunt: vtinamq; virtutes nostræ tantis laudibus pares essent, sed teipsum admonet quam in nos habes adfectio. Est enim à natura traditum, vt quos diligamus præstantiores, & clariores iudicemus. Solèt præterea tam poëta, quàm cæteri quos diligunt, & in amicos habent, laudibus illos extollere, quibus eos refulgere desiderant: perlibuit tamen omnes epistolæ partes audire, & quicquid ex te prodierit vsq; qua libenter audituri sumus, ipsumq; omnipotentem & immortalem Deum oratum facimus, vt gesta nostra præteriti, & futuri temporis pro sua clementia tanti faciat, vt à musis tuis extolli, atq; illustrari mereantur. Magno autem desiderio visuri te sumus, viuamq; vocem audituri: ex qua tantus affluit ornatus, tanta verborum grauitas, tanta suauitas, breuiq; futurum esse confidimus, vt deturabilitas, hoc desiderium nostrum implèdi, & alter alterius possit gaudere præsentia. Vale.

*Philippo Mariæ inclÿto Mediolanensium Duci
Antonius Panhor. S. P. D.*



Atebor ingenuè præsertim apud te Princeps serenissime, cui non minus animi simplicitatem, sinceritatemq; debeo, quàm reliqua si qua sunt in me officia: cum legissem nuper epi-

stolam tuam ad me suauissimam quidem illam, & ex tua vena, tuaq; humanitate verè proficiscentem, non potuisse contineri, quin lætitia quadam gestiente diffunderer, & quasi triumphare mihi visus sim, quanq̃ id molle, atq; indecorū est, nec certè secus quàm dolore quempiam premi, cōtrahiq; : ego tamen is sum, qui cum lego, atque audio tuam erga me, maioresq; meos gratiam pergere, non possum non gaudere super modum, & præ lætitia non medius ferè dirumpi, clament in me licet philosophi, vitæq; duces, ac magistri. Ego à summo viro dilectus non gaudeam? à seuerō, & iusto iudice laudatus non exultem? à sapientissimo Principe probatus non glorier? sanè qui Principi huiusmodi placuerit, is & à reliquis commendatissimus sit oportebit, quasi iam periculū fecerit & virtutis, & ingenii simul. Fecisti præterea Philippe Princeps, vt quemadmodum equi fortes audita tuba, ac classico ad prælium incendi consueuere, sic ego visa hac charitate tua toto quidem spiritu concitarer ad laudem, & amplitudinem nominis tui, & si qua vis ingenii mihi sit, est sanè tenuis, eam tamen mirum in modum excitaueris, adauxerisq; : Qua ex re nō ego quidem, cum dignè neutiq; possem, sed illustrium virorum animæ, quorum iudicia mori nō sinis, gratias tibi & habebunt, & persoluent. Scipio in primis ille superior qui quantopere in Ennium flagrat hinc facile deprehēdimus, quòd sepulchro eodem cū poëta

contumulari voluerit. Diuus item Augustus quis ne
 sciat qua beneuolentiâ, & beneficentiâ Virgilium, Ho-
 ratium, Varrum fuerit amplexus? sed vt omittam cæ-
 teros, quis non laudet, & admiretur ob id saltem Ne-
 ronem ipsum, qui cum alioqui crudelis extiterit, & im-
 manis, solum in poëtas facilis, & benignus inuētus est,
 & quidem vsq; aded, vt statim edito poëmate Eximiū
 quendam adoptasse traditum sit. ego verò Princeps
 humanissime etsi certus sum nequaquam posse tuas,
 aut diuorum patrum res gestas pro dignitate literis
 intexere, attentabo tamen ea ex parte tibi qualem po-
 tero gratiam referre. Nam si quidem tuis rebus, ac
 gloriæ par ingenium expectas, vereor ne præstantia
 virtutis, ac probitatis tuæ tibi nocumento futura sit,
 hoc est neminem vsquam comperias, & interim vir-
 tus vt fit obliteretur tua. Quare meo quidem iudicio,
 principium fecisse præstabit, idq; cordi est, quando &
 id tibi gratum fore intellexi. Vale, & triumpha.

*Philippo Mariæ inclyto Mediolanensium Duci
 Antonius Panhor. S. P. D.*



Vm multa, ac varia quotidie tui grauissi-
 mi, & propè singularis iudicii argumenta
 extent sapientissime Princeps, siue in præfi-
 ciendis rei bellicæ ductoribus, siue in designandis, cre-
 andisq; magistratibus, soleo ego cum pleraq; omnia,
 tum hoc quod in Lanzaloto nuper edidisti cælo te-

nus

nus efferre: cum scilicet cum in amplissimo patrū con-
scriptorum ordine collocasti, qui summum obiret, ac
regeret magistratum. rectè quidem, & summa cum
prudentissimorum hominum commendatione, atq;
laetitia. nam & tu viri huius industriam, ac fidem mul-
tifariè exploratam habes, & illud iuxta tecum omnes
intelligūt, eius neq; vita quicquam probabilius, & san-
ctius, neq; iustitia rectius, & innocentius, neq; auctori-
tate clarius, & amabilius inueniri posse. Qua ex re
ego quidem non adeò illi, quàm dignitati gratulor,
quæ à Lanzalotto plus vtiq; ornamenti acceptura,
q̃ datura est. Honoris enim ipse, nec gloriæ est cupi-
dus, sed dum Ticinensem magnam illam, atq; inclytā
arcem vigilantissimè custodiret, & à tuis aliquādo re-
bus vacans optime Principum, philosophis, ac sacris
litteris operam impartiretur, ad huius officii magnitu-
dinem euocasti, rei quidem inscium, ac recusantem.
Præcipua tua quidem Philippe laus, qui non inhianti-
bus dignitati, non ambientibus, sed benemeritis illam
confers. In hoc quoq; Romanorum prudentiam imi-
tatus, qui Scipionem, quoniam consularum petierat
nunq̃, bis Cōsulē effecere. & profectò qui honores, &
magistratus appetūt, facile ostēdūt eo ipso quod appe-
tūt, esse indignos. Verū Lanzalotto id p te quoq; acci-
dit, qđ ante M. Catoni cōtigisse traditur: q̃ quò minus
gloriā petebat, eò magis illā adsequebatur. Quā rē
nō modò sapiētis, sed & grauissimi, ac beneficētissimi

animi documenta exhibuisti, quippe qui hominē iam
 pridem tuis seruitiis omnino deuotum, cuius fidem,
 integritatem, perseverantiam, stabilitatem, constan-
 tiam, & deniq; cuius animi sanè inuicti magnitudinem
 iam mille laboribus, iam mille terra, mariq; discrimi-
 nibus periclitatam, probatamq; habes, amplissimis tā-
 dem honoribus affecisti: haudquaquam passus hominis di-
 uinam virtutem, & in te vix credibilem obseruatiam,
 & affectionem indonatum relinqui. Quo facto mirifi-
 cè quidem, & cæterorum animos ad virtutem, ac pro-
 bitatem incendiisti, & amorem tui, cum cognoscerent
 virtutem à te tantopere exornari, & decorari solere,
 & benefacta non perditum iri. Consuluiſti præterea
 maximè populis, ac ciuitatibus tuis, videlicet illis præ-
 ficiens hominem, sanè omnium, pace omnium dixe-
 rim, quos tua hæc Gallia, & reliqua fermè omnis Ita-
 lia nutrit, æquitate, atq; animi moderatione præstan-
 tiſſimum, aptiſſimumq; ad regendos, & gubernandos
 homines, & magistratus: is enim profecto est, qui quā-
 tum omni diligentia, & industria proficere poterit, id
 omne in conseruandas tuorum ciuium vtilitates adhi-
 biturus sit, ac in tuæ omnis rei publicum decus, & di-
 gnitatem augēdam, oblitus scilicet, ac prorsus imme-
 mor cōmodorum suorum. Videre equidem videor
 Lanzaſtōtū ita administrantem, vt suum cuiq; tenere
 liceat, & pacificè, & liberè possidere, neq; tenuioribus
 imbecillitatem, neq; locupletibus inuidiam obfuturā.

Continentiam verò, & abstinentiam Lanzalotti quis non tota, vt aiunt, beneuolentia cōplectatur: huius maximè vt ego arbitror officiis, nec non iustitiæ fama, is in omnium animos tanq̃ influere videtur, atq; ita homines inescare, vt nemo adhuc quem sciam inuentus sit, qui hunc ipsum vel paulisper oderit, imò qui hunc ipsum non prolixè diligat, & obseruet. Iam verò illud & in hoc viro fore vaticinor, quod Crasso olim haud mediocri laudi tribuebatur, vt ne ipsi quidem iudicio ab eo damnati, atq; mulctati ipsum sint odio habituri: sed laudaturi, & benignè laturi, seipsos potius iuculantes qui deliquerint, quàm eum qui in delinquentes iure animaduenerit. Solet enim aliquod esse perituris solatium, si non iniuria corrupto, prauoq; iudicio sese punitos intelligunt. Sed redeo ad abstinentiam, quæ vt magistratus, Remq; publicam gubernantibus præcipua, & pernecessaria est, sic in Lanzalotto inesse, atq; illucere eam quidem insigniter gaudeo, eoq; plurimum, quia & semper, & in hac maximè tempestate perquàm difficulter inuenias, qui non capiatur admiratione diuitiarum, nec donis, aut muneribus corrumpatur, vsq; adeò prostituta quæstuarialia, & deprauata sunt omnia. Cæterum vnus hic vir tantum meo quidem animo abest à sordibus, quântum reliqui ferè omnes à puritate. Itaq; nō immeritò eū magni æstimas, diligisq; atq; adeò ad te ipsum applicas, & propius admoues. Præclare Plato cum vitæ, ac statui Principi-

pum studiosè prospiceret, nullū diiudicauit aut vberius, aut præstantius prædiorum genus esse Principibus, quàm eorum familiaritates hominum, qui cauponari nescirent. Nam quid vnq̃ turpius, aut detestabilius esse potest, quàm cū ñ præsertim qui Reipub. & magistratibus præsunt, iusti, æqui, seueri, tristes, integri, puri, sancti, immutabiles esse debeant, reperiantur iudicia licitari, atq; omnia quæstui habere? aut qd rursus instabilius, & incertius ea ciuitate, in qua hæc tã dira, & execrabilis pestis irrepsit? Apollo Pythius vt Tullius tradit, hoc olim Lacedæmoniis prædixit, Spartam eorū amplissimam ciuitatem nihil ob aliud quàm propter avaritiam perituram. Sed de hoc satis. Attingēda est etiam māsuetudo, & humanitas Lã zalotti, quæ eiusmodi est, vt nulla licet secundissima, & affluentissima fortuna immutari queat: sed quantò sublimius illum euexeris, tantò se geret submissius: idem vultus, eadem frons semper in hoc viro, & admirabilis quædã æqualitas in omni fortuna. eius quoq; placabilitatem, & clementiam quis pro dignitate vnquã recēseat? quis satis laudet? Tu autem Philippe Princeps, qui hoc genere laudis maximè inter præstantissimos viros emines, & excellis, tum quidem vehementer oblectaberis, cum in alio te ipsum recognoscas, id est cum eum gladium quem necis, ac vitæ Lã zalotto commendaueris inspicias, non cruore pollutum, non vindicta saturatum, non strictum ad necem:

sed ad emendandum errantes, ad comminandum cō-
 tumacibus, ad cohibendum renitentes. Vitia quidem
 infectatur, & delicta, non homines, nisi interdum pro
 causa seueritas adhibenda fuerit, & habenda iustitiæ
 ratio, & Reipub. potius q̃ facilitatis, & misericordiae.
 Nam qui prius illum monētem, hortantem, placidū,
 lenem viderunt, nisi obtemperauerint, nisi pœniten-
 tiam egerint, seq̃; correxerint, eundem postea rigi-
 dum, durum, inexorabilem sentiant oportebit. nulla
 adulatoribus fides adhibetur, nulla auris maledicis
 præstatur. hæc, atq; alia in hoc viro ornamenta mirifi-
 cè effulgent, veluti prudentia, sermonis suauitas, & di-
 ligentia: quæ, ne te lōgè maioribus, atq; vtilioribus cu-
 ris districum vltius morer, de industria præteribo.
 nam & tu Diis adiuuantibus aliquando eris otiosior,
 & ego ad huius spectatissimi viri laudes rescribendas
 paratior. Vale, & triumphā.

Ant. Panhor. Bartholomeo Guasco S. P. D.



EX particula quadā literarum Mercurii Rā-
 ci uiri humanissimi ad Catonē iurifconf. in-
 tellexi, te rethoricam Cherii profiteri: qua
 de renō tibi admodum quidem, sed auditoribus tuis,
 quippe qui eruditissimum, atq; eloquentissimū præ-
 ceptorem sortiti sunt, immortaliter sum gratulatus:
 mihi etiam qui virum amicissimum, & me ferè alterū
 iādudū penè deperditū repererim. Haud facile quidē

scripserim quanta animi lætitia sim affectus, ut si par altera super accesserit, mirum quin immortalis fiam. Argento enim inuento fuerunt qui præ gaudio gestiētes vitam efflarint. Quid putas me facturum amico, quem vel præ me ipso diligam, reperto? Is profectò sum, qui semper amicitiam tuam præsertim omnibus rebus anteposuerim, nec quicquam iucundius, neq; felicius in vita mihi contigisse iudicauerim. Ceterum quæres, aut fortè etiam admiraberis quid ego hoc loci negotii agam: quæ spes sit, quæ fortuna, paucis expediam. Cum Pontificem Mediolanensem Ianuæ visitassem, est enim ut nosti non vulgari mecum beneuolentia coniunctus, eius persuasionibus factum est, uti Papiam potius studiorum causa diuerterem, ubi gentium moram producturus sum, quoad quicquam vel Deorum, vel amicorum aliò me euocauerit. spes nonnulla interim mihi sublanditur, quāquam ut stultorum, sic & avarorum plena sunt omnia: fortuna verò illa eadem perstat, aut verius non usq; adeò tenuis, & aduersa. Tu cōtra, quæ mens, quæ fors, quæ spes, quis status te detineat, me condoce, quo tecum vnà vel distrahi lætitia possim, vel contrahi mœrore. Plura quidem enarranda sunt, sed his breuib; satis sit factum initio literarum nostrarum. Vale, & Mercurio scholasticorum Rectori ex me plurimam salutem dices. Papia.

Antonius Panhor. Nardosuo S. P. D.



I fores accepturus à Petro meo & fortunā,
& valetudinem meam viuis affatibus, signi-
ficassem tibi id ipsum hodierno die, & quidē
prolixiore epistola: sed ab eo longē suauius, si quidem
ex voce, fronte, supercilio fortunam sanē amplissimā
deprehendes, atq; concipies, modò non angatur ab-
sentia mea. Huic maximo Mediolanensium Principi
Philippo pergratus, atq; in primis iucundus effectus
sum: me quidem oblectatur, me subgloriatur, me de-
niq; meoq; ingenio suauissimè fruitur. Salarium mihi
decreuit pro tempore satis grande, aureos videlicet
octingentos annuos: verum ego non auro, sed gratiæ
ipsius solum inhio, quam iam iam adsequutus Disgra-
tia mihi videor, nec illius modò, sed Meccænatis, ac
primorum Procerum, eorundemq; illustrium viro-
rum: verum hac ab Augusta meo plenius. Tu siquid
me tua gratia moliri posse arbitrare, iubeto: nulla
quidem fortuna, quæ quidem sit lautissima ab nostra
vetere amicitia minimum mutari potero: amor e-
nim quem virtus conciliat, perennis est. Vale cum
coniuge dulcissima, ac singularis exempli fœmina.
Papix.

Ant. Panhor. Antonio Cremonæ. S. P. D.

SI uales gaudeo. Suades ut vel singulis horis ad te literas dem, ut quæ probetur, & amen- tur à doctis, ac grauibus viris. at ego Anto- ni non idè ad te frequentius scribo, aut scripturus sum, quia meis hisce ut ita loquar ineptiis aut existi- mem, aut velim ingenii laudem aliquam venari, illas enim probè noui: sed ea vna ratione id sedulo & feci, & facturus sum, ut in dies magis ac magis innotescat amor erga te meus, simplex, ingens, & verus. Non e- loquētia, sed beneuolentiæ certamen est: non Cicero videri tibi, & reliquis cōcupisco, sed Pylades, aut Da- mon. Maior aliquantò mihi animus est, quàm ut di- fertus haberi cupiam, id est amicum esse, & eius ge- neris amicum, quales semper rarissimi reperti sunt: Itaq; epistolarum si qua facis exēplaria, non est quòd exultem, quia laudem compositæ orationis adeptum me putem: sed gaudebo si nomen amicitiae nostræ di- uulgari, atq; nobilitari sensero. Scribis peruenisse lite- ras in manus domini Meccoenatis, & ab eo maximè cō- mendatas: dic obsecro cuius est laus? herculè illius, qui quicquid contingit aurum faciat. Si verò non episto- lam, sed perseverantiam in te amando, si prudentiā in te iudicando, si deniq; ea quæ animi sunt commen- dauerit, hæc laus utiq; singularis mea erit: hæc idè ad te scripsi, ut post hac potissimū inter nos studium
sit

fit amoris, potius quàm sermonis, existimemusq; eā laudem esse præcipuam, quæ à virtute animi, quæ ab amicitia, atq; constantia proficiscitur. Vale.

Ant. Panhor. Antonio Cremonæ. S. P. D.



Vm puto, ac gaudeo te bellum gerere contra Florentinos, proq; tua salute vota quoti die suscipio, perlatum mihi est ab Ergotele te esse Mediolani, sanum quidem, & fortem. Qua ex re nisi ob negotia tui Herculis coniectarem te regressum, angerer mediusfidius, eò maximè quòd nō mediocrem laudem, atq; fortunam in Tuscia te vaticinabar adepturum, vbi de gloria, vbi de salute, ac trāquil-
litate nostri Principis est certamen, vbi etiam mori vi-
ta, & voluptas est. Gloria quæ ex bellis proficiscitur ea sanè præcipua est. Nec sanè te minus sum demira-
tus ab animi magnitudine, quàm te hætenus amaue-
rim, suspexerimq; ob egregiam animi facilitatem, ac
suauiloquentiam. Nulla siue ingenii, seu animi dote
æquè honestaberis, ac si fortis, & excelsi animi aliquā
do specimen exhibueris. Hanc laudem dic per Deos
omnes te quæso, Mediolani ne es assequuturus, vbi
regnant dominæ voluptates, vbi ignis tuus ille impe-
rialis te delinit, frangit, & verè in te imperat, vbi per-
ditionis denique mille viæ, mille nocendi artes? quid
hæc vt quàm ocissimè potes mea sententia discedas.
Nā quāq; tua hæc profectio nulli tã incōmoda, tamq;

inutilis, & inimica est futura, quàm mihi, non sum is tamen qui amici, & veri quidem amici laudem meam non lim antepone re utilitati. Planè tuam hanc absentiam tuo cum honore, ac gloria compensabo, ut quantum illinc incommoder, tantum hinc capiam voluptatis. ero praterea licet absens tecum, tecum equitabo, tecum iaculabor, tecum hostes fugabo, tecum castradi ripiam, deniq; tecum orabo, atq; triūphabo. his itaq; imaginibus me consolabor, meq; obletabo, quo ad te tandem recipias victor, & fortis. Illud postremò peto, ut illuc ire statuens, hac trāsitum des, mecumq; vel diem saltē agas genialiter. Vale mea omnis suauitas.

Ant. Panhor. Antonio Cremonæ. S. P. D.



Audeo quòd ad me vnà cum Feruffino venturus es. Verum gaudeo si celeriter, amor enim non patitur moram. Et te ex peregrinatione redeuntem, & illum ex lecto resurgentem visere magnopere cōcupisco: maturate igitur vos oro, & me ab hac desiderii agritudine liberate. tu itinere, ille febribus, ego desiderio laboro: quis nostrum verò grauius, sat scio, qui & peregrè profectus sum, & febrem passus, sed qui desiderat is profecto iacet grauius simè. Tecum afferas si me amas oratiunculam primā ad Genuenses meam, qua de re aliās ad te prolixius scripsi, & quia aberas literæ redditæ fuerūt Piccinino filio. Item adferas ab Iphicleo nūc te rogo Tulliolum

suū, & quicquid præterea suauitatis, & mellis in te est.
Interim parabo tibi Curgulionem, & delicias meas.
Vale tu, & vt valeat Feruffinus elabora.

Ant. Panhor. Antonio Cremonæ S. P. D.



I vales benè est, ego valeo. Post Ergotelis ad
uentum, & tuum illud regium, & te dignum
donū, quatuor ad te literas misi : quibus ad-
huc nihil respondes, aut quia absens es, aut quia Do-
minici nostri obsequelis totus es deditus, vtraq; excu-
sabilis causa, Dominici etiam laudabilis, etenim illi dū
feruis, & inuigilas, neq; literas à te postulo, neq; verbū
vllum. Sin verò alia fortassis causa obticescis, si rescie-
ro vt sum in amore tenerrimus, ægrè feram, vni autē
Dominico concedo, immò vt vni illi intētus, & adscri-
ptus sis, te etiam atq; etiam hortor, & rogo. Sat scri-
bis, sat epistolis operam das, si iacentem, eumq; amicis-
simum erigis, aut certè refocillas. Scribo ad Piccini-
num, eumq; obtestor, vti mea causa Ioannem Olea-
rium Causidicum amicum meum Meccœnati cōmen-
det. tu item si tantisper à Dominico vacare potes, dū
hūc Causidicum familiarem nostrum Meccœnati tra-
dideris, facies mihi quàm maximè gratū, saltem Pic-
cininum excita ad id quod honestissimè pro honestis-
simo viro postulo. qua de re quid actum fuerit, si per
te licet, fac vt intelligā etiā ante Causidici regressum.
Vale, & has Guariniustræ nostræ literas Guarino no-

stro quàm potes coisimè perferendas cura. Papix.

Ant. Panhor. Antonio Cremona. S. P. D.



Vnquam putaui te adeò curis distringi posse quãuis arduis, & infinitis, quin mihi meisq; literis responderes. Quid enim potius ali cui curæ esse debet, quàm amicus? Cedunt & Principes amicitia. Quinq; si ritè dinumero, literas ad te misi, & tu tamen siles, vt silex, & maximè cum de valetudine clarissimorum scribarum, eorundemq; amicissimorum certior reddi sitiam, ac propè tabescā. Quid hoc sit vaticinari nequeo, nisi quòd abominor ne tu si mul agrotas, nā absens neq; es, neq; esse debes, Marcolino, & Feruffino iacentibus: aut si adeò illis curandis deditus es, quo laudabilius nihil facere potes, quid hoc nobis non significas vel vnico verbo? Rescribe statim te rogo illorum statum, ac tuum, nam si diutius tacere pergis, certum est te etiam adfici, quod Dii ventent. Pensa qua solitudine interea affligar, iam intelligis, quid factò opus sit. Indigeo, & quidem vehementer oratiuncula illa prima, quam ad Genuenses conscripsimus: eam mihi ad pauculos dies commodato mitte, aut si eam ipse non habes à Piccinino magno sume, quam euestigio mittas, si meam gloriam a-
mas. Vale mea lux.

Ant. Panhor. Antonio Cremonæ. S. P. D.



Vòd redieris gratulor mihi, quòd sospes tibi, quòd re benè gesta Principi, quòd citò Feruffino nostro. Celeritas hæc enim tua cū Principi, & Mecœnati grata, atq; vtilis esse debet, tum conualescentiæ maximè conducet Feruffini, & Marcolini. Suauitas, & vrbani mores ad valetudinem valent, & vt quisq; iucundissimus est, ita medicus acceptior. Nam ingenii suauitate quantum polleas dicere aut scribere admodū vereor, ne partim natura ipsius tua, partim prædicatione amicorum, partim merito tuo aliquādo in isthanc curiam intrudaris, aut rectius sepeliaris, quod vt nosti pridem vaticinor, ac veritus sum te non perdere, quiq; te nouit de te facillè diuinus est. Hoc igitur omisso, tuo aduētū plurimum gaudeo, sexcentis tristitiis, sexcentis odiis, sexcentis obrectatoribus circumuentus sum. Vnus ex omnibus relictus es consolatio angorum meorum, & innocentiae tutela. Benè igitur veneris mea spes, mea voluptas, mea laurea, vnum te illud rogo, scilicet me inuise. Erit viæ pretium quòd biduo tibi Gurgulionem legam, aut si non licet, patere saltem, vt ipse ad te veniam: & repete mihi Mānum meum ab Abbate Palatino, qui isthic est, & vnà alterum ex tuis ad me mitte. Nisi te videro tabescam miser: ita me velut poculo amatorio occupatum tenes. Vale vnicū desiderium. Papix.

Ant. Panhor. Antonio Cremonæ S. P. D.



Epetēs mecum quid id esse possit, quod pro nostro diuino Antistite sis nuperrimè molitus, quod scilicet vtilitati cederet florenorū centum annuatim, illud vaticinor fore, puta foci vt vulgò loquar exemptionem: quod si ita est, vt coniecto pro coniunctione tua cum Vitelliano viro clarissimo, quid est per Deum te quæso quòd ante digressum tuum beneficium non perficias, & Antistiti pandas quid id est, vt & rebus suis consulere possit, & tibi gratias per ingentes habere hoc primum: quod vt expedias te pariter adiuro: deinde studeas, vt librarius noster ad me mittat reliquū Ciceronis, ac mēbranas accipiat. Vale, atq; i feliciter meum cor. Ex Lauda.

Ant. Panhor. Antonio Cremonæ S. P. D.



Pistolam simul & vinum à te hodie accepi, persuaue quidem vtrunq; sed epistolam ali quantò fortassis suauiore: quanquā enim id molestè fers: malles tu quidem vinum iri præpositum, tamen epistola sanè dulcior, atq; suauior. Sicut enim quicquid à te mihi dono datur, ita deperditum, sic & mihi iam insuaue est: seu quia vini minimè peritus sum, haud dubiè epistolarum lepori, atq; saporis magis accedo. Cæterum tu, per ingenium tuum te nunc obtestor, quid mecum, id est cum homine coniunctis-

fimo, ac deditissimo vulgaribus hisce donationibus agis? an putas à me propterea plusculum amari? vinū quidem laticat hominum corda non gignit, nō con-
tinet amicitiam. Perge tu vt cœpisti honestatem cole-
re, literis, & bonis artibus assidere, me amare, nec vi-
no inter nos, neq; munusculis opus erit. Nam tu cum
sis humanitatis, ac modestiæ exemplum, vnde putasti
tuum vinum iucundius esse, quàm ipse sis? equidem fa-
teor & vinum esse rem persuauem, hilarem, sanctam,
sed qui Cremonæ mores semel degustauerit, vel ne-
ctar, vel mulsum, vel Bacchū ipsum floccifaciat opor-
tebit. Ego te equidem malo, quàm tua, vt post hac si à
me amari desideras ab huiusmodi muneribus super-
fedeas: est enim in te cur homines inebries non vini,
sed morum suauitate, & eloquentia: dabis posthac vi-
num aliis, mihi vnum te ipsum trade, immo iam pridē
traditum firma. Vale mea dulcis epistola, cætera tran-
sigemus coram.

Ant. Panhor. Antonio Cremonæ. S. P. D.



Erfus, quos iam dudum à me pro tuo iure ef-
flagitasti in laudem Elysæ mulieris, aut re-
ctius nymphæ præstantissimæ, per Ergote-
lem ad te mitto: non vt desiderio tuo, & virtuti, ac pul-
chritudini illius satis me fecisse arbitrer, nam illa & in-
genia, & laudes hominum facile supergressa est, sed
quemadmodum hi qui grandi ære alieno obstringun-

tur,quò creditores interim obticescāt, aliqua qua saltem possunt ex parte soluere consueuerunt: sic ego qui tuæ in me beneuolentiæ, ac beneficentiæ tantum debeo, quantum haud facile scripserim tibi, in amica, ac domina tua pro parte saltem satisfacere conatus sum. Rectè quidem, modò tu interim agas silentium, ac perferas. Nam cum cæteris in rebus temperās sis, & modestus, vereor ne quid Andria apportet mali, & propter amorem, vt fit, ex modesto immodestus fias, & importunus mihi. Etenim cordi est, nisi me præcipites, Elysam tuam accuratius efferre, & quantum in me fuerit immortalitati cōsecrare. Debeo, daboq; id profeçtò amicitia nostræ, quippe cum nulla in re tibi æquè intelligam placere posse, quàm in commendanda, atq; honestanda tua hac imperatrice corona nympharum: interim hos accipies in partem solutionis, de quibus quid sentias sine adsentatione à te scire concupisco: ut si tibi fuerint grati gaudeam voluptate tua, sin minus studeam post hac tibi diligentius satisfacere. Vale, reliqua ab Ergotele intelliges.

Ant. Panhor. Antonio Cremonæ. S. P. D.



QVòd versus nuper à me editi in commendationem Elysæ tuæ tibi tantopere grati sint gaudeo, & proinde maximè quòd in ea haud parua tuæ felicitatis partem consistere opinaris, cum illā magis quàm te ipsum diligas. Nos quoq;
olim

olim amauius, & quis nō? & nulla in re mihi morem
geri potius desiderabam, quàm in Moniphila mea,
hoc illi nomen erat: itaq; malorum laud ignarus, vt
ait ille, miseris succurrere disco, quod libenter equidē
facio, & si quādo feci gaudeo, vt dixi. Nam quod tam
mirificē de versibus sentis, mihi nec cristæ surgūt, nec
tamen moueor, satis me ipse cognoui: sed amantes iu
dicio carent, quod vitium in te præsertim dolerem, ni
si eo factum foret, vt pro versiculis mihi sericum do
no misisses. Dum enim ob amorem iudicio priuaris,
atq; inebriaris, me fortassis Homerum putans, qui ti
bi amicē gratificatus fuerim profundis, atq; dilapidas
tuum: sed putasti, vt arbitror, me repudiaturum do
num, errasti, non sum ego Socrates, quem à nullo vn
quam neq; donum, neq; mercedem accepisse traditū
est: maioris enim & liberalioris animi existimo, quod
ab amico optimo animo confertur acceptare. nam
qui accipiunt & ipsi laudandi sunt, & eò quidem ma
gis, quod nisi id fieret liberales non essent. Auarorum
est, vt nihil dare, sic & nihil acceptare, ne quando & ip
si dare, aut gratiam referre cogantur. Vtrunq; igitur
donum accepi, & quidem hilari fronte: tu posthac di
sces ad me nihil mittere, quod tibi remittendum spe
res: sum enim tuum mel, sic enim me appellas in epi
stolis: mel enim pennas, si quas contingit, non deferit:
hactenus de dono tuo tecum iocatus sum, quid de eo
autem seriō iudicem, erit simplicitatis meæ, non ad te,

sed ad Piccininum scribere . Vale, & vt valeat Feruffinus splendor Ducalis enixè cura.

Ant. Panhor. Antonio Cremonæ S. P. D.



Te Saturni literas ad te dedi, quibus respondi tuo illi peregregio dono : nunc te rogo si quid vides me iucunditatis adferre posse Dominico iacenti id perquiras, & maturè significes. Aduolabo meherclè si qua ex parte sensero, me humanissimo adolescenti, & de me in primis benemerito profuturum. Non tu tam libèter ad Elysam profecturus es, quàm ego ad Feruffinum meum. Interim tu hortare hominem ad bonam spem valetudinis, & quantū in te est, fac domus tota delitiis defluat, vnus omnium salute dignus est, & Deorum gratia . tu nulla in re, & mortalium, & immortalium beneuolentiam pròptius cōparabis, quàm ægrotis, hisq; virtute præditis subueniendo. cantabis, saltabis, ridebis, iacētū causa oīa licet, histrionē agas licebit, adfectis ea optima medicina est, quæ illis iucūda, & accepta est: me vel mimum cōstituas, dū illi solatiolo, aut fomēto sim aduēturus. Vale, & qđ facis Feruffini valetudinē diesq; noctesq; procura

Ant. Panhor. Antonio Cremonæ S. P. D.



Vòd scribis te comestationibus nō lectionibus esse occupatū ægrè, & molestè fero, nam qui comedit vt alii, mihi crede, sapit vt alii.

Cicero ad ouū famē seruabat, vobis neq; flumina, neq; nemora sufficiūt ad gulā. Obsecro deuorato isthoc misero castello, quò postea tendetis pullorum, vitulorum, leporum, ac piscium calamitates? Formidant Polyphemos oppida, quocunq; enim acceditis rerum caritatem inferis: Ticinum prorsus effectum est exanguē, neq; vos certè minus quàm Xerxis velut exercitum pertimescit. Sed Ferussino meo vereor, ne dum à valetudine confirmari studet, sentiat tandem epistolarum fructum, ne luctum dixerim. tu ne a groti comes addictus es? tu ne sanitatis custos? ad reintegrandos inualidos nihil æquè facit atq; temperantia, crapula etiam fortes expugnat, ac perimit. vide nunc quid facto opus sit, si Ferussino suauissimo prodesse vis, & tuæ laudi prospicere. De domo conducenda amplius non labores, locata est alteri. A Piccinino tandem literas accepimus plenas pietatis, & suauitatis antiquæ, cui ni respondurus essem actutum, tecum nunc essem prolixior plus etiam quàm velles. Vale.

Ant. Panhor. Antonio Cremonæ. S. P. D.



Vperioribus meis tibi abundè vt arbitror respōdi, quibus profectò talem tibi gratiam retuli, qualem tua ista donandi praua cōsuetudo commereri videbatur: qua in re si tibi ingratus, ac penè rusticus visus sum, illud compensa quòd tu mihi prodigus, ac penè dicam inamabilis iudicatus es.

Inunc, & tuum prodigas: posthac tibi habere tuum vinum, mihi diuinum tuum istud ingenium impartias, tuas orationes, te ipsum, alioqui frustra laboras, & vinum perdis. Non tua magnifacio, sed te, vinum terræ redditur, tu immortalis, mingam quod mittis, te ipsum lingam: sed si donum æquo animo recepisse me vis, veni, & vinum tibi tuum combibe, nec ad Herculem aliā proficiscare, quā haccē, si modō ad Herculem profecturus es: sin minus, promissi fidem exolve, quod est, si ad me mecum permanurus contendis. Vale.

Ant. Panhor. Antonio Cremonæ. S. P. D.

Non est quod me taciturnitatis accuses, si iustus es, nam nudiustertius, id est eo illo die, quo tuas accepi, tibi respondi, tuoq; reditu gratulatus sum & literis, & animo:

Cantauiq; Deis laudes, Regiq; supremo

Candida per sanctis cæsa iuuenca focis.

Creditæ sunt literæ cuidā, qui præsidet portæ nouæ ex clientela Antonii Beccariæ, apud quem facile hominem offendes. Adornatur tibi camera, cupio à te scire, an circa diem festū, quod malo, vēturus es: alioqui aliō inuitatus extra urbem ire nō abnuam: fac igitur ne frauder hac, & illa voluptate, hoc est veni, tecuq; feras Charites, Veneres, iocos, & amores, cōperturus hic delitias omnes, & lac, & nectar. Vale. Papia.

Ant. Panhor. Antonio Cremonæ. S. P. D.



Fortunatum hunc literarum adlatorem, iuuenem sanè elegantem, & mihi pridem beneuolentia coniunctum, tuæ fidei, tuæq; beneficentiæ commendo: cupit enim isthic locari, maxime apud Fulginatem nostrum virum amplissimum, vel apud quē alium vnus Fulginas decreuerit: quod vt assequatur enixissimè velim labores, ac studeas. Feceris mihi admodū gratum, feceris & officium tuū, quod est, honestos adolescentes honestissimus ipse vt iuues, & augeas: virtuti virtus debetur. Vale.

Ant. Panhor. Antonio Cremonæ. S. P. D.



Inis superioribus ad te meis nihil respōdes, nec propterea digressum è Mediolano existimo: nam quam aliam facturus es viam, nisi quā suauissimum tuum illud vinum esses offensurus? Puto tamen te per hoc tempus maximè districtū negotiis Philippi Ducis, atq; Herculis tui: sed vt res habet vini sis memor, id est hac transitum des ad Herculem iturus. Quod sequitur, si mihi vnq; aliās auscultasti, dato operam, vt hic epistolarum adlator Gaudētii nostri necessarius rectā dirigatur, deducatur, atq; absoluator maturè: tuo cōsilio, tuoq; auxilio indiget. Turebus illius ita consule, vt meis suesti: nosti iam mihi nihil æquè iucundum, ac voluptuosum esse, quàm Gaudentium, & Gaudentianos oēs. Vale flos veteris vini.

Ant. Panhor. Antonio Cremonæ S. P. D.



Entio de epistola hac tua ad Piccininum, quod de epistolis Tullii soleo ad Lætulum, aut Atticum, aut Brutum: nec mihi persuadere possum in itinere huiusmodi exaratas epistolas, quæ sapiunt, redolentq; non modò otium, sed otium academicum. Sunt nimirum elegantes, sunt copiosæ, sunt suaves, sunt deniq; non de voluptate scriptæ, sed voluptas ipsa. atq; haud scio, an maiorem isthic voluptatem perceperis ex mille delitiis, quàm ego, & qui mecum aderant, ex epistola tua. Reddita mihi est in conuiuio in mediis poculis, placuit multis, id est iis omnibus, qui eam perlegerunt, non secus ac condimentum aliquod præcipuum. Dicerem de te plura, si de te apud te loqui liceret: ad hæc tua studia incumbere, & aut vanus sum vates, aut euades in eloquentia clarus, & insignis. Clemens de Petra, qui isthic vitam degit, habet hic Ticini domum locandam, amœnam, ac nostris desideriiis, & studiis apprimè accommodam: cura, impetra, vt eam conducā mercede consueta: quod si feceris, nihil mihi potes per hæc tempora, aut gratius, aut vtilius afferre. de qua re scribas velim, quàm potes ocissimè, & eris ocellus aureus. Vale. Ticino ex mediis poculis.

Ant, Panhor. Antonio Cremonæ. S. P. D.



Itera tuæ, quas hodie tandem accepi, effecere, vt epistolæ literas intexerem, cum secus statuissem præ capitis dolore infestissimo: verum adeo dicendi vi, & suauitate ingenii præstas iâ, vt non dicam agrotantem, sed prorsus mortuum possis excitare, & quòuis impellere. Non blâdior mi Cremona, potes mea quidem sententia in disertissimis nostræ ætatis hominibus haud iniuria recipi. es copiosus, luculentus, acer, vehemens, elegans, & vsque adeò dulcis, & suavis, vt me iam inualetudine implicitum curaueris, sanauerisq;. Perge quod facis, exerceas ingenium, quod tibi natura molle, & versatile est. exercitatio enim vel præcipuè conducit eloquentiæ. Maphæus tibi deuinctus, & irretitus est.

Tu quoq; Maphæi dulci cantabere musa,

Tu quoq; musarum dignus amore venis.

Illum tu mutuò diligas, si à me diligi, atque obseruari vis. Gabriel tuus valens, & lætus est. Interdum verò

Suspirat longo non visam tempore matrem.

Tu filioli personam sustinebis opinor apud elegantissimam mulierem. Nos pollicitationi nostræ non decrimus. Vale mea salus, & voluptas viuica.

Ant. Panhor. Antonio Cremona. S. P. D.



X Iacobo Modosiensi viro dulcissimo literas à te non accepi: cum quærerem quid esset in causa, respondit, Palatinus effectus est. Placuit meherclè fortuna isthac tua, & tu non solū palatio, sed cœli regia dignus es. Cæterum si eo pacto te perditurus sum, odi, atq; execror & palatium, & palatinos omnes. memineris tamen amicitia nostræ, alioqui indignus est prosperitate, qui gratias mortalium paruifacit. Circūspicias quid te eò loci perduxerit, & comperies beneuolentiam hominum extitisse. occupationes sint licet vndequaq; amicorum causa præcipua esse debet. Adolescentibus nostris epigramma feci, & misi. auctori nihil ingratum est: retractabitur tamen pro eorum sententia. Camutias pelles adhuc nō accepi, puto id reiicias ad ver, cumq; illis minimè indiguerō. Postremò si Mecœnati me de meliori nota cōmendaueris, nihil liberalitate, aut humanitate tua alienum feceris. Vale.


Ant. Panhor. Antonio Cremona. S. P. D.




I vales, valeam opus est. Iacobus Valperga vir nobilissimus, & vt nosti socius, & cōtubernalis meus rem agit in Curia Domini nostri Principis: qua in re vt deducatur, atq; etiam peritior fiat, indiget opera, & auxilio tuo. illum audias perbenigne,

nignè, ut meos sueuisti, & si fuerit opus etiā, atq; etiā committas Palatio filio: in summa aut à te instruat, aut à Palatio. plura in hac re scriberem tibi, ni mālles semper exequi uoluntatem meam, quā prolixius à me orari. Ego die Iouis me conferam Mediolanum, fac pares quicquid suauitatis, ac mellis in te est, cætera agemus coram. Vale.

Ant. Panhor. Antonio Cremona. S. P. D.

 Ecce ab hinc dies nihil exaras: expectas ut opinor meas. verū nō est id ueræ amicitiae scenerare uices, & beneficia. nosti me districtum, & ingenuo quidem negotio, tum res etiam ad te attinet: nam adolescentiū trium est, quos tu, uel præ te diligis, & amas, ut si deinceps me abiudicaueris à lepōre literarum tuarum, aut amicitiae munus deferas, aut amicis inuideas oportebit. scin' tu quid expecto? epistolas tuas. Vale.

Ant. Panhor. Antonio Cremona. S. P. D.

 Audeo, ac Diis habeo gratias, quod te mihi, & patriæ, & amicis restituerunt incolumem, & saluum. eoq; magis & gaudeo, & obligor Diis, quod præter quā quod te mihi ex tā multis, & uariis hostium periculis reducem fecere, fecere etiam ut animo institueres, ac uelles omnino mecum condegere, atq; unā philosophari, quasi naufragio eie-

E

Etus volueris Dei cuiuspiam sacris initiari. Laudo
 tuum hoc propositum, & nostrum utriq; plurimum
 gratulor: mihi, quod amici verissimi cōversatione in-
 gentem equidem voluptatem percepturus sum, tibi,
 quod literis præcipuè, & humanitati mihi natus vide-
 ris: ut si naturam sequi vis, tibiq; non deesse, magnum
 profectò ingenii fructum, & laudem haud dubiè sem-
 piternam adepturus es. Mea autē ut tibi debita sunt,
 sic & communia esse volo, libros, facultates, doctrinā,
 musas deniq; ipsas, & delicias omnes. Expecto te igitur
 haud minori quidem desiderio, quàm tu teneris
 me adeundi simul & deosculandi. A Lampognino
 strenuo milite literas adhuc nusquam accipio, quas
 tamē audio mihi illum obsignasse: quàm primum ve-
 rò illas olfecero, respondebo, ac faciam probè satis. In-
 terim virum suauissimū ex me saluere iubeas. Tu va-
 le, & Plautum quàm potes ocius ad nos præmitte.
 Iphicleus valet, & domus reliqua.

Ant. Panhor. Antonio Mercurio Cre-
monæ. S. P. D.



Atum, acceptumq; fero Mercuri iucundis-
 simè quicquid Ambrosiæ tuæ mulieri orna-
 tissimæ pollicitus es nomine meo. mandatū
 quidem geris ut velis cunq; obligandi me. quàm pri-
 mum igitur Augustam meum absolvero, quod sta-
 tim est, componam epigramma illud ut iubes in ele-

gantissimæ mulieris laudem. Qua de re tibi, non mihi gratias agat volo: mihi quidem satis abundè sit, si quando honestissimæ tuæ voluntati morem gero, alioqui tua voluptas, & mea est. Verùm ne deinceps queraris tarditatem, aut negligentiam meam Laudæ agens: nam si Mediolani nunc sis, offendes iam epistolas, & insuperabilem Panhormitam, neq; in me, meosq; mores putes fortunam imperium gerere. Si quæ flecti, aut immutari possum, amicitia solum flecti, & immutari possum. Vale, meq; ut fuesti, ama.

Ant. Panhor. Antonio Cremonæ S. P. D.



Aulum virum officiosissimum, & amicitia specimen aduenisse præsertim incolumem gaudeo. Verum cum per istam aëris malignitatem se receperit, & illi angor, & nec minus tibi.

Res est solliciti plena timoris amor.

Quod autem possum, id est pro vestra vtriusq; salute vota suscipere, id piè sanctèq; persoluo. Caterum tibi meam domum oblatam, & deditam facio.

Heu fuge crudeles terras, fuge sidus iniquum,

Et tibi si non vis parcere, parce mihi.

Hic saltem pestilentia gratias aliquas habere poteris, quòd mecum lectitabis, poëtaberis, philosophaberis. Iube an velis tibi cameram adornem, & factum puta, aut quod malo, nil mihi rescribas, veni. Quæ mea sunt tibi sunt iure optimo debita: alioqui salus tua mea est,

voluptas tua mea est. Nobiscum salubriter agitur,
& cum Riciis etiam largiter, & opiperè. Vale tu mea
exoptatissima ualetudo, & nunc cum maximè opus
est, tuam salutem frequenter renuntia, aut quod ex-
pecto potius ueni, immodò, ut Catullus ait, uiam uora.
Iterum, atq; iterum uale cum Paulo dulcissimo.

Ant. Panhor. Antonio Cremonæ. S. P. D.

EX Cremona Vrbe te recepisse gaudeo, eò
præsertim, quòd in uia latet anguis in herba.
Quare deinceps te pariter & nos custodias
quæro, hoc est, quoad licet te Mediolani contineas, ac
cures molliter. Item & Catonem nostrum rediisse fa-
ma est. eum ut conuenias te rogat Abbas ille omniū
suauissimus, atq; lepidissimus, eiusq; uerbis hominem
ora, si quas ex Heluetiis Halecēs detulerit, illi ut ipar-
tiat. Quid sibi uelit, cupiatq; flamen urbanissimus à
Catone ipso optimo interprete cognosces. Quā pri-
mum Princeps repetierit Iouis arcem, ad me remie-
tas caballos, ut ad te adeam. Interim me somniet cō-
cupiuerim. Vale. Ticino.

*Ant. Panhor. Antonio Mercurio Cre-
monæ. S. P. D.*

EPigramma illud, quod tantopere expetiscis
in commendationē Ambrosiæ tuæ, nisi fece-
ro, tu posthac neq; diuini, neque humani

quicq̃ mihi credas uolo. id equidē & pollicitus sum, & promisi tibi. sed cum tale quid factito, nō ex sententia, sed ex furore id facere soleo. hoc te ūehementer orō, diem mihi ne præscribas in hac re, si egregium, & duraturum aliquid à me desideras: atq; eo pacto consules uoluptati tuæ, & illius suauissimæ fœminæ laudi, ac gloriæ. Sin uerò, ut in amore euenit, morā ægrè laturus es, faciam quod iubes, uel stans pede in uno.

Vale puellarum cura.

Ant. Panhor. Antonio Cremonæ. S. P. D.



Roximè ad te literas binas dedi, ita que nostræ illi literariæ constitutioni nec defui, nec defuturus sum: tu contra obmutuisti iam, quod cū mihi ingratum admodum sit, tamē quia succumbis, & exuperaris, ea utiq; uoluptate consolor, ut haud sciam uictoria ne magis delinias, an literarum tuarum frequentia, cum sint illæ quidē suauissimæ. Sed his missis, esset iam amodò diligentia tuæ mihi literis significare siquid egeris de gemis illis zaphiriis, an proscripseris nec ne, aut saltem si emptorem reperiant, aut cōditionem aliquam, ad hæc rescribas uolo si me diligis: nam reliqua tractaui superioribus epistolis. Vale cum diis adolescentibus, & palatiolis. Papia.

Ant. Panhor. Antonio Cremona S. P. D.

Er Iouem placabilem te oro, atq; obtestor
 Antoni suauissime, noli succensere lentitudi-
 ni meæ, & parsimonia, vt ita dixerim, litera-
 rum: ardua quidem res beneuolis, & familiaribus tar-
 dum me reddit meis. Licebit fortassis aliquando te li-
 teris sepeliam: in præsentia ne Cambio quidem ipsi,
 cui omnia debeo, possum exarare. Si quid cum scriba
 cōstruxeris renuntiato. De Farafalla meo si quid sen-
 seris scribe, nec meo exemplo tardior fias. Sed dum-
 modo rescribas, vna tantum lineola contentus sum.
 Vale. Ticino.

Ant. Panhor. Antonio Cremona S. P. D.

Erit etiā humanitatis, ac mansuetudinis tuæ,
 si nostro isti silentio, ac contumaciæ non suc-
 censeas: dum enim studeo satisfacere, ac cō-
 modare adolescētibus nostris, abducor abs te vel in-
 uitus. illis enim primum commentariolos ad Plautū
 promisi, quos nunc à me exigunt iure optimo. patia-
 re igitur te obsecro priores tempore, vt legulei dice-
 rent, potiores esse iure. Pernoctabo igitur cum asinis
 Plautinis, verum id ita, vt saltem tecum, vt soles dice-
 re, sabbatizem: nullo enim pacto defuturus sum mu-
 neri tuo, sed spatium posco. Tum Saturni quoq; die li-
 teras à me expecta, si nō quales ipse expetis, at saltem

quales ex mediis a finis qui uero . tu uerò frequentius
mecum agas , nec metiaris otium tuum ex negotio
meo . Augusta meus ita à nobis abiit quasi poculo
quodam amatorio insanus, senex est, nihilq; vehemen-
tius admiratur iam pridem, quàm tuam, & adolescen-
tium urbanitatem . nam Mecœnatem colit religiosif-
simè: sed te Dii sospitent, superstitentq; : ego ad Plau-
tum redeo . Vale, & Cambianum illud numen ex me
saluta. Iterum vale suadela mea. Papia.

Mitto quàm maturissimè quinterniones illos ad
Mitiensem nostrum. Item an Palatiolus ad nos iturus
sit, me certiores. Quæ mea sunt, illi diuidua erunt oïa.

Ant. Panhor. Antonio Cremonæ. S. P. D.



Voniam te adeò sollicitum, ac propè anxlū
video in Columnulæ nostri salutem, vt ne
Thetis illa poetica in Achillis quidem ma-
gis: omnium primum fortem, & valentem, addas &
lætum, & hilarem puellum renuntio, cui quippe nulla
vnquam in re & tua gratia, & Herculis tui viri fortissi-
mi defuturus sum. Ad literas magnū immò necessa-
rium nobilitatis ornamentum quotidie hortor, & vo-
lentem stimulo. ad mores nihil hortatu opus est, inge-
nuus quidem & liberalis est, totusq; aureus, & suauis,
deniq; Columniæsis, Romanus, atq; Herculis nepos:
de quo aliàs vel ad ipsum Principem aliquid dicam :
Tu autē i felix, felixq; redi, atq; obiter virū illum, aut

rectius semideum nostrum, Pontificem dico Laudem à me plurimum saluta. Cremonæ uerò cum fueris, & Herculi Romano me gratum effcito, & Caucino tuo uiro ut ais optimo, & ut certè scio pereloquenti. In re autem Catoniana, & Guariniana te plurimū laudo, ac spero fore, ut hæc tui animi benignitas tibi tandem & Deos, & homines conciliet, atq; deuinciat. aut tua fortuna omnino ingrata est, aut tua uirtus fortunata euadat necesse est. Vale bonorum patrociniū, & mea lux.

Ant. Panhor. Antonio Cremonæ. S. P. D.



T si tibi curæ, & studio est res Catoniana, excitabo tamē scabronem, et quod aiunt sponte currentem. uolo à te igitur, et uehemēter peto, ut Catonē ita commissum facias Sperono Quæstori, viro Senatorio, ut quæ Catoni ipsi iure debētur pecuniæ confestim exoluantur. nosti tu, an ea talis pecunia necessaria sit amico nostro: tum an pro laboribus, pro dignitate, pro fide in Principem, mereatur etiam grandiore. Clarissimo autem Sperono cessura est hæc pietas, & benignitas in laudem egregiam, & memorabilem. Tum Meccænati magno, & iis omnibus qui Meccænatis sunt, pergratū faciet Speronus, ut non unum Catonem, sed plures sit debitores habiturus. Ego quoq; pro uirili laudes, & gratias acturus sum, ut qui indigentia Catonis compertam habeā, & quā

quàm benè de Principe mereatur sciam. Obligabis igitur te, obligabis me, obligabis Meccœnatis omnes Sperono magnifico, si nostras audiat preces, & uota. Tu uale cum humanissimo, ac sanctissimo Abbate nostro. Columnula tuus valet, & deposita omni trititia ridet, & cantat.

Ant. Panhor. Antonio Cremonæ. S. P. D.



Itto tibi oratiunculam Gerardi Pontificis viri tum moribus, tum eloquentia insignis, quam ex tempore habuit apud Patres illos Babilienſes, elegantem quidem, tuâq; , & doctorum omnium lectione digniſſimam. Leges tu illam, & perleges, poſtea exſcribendam concedes ſtudioſis humanitatis, tandem illam ad me remittas, mihi in delitiis reponendam, & conſeruandam tanquàm alteram animulam. Expecto diu Plautum tuum, meus commodato abeſt: at tu non lentus, ſed mortuus es, & ſi non mortuus, certè lentus. Tui quidem illi uerſus mihi cordi ſunt, eoq; gratiores uenient, & politiores, quò tardiores. Vale.

Ant. Panhor. Antonio Mercurio Cremonæ. S. P. D.



Nexoraueris adhuc domum illam Antonii Beccariæ equitis ſplendidiſſimi, id cū uehementiſſimè cupiā, non poſſum nec à te, nec à

meo Cābio scire, quod proinde ægriusculè fero, quoddam silentiū, & mora ista damno celsit, & cessura est. dum eam quidem à uobis frustra expecto, domum alterā amisi: quare si me amas, uel lectis literis ea de re mihi scribas. Gaudentius noster adhuc Placentiæ agit. Te uerò aduenturum ad nos audio hastiludii gratia, uel nos potius uisendi: quo in proposito ut perstes, noster Gaudentius satis suadere potest: eum si uideris amabis, & cum mox non uideris desiderabis. Vale.

Ant. Panhor. Antonio Cremonæ S. P. D.

Proximè ad te scripsi, & pro uirili nostra satis pactionibus feci, atq; unā Palatio nostro literas dedi. Tu uerò siles, tuis hisce ut arbitror armilultris mei immemor factus: an rectè, & amicè agas, tute ipse cogitaueris. Ego quidem ex taciturnitate tua ea saltem uoluptate afficior, quoddam te officio reddundarum superaturus sum. Varronem suscepi iam, qua de re tibi gratias neq; refero, neq; habeo, immò tibi succenseo potius, quippe qui adhuc ad me nō miseris uocabulorum codicem illum uetustissimum: expurga tuam hanc taciturnitatem, & librum aduolare facias. Vale.

Ant. Panhor. Antonio Cremonæ. S. P. D.



Pistolam, quam die Martis obsignasti, non solum accepi, sed acceptam semel, atq; iterum sum deosculatus: ut enim uirtute, ac probitate te quotidie vincis, sic & dicendi suauitate in singulas horas excellis. proinde te hortor epistolis cōscribendis dare operam, ut facis: ita quidem & studiis prospicies tuis, & in dies tibi nouas conciliabis amicitias. Sanè quidem epistolæ cum plurifarè nos exorant, tum verò maximè, quòd beneuolos nobis quotidie comparant. Quamplurimos, quos nunquam uidi, per epistolas amo, ac mutuò amare certè scio: ego quidem, non dico tibi, cui omnia beneficia debeo, sed ne ipsis quidem vulgaribus amicis deero hoc epistolari colloquio. Quid homine indignius, quàm id non agere quod facile, & cum uirtute possis agere? Optarim uerò tua causa, ut per otium liceret nō modò frequenter, ac beneuolè, quod sponte, & iure facio, posse ad te scribere, sed paulò etiam accuratius, ornatiùsq;, quanquam pro tua propè singulari humanitate à me non eloquentiam, sed beneuolentiam reposcis, quam, si qua in me est, & est quidem ingens, omnem erga te conferam, ac tradam: ut si quis posthac diligì à me desideret, non sim ut aiunt soluèdo, hætenus tecum. Tres illos aureos adolescentes Mercurinum, Dominicum, Franciscum ita diligo, ita admirror, ut

quoddam mansuetudinis, & urbanitatis exemplum. mea quidem sententia sunt digni optimi, maximiq; Principis beneuolentia, qui procurent, ac tractent res perarduas. crede mihi non ab re placent tantopere Francisco Barbauariae uiro illustri. uidit vir magnus, atq; acris iudicii aliquid in adolescentibus, quod dignum Principe, quem vnicè colit, ac dignum se diiudicaret, quod vel præcipuè cedit illorum ornamentis. Etenim didici id esse magnum probitatis argumentum, si quis uiro graui, maximeq; spectato collibuerit. adolescentes ex senibus iudica. Vale, & apud illos me iterum, atq; iterum gratiosum fac, ad quos si literas nunc non exararim, est quod imputent hisce commentariis, quos eorum nomine, ac laude in manus habeo. Tres illos codices in horas auidissimè expecto. Item Vale.

Ane. Panhor. Antonio Cremonæ. S. P. D.



Pigramma, quod à me quotidiano penè conuitio efflagitasti, in laudem Ambrosiae tuae, feci, & ecce illud nunc ad te mitto: quod retractare debes, & incudi reddere, priusquam elegantissimæ illi matronæ legendum tradas. Nam si tandem intellexero illam oblectari carminibus, & Poëtas uenerari, faxo, nisi fallor, ut numeretur inter præclaras mulieres. Nam & si tibi omnia debeo, & præcipienti quoq; non ob-

temperare nefas est, tamen erit operæpretium scire, an ea quoq; afficiatur uersibus meis, & Poëta suo gratias habeat: labor enim omnis in bene-meritos lenis est, & iucundus. Vale tu nympharum amor, & valeat illa amoris nympa.

Ant. Panhor. Antonio Cremonæ, S. P. D.



Citur à te tandem mihi redditæ sunt epistolæ & suaues, & officiosæ. Doces item iam quatuor illius generis ad me dedisse superioribus diebus, sit ut harum gustu, illis deperditis vehementer indoleam. Dispereant quæso omnes & tabellarii, & miliones, quorum incuria, aut perfidia fraudamur hac perhonestâ literaria uoluptate. sed curato deinceps negotiari cautiùs, cuiq; tuas gemmas crediturus es, etiam atq; etiam considerato. Perfidis quidem omnia reddundant, & profectò lupo est homo homini, ut Plautus ait. Caterum quòd ais, me plusquàm satis est, questum spem, & fortunarum mearum moram: id tibi ut cætera assentior, non ut diffidam Mecœnati viro immortalis, aut reliquis benefactoribus nostris, sed ut peccem faciunt agnatorum meorum minæ: instant, iubent, volunt, ut redeam ad eos, alioqui mihi aliundè victum exquiram, ab eis nihil sperem omnino. Quid mihi faciundum sit, fare nunc: an

vis utar cōmuni diuidendo actione: sed longè, & mille miliaribus disto: an agā id per procuratorem? prae potentes sunt, & in nobilitatem hodie non admittitur actio: an vis philosopher, id est miserè agam, ut Cambius vult? at id non patitur dignitas, aut genus, tū mea aetas expostulat iam a modo, ut aut patriā repetam, aut si fata negant, uel hic, uel alibi domicilium mihi constituam iam. expecto tamen, duro, spero, confido, fretus & Meccœnatis pietate, & studiis aliorum. Verum ut senescam intersperandum, id non persuaserit ipse Demosthenes, persape mihi dicendum est, qui sperat, is mancus quodammodo, & inutilis est. Vale, & Marcolino Saccaro nostro me iucundum magis, magisq; facias, nam Palatio, & Feruffino literas heri dedimus.

Ant. Panhor. Antonio Cremonæ S. P. D.

Prostea quàm in Padi ripa à me cum Catone discessisti describis ea pericula quæ magna quidem, & per ardua in uia passus es, atq; ita describis, ut iam mihi interfuisse periculis uidear, hoc est imbres, & pluuias sustinuisse, latissimum flumen transmisisse, per tenebras migrasse, deuiasse, aberrasse, uitam deniq; desperasse. itaq; dum absenti mihi gratularis præsentem constituis. eò quidem eloquentiæ euasisti, ut quæ scribis agas. Iam uerò tua legens contremisco, & nisi phrigium mutas, ut Timotheus

ille, ac leuius moderaris, pericliter & ipse oportebit.
Quæ peregristi meo nomine, meoq; mandato apud
nostros adolescentes lentè admodum audiui: expe-
cto igitur domini Mecænatis epistolas, postmodum
toto, ut aiunt, pectore incumbam: quodq; pollicitus
sum nihil uereare, statim absoluam, & plaudite dicā:
alioqui nec iurato mihi credas deinceps. alia quidem
plura studeo, ac molior, quæ si Dii dent, & in lucem
prodeant, & ipse Princeps, & Mecænas sanctissimus,
& adolescentes tria sidera, & qui me amant omnes,
mihi gratias agant, erit necesse, rumpentur & ilia co-
dris. Piccinino meo tabellarii festinantia non scripsi,
ualeat, & tu quoq; Deos oro.

ANTONII BECCATELLI
SICVLI COGNOMENTO PANHORMI
TAE EPISTOLARVM GALLICARVM
LIBER SECVNDVS.

Antonius Panhor. Piccinino suo. S. P. D.



Cribis extare nescio quem, aut
extitisse nuper apud vos homi-
nem bonum, & ex sapientia illa
Attica conflatum, atq; effigia-
tum, qui quærat à me, ac prius-
quàm respondeam affirmet, me
nesciturum, quare antiqui coena-
bant, & non prandebant. Quæstio nimirum subtilis,
& lepidissimo illo viro dignissima: sed Dii boni cur
me nō bicipitem finxistis? vt cum huiusmodi ineptias
audio, caput alterū in parietem impingerem. ò Gua-
rine Ventrati ubi nunc es? Hic Guarinus Ventrarius,
cum de Martino Siculorū Rege benemeritus esset,
pro meritis à Rege impetrauit, vt deferre posset sub
pallio absconsum cuiusuis pecoris ventrem, siue re-
ctius aluum vocites, plenam animæ: eamq; si quem
fuisset nactus ineptius loquētem, in huius faciem, atq;
os impunè inuergere: hinc à ventribus Ventrati co-
gnomen accepit. Si videat modò hic Ventrarius,
homo

homo haud sanè illepidus, & hic gentiū valde necessarius, quempiam exillimantem maiores nostros tantum semel in die comedisse, de vniuersis dico, non de singulis, quid putas Piccinine facturum esse? an contenturum, & refranaturum aluum illam, an refususū vniuersam in caput ita exillimantis? Omnium primū constat, si quidē claris auctoribus credendum est, veteres longè proceriores, atq; robustiores extitisse, coepisseq; genus hominum iam vsq; ab Homeri temporibus decrescere, hoc Iunius Iuuenalis auctor locupletissimus tradit, atq; addiicit.

Terra malos homines nunc educat, atq; pusillos. Ergò imbecilliores, atq; breuiiores plus comedent, & maiore indigebūt nutrimento, quod absurdū est. At si dixerit Atticus tuus, erant illi magni quidem, sed sobriores, continentioresq; respondeat quæso an apud satyricos vspiā legerit veterū ingluuiem, ac crapulas.

Vna comedunt patrimonia mensa.

Nullus iam Parasitus adest, ecquis ferat istas
Luxuriæ sordes, quanta est gula, quæ sibi totos

Ponit apros, animal propter conuiuia natum.
Et huiusmodi innumerabilia, magisq; pudēda. Titius in suasionē legis Fanniae obiicit sæculo suo, quod porcum Troianū mensis inferat, quē illi ideò sic vocabāt, quasi aliis inclusis animalibus grauidum, sicut equus Troianus grauidus armatis fuit. Hortensius vir utiq; antiquus, & adhuc eloquentia illustis, primus pauo-

nem augurali cœnæ posuisse traditur. L. Crassus vir Censorius, & Ciceronis sententia grauis, & super cæteros disertus non ne murenam in piscina domus suæ mortuam tanquam filiam luxit? Quid deniq; Cato ne clarius, quid sanctius? & hunc quidem ebrium legimus. Taceo hoc loco & lepores, & cocleas ætate illa solitas saginari. Prætereo Accipenserē paucorū hominum piscem: omitto etiam Mullum ab Asinio viro Consulari emptum septem millibus nummūm. Quid murenas dicam ab vsq; freto Siculo accersitas? Quid ostrea? quid ostrearia illa Sergii Oratæ? Quid ēt oras à quibus Sergius cognomē accepit? Quid tubera?

O Libiæ disiunge boues dum tubera mittas.

Quid bellaria secundæ mensæ? quæ quid sint ab Attico vehementer addiscam. Quorsum hæc? ut intelligat ne ætatem quidem illam vitiis caruisse, nec ipse inficiabitur. Cæterum quæret, an prandia vsipiam legerim apud veteres. Quid ni? Valerius Maximus in secundo memorabilium libro, Maximis, inquit, viris prandere, & cœnare in propatulo verecundiæ non erat. Insuper autē poenis legis Didici tenebantur non illi solum, qui prandia, cœnas ue maiore sumptu fecissent, sed etiam qui ad eas vocati essent, aut omninò interfuissent. Et Sosia ille Plautinus adeo id quod narraturus est magis meminit, quòd illo die imprāsus fuit. Locus præterea est, Attico meherclè dignus, vbi flēe nequam homines, qui polentā pransitant. Idem Plau

rus in Milite, adducunt extra me ad se prandium, ad
cœnam vocant. Idem in Bachide, defubirò prādium,
aut potatio fortè, aut cœna vt solet in istis fieri concilia
bulis. Idem in Sticco, an pararit prandium vxori. &
paulò post, quot adeò cœnæ, quas defleui mortuæ?
quot poriones multis? quot autem prandia? Idem in ea
dem: quàm mox cocta est cœna, impransus ego sum.
Cicero in. III. Philippicarum. Quid prandiorum
apparatus? quid furiolam vinolentiam tuam profe-
ram? Idem in. III. Verrinarū: In Asiam verò postq̃
venit, quid ego aduentu istius prandia, cœnas, equos,
muneraq; cōmemorem? Hieronymus ad Rusticum.
Hic benè nummatus plus placebat in prandiis. T. Li-
uius in primo belli Maced. Itaq; turmatim equites le-
uis armaturæ aquatum ire prādere iubet. Suetonius
in vita Caligulæ. Hora ferè septima cūctatus ad pran-
dium surgeret, & reliqua. Helius Spartianus in vita
Alexandri seueri Aug. ita scribit. In proclinctu, atq; in
expeditionibus apertis papilionibus prandiit, atq; cœ-
nauit: & illud præclare, prandeamus milites, tãquam
apud inferos cœnaturi. Sed stultior ego qui prādium
rem vulgatissimam quasi incognitam, & inusitatam
recenseo. Cum maximè, & ante prandium cibo quon-
dam veteres vescerentur, quem ientaculum appella-
bant, quia eo ieiunium solueretur. Nigidius, Nos ipsi
ieiunium ientaculis leuibus polluimus. Et illud Plauti
num, me inferre Veneri noui iam ientaculum, quid

antepones Venerea ientaculo. Suetonius item in vita Vitellii, epulas trifariam semper, interdum quadrifariam dispartiebat, in ientacula, & prandia, & cœnas, comestationesq;. Quis præterea merēdam ignorat, eamq; & apud veteres vsitatam, dictam quasi meridie edere, quam nonnulli antecœnam vocarūt, quòd proxima esset cœnæ. Verum hic error, qui in præsentia Atticum habet, emanauit, vt opinor, quòd legunt præsertim apud Isidorum in vsu prandia nō extare, putantq; prandium ibi ad esum referri debere, cum nullam vtiq; comestionem respectet, sed vocabulum, quod est prandium prandii: quod & Pompeius Festus præcipuæ auctoritatis grāmaticus probat in hæc verba. Cœna dicebatur apud antiquos, quod nūc est prandium: Vesperna, quā nunc cœnam appellamus. Cum illud itaq; legis ò Attice in vsu prandia non extare, suppleas, sed prandii loco cœnæ erant, vt ait Festus, idq; etiam prudenter intelligas, scilicet apud vetustissimos prandii verbum non extare, nam qui à Festo habiti sunt antiqui, à nobis vetustissimi ritē vocabuntur, & habebuntur: nec Plato ipse bis in die comedere improbauit, sed bis in die saturum fieri. Vale.

Ant. Panhor. Francisco Piccinino. S. P. D.



Ateor & apud te fili Piccinine me sæpiusculè detestatum, atq; etiam execratum fuisse diuturnissimum, ac putidissimū tuum istud

silentium, neq; te filii, neq; amici officium fecisse dixi. Pluribus te quidem literis, pluribus te etiam nuntiis pulsaui, tuumq; ostium perstitit occlusissimum, cū interim tuæ epistolæ circumferrentur ad alios, & item alios, Dii immortales, quales homines nēpē impuros, & amicos fulgore, quiq; te ideo amare, & observare videantur, quò mihi ex tua consuetudine dolori sint, & admirationi. non te amant, utiq; non amant mali, sed me odio habent. Quid facerē ego, quæ mens, qui animus mihi fuerit, cū hæc terrarum crimina, hominū portenta circumblaterent? Piccininum esse ipsorum amicū, familiarem, benefactorem, Panhormitā verò destitutum: literas ostendent ad se tuas, & frequentes, & officiosas. audiam ne hoc, & non dolebo? videbo ne hoc, & non querar tuam taciturnitatem? nā quid ego contra exhibeam signum benevolentiaē nostræ? num literas? qui non annum, sed ætatē à te literas non accipio: num salutationē? qui proximè ad Antonium scribens me nec nominas, nec salutas. Paterer tamen ego omnia q̄q̄ verus amor non patitur moras: paterer in quā à te omnia, modò inimici mei non exultarēt, aut mihi etiā non obijcerent lentitudinem tuā. Quare mi fili suauissime te & moneo, & rogo, ut hoc tēpore maximè, cū maximè tua opera, & auctoritate indigeo, cōtra maleuolos detractores, me gratia, & favore nō destituas. Quod enim animo facis, exterius etiā neq; literis, neq; signis benevolentiaē me deseras: amicus certus

vt ait Ennius, in re incerta cernitur : quo facto & à me non mediocrem molestiã amouebis, & tibi magnam pietatis, atq; constantiæ gloriam vendicabis. Vale.

Antonius Panhor. Piccinino filio. S. P. D.



Vbiratus tu quidem ad me scribis, atq; ego subridens quæ scribis lego, ac gaudeo plurimum tua ista ne ua, & recenti indignationicula, vt quæ mox conflatura sit, aut rectius corroboratura ingentem charitatis, & beneuolentiæ flammam. Equidem volui stultorum cōmertia effugeres, volui, ac vehemēter volo, sit modò id possibile. stultorū plena sunt omnia, & quoquò te verteris, stultus præsto est. est igitur hoc ipsum quod tibi cupio difficile, fateor: sed virtutis comes est difficultas. Verū his missis, respondes te stultos non nosse, nec etiam amare. ergò me longè fortunatior es certè, qui stultis vndiq; circumstipor, cum stultis ambulo, cum stultis conuiuo: hoc est quod desiderabā tibi non euenire, quod ipse non possum effugere: tibi quàm mihi magis benè esse concupisco: quid nī: filius es, & ita propalām habetis: atqui quoniam à stultis vacas, planè es, vt Poeta ait, gallinæ filius albæ, Nos vilis populus nati infelicibus ouis: & his, & superioribus illis tecum iocor. Vale, & quicquid à me effluit, à patre dictum puta. quicquid verò obscursum, & dubium tibi videtur, ridiculariū est: aut si serium esse vis, id aliquando accipies à me vi

uo sermone. De oratiuncula mea nihil scribis, at ego vereor, naufragus omne fretum: dum verò id taces, multa tibi erit obscuritas epistolarum. Iterum vale cum Palatio desiderio Panhormita.

Antonius Panhor. Francisco Piccinino. S. P. D.



Mendaui pro meo iudicio literas nostræ suauitatis Cremonæ, non quòd indigerent correctione, sobriæ quidem, & ornatae erant, sed volui illi morem gerere etiam in ea re, in qua minimè opus erat. Ea enim modestia vir est, ut vel ea quæ probè scit, nescire se arbitretur: ea etiam amicitia flagrat in me, ut sine me æternum fieri se non velit. Gaudeo itaq; tali amico, gaudeo & tam docto homine: tu si itidem beare me vis, dato operam recuperandi mihi Tulliolum, id est animulam meam: nam Iacobus Mestiolani est, quod cum feceris, ad glebam me utiq; obligabis: si rogas à me quid te putè posse, multa posse respondeo, & hoc ipsum posse, quod peto, & mihi nihil acceptius facere posse. Vale.

Ant. Panhor. Francisco Piccinino. S. P. D.



Oannes Olearius egregius Causidicus, & amicus meus Mécœnatis beneficentissimi opera, & suffragatione indiget, & in re quidè per honesta: vnice sanè bonus vir est, & in hisce Tici-nensibus velut scœnix. Magna ubiq; penuria Ciuium

bonorum, hic maximè, vbi si quem huiusmodi ciuem
 offendas, album, vt aiunt, coruum offendes. Eo igitur
 maiore gratia, & fauore dignus est, quòd vnus ex infi-
 nita ferè multitudine emerferit & bonus, & bonorum
 mihi crede apprimè studiosus. Quare per tuam in me
 pietatem fili te rogo, meum hunc Olearium Mecce-
 nati commenda, faciliè enim quàm gratum facies bo-
 num bono. Tu, si me amas, hominem pro tuo amore
 suscipias comiter, & vrbane: cui si quid benefeceris
 operam non ludes, gratissimus, ac beneficentissimus
 est Olearius noster. atq; hinc illi nomen Oleario est,
 quòd oleo scatet, id est lenitate, suauitate, vrbanitate.
 Postremò ad hanc rem velim memineris amoris mei,
 & quòd Plautus monet, Cum bonis fit beneficium, ea
 gratia grauida est bonis. expecto igitur scire à te quid
 feceris, & ab illo mihi gratias agi. Vale, & valeat hu-
 manissimus Marcolinus, & Feruffinus.

Ambo iacent, ambos erigat, oro, Deus.

Antonius Panhor. Piccinino filio. S. P. D.

Bellè quidem Cremona noster me secum
 apud Pontifices fuisse comestatum, & debac-
 chatum ait. Quid ni? & Catonem ebrium le-
 gis, & Homerum vini vinosum: & Ennius ille pater
 nunquàm nisi potus ad arma prosiluit dicenda. ego
 neutiq; siccus ero cum Cremona madido, nec grauis
 vnquàm cum eodem scurra. Cum amicis iisdemq;
 emendatis

emendatis viris interdum insanire prudentia est. Cum Cambio, cum Scipione me interdum saltitare, quis prudens prohibeat? tu fili si semel in anno insanis sanus es, nisi cum stultis cōmertium habeas, nam ne semel quidē insanire cum stultis licet. hætenus vt Cremonam, & me expurgare miocatus sum. De oratiuncula mea ex te aliquid quod iuuet audire concupisco, verum non magis rationē desiderii, & amoris, quā ueritatis habeas: hoc est si minus illa collibuerit, minus collibuisse significes volo, quò aliās studeā placere, ac satiscumulatius facere. Duo sunt, quæ in te vehementer optarim, apertum esse, stultorum amicitiam haud magni facere, quorum primū in te probè compertum esse habeo, postremū non satis. Perge igitur, esto simplex, ac sincerus, quod facis, & quia facis maximè gaudeo: nihil est magis contrariū veræ amicitia, quā dissimilitudo morum. Vale.

Antonius Panhor. Piccinino filio. S. P. D.



Gitur cras, id est die lunæ Laudā, aut mauis Laudentē repeto, ac summo studio curabo Principi satisfacere:figurationes depingi faciam manibus puris, neq; eas certè tetigero, idq; audacter adiurabitis. siquidem nostri Principis salus vt mea, est sic mihi maximè curæ, & cordi. tantū pictorē instruā, cætera pertractabit Antistes noster. Quāprimū verò Laudā applicuero, rescribā Principi, quid

H

sibi vult draco ille suus : qua in re, nisi fallor , satisfaciam probè, idq; subitò renuntiabis Andreae nostro: & posthac Laudã dirigitoliteras apud Antistitem Deorum mel. Interim, quod facitis, pugnetis pro parte contra Rhodianos, genus hominum teterrimum. Postremò fac per Deos te oro fili, vt singulis diebus à te literas recipiam, & meam hanc paruiloquentiam feras æquo animo. Vale.

Ant. Panhor. Francisco Piccinino filio. S. P. D.



Nas tantum à te literas Papiæ accepi, neq; anteriores illas adhuc olseci. Quicquid adfigurationes scribis, mirificè placet, & vt pietati, ac studio Principis, sic diligentia tua habeo gratias, at Principi satisfaciam oportebit: verum est opus vt Laudã repetam pro pingēdis imaginibus: qua de re Andream etiam consultes, velim, & ad me secum per proprium nuntium sine mora rescribas. Igitur Principi satisfacturus sum, deinde Meccenatis desiderio, postremò tibi literis aureis. Interim, quod sæpe dico, feras æquo animo paruiloquentiam meam, tum apud Cambium curiæ lumen excusatum me reddas. Mitterem ad te luculentissimos quosdam versus, ad me nuperimè adsignatos, nisi vereretur ne perdantur, vt potè è Papatia venientes. Tu vale meum decus.

Ant. Panhor. Piccinino Magno. S. P. D.



Lteras tuas illas, quas nondum olfeceram, accepi, sensiq; iam vnguenta, & suauitatem mularum: tum desiderium erga me tuum ex imo, vt aiunt, corde sum exosculatus. Curabo iterum Principi satisfacere, quod confido fore: atq; vtinā ne pictor ille Laudēsis me detineat in mora, coq; pacto præueniant riuales: quod velim, quoad liceret, animaduertes, nam studeo illos vel celeritate superare: sed me angit, quòd Laudæ nō extat pictor, præter eum quidem, & vnum, & luscum, & senem, & difficilem. Ibo cras igitur Laudā, vt hoc mane ad te verbo sius scripsi. Cætera committo amorì, & diligentia tuæ. Ego sexcentas quidem figurationes animo habeo. Vale meum lac.

Ant. Panhor. Francisco Piccinino filio. S. P. D.



Michaele nostri huius Pontificis nepote homine, vt nosti, per humano, & tuo, accepi tuo nomine, me esse immemorem magni Cambii, & ingratum, & fortunas hominis potius quàm virtutem, aut amicitiam sequentem: non est ita, non est. nam quod ego struo, nisi sis Oedipus, diuinare nō potes. amaui iam Cambium, id & tu scis, & verè omnes intelligunt: amo nunc Cambium aliquantò etiam ardentius, id pace tua dixerim, neq; tu scis, neq; alii intel

ligunt. Cambius hoc ipsum vnus scit, & intelligit: mecum est Cambius, non est mortuus, nō est, viuit apud me Cambius, loquitur, suauiter philosophatur: item lectitat, pransitat, dormit, ego velut Numa, ille Egeria. Tu Vale.

Ant. Panhor. Francisco Piccinino. S. P. D.

Satis abundē tecum iocatus sum superioribus epistolis, satis superq; & in Cremonam constantissimum inuectus sum, nunc illud Horatianum seruandum. Lufisti satis, edisti satis, tempus abire tibi est. Ioco vel maximē modus dandus, ne scurram agamus: qui pauxillum iocatur, urbanus est, qui sæpē, & multum scurra, qui nūquam rusticus. Atqui cernere erat nostri Cremonæ paciētiā, quamuis enim contumelia prouocatus, per iocū dicta sicut erant, accepit omnia, nihil omnino commotus: traduxit etenim vitam non per potiones, vt iocabar, sed lectiones, ac disputationes: omnis sermo de honestate, de paciētia, de literis fuit: de te multa quidem loquuti sumus, aderas, quāquam absens, & lectionibus, & disputationibus nostris, tua fides, tua amicitia, tua stabilitas plurimum commendata est. Quæ omnia malo à Cremona ipso accipias viuo sermone, quàm me adfentatorem putes, dum te meritissimē laudo. Quod reliqui est, item intelliges auuditatem meam recuperandi cuiusdam libelli à Zambiccario nostro, qui centies

mihi reddere pollicitus, vereor ne propositum muta-
uerit, dum differt restituere: tu autē si id feceris, quod
vnus facere potes, vt codicillū mihi restituat, immor-
tales tibi sum gratias habiturus, & prædicaturus
quasi quendam beneficiorum Deum: potes multa, fa-
cis multa, sed nihil ego à te vnquàm maiore cum de-
siderio expectaui, quàm nunc codicillum hunc ani-
mulam meam. Vale.

Ant. Panhor. Andrea Palatio. S. P. D.



Vdio te per quàm iucundum esse Cambio
meo, proinde velle ea sola ratione cogor te
prolixè diligere: viri quidem illius iudicium
tanti facio, vt quos ille probet, ego venerer, quos dili-
gat, ego deamem, quos ue obseruet, ego religiosissi-
mè colam. acre nimirum & singulare iudicium est
Cambio, vt qui iuxta secum non sentit, is nihil sen-
tiant oportebit. Alioqui sunt in te quoq; artes in-
genuae, mores egregii, studia deniq; humanitatis,
atq; omnia insigniter. Quas ob res etiam qui er-
ga te non incenditur, barbarus vtiq; ferreusq; est.
Faciunt hæc, atq; alia huiusmodi, vt te, licet absen-
tem, & quem nunquàm viderim, vnicè diligam,
& abs te redamari quàm maximè desiderem: quod
si concesseris, ingenti me profectò voluptate affe-
ceris: ea si quidem voluptas, quæ ex amore pro-
ficiscitur, una est & præ aliis iucunda. Quam re

ne me fraudes te peto, & si pateris, oro mi iucundissime Andrea. Bene vale. ex Cambio viro primario intelliges desideria, & vota nostra, quæ tibi iterum atq; iterum commendo, emes me medius fidius hoc tuo beneficio, meq; uti, & frui poteris pro tuo arbitratu.

Ant. Panhor. Andrea Palatio. S. P. D.



Ccepi nuper à Cremona nostro quantope-
re me quotidie augeas, & honestes apud
Cæsarem, & Mæcenatem, quod quidem
haud nouum, sed periucundum mihi exitit. ea enim
natura es, & ingenio præditus, ut semper benefacere
studeas, iis præsertim, quos aut doctrina, aut bonita-
te præstare arbitraris: facis profectò quod debes, ni-
hil enim virtutis proprium magis est, quàm viris po-
tissimum bonis prodesse: neq; conuenientius naturæ
tuæ, quàm benignitas, atq; humanitas. sed utinam
ego talis vir sim, qualem me existimas, utq; alij pari-
ter me existiment, contendis, & eniteris. equidem ni-
hil addubito tua hæc de me singularis opinio magna
ex parte & te, & tibi credentes frustrabitur: sed eo me
consolor, quòd me saltem gratum, & memorem vi-
rum intelliges, ut si præstantia non respondeam, me
tamen tibi, vel ipsius animæ debitorem perpetuò con-
fitear, & decem. Emisti me ergo tuis beneficiis, quo
si posthac non vteris, & abuteris, erit non quidem mo-
destiæ, sed insignis cuiusdam potius avaritiæ, ut intelli

gas nihil mihi voluptuosius euenire posse, quàm si me familiaris, & liberius vti cœperis. Quod reliqui est accipies à Masino fratre suauissimo, quem si studiis hîsce nostris addixeris, tantum illi conferâ, quantum summa mea erga te, & tuos omnes charitas, & obligatio exigit: & summam nisi mea opera, meisq; facultatibus vteris, in fratrum tuorum præsertim ornamentis, facies sanè rem impiam, mihiq; admodum grauem, & molestam. Vale mi Palati dulcissime.

Ant. Panhor. Andrea Palatio. S. P. D.



Vm euntem, & redeuntem à Sigismundo Cæsare Benedictum Forliuatem visitassem hic Ticini, vix primis illis salutatoriis verbis absolutis, sermo de te statim incidit amplius quidem, atq; magnificus, mirificè enim de te, tuaq; industria sentit, & iudicat, mirificè prædicat. homo est, vt mea fert opinio, vnus omnium memor, & gratus, & in quæ beneficia nulla perdantur, à te præsertim, à quo & si immortalia beneficia accipisse autemet, & quibus haud quaquàm referre gratias queat, tamen ea verborum magnificètia, & auctoritate te exornat, vt maiores à viro grato desiderari neq; debeât, neq; possint. Qua ex re tibi plurimum gratulor, quippe qui talem tuæ virtutis buccinatorem, & prædicatorem inueniris: amat te tantum præterea, quantum demiratur, nec me in amando fallere potest homo omnium pu-

rissimus, ac luculentissimus: in prouerbio est, vt tussis, sic nec amor occultari potest. Dii boni qua ille affectione de te loquitur, qua pietate deosculatus est fratriculos tuos, qua tandem auiditate sitit Abbatē Masinum, qua gratia, quo studio, qua charitate completitur tuos omnes? Iam vides quid à te vicissim, quid à nobis omnibus faciundum sit, si in amore vinci volumus: qua in re superari maximè turpe est: igitur hortatu meo hominem, quod facis, honestabis, & augebis, tuisq; hanc suppellectilem auream conseruabis, & continebis aeternum. Vale.

Ant. Panhor. Andreae Palatio. S. P. D.



I mihi aditus ad te pateret, & nostri Principis interdictum ita permetteret, non literis ego tecum egissem, sed aduolassem nimirum, ac coram fuisset te solatus: non proinde quia ad dolorem admodum medicina indigeas, forti enim, & armato animo esse consueuisti, sed quod ipse pietatis officium, & charitatis munus explesem. Sed veter licet ad te ire, hoc certè nusquam prohibebor, animi sententiam literis commendare. Heri itaq; nobis adlatum est acerbissimum, & infelix nuntium de migratione Alexandri fratris: quo primum quidem indoluimus, ac quanquā inter Philosophos & nati sumus, & quotidie obuersamur, non potuimus non commoueri morte ornatissimi, ac consumatissimi adolescentis. mox

verò

verò vt rationis, & sapientiæ arma, atq; antidota succurrerunt, leuati sumus: & ea sunt. Principiò sic omnes natura creati sumus, vt mortalitati debeamur, neq; personarum delectus vllus, neq; discretio est: moriuntur diuites, moriuntur tenues: occidunt pii, occidunt impii: deficiunt pueri, deficiunt senes: &, vt Satyricus noster inquit, Ossa vides Regum vacuis exuta medullis. Itaq; Dei, & naturæ instituto nascimur, vt moriamur: vt cum tale aliquid obtigerit, piaculare sit, non æquo animo ferre, quod Deo placitum est, & naturæ. Quod & Satyricus alter elegāter ait. Lenius fit patiētia quicquid corrigere est nephas. Deinde cum huius vitæ perpetuos labores, fluctus, atq; pericula repeterem, infinita quidem & corporis, & animæ, satius, tutiusq; existimabam hominem mori, & Deum Patrem repetere, dissolui, & esse cum Christo, quàm hic viuere, vbi vita mors certa foret, & æterna. Sanè bonis, & emendatis hominibus, præsertim christianis nihil charius, nihil optabilius esse potest, aut esse debet, q̃ hisce exuuiis, vt ita dicam, carcerariis exui, eoq; migrare, vbi beati æuo fruuntur sempiterno. Ea ratione credo adductus Empedocles Agrigentinus pater ille Philosophorum, & decus, Aetnâ insiluit, fortiter quidem, & sapienter, vt & Philosopho, & Siculo par fuit. hoc enim ipsum, quod reliqui ferè omnes mori existimant, ille viuere est arbitratus. Atqui nobis non gentibus, sed christianis id quidem non

licet, mortem namq; nobis conscire diuinæ legis præcepto prohibemur: si mors autem accidat, seq; vltro offerat, suscipienda alacriter est, atq; amplectenda, quasi Dei immortalis beatissimum donum. Hinc Pericles Atheniensis cum clarissimis duobus filiis esset orbatus, nō modò vultum, aut orationem, quam per id tempus agebat, non commutauit, sed ne coronam quidem capite deposuit. Præterea quis mihi affirmauerit nostri huius adolescentis vitam diuturniorem non propinquorum, & necessariorum exitio futurā? Erat in faucibus hostiū, erat præses exigui oppidi, & immuniti: poterat ergò vel facile expugnari oppidū, & adduci ipse captiuus. Pone eum captum, quē vtiq; omnes admirantur esse non captum, non tunc & Palatianæ domus calamitas subsequeretur, & amicorū omnium desolatio captiuitate vnus? Scitè admodum Epichetus Philosophus: Non omnimodo Diis exosos esse inquit, qui hac vita cum ærurnarum varietate luctantur: sed esse arcanas causas, ad quas paucorū potuit peruenire curiositas. Ego mihi sæpe persuasi, quicquid bonis in vita accideret, quanquam id triste, aduersumq; videretur, esse lucrificandum: atq; eum prorsus infelicem censendum, qui semper felix habitus esset in vita. Postremò virtus ipsa, ac bonitas Alexandri obuersabatur oculis meis, & grauitas in adolescente, qua posset etiam senes prouocare, & vincere, religio in Deum, pietas in parentes, studium in

fratres,iustitia in cunctos. Quæ cū ipse meminissem, more Xenophontis Socratici maiore ex virtute adolescentis voluptatē, quàm ex obitu dolorem percipiebant: eius enim virtutum memoria, quanuis ipse decesserit, suauissimè fruor, atq; delector: sola enim virtus non interit, quæ & facit, vt nunc, semperq; viuat apud me suauissimus Alexāder. His ego, & similibus Andrea fili rationibus, atq; argumentis me ipse consolatus, institui & Palatiolum velle delinire: is enim accepta desideratissimi fratris morte fleuit ad horam, mox libros poposcit Tullii, & Basilii, quorum lectione, & exemplis ipse erigeretur. Tum ego oportunitatem nactus, Heus inquam Palatiole, quo pacto fers optimi fratris casum? num Philosophorum fortassis oblitus es? num fortissimorum hominum, quos cum mortem filiorum, tum patriæ euerсионē, tum siquid etiam tristius fieri potest, magno, atq; robusto animo tolerasse, crebrò lectitamus? tum ille, grauiter, fateor, primò nuntium audiui, mox verò vt in mentem venit, quàm plurimos esse homines, qui nullos fratres habuissent, mihi tres adhuc reliquos esse florentes omnes, & ornatos aliquantò sum refocillatus, Deo q; laudes, & gratias de superstitiis habeo potius, quàm vt defunctum iam amplius lugens, ingratus, & iniquus videar erga Deum. Habes nunc quibus ego, & egregius puer Iphicleus Palatiolus argumentis à mœrore, atq; omni propemodum afflictione liberati simus,

quod tibi animo cognitum ea saltē ratione volumus,
quod ex nostra animi tollerantia non mediocre te re-
frigerium esse capturn ariolamur. Cura ut valeas,
atq; illud te ne fugiat ab Aristotele sapienter dictum:
Principum ministros alacres, & iucundos esse de-
bere. Ex Stratella.

Ant. Panhor. Andreae Palatio. S. P. D.

Terū à te mihi literæ delatæ sunt, hæc; bre-
ues, & Laconum ritu circumcisæ, refertæ ni-
hilominus & pondere, & efficacia. Lacones
enim, quos tum Lacedæmones, tū Spartanos appel-
lamus, hac præcisi sermonis breuitate admodū oble-
ctantur, & succinctum hunc dicendi modum quasi
peculiarem sibi vendicant. Lacedæmonii Philippo,
Dyonisius Corinthi est, nec plura. huiusmodi enim
sermo vehementius sauciare animos auditoris vide-
tur, quàm si vberiore verborum circumitu dixissent.
Quanquā Dyonisius latè, atq; amplè iam pridem do-
minatum obtineret, ut tu nunc in præsentia, tamē pri-
uatus, & extorris, amisso regno Corinthi domicilium
habet. Tuæ itaq; id genus epistolæ non proinde mihi
minus gratæ, & iucundæ sunt, quia breues, & circumci-
sæ, & Laconenses potius quàm Parmenses, cum sint
eandē acres, & ut ita dixerim, succi plenæ: quibus inter
legendum mirificè inflammor erga te, tuosq; mores
sanè liberales, vereq; palatinos. Quid enim efficacius,

quid ue studiosius scribere potuisti, licet breuiter, q̃
 me diuino Principi gratiorem in dies magis, magisq̃
 fieri: quàm exorasse te literas vndequaq; meam lau-
 dem, & amplitudinem concernentes: quàm deniq; te
 effecturum polliceri, ne vel ipsa vtilitas, aut tuo mo-
 re tranquillitas animi, honori desit? Id & si tu Laco-
 num breuiloquentia exprimis, periucundum tamen
 mihi sit, eoq; me mouet magis, quò breuius dictum,
 vel si posthac libitum sit dicas in hunc modum. Ille illi
 salutem, laus & gratia tibi parita est apud Principem,
 vtilitatē sperato mea opera. Vale, vel etiam: breuius
 dummodò scribas. Ille illi, vtilitas etiam impetrata
 est, nec plura. Quid enim præcisius scribi, aut cogi-
 tari potest? erunt tamen hæ literæ mihi multò suauio-
 res, felicioresq; quàm meæ tibi, quanquam sint lon-
 giusculæ. ab amicis enim, quod sæpè dico, beneuo-
 lentiam potius, quàm eloquentiam desidero, licet vt
 ante dixi tua lectitans, vehementissimè concitari me
 sentio, vtiq; magnæ, & exquisitæ cuiusdam eloquen-
 tiæ coniectura. Vale.

Ant. Panhor. Andrea Palatio. S. P. D.



Vò magis, ac magis illā diuini nostri Princi-
 pis responsionem animo repero, eò magis,
 ac magis ipsius liberalitatem, ac beneficen-
 tiam admirari cogor: & sperare desideriis meis.
 Facit ille profectò rem se dignam, qui complecta-

tur cum charitate, & benignitate incredibili seruos, aut quos mauult appellari familiares, & deuotos excellentiæ suæ, eosq; prosequatur laudibus, & benemeritis. Hoc sanè Principis officium est, dignoscere in primis beneuolentes sui: illosq; exornare simul, & augere, atq; eo pacto id est gratia, & mutua beneuolentia sibi reliquorum, vel exterorum animos aucupari. Quàm scitè quidam interrogatus, quid est Regē esse? diligi, & obseruari inquit. Ego quidem in iis esse debeo, & sum meherclè, qui pro Principis studio, & pietate immortales ei laudes, & gratias habeam, simq; apud gentes omnes perpetuò decantaturus, in deuotos eius nominis gratitudinem, in bonos obseruantiam, in peregrinos charitatem, in omnes humanitatem, in me simul hæc omnia, & plura etiam officia: ex quo iam deleo ex animo Siciliam, Panhormium, Bononiam, parentes, fratres, reliquosq; fermè innumerales propinquos, & affines meos. Ipsi perpetuò inseruam, ipsi viuam: ipsi poëter, ipsi deniq; quicquid in me est aut ingenii, aut industriæ, aut fidei, ipsi inquā vni dedicem, deuoueam, tradam necesse est: & quod Horatius ait, secum viuere amem, secum obeam libens. Quod reliquum est, studiis illis incumbam, ac toto quidem pectore, quibus vt darem operā iussu eius mihi renuntiasti. Quam in rem velim intelligat, me iam septem, & plures annos intendisse, tum modestiæ, & existimationi non minus studebo, nec ingenio so-

lum, sed morum sobrietate curabo, ut sua dignus veniam opinione, & obseruantia. Interim curato tu, ut euestigiò describantur, emittanturq; mihi literæ familiaritatis, quas, ut humanissimus Princeps est, ita te internuntio mihi perhumaniter pollicitus est, prospiciens ea etiam ex parte laudi scilicet, & gloriæ meæ, nec non meorum gaudio, ac propè felicitati. Mihi quidem nihil laudabilius, nihil præclarius euenire potest, quàm si omnes intelligant, me non familiarem, sed famulum esse huius tam excelsi, tamq; dignissimi Principis, meis verò nihil æquè iucundius, aut optabilius futurum est scio, quàm si quid tale de me sentiant aliquando. Deinde erunt exarādæ literæ propinquis ipsis, & necessariis meis, ut accipiant vel ab ipsomet Principe, me designatum esse familiarem domesticū eius excellentiæ, idq; eos ferre literis exhortetur æquo, & tranquillo animo, licet ob eam rem sponte, & immortaliter gauisuri sint, certo sciō. Consanguinei ipsi mei Deorum benignitate sunt propè innumerales, sed ut res deducatur in angustum, scribat tantum Iuliano, & Ioanni dulcissimis fratribus germanis meis, apud Panhormium eosdem commēdet ipsi Alphonso Aragonū, & Siciliæ Regi sapiētissimo, hoc est, quod humanissimus Princeps vltro mihi, & liberamente offert, quodq; & ego annuo, & suscipio libens. Tuæ partes sunt procurare, ut statim literæ eiusmodi mittantur, & Principi me iterū, atq; iterū dedere. Vale.

Non me germani, patriæ nec dulcis amores
Solicitant: me solus habes, mea pectora versas,
Solus & ante oculos, noctuq; dieq; pererras.

Ant. Panhor. Andrea Palatio. S. P. D.



Ccepi tandem à te VI. Cal. Martias epistolam, cum non solum admirarer, vt arbitraris, sed etiam execrarer tuam istam aut obliuionem, aut taciturnitatem: nam quòd mihi silentiũ suadet, id est scilicet, ne videar aut petendo molestus, aut cupiendo ambitiosus. Cæterum quòd à me petis epistolas, si quas aut Cæsaris, aut Alexãdri habeam, possum in ea re tibi, & Principi consilio potius, quàm auxilio satisfacere, siquidem apud me minimè sunt, neq; vndè illas, si quæ extant, extorquere possem satis adhuc intelligo, nisi à Nicolao Nicocli solertissimo antiquitatis, ac rerum huiusmodi scrutatore. Ego verò hortor, ac moneo Principem nostrum, vt commentariis potius ipsius Iulii Cæsaris, quàm per paucis eiusdem epistolis oblectetur, ne plus in quærendo, quàm in legendo temporis conteratur. Rursum extant gesta, ac dicta Alexandri, à Q. Curtio luculenter, atq; feliciter scripta: quæ si semel tantũ degustauerit Princeps, nihil suauius, nihil optabilius, nihil deniq; Principum lectione dignius sese legisse, vel audiuisse fatebitur. sed sus Mineruam. ego in quã epistolas, quas tantopere concupiscis, non habeo, quod pro tuo in Principem

cipē desiderio, & in te meo grauiter, & molestè fero. Quod reliquum est, puto tibi iam innotuisse Augustam necessarium meum non in dies, sed in horas aduenturum ad me Papiam, quò me secum in patriam reuehat, quod ego iam dudum veritus, & vaticinatus sum: quò sit, vt ni statim prospexeris rebus meis, quæ & tuæ sunt, sis omnino me cariturus: verum hæc à Cambio prolixius accipies. Vale.

Antonius Panhor. Guasco suo. S. P. D.



Vòd binis tuis literis nihil respondeo quere ris, meq; & lentitudinis, & ingratitude ac- cusas, neutrum sanè in me vitium: non enim lentus in scribendo appellabitur, cui scribēdi potestas obnegata est: neq; ingratus is erit, qui beneficii me- mor est, & in amore non vincitur. Duo sunt, quæ ve- lim tibi persuadeas, à me vnicè te vnū ex omnibus dili- gi, & in tuā rē neq; fuisse, neq; fore negligentē. si quod desi- deras, fieri nequit, quid me insimulas? at saltē scri- bas, neq; id datur, & tamen scribo: nam qui amat, ne- minem omnino veretur. Vale meum desiderium.

Ant. Panhor. Antonio Theologo. S. P. D.



Ite- ras à te proximè accepi, quibus vt vnà cō- ueniamus hortaris gratia benevolentia in- ter nos reintegrandæ. Id ego & laudo, & iux- ta tēcum concupisco, sum profectò qui cuiunque

& tibi maximè gratificari velim : neq; idipsum, quòd in præsentia efflagitas, per me steterit antè hac, quo minus fieret, vt tu nosti. Rursum petis, vt interim ab inuectiuis abstineam, idq; etiam tibi assentior, & calamum frango, tu modò perstes in proposito. Ego quidem à Diis immortalibus nihil vehementius peto, quàm pacem, atq; animi tranquillitatem. A Feruffino, & Cato ne Iurisconsultis salue, & Vale.

*Antonius Panhor. Bartholomeo Senensi viro
suauissimo. S. P. D.*



Iteris his, quas domino Gubernatori mittimus, ab eo commodato petimus ad breue tempus eos legum textus, quos Mediolani habet. Infortiatum, Digestum vetus, ac nouum, & ne scio an Codicem præterea habeat : tuum officium sit curare, illos ex continenti habeam, statimq; mihi mentem Præsulis renuntiare. Qua in re si quid suasione opus est, Tullius esto. Cum Henrico tuo viro iucundissimo societatem scolasticam coiui. Te diligit, & quidem ardentissimè, tuos amores narrat, tuas ægritudines : quod, quia in præsentia liber, & sanus es, voluptuosissimè audio. Cura de in te molliter Bartholomee mi dulcissime, etsi quid in rem meam adstruxeris, mihi significato. Vale meum pascha, è me item valeat tota Præsulis humanissima domus, & familia.

Ant. Panhor. Bartholomeo Pontifici. S. P. D.



Apiam, siue vt mauis Ticinum Diis gratia contigimus fortes, & incolumes: vbi gētium moram producam, quoad tibi, vel Diis collibitum fuerit. Literas tuas reddidi: exceptus sum comiter tum à Gaspare tuo, tum à Feruffino clarissimo Iuriconsulto: tu verò siquid interim in me augēdum, atq; honestandum adstruxeris, crede mihi, mihi inquā crede, haud minus gloriæ tuæ prospicies, quàm vtilitati meæ. Ego verò iuri ciuili interim operam do, & si studiis his meis consuli concupiscis, tres illos, aut quatuor legum textus, quos Mediolani habes, tantisper mihi commodato concedes, dum meos partim ex Bononia, partim ex Senis accepero: efficacius non rogo, ne tuæ beneficentiæ, & in me beneuolentiæ diffidere videar. Vale meum sidus, meq; vt facis, perseueranter ama: ego nite prolixè diligo, atq; vnicè obseruo, dispeream.

Ant. Panhor. Bartholomeo Pontifici. S. P. D.



Non poteram equidem gratiore, aut iucundiore nuntio affici vir humanissime, quàm eo, qui proximè mihi ab Ioannis Lamolæ docti in primis adolescentis, & emendati literis allatus est. Siquidem enuntiat, quod ego magni semper æsti mai, quodq; mirificè concupiui, me tuam gratiam

inuiffe iam. Cum enim ſæpenumero tuum ſuaue in-
 genium, doct̃inam, animi virtutes, à maximis, ſpecta-
 tiſq; viris celebrari laudibus audirem, mirum in mo-
 dum me ipſe alliciebas, perfringebas, irrepebas de-
 niq; in ſenſus meos: fiebatq; vt te, tametſi nunquam
 videram, tam ardentè diligèrem, quàm te illi vehe-
 menter laudarent, probarentq;. fatebor in amore mol-
 litiem meam, nunquam beneuolentiæ impetum con-
 tinere potui, ſi modò cuiuſpiam fieret aliqua virtutis,
 aut probitatis ſignificatio. natura quidem omnes in
 amore procliues ſumus, eorum præſertim, qui præ-
 ſeferunt aliquam probitatis lucem. Quorſum hæc?
 vt intelligas me iam pridem in te, tuosq; mores affe-
 ctum, incenſumq; in præſentia verò quoniam & abſ-
 te multa charitate diligere me audio, adeo præ lætitia di-
 ſtractus, adeo diſtenſus ſum, vt ſi vngula vel leuiter
 me contingas, facile me totum dirimas, aperias. Quis
 me felicem, & beatum nō putet? quis me vera, & præ-
 cipua laude dignum non exiſtimet? quis me perſpe-
 ctum, & abundè iudicatum non habeat? qui tam præ-
 claro, tam magno, tam graui, tam deniq; literato viro
 placuiſſe, & amicum fuiſſe cognouerit? Quæ ex re ſi
 quando miſis habui gratias, nunc maximè & habeo,
 & ago peringentes certè, quæ me voti compotem ef-
 fecerunt: quæ quidem in re illud pro virili ſemper ad-
 nitar, vt perpetua ſit amicitia, quam muſæ ipſæ conci-
 liarunt. Et ſanè cū alioqui haud facile amicitia ad po-

streptos cineres perduret, eam tamen, quam musæ deuinxerunt, à musis didici perpetuâ simul & memorabilem esse solere: sed de amore hæc tunc. Nunc ad Lamolam nostrum redeo, is me per epistolas rogat, & quidem tuo nomine, vt Hermafroditum meum ad te propediem mittam: ait enim incredibilem tibi sitim incessisse videndi eius, & lectitandi versus meos. Ego cum primò subsisterem, siquidem res admodum lasciuia est, & adolescentis opus, dein certa ratione decreui, quicquid id esset, pro tuo iussu dimittere: vt si quid tuis moribus, tuaq; ætate alienum offenderes, esset quod tibi potius imputares, qui id exegeris, quàm mihi, qui vt tuæ voluntati obtemperarem, exhibuerim. Mitto igitur tibi meum Hermafroditum, libellum quidem lasciuum, sed ea lascitia, qua summi oratores, sanctissimi Poëtæ, grauissimi Philosophi, viri continentes, & christiani deniq; prælusere: & sanè castum esse decet pium Poëtam ipsum, versiculos nihil necesse est, quod tu pro tua eruditione plenissimè nosti. quare hoc apud te prolixius tractare, esset quod aiunt, Mineruam edocere. Illud autem simplicius, & amicitius feceris, si quod de eo dicturus es aliis, id ipsum egeris apud me, vt quid de me sperandum sit, ex tuo magno, acriq; iudicio deprehendam, atq; constituam. Vale meum decus, tibiq; meam musam habere, eamq; desidia indormientem quandoq; excita.


*Antonius Panhor. Bartholomeo Pontifici
Mediolanensi. S. P. D.*



Lim ad te nihil scripsi, sperās quotidie fore, vt non literis, sed & iucundis nuntiis possem te gaudio afficere. Id dum in singulos dies spero, reiectus sum in hunc usq; diem, vt si lentitudinis inculpandus veniam, desiderio tamen hoc meo sim excusandus, simul & laudandus. Igitur est quod Diis gratia mecum læteris, & triumphes, & hoc est: literæ tandem à Philippo domino nostro mihi redditæ sunt humanitatis, beneficentiæ, & cuiusdam propè felicitatis plenæ, eas vt perlegas, & interpreteris ad te mittimus: in quibus si quid offendas, quod amplitudini accedat meæ, statim itelliges id tua opera, ac studio euenisse, & me debitorem tibi cōstitutum: quod ego nunquam abnegauero, non, si quispiam minetur mihi taurum Phalaridis. Ea ex re gratias velim agas, & persoluas Ioanni Feruffino nostro non incelebri Iurisconsulto, qui posteaquàm me illi per epistolas commendasti, nunquam utiq; requieuit, quoad rem perduxerit eò loci, quò tu vides, nihil veritus, aut labores, aut quod certè extimescendum fuit, quorumdam hominum inuidiam, aut calumniam. Tantum profectò debes in hac re obseruantia, ac fidei erga te illius, quantum ego charitate, liberalitate, & facilitate tua tibi obstrictus, & deuinctus sum. Quare tu illi gratias ali-

quando referas, quas ego tibi perpetuò habiturus sum. Quicquid in Rhodum scripsimus occultum est: res enim monet ne efferatur: quàmprimum autem edidero, quicquid id est, & est fortasse non illepidum, primus tute es & lecturus, & emendaturus. Interim cura ut valeas meum nuinen. Papiæ.

Ant. Panhor. Bartholomeo Pontifici. S. P. D.

 I vales benè est, ego valere opto: factum est enim, uti huius aëris malignitate febribus, & aduersa valetudine corripere, non quidem solum, sed si quid ad solatium ægrotantis attinet, cum decem ferme millibus hominum. Multi vitam efflarunt, quanquam aiunt neminem peste, aut malo morbo periisse. nos verò nusquam maiorem pestem, nusquam corruptiorem aërem, nusquam maiorem Deorum iram, nusquam corruptiora omnia vidimus, inspeximus, quàm Romæ. Ego Diis gratia conualesco in dies, spero quæ monstrum id profectò horrendum, in forme, ingens posse propediem effugere. pessimi quidem illi calores ex me ad Barbaros iam abierunt, apud quos Christi nomen inuisum est. Interea verò si quid tua illa innata, & prædicata benignitas, si quid tua in me beneuolentia adstruxerit, delegerit, atque firmauerit, cum ob alias causas, tum ob id maximè tibi gratias habiturus sum, quod ne denuò Romam reuertar effeceris: quæ res faciet, ut & si natura minimè ambitio-

sus sim, tamen si quid in praesentia in me contuleris, tam gratè, tam libenter excipiam, quàm si magnopere concupiuerim Vale.

Ant. Panhor. Pontifici suo. S. P. D.



Atto Iureconsultus hic est, est peropus Placentiam eamus etiam hodie, si modò nos equi non remorentur. Quare à te peto, & si pateris etiam rogo, sine abutar mula tua nigra ad biduum, certè quidem abusus est, nam tibi per necessariam cognosco: sed amoris, & gratiæ verè ampla est licentia. Visuri illic sumus Antonium Cremonam. Ludouico ductori siquid tuo nomine nuntiari vis, iube. Palatiolum meum tantisper penes te committam. Vale.

Antonius Panhor. Christophoro Lampugnano. S. P. D.



Vm esset de te proximè sermo, vel admiratio potius inter egregios quosdam viros, auidui, nam aderam unà, tum primum in ualitudinem tuam: quo nuntio quanuis pro mutua inter nos beneuolentia sim sanè vehementer commotus, potui tamen ea ratione me aliquando consolari, qui te cum doctrina, tum fortitudine animi pollentem, ac præditum noui, sapientia quidem confirmari potes, virtute patiens fieri: alioqui febris, & motus omnis
contra

cōtra naturā tēpus plusquā breue habeat necesse est:
et quod breue est, si licet magnum, tolerabile esse de
bet. Habes præterea Girardū Medicū, cuius peritiā,
& mēdendi scientiā non minus sperare possis, q̄ despe
rare negligentia: quippe cū doctus, & Esculapius ferē
alter, tū curis felix, & fortunatus sit. His, atq; aliis qui
busdā argumētis possum tuā istam corporis ægrotā
tionē ferre aliquantō modestius. Verū cū mihi, quod
citō sit opto, renuntiaueris te prorsus cōualuisse, & ad
barbaros abiisse febres illas, tantum voluptatis, ac solā
tii percepturū me tibi persuadeas, quantū ne propin
qui tui magis queāt, aut si qui tibi sunt amore, & fami
liaritate in primis deuincti. Tua quidē indole, & egre
giis animi ornamētis ita te olim amare cœpi, ita pleue
rānter in dies magis, atq; magis amo, vt siquid ægrē,
aut, quod malo, si quid tibi voluptuosē accidat, mihi di
uidue sit oportebit. Mea quidē opinione barbarus est
qui te nō diligit: inuidus, qui te non colit: saxeus, qui te
nō laudibus fert. Hæc hæcenus. Indagationes illas ad
Terentiū, quas à me petis, exquirā, & seponā tui cau
sa. Commentariorū ad Plautū aut primus, aut primō
proximus, si modò illos tāti feceris, exēplar habebis.
Deniq; nihil apud me est, quo nō uti, & abuti possis ar
bitratu tuo, neq; vspiciā defuturus sum studiis tuis, non
solū absens scripto, sed ne p̄sens quidē viuo sermone.
Cura vt valeas, nā aderit Phæbus scio: secūq; feret, qui
cūq; sapores, quicūq; & cātus corpora fessa leuāt. vale.

Ant. Panhor. Antonio Beccaria. S. P. D.



Cambio viro officiosissimo certior factus sum, assensisse te perlibenter votis, & desideriis meis, atq; vsum in me peculiari, & ingeni-
ta tua illa animi benignitate, ac beneficentia: hoc est concessisse mihi, meoq; vsui domum tuam. Qua ex re gratias tibi quidem ago, & habeo, non autem refero, neq; persoluo, quippe cum id neq; ipse pro dignitate possim, nec tu tibi pro beneficiis gratias referri desideres. Virtus, & humanitas tua tibi gratias abunde referunt, & benefaciendo gaudere consuesti, non accipiendo: idq; generosi animi est, sua virtute, non aliorum ope gloriari. Itaq; liberalitas tua singularis, humanitas, clementia, & quibus maximè illustraris, fides, & integritas, tibi tecum gratias, & quidē immortales reddent. ego equidem, quanquā idipsum respuis, pro tuo hoc benemerito tantum tibi debeo, quantum vel ingeniolo possum, vel obseruantia, aut gratitudine in benefactores meos. Demum prouiso ne tui huius distādeat propositi, sed intelligas benè actum cum domo tua fuisse. In ea quidem exornanda, ac polienda utiq; diligentiam præstabo, quam ne rebus quidem meis exactiorem possem. Hortus coletur, reduce-
turq; in pristinam venustatem, atrium, impluuium, aula, camera, laquearia, reliqua deniq; domus verretur, expurgabitur, cōponetur: atq; ut tua est, tibi sem-

per, atq; omni tempore aperta, patēs q; erit : nec mihi quicquā iucundius accidere poterit, quā qui nunc te benefactore vtor, si aliquādo te hospite fruar: atq; il lustrer: & haud scio an id onerosum aliis foret, mihi certē felix, faustum, & optabile futurum est: neq; seruituti, sed libertati potius, & vt dixi, felicitati meae adscripsero, si quando Ticinum te contuleris apud me, immò apud te. Cetera autem tuae sententiae, tuae benignitati committo. Tantum quo tempore, quōue die ea potiri possim rescribas, te vehementer rogo: nā quò citius, eò liberalius. Vale nobilitatis splendor.

Ant. Panhor. G. Pontifici Laudensi. S. P. D.

A Vianum tuum, & Martialem Poëtam non illepidum accepi iam, atq; adeo quidem acceptius, quò maturius, & opinione celerius missos. Facis vt prudentem decet, & beneficum virū. Ille enim quod altè, & consideratè cognouit, celeritate conficit: hic cum demum benefacturus est, nihil differt. Adeo verò celeritas in omni re grata, probataq; est, vt vel citò abnegare pro beneficio sit: cōtra si producis quod tandem facturus sis, mora beneficium inficis, & gratiam perdis. Gneus enim Pompeius, vt nō sti, non minus celeritate in negociis, quā fortitudine in periculis commendatur. Laudo itaq; ac deosculor tuam hanc benefaciendi alacritatem, atq; festinationem, nec certē minus quā beneficium ipsum: ta-

mersi quodcunq; à te munus proficiscitur, non exiguum sit necesse est. Cæterum codicibus, & Poëtis tuis oblectabor, quoad studia & voluntas tulerit tua: exscribi enim liber non potest, adeò multis locis caducus, & obliteratus est. Tu verò si quid in me est, aut librorum, aut industriæ, aut ingenii pro tuis porro utere, & abutere. tua quidem vel anima ipsa mea est: eritq; liberalitatis tuæ, & beneficentiæ in hoc quoq; satisfacere voluntati meæ. Vale Pontificum decus, & licet absis, sis tamen felix vbicunq; mauis, & memor nostri Galathee viuas. Iterum vale.

Antonius Panhor. G. Pontifici Laudensi. S. P. D.



I vales gaudeo, & propè triumpho. Ego Diis gratia valeo. Nihil equidē in præsentia tibi, aut mihi melius optare possum, quàm corporis valetudinem: ea enim malignitate aëris viuimus, ut sani si quisunt, ægrotantes videantur, ægrotantes verò semimortui. At verò mihi nil ægrius ferre est, quàm beneuolorum absentiam, præsertim per hanc cœli inclementiam, cœli certè inclementiam: nam puros simul, & impuros insectatur. Accepi enim te nuper ob pestis suspicionem Lauda excessisse: id quicquid est, optarim à te certius reddi. Tua quidem valetudo, & fortitudo felicitatis meæ pars est: quasi reposuerim summam animi voluptatem, quam Epi-

curci summum bonum appellāt, in prosperitate tua. Sanè mollior sum in amādo, te maximè, cuius virtus, & humanitas ita me eneruat, ac penè dixerim, effœminat, vt facilius ærūmnas Herculis, quàm tui desiderium ferā. De Feruffino item nostro viro sanctissimo aliquid velim renunties. Siquidem ambo valetis, valeam & ego necesse est. Abbas tuus ille omnium suauissimus à me valeat. Tu si quid rescriperis, leuabis me haud mediocri mœstitia. Vale.

Antonius Panhor. Oldrado. S. P. D.



Andreas Theologus hic literarū adlator vir doctus, & cōterraneus meus à me petit, vt se tibi cōmendem: innotuit quidem illi, vt multis præterea, tua erga me charitas, & affectio. Ego verò à tua natura, tuisq; moribus haud alienum ratus, fouere, & augere Christi Domini Philosophos, hūc tuæ fidei, tuæq; beneficentiæ committo. Vult paruus parua, honestus honesta: tu perinde mihi gratum facies, ac si illi magna contulisses. Vale. Ego tuus perseverantissimè persto.

Ant. Panhor. Luchino dulcissimo. S. P. D.



Quætarim adolescens honestissime corā affuisses, cū officiosas ad me tuas literas perlegebam. cognouisses sanè non verbis solū, sed vultu, fronte, supercilio, risu, quanta me latitia affecerit valetudo Victorii nostri viri clarissimi. Crede mihi

crede inquam non potuit quicquam iucundius, aut voluptuosius renuntiari, non Regē me quidem creatum. Etenim amo illum pro suauitate ingenii supremum, nec quicquam est, quod ardentius cupiam, quā illum videre, suāq; fortitudini coram gratulari, tametsi de vita illius nunquā addubitauerim. Deus non lædit amantes. Idcirco dimittere ad nos caballos poteritis die Saturni, aut si lubet etiam ocius, nam ut prædixi nihil in vita per æquē appeto, quā eum visere, quem tantopere diligo, & deamo. Vale flos adolescentium, nam reliqua viuis affatibus agemus, & opportunius, & iucundius.

Ant. Panhor. Nicolao Quæstori. S. P. D.



Fortunatum hunc, quem tibi aliās literis & laudaui, & commendaui, iterum nunc, atq; iterum tuæ liberalitati commendo, & sum commendaturus, quoad hominem verē fortunatum facias. Vult tuis manibus locari quouis in loco: vult tuus esse, quo uti possis pro rota figulari. Mihi quidē eo officio proinde maximē gratum facies, quod cognosco nulla in re ampliorē laudem assequi te posse, quā egenos iuuando, bonos fouendo: de Fortunato satis. In re autem Palatiana, id est miseri Andreæ, spes omnis in te residet. Tu si in ea re hominum expectationē adimpleueris, immortalem crede mihi gloriam assequuturus es. Vir bonus ille, & amicus tuus

& est, & habetur. A Masino fratre rem omnem accipere debuisti, quam si mandaueris effectui à plerisque aliis, à me certè pro Deo quodam amicitiae prae dicaberis. Vale meum decus.

Ant. Panbor. Aloisio Crotto. S. P. D.



Vm essem aliquanto otiosus hodierno die peropportune mihi oblata est tua quaedam epistola ad Lanzalottum fratrem, qua scilicet efflagitas à nouo sponso, non quidem epulas, quod utique parasitorum est, sed quomodo se gesserit in duello nouus miles. & huius generis multa facetissime quidem, & urbanè, nihil tamen inconueniens grauitati, atque auctoritati tuae: siquidem & ipsum Scipionem summum virum, & Imperatorem interdum remissionis gratia, tripudiantem accepimus: & Catonem virum maximum aliquando animum Reipublicae curis pressum, atque contritum, vino leuare, atque reficere consuetum. Lucullum quoque virum grauissimum comitate, & festiuitate nonnunquam gaudere solitum legimus. Et C. Caesaris, & ipsius denique Socratis leporem, atque facetias nemo literarum solers ignorat. Est enim in vita hominum cessatio quaedam, atque remissio, vel ab ipsis Philosophis, vitaeque magistris concessa. Nam cum perpetuo laborare nequeamus, solatiorum quaedam moderationem nobis rectissime permiserunt. Tu vero Aloisi vir grauissime, qui tantum gloriosissimi Du

cis nostri negotiis circumueniaris, vt, quod aiunt, sede
 te, & respirare vix queas, haud absurdè facis, si inter-
 dum cum fratre præsertim iocaris: atq; hanc tibi re-
 missionem animi potius delegeris, quàm vinum illud
 Catonis, & Scipionis saltatū. Sed his missis, quis enim
 nesciat viris grauib, ac sanctis interdum iocari lice-
 re? Ad epistolam tuam redeo perlepidam quidem ibi-
 lam, & vndequaq; festiuam. Eam ego summa cū vo-
 luptate non dico legisse, sed ebibisse quodāmodo mi-
 hi visus sum. Dilexi te quidem antehac humanitate,
 beneficentia, & qua plurimum commendaris à quita-
 te, ac fide, nunc etiam tua hac comitate, & iucunditate
 me tibi in perpetuum comparasti. odi nimirum rusti-
 cos quosdam homines, immò vix quidem homines,
 ab omni iucunditate, atq; humanitate abhorrètes. Vt
 autem à me quoq; & fortasse diligentius intelligeres
 ea, quæ à fratre iucundissimè requiris, veritus ne ille
 dum tibi rescribit, multa taceret, quæ corā inter ami-
 cos, & cum risu narrantur, ab ipso singula perscruta-
 tus sum, quæ tibi exponam. Manè namq; salutādi gra-
 tia sponsum adii, atq; his vltro, citroq; dictis, quæ pri-
 mo congressu familiares, & amici consueuere, conti-
 nuò illū rogo, quonam pacto valuerit in armilustro.
 Tum ille subridens, viriliter inquit, nā perduellis pro-
 strata simul, & deuicta succubuit. Verum operæpre-
 tium est audire mi Aloisi, quibus eam verbis, & blan-
 diloquentia deliniuerit. est mea quidem sententia Lan-
 zolottus

zalottus noster vt multis insignibus ornamentis apprime præditus, sic vel maxime eloquentia excellens, vt de eo rectè id dici queat, quod de Venere tradit Poëta. Dum loquitur, vernas afflat ab ore rosas: quanquam in hac re non ipsius Ciceronis, aut Demosthenis eloquentiam magnificerim: facile est enim volentem cogere. nulla enim tam difficilis, tam rigida, tam Sabina, tã barbara est, inquit Poëta, quin fiat tacto mollior illa viro. Cæterum exclusis tandem arbitris solus solam continuò amplexatur, deosculatur, deniq; etiam verbis blanditur sedens propè lectum. Mea inquit Valentia, sicilli nomen est, suauitas mea, corculum meum, sine tuos ocellos deosculer, sine te gestem in sinu, mea rosa, meū lilium. Exue te vestibus iam animula mea, mel meum. Nox multa est, edormisco iam. Illa autem inuitæ similis tandem exuitur, thorum petit, vultu subtristis, & verecunda. Contra Lanzalottus noster projectis vestibus ad eam aduolat, amplecti tentat. Non consentit illa, quin immò modestè repugnat. Tum miles noster, quid rei est Valentina mea bella bellacula, non hostis, sed sponsus sum, cur refugis? sine te tangi mea vita, sine te amplectar voluptas mea. Tum sponsa, Polypi inquit amplexus vereor. Ah noli, inquit Lanzalottus, id vereri animula mea, vt quicquam in te facturus sim, quod tibi graue, aut molestum futurum sit. Nesti quàm efflictim te deamem, vt ne meos oculos, aut

animam, aut quicquid in vira mihi gratissimū est, certe magis. Planè siquid tibi molestè accidat, quod abominor, id mihi diuiduè sit oportebit. Id cum ita sit, tuq; compertum habeas, quid est, quod deinceps vereare mea lux? sine te iam amabò amplectar, tuosq; sidereos tantum ocellos deosculer. Sed lius arat miles noster, illa quidem refragatur vehementius, nec quicquam auscultat, quinimmò flere cœpit. Tum Lanzalottus id minimè ratus missis iocis, exquisitiore quodam dicendi, ac suadendi genere opus esse arbitratus: turpe enim, & ignominiosum est viro forti, & magnanimo puellis præsertim vim inferre. Igitur suspirans inquit, Verum profectò perhibebāt miserum me, ducturum sponsam difficilem, morosam, inamabilem, mœstam, quod nūc ecce periclitor, & assentior illis meherclè. Nam quid hæ lachrimæ sibi aliud posscant, quid ue portendant non video, nisi fortassis me marito, quod aiunt, minimè contentaris. Putabā equidem hoc loci sponsalitia, non funeralia celebrare, tuumq; in me amorem verum, ac mutuum sentire, non odium, non lites: deniq; cōiugium, & perpetuam tecum, ac tranquillam inire societatem: non tumultum, atq; diuortium. Hoccine genus tuum præclarū illud, & abundè spectatum? hoccine parentum honestissimorum hominum educatio? Decet enim generosas, honestasq; virgines taciturnas, & mansuetas esse, nec minus faciles, & obtemperantes marito. Quòd

vero aiunt mulieres nescio quas solitas prima nocte
maritis obsistere, id vt turpe, & indecorum, ita vilissi-
marum est mulierum. Tu maiorum tuorum mores,
& dignitatem tibi vendica, tuum ordinē imitare : sine
plebeculam suis deturpatis vti moribus, & cōsuetudi-
ne: placeas summis hominibus, placeas morigeratis:
placeas vel præcipuè marito, reliquā illam faciem po-
pularem damnes, & asperneris. An reris fortasse no-
stram hanc coniunctionem quicquam tibi amaritudi-
nis adlaturam? erras medius fidius. Si ritè memineris
animadvertere nonnunquam potuisti, quàm sponsæ
omnes manè surgant solito hilariores, formosiores,
iucundiores. Num hæc amaritudinis coniectura est?
an nō potius suauitatis, summæq; voluptatis? Cæterū
sunt anus edentulæ, quippe quæ inuidia maximè fla-
grantes, eo modo virgunculas, & nouas sponfas terri-
tare consueuerunt, vt qua ipsæ iam pridem voluptate
cassæ, & orbatæ sunt, ea velint & reliquas priuatū iri:
pallidū profectò genus, macilentum, deforme, tetrū,
versutum, & puellis semper aduersarium, inimicum,
damnosum. Sed dispereāt vetulæ omnes: tu, quod na-
tura docet, quod religio permittit, quod suadet volu-
ptas, quod omnes factitant, ne exhorrescas. Noli mea
lux aduersari amplius mihi: sine te iam dissuauier co-
lumba mea. His, pluribusq; verbis longè suauio-
ribus, mi Aloisi tandem germanus tuus, vir meo
quidem iudicio disertissimus, voti compos effectus,

arce, quam oppugnabat, amicè potitus est. Ex his facile intelligis, te fratrem non infantem, & enervum, sed eloquentem, & robustum habere, qui duelli victoriam non sine triumpho reportauerit. Tu vale, & lætare, nam cætera quàm lautè, splendide, & honorificentissimè peracta sint, id tu satis nosti, & admirantur alii.

Iterum vale meum
decus. Papia.

ANTONII BECCATELLI
SICVLI COGNOMENTO PANHORMI
TAE EPISTOLARVM GALLICARVM
LIBER TERTIVS.

*Ant. Panhor. Cambio Zambiccario Viro
Illustri. S. P. D.*



Odierno die, nec prius literæ tuæ mihi redditæ sunt liberales quidem, & officiosæ, & à te sanè profectæ: quibus à me scire desideras agnationem, & progeniem meam. Ego Cambi magnifice, etsi quod petis, aliis aperire erubescerem, de se quidem dicere non decet, tibi tamen nihil nō assentiri persuasum habeo. Sum igitur Equestris ordinis, Henricus enim pater Eques creatus est à Martino quondā serenissimo Siculorū Rege: à quo dignitates, honores, magistratus & quidem amplissimos assecutus est. Ego verò natus sum patre Pratore, quæ dignitas apud nostrates præcipua est, sororii quoq; mei Equestris sunt gradus. Fratrum verò alter præclara sapientia Iureconsultus, alter, & item tertius ut nobiles agunt, disciplinæ militari, & ingenuis artibus operam dantes. Sumus præterea, si quid ad rem attinet, multitudine propè innumerabiles, diuitiis, co-

piis, necessariis, affinitate, gratia, absit verbo inuidia, pollentes apud Urbem Panhormitanā. His Panhormii cognomentum est Bononia, illinc enim à quinq; & nonaginta fermè annis originē ducimus, ex proge nie Beccatellorū: Vanninus etenim Beccatellus auus meus Bononia profugus ob partes, & Ciuium dissensiones Panhormiū traiecit. Ibi innumerabiles fermè filios, filiasq; nepotes, neptesq; procreat, auctoq; numero, firmatoq; domicilio, Bononiam reuerti cū posset, noluit. Bononiæ vetustissima est familia, ab octingentis quippe annis extat memoria domus nostræ. Fuit ille primus auctor familiæ Eques Regis Angliæ orator ad summum Pontificē: sepultus est Bononiæ apud Diuum Ioannem in Monte, eius sepulchro, nisi fallor, antiquius nil est in patria tua. Eorum domus, & palatia extant adhuc iuxta Diuum Stephanū, & plurima, & vetusta. Helena Caniculorum parens, & Dorothea Guzadinorum, ex nostra sunt familia. Extat etiā Malatesta quidam, vir bello industrius, familiaris, & amicus Principis Caroli Malatestæ: in cuius aula Bononiæ offendes arma, & insignia domus nostræ, vetustis clipeis, & vmbonibus inscripta, alas videlicet, & de super alas viperam diuorū Principum Mediolani in signe. Illorū quidem partem sustinuerūt semper maiores mei, à quibus & pluribus donis exornati sunt: cuius argumento tibi sit ipsa illa vipera, quæ nostris eminet armis. Hinc etiam Panhormitani mei memo-

riter, & summo cū animi desiderio, ac fide profecuti sunt Mediolani Principes: quibus quippe pro antiquis benemeritis debent res, membra, atq; etiam animas. Et extat adhuc in nostris Panhormii quidam, cuius affectio, cuius etiā audentia, ne audaciā dixerim, pro huius nostri Principis amplitudine pluribus innouit, & Principem fortasse non latet. Præter eo hoc loci epistolas, quas quotidie ex Panhormio accipio, quibus me monefaciūt mei, uti nulli me dedam in Italia, nisi eorum domino diuo Principi Philippo Mariæ, cui soli, ut eorum cætera, sic & meæ musæ debent. Ex quo hætenus nonnullorū ego Principum, ut ita dicā, seruitia, & munera repudiaui, atq; reieci: aut enim Philippo ipsi dignissimo Principi inseruiēt musulæ meæ, aut certè perpetuò obmutescēt. Habes igitur originē meam mi Cambi, qua in re si quid impudenter, aut ineptè à me dictū est, erit quod tibi potius imputetur, qui id ipsum ut scriberē exigisti, nō mihi, qui viro summo, ac modestissimo, mei q; amantiſſimo obtēperaue- rim. Aberrare quidē haud poterit, qui Cambio morē gerit. Tuus posthac labor erit imperare, mihi iussa capeſſere. Vale, nam cætera fient, ut desideras.

Ant. Panhor. Cambio Viro Illustri. S. P. D.



Eriq̃ primū mihi reddita fuit epistola tua, tibi respōdi non quidē syllabatim, ut soleo, literis præsertim tuis, sed solū particulæ, qua pe-

tebas à me progeniem, & genesim meā. Qua in re si quid in respōdendo peccauerim, petēti tibi potius imputandū, quàm mihi certè, qui obtēperauerim bono; & spectato viro, mei q̃ plurimum studioso: non quòd ex meis quicquā laudis expetam, aut ex illimationis, miserum est aliorum incumbere famæ, sed quia tibi, tuæ q̃ auctoritati quauis in re mos gerēdus fuit. Ego, si nescis, id vehementissimè studeo mi Cambi, ne à maioribus meis degenerem, ne ue tuum de me testimonium, vanum, aut falsum habeatur, neq; modestiæ minus mihi curæ erit, quàm musarū. Hermafroditi versus est, Scilicet impuris Pegasis vnda latet. Crede mihi non potest Poëta quisquā euadere, nisi pius, & simplex animo: siquid verò in adolescentia iocati, & vagati sumus, Quædam cum prima refecantur crimina barba. Postremò velim desinas de me adeo magnificè loqui: commendare enim quempiam supra morem, non honorare, sed rectius onerare est. De his satis, super q̃. Aduentus ad nos tuus mihi iucūdissimus, & felix est. In portentum illud hominis iam dudum nihil scribo, occupatus videlicet non tantum negotiis, quantum spe, & futuræ vitæ euentu, quicquid tamen edidero, primus omniū leges, ac perleges. Aeneam tuum nondum retractaui, recorrogam profectò illum vel ad fastidium, si modò moræ patiens fueris, sin minus, mittam ad te interim Virgilium meum. Tu contra si Liuium meum interlegendum aliquando emendaueris.

daueris, haud facies inofficiose. Literis hesternis, nam puto te illas recepisse iam, respondeas, te peto, paulò prolixius, utinam prospero, & tranquillo nuntio. Vale meum decus.

Ant. Panhor. Cambio Viro Illustri. S. P. D.



Eneam tuum mea opera recognitum, atq; recorrectum ad Christi Dei optimi natalitia tibi restituum: maiore quidem ex parte iam emendatus est, cras enim octauum librum absoluiam. habui adiutorem Maphæum Veggium Poëtam haud reiiciendum, interdum Catonem Iuriconsultum, nec à Poëtis abhorrentem. De isthac tua peregrinatione multi multa, ac varia disseminant: tu, si res nota est aliis, non facis amicè mihi illam non renuntiare. itaq; si modò fas est, fac ne potius ex aliis, quàm ex te accipiam quicquid ad rationem vitæ, ac fortunæ tuæ pertineat. Hæc eò spectant, ut intelligas, nihil me vehementius concupiscere per hæc tempora, quàm intelligere, quorsum euasura sit hæc tua profectio, quæ felix, & fortunata sit. Rursum adicias, an hæc trāsitus daturus sis, alioqui Mediolanū, ut te ipsum tantum videam, accedā, teq; deosculer ante digressum. Si qua ex parte prospicis me posse conducere itineri tuo, intrepide iubeas, vel capitis periculum adire non verebor, si modò tibi quiuero prodesse, saltem precibus, ac votis nusquam defuero. Vale mea lux.

Ant. Panhor. Cambio Viro Illustri. S. P. D.



Vòd frequentius ad te non scribo, nolim ad scribas negligentia, aut inertia, sed ita suadet eximia, & propè singularis virtus animi tui, vt nihil ad te scribere, nisi magnificè, & accuratè debeam. Magnum magna decent. Verum hac tempestate ita animi intranquillus sum, vt si magno opere id ipsum concupiscam, tuæ tamen magnitudini satisfacere haud quaquam confido. Disper eā mi Cambi, nisi barbarus effectus mihi videor, & à musis omnino destitutus, est sanè quod mihi indoleam, est quod angantur, & quidem vehementer amici mei, quos si certè nequiuissem, tentassem tamen immortalitati commédare. Sed hæc missa faciamus, aderit aliquando vocatus Apollo. Tu verò qui me longè exuperas fortitudine, si ex mediis occupationibus tuis quicquā exaraueris, eò mihi iucundiores erunt epistolæ tuæ, quia ex mediis occupationibus profectas intelligam. Vale.

Ant. Panhor. Cambio Viro Illustri. S. P. D.



Gitur erit tibi curæ, vt domum certo die habeamus ab Antonio Beccaria viro magno: nam literas ad eū mitto, quibus, nisi fallor, flecti poterit, te præsertim interprete. Fac tandem ipse rescribat, nam si nobis verba darentur, eo tempo-

ris ne casam quidem hic conducto reperirem. Illud etiam, quantum in te est, contendas, vt in presenti nobis assignetur domus: nam Bartholomeo Vlpio meā hinc ad duos menses sum pollicitus relinquere. Christophoro nostro aureo adolescenti responsum rettulimus: in quibus epiraphium Leonardi clarissimi citharædi interclusimus, de quo quid senseris tacuisti, quasi tacitus despuas quod propalam nō laudas. Iterum Lampugnano statim rescribo hortatu tuo. p̄facile habes persuadere mihi quod vltro, ac sponte volo, volo autem ita, vt nihil ardentius velim, quā ornatissimo illi adolescenti literarum vicem reddere: immō epistolis eum, vt ita dixerim, obruere, modō me nutuō diligat, ac perseueranter amet. Vale.

Ant. Panhor. Cambio Viro Illustri. S. P. D.



EX Antonio Cremona, viro iucūdisimo tuā, tuorumq; valetudinem intellexi: hoc primū, nam de te semper apud me primus habetur & celebratur sermo: deinde noctem penē totā insonnem duximus de amicitia, de studiis literarum, de te maximē differentes. Crede mihi repetiuimus à gemino, vt aiunt, ouo, cōtulimus, comparauimus, iudicauimus ferē omnes, quos aut vidimus, aut audiuius, & adhuc simpliciorem, constantiorem te inuenimus neminem. Nam etsi ille quosdam nescio quos recēscar, vel animi fortitudine, vel rerum cognitione tibi pares

fortassis, in hoc ipse tamen à me nihil dissentit, amicitia palmam, & gloriam sine controuersia tuam esse. Perge mi Cambi, vt aliquando dinumeremur inter tria illa, aut quatuor amicorum paria. Ego pro virili parte nunquam defuturus sum amicitia nostræ, immò verò, si fiat opus, etiam, atq; etiam capitis periculum adiero, vt nostram hanc seruem sanctissimā consensionem: amicitia laus illa quidem præ cæteris perspicua, atq; homine digna est. Vale.

Ant. Panhor. Cambio Viro Illustri. S. P. D.



Hilippus Rex ille celeberrimus Alexandri pater ita, vt tradunt, in Tesselam quandam mirificè, ac perditè affectus erat, vt poculo potius amatorio, aut veneficiis occupatus putaretur, quàm ex animo illam diligere: cū verò is rumor Regi innotesceret, exhiberi Tesselam ad se iubet, quam alloquutus, atq; altius perscrutatus, dispercāt, inquit, calumniatores mea Tessela, tua quidem indoles, & in signis modestia id ipsum est, quod amoris incantationes arbitrantur: pocula enim tua non Pharmacis, vt aiunt, sed probitatis suauitate condita sunt. Id nunc, & quotidie in mentē venit mi Cambi suauissime quoties erga te amorē dimetior, & contemplor meum: tantus enim, tamq; exuberās est, vt nō amare, sed insanire potius videar, nec Pharmacis, sed egregia tui animi virtute, & humanitate. huius enim furoris rectius q̃ amo-

ris in te mei exēpla sunt fermē innumerabilia: sed hodie præsertim, audiēs ego à Feruffino viro terfiffimo, & Iurifconfulto fingulari, te vehemēter auere epiftolam meā nuper ad Principem. haud facilē fcripferim, vel in re minima mei animi follicitudinē, angorem, difcruciatū, quòd tuæ minimē poffem obfequi volūtati. exemplū enim literarum nullum extabat, quod ad te mitterē, edideram equidem illas extēpore, non Principe tamen dignas, fateor, malui enim tibi, & Frācifco Barbauario, viro maximo obtemperare, q̃ meā laudi profpicere: nec tantū ftudui Principis noftri laudes eo loci recenfere, quod tu pro fingulari defiderio, quo flagras in Principem fortaffis expectas, quantum vti meū, meorumq; omniū erga fe obfequium Princeps recognofceret. Etenim bona huius noftri Cæfaris nō laudū vtiq; fed venerationis funt, quæ ue exuperēt officii humanæ linguæ. Meo quidē iudicio, fi quis iufte fapit ea tacitus admiretur, veneretur, adoret, q̃ vel magniloquentia complecti ea poffe fperauerit. Sed ad te redeo, cui dum nequeo morem gerere, & ex eo ex crucior, Ergoteles mearum ftudiofus ineptiarū enuntiat, fe furtim exfcripfiſſe me infciente literas. quæ uox quàm mihi iucunda, quàm voluptuoſa extiterit, facile ex ea triflitia, quam, quia tibi gratificari non poteram, paulò antè conceperam, colliges. Eam igitur epiftolam, quam tu petis, apud nos caſu reperi tam tibi reſcripſimus, non quòd ab ea quicquam

ponderis, aut dicendi copiam requiras, per hæc quidem tēpora nihil accuratè possum, sed vt obsequerer mandato tuo, cui refragari, nephas puto; sed longius expatiatus sum, quàm initio putauerim, & dum vnas studeo ad te literas describere binas dabo. Tu verò qui non aurum, sed meas fæces sitire solitus es, fæces bibe, & Vale.

Ant. Panhor. Cambio Viro Illustri. S. P. D.

Hieronimus Forliuias, is cuius & ingenii suauitatem, & erga me gratiam tibi cognitam feci, venit ad me recepturus à Principe non admodum grandem pecuniam. Quare à te peto, & pro tali amico etiam te rogo, hominem ne reiicias, vt fit, in alios, & vêturos dies: sed si potes eodem illo die, quo primum videris, illum absoluas, expedias: deditus, & quidem totus est studiis legalis sapientiæ, à quibus vel vna hora vacare per moleste fert: alioquin, vt dixi, tam totus meus est, quàm grandis est, tuæ etiam gloriæ perquàm auidus. Vsq; huc præter eum neminem reperi, qui Liuii ingens illud volumen ad te deferre non grauaretur: is verò tam libenter ad te codicem affert, quàm ego mitto, vel quàm tu illum perlecturus es scio. Hæc hætenus. Cum hæc exarassem, redduntur mihi literæ tuæ ea meherclè suauitate descriptæ, qua tu præ cæteris, cæterorum pace dixerim, præditus es. Illis ego nunc non prolixè, vt desideras,

sed perpaucis, uti multa nox suadet, respondebo. Mis-
sissem tibi literas meas illas ad nostrum Cæsarem, nisi
Dominicus Feruffinus clarissimus adolescens, scriba
Principis detulisset illas ad Franciscum virum claris-
simum fidus tabellarius, & peropportunos: saltē mo-
dò tibi fecissem copiam literarum, si modò extaret
apud me copia. Non ea diligentia scribo mi Cambi
per hæc tempora, ut conseruari meas exoptem in-
eptias. Quamprimum transcripta fuit epistola, vix
quidem relecta, illam Dominici fidei commisimus. cu-
ro tamen à scribis nostris, ut tu quoq; illius particeps
fias. Reddita tamen adhuc Principi non est, etenim, ut
ille ait, tempori aptari decet: & referunt Principem hi-
sce diebus apprimè occupatum arduis quibusdam
negotiis extitisse. Captato igitur tempore rem aggre-
dientur, quod Dii benè uortant. Celsi item epistolæ
tuo nomine transcribi curabo. Cum remisseris ad me
Andrææ Imperialis viri clarissimi epistolam, stude-
bo paulò etiam accuratius illi laudes, & gratias refer-
re. Interea, ut facis, virum imprimis eloquentem, &
ob incredibiles eius virtutes, & meam ob causam non
ames, sed vehementer ames, nec vehementer solum,
sed etiam vehementissimè velim. Propinquos autem
tuos fortes, & incolumes esse summa cum voluptate
semper accepi, quorum prosperitatem si sæpe mihi
renuntiaueris, præter tuam nihil certè mihi afferre iu-
cundius potes. Valeāt igitur illi Bononiæ. Valeas tu.

Valeant omnes, quorum valetudo mihi diuidua est.
Ego quidem cum Ioanne Feruffino Iurifconsulro va-
lemus perbellè.

Ant. Panhor. Cambio Viro Illustri. S. P. D.

SVperioribus diebus literas ad te dedi tribus
epistolis, quibus cumulatè, vt arbitror, satis-
feci quæstioni tuæ. Tu tamen adhuc files, &
respotionem differs, quasi nunquam fueris periclita-
tus, amanti, & speranti quàm grauis, & dura sit omnis
dilatio. Sed de his satis superioribus epistolis. An-
dreæ Palatio viro beneficentissimo literas, quas tuis
alligabo, reddi facias, & si potes etiam manibus pro-
priis: cui velim insuper gratias, & laudes agas pro eo,
quòd summa cum diligentia me quotidie exornet, ac
commendet apud Principem nostrum: cumq; ad id
quod facis horteris, atq; excites licet sponte curren-
tem. Item epigramma, quod tuis hisce epistolis inclu-
do, Marcolino, & Dominico, Piccininoq; claris adole-
scentibus reddi curato. id quidem à me magnopere
petierunt, quod frontispicio eorum cancellariæ sub-
scribant. Alloquitur aduenientes, quos monefacit, vt
absistant, neq; id studeant videre, quod vidisse pœni-
teat exemplo Acteonis. Rursum ne strepant exhorta-
tur, quoniam luna eo loci eclipsim non patitur. Con-
sueuerunt enim veteres, & nota est fabula, quoties
luna eclipsi laboraret, illi obstrepere tubis, cymbalis,
& huiusmodi

& huiusmodi tintinnabulis, arbitantes in cāntu, & veneficio illam occupatam, eoq; pacto id est strepitu lunæ succurrendum esse. Vnde præclare Statius.

Sic cadet attonitis quoties auellitur astris

Solis opaca foror procul auxiliantia gentes

Aera crepant, frustra q; timent, at Thessala viatrix

Rider anhelantes audito carmine bigas.

Iuuenalis quoq; facetissimè non tubis, & eius generis strepitu esse opus inquit, sed vna dumtaxat muliere, siquidem in ea verborum tanta cadit vis.

Tot pariter pelues, & tintinnabula dicas

Pulsari, nemo tubas, atq; æra fatiget,

Vna laboranti poterit succurrere lunæ.

Si verò fabula non esset cognita scribis nostris, eam illis velim exponas, non hisce meis quasi quibusdam commentariolis ad epigramma, sed potius viuo sermone, quæ fuit causa huius epistolæ. Illud etiam eis renuntia, me pro eorum sententia mutaturum epigramma, si minus collibuerit. Vale meum numen, & quàm primum aliquid rescribe.

Ant. Panhor. Cambio Viro Illustri. S. P. D.



Aphæus noster vt iubes Piccinino illo Saccharo, & melli gentium respondebit, non quidem oratione prosa, in qua minimè versatur, sed carmine. Efferetur laudibus, quod cupis, Piccininus noster, tuq; etiam Cambinalia sua agnosces,

& decantaberis ad summū, Maphæus enim tuus est integer, tibi pollicetur, ac dedicat omne suum studiū, versus, & musas. Ego quoq; post paucos dies poetari incipiam, pyerius menti calor incidit, & absolvam Diis volentibus opusculum quoddam inceptū. Epigramma illud ad sepulturam genitoris tui viri summi conficere etiam cordi est, tu modò patris optimi laudes perstringas, & mittas mihi. Vale.

Ant. Panhor. Cambio Viro Illustri. S. P. D.



I valeas, ita valeo. Accepi tandem orationes Guarini, & Candidi, perlegi q; ad satietatē: quamprimum inuenero qui non grauetur, illas ad te remittam. De Candido iuxta tecum sentio, hominem sanè nō iudicas, sed depingis. Epigramma illud ad Catellam Antonii Abbatis viri clarissimi si fuerint indignatiunculae ad te mittam, tametsi nolit Abbas noster, ut efferatur, mittam equidem, licet arma mihi, mortemq; minetur. Epigramma autem illud ad genitorem tuum virum summum componam ut primum furorem collexero, quod in praesentiarum enixè studeo: non minora quidem illi & ego debeo, qui te mihi genuit: sed si quisq; sine furore obnitatur, perridicula est eius omnis poësis, statim nihilominus tibi obtempero. Cætera non sinunt curæ, & hæc quidem barbaræ. De scribis nostris iam pridem nihil audio. Vale.

*Antonius Panhor. Cambio Viro
Illustri. S. P. D.*



Escio an tu pariter queraris silentium istud meum diuturnum simul, & odiosum: est sane quidem, sed dum tuis scribis obsequelam facio, potes id æquiore animo ferre. Quid tibi voluptuosius in vita est, aut esse debeat Piccinino Magno? & erunt, nisi fallor, hæ nostræ ad Plautum indagatio- nes, si non tibi, quippe qui vir egregiè doctus es, at ta- men aliis multis, & Scipioni tuo abundè vtilis. Nam me animo contumace in amicitia existimare, erit indi- gnantis potius, quàm æqui, aut iusti censoris. Te qui- dem vnicè vnum ex omnibus diligo, & obseruo, sed in Catone nostro Iurisconsulto quid mihi risum moue- rit, audi. Is cum heri ex Mediolano reuertisset conti- nuò hominem rogo, an te potissimū visitasset: At ille semel accidit: Cur semel inquam? quia cum semel cū suis contratabulis me tristem satis habuisset, timui se- cundò, ne tripedibus tristius ageret. Demiratur tuam ad ius Imperatorium memoriam, atq; prudentiam, sed miretur, vel obtupescat licebit. Ego cum de te magnum aliquid quotidie audio, nihil noui, miriq; audio. Vale Cambi vir optime cum eleganti, & in- signi Iacobo tuo.

Ant. Panhor. Cambio Viro Illustri. S. P. D.



Eceptis à te literis consilium fuit Ergotelem ad te mittere, à quo licentius, quàm literis acciperes mentem meam. Ego quod iubes, & adstipulatur Mecœnas, facturus sum, & quidem animo libens, si modò res, ut polliceris, cessura sit & dignitati, & vtilitati: qua in re vna est via, & remedium, nisi fallor, optimū: id ab Ergotele, & cætera accipies: & si res confici posse tuæ prudentiæ videbitur, accedam & ego vocatu tuo. Vale decus meum.

Ant. Panhor. Cambio Viro Illustri. S. P. D.



Pitaphium, quod in catellam domini Abbatidis viri clarissimi composui, quia expetis, illud ad te mitto, non quia sit aut elegans, aut accuratè compositum, sed difficile, & propè barbarum est, tibi non obtemperare: proinde erit moderationis tuæ quæcunq; à me exigis, vel enim elaborata, vel dicta confidenter, nequaquam efferre. Ita quidem tecum, ut cum me altero ago. Vale.

Ant. Panhor. Cambio Viro Illustri. S. P. D.



Quòd exemerit, ac liberauerit te Princeps noster à Quæstura, primum tibi gratulor, quia ea molestia cariturus sis, & officio te non di-

gno, deinde Principi gratias ago, qui, nisi vates malè vaticinor, eò te euecturus est, vbi tuam illam incredibilem animi fortitudinem queas exercere, & tibi, & illi gloriam parturire sempiternam. Accingere igitur actioni potius, tibiq; persuade, nemini magis perspectam esse naturam, ac probitatem tuam, quàm sapientissimo nostro Principi, ne dum otium animo fortasse agis, aut virtutum tuarum, aut illius iudicii diffidere videare. Ego interim Deos, ac musas rogabo, vt nostrum desiderium dextrouorsum euadat. Vale.

Ant. Panhor. Cambio Viro Illustri. S. P. D.

DVm olfacio quasdam nescio quas tragicædias venalicias, factum est, ne meas adhuc miserim tibi: itaq; aut emam tibi illas, aut maturè ad te mittam meas. Homeri ranis, si modò Homeri sunt, oblectatus sum valdè: cum illas repetiero ab Antiſtite Cumano, quod statim est, illas ad te remittam. Tu, si quid ad me quotidie scripseris, facies nunc, quia otiosus es, officium tranquilli hominis, & amici. Si quando enim aliàs, nunc maximè tui desiderio incendor. Quòd autem optimus noster Princeps adhuc te non vtatur & tua, & sua maximè causa, id ægrè patior. siquid autem præsentis, fac intelligam à te prius, vt Principi gratuler, & tibi, qui otium diutius sufferre, nec potes, nec debes. Vale.

Ant. Panhor. Cambio Viro Illustri. S. P. D.



Vm tu reris fortasse, me tibi gratias habere pro anulo, quem mihi proximè dono dedisti, ego ingratus rideo, & incuso te potius, & nisi peruersa hæc donandi consuetudo te paululum excusaret, damnarem te etiam, atq; multarem. nam cum legeris, & itē scripseris ad me sæpenumero præclarum illud Euripidis dictū, amicorum omnia communia, nō animaduertis, si quid amico des tuo, id quidem amici esse? sed quod superest cæterarum rerum, id totum ab amico alienum esse planè, qui vnum donat, ac tradit reliqua excepisse sibi, & abstulisse videtur. Quàm scitè Solon apud Græcos legem dixit, Dandi consuetudines proprias esse morientibus, idcirco viuentibus inhibere: prospexit enim, vt arbitrator, prudentissimus ille legum lator, id esse contemptum, & vile quoddam beneuolentiæ signum, cum quis scilicet donat. nam & qui minimè diligunt, donant interdum. Per se quidem amor amabilis est, nec mercede, sed gratis hominum beneuolentiam consecrari debemus. Ego tamen si pretiosa fuerit gemma, & tuum munus, nihilomags te diligam, aut meminerim tui. Non digito, sed corde sunt monumenta charitatis nostræ, & ea quidem certa, ac fixa clauo veri cupidinis, non volubilia, non caduca, quæ admodum ipse anulus. Nec te vehementius amare possem, quàm

amo, non si totam ipsam Venerem ebiberim liquefactam. Hæc tendunt, vt intelligas, tua hæc dona tibi deperdita, & mihi non grata dein affutura, hæc pro tuo egregio illo munere tibi gratiam ingratus reddo, ac refero. Tu quicquid ab amico, & familiare homine profertur, accipito semper in bonam partem, & iocari permittito, cū res exigit. Vale Cambi humanissime.

Ant. Panhor. Cambio Viro Illustri, S. P. D.



St particula literarum tuarum Cambi magnifice, qua desiderare videris ampliorem fortunam, quod me dignitatibus honestares, et augeres copiis, atq; facultatibus. Id ego & tibi opto, & fore vaticinor: nā & diuino propè animo præditus es, & eo sub Principe agis, qui cum ipse ornatissimus, ac beneficentissimus sit, hominum ornamenta in primis dignoscit, atq; complectitur, & cum potest in cœlum efferre consuevit. Alioqui ingens, & eximia hæc tui animi virtus ingentē tibi aliquando fortunam parturiat oportebit, quod vt statim dixi fore confidimus, & auemus. Non ego te facto diuite pauper ero: quam à te sum assecutus iam, quod etiam, si Rex Philippus fias, neq; maius quicquā, neq; splendidius cuiquam possis conferre, summam animi charitatem, ac benevolentiam: vt intelligas quantum ad me attinet, fortunatissimus es. Non Cambium fortunatum, sed Cambiū amo, nec beneficia, sed benefactorē. Sinam

ego alios ex te contendere, aut argentum, aut equos, aut vestes: ego verò non rebus, sed animo tuo tatum inhiabo, quoad eum cum meo misceam, itaque fiat vnus ex duobus. Sed audi nunc quid ego vicissim more poetarum fingo, ac somnio. Ascendisse me scilicet Dei cuiuspiam beneficio montem altissimum, nam cœlum iocis immiscere nefas est, atque inde mihi concessum, ut pluuere possem, ac spargere, tum campis, atque aliis hominibus nimbos, & grandines: tibi verò, tuisque penetrantibus nungere margaritas: harum igitur gemmarum si fortasse cupidus existis, cura, ut facis, ut otium aliquando nanciscamur. Vale, nam meum est fingere, tuum autem sperare.

Ant. Panhor. Cambio Viro Illustri. S. P. D.




Vm vix vno, aut item altero die ad te non scribo, & incusas me quasi tardum, & negligentem in amicitia, id ego haud quaquam molestè, sed in bonam partem accipio, mihique admodum gratulor, quippe qui ob id ipsum intelligam, tuam in me beneuolentiam ad arcem usque, ut ita dixerim, peruenisse. Verè quidem amantium est dies dinumerare, & moram, quæ quidem sit minima, ægrè pati. Quare haud scio, an mihi nunc faciendum sit, ut puellæ solent, quæ cum amatorem pellegerunt, irretieruntque, mox illum ad quoddam tempus destituunt duræ, ac intractabiles, quò magis, magisque interim miser ille incendatur,

incendatur. Id pro tua hac querela sanè indignissima iure, ac meritò facerem, nisi quòd vincor, frangorq; mollitiè, ac facilitate quadam animi erga te mea propè incredibili, nec pati possum vllò pacto querelas, aut contractiunculas tuas. Noli igitur succensere mihi Cambi suauissime, nam post hac non modò non diem, sed nec etiam horam præteribo, quin ad te scribam, si modò epistolarum & tu vices reddideris. nam sis licet perarduis negotiis impeditus, an ignoras amicitiam omnibus verè rebus præponi debere? Odi ego negotium quanuis magnificentum, si minima ex parte violaturum sit amicitiae munus. Immodò verò eò iucundiores veniunt epistolæ tuæ, si quando ex mediis laboribus proficiuntur: nam si cum vacat, tunc mihi solum exaraturus es, erunt profectò gratæ omnimodo literæ Cambi, sed existimabo aliquid esse, quod pluris facias, teq; magis oblectet, quàm amor, & amicitia nostra: & summum nulla excusatio tarditatis est, si tuis hisce negotiis tantum niteris ad te expurgandum. Cæsar interdum contra Gallos summa industria, atq; animi virtute præliabatur, nocte autem, vt scriptum legi, partim gestis scribundis, partim epistolis ad amicos vacabat. Tu verò qui ne ipso quidem Cæsare interior haberis animi fortitudine, cura ne officio reddendarum epistolarum vel à Cæsare supereris, & Principi nostro, atque Reipublicæ dies præsta, noctes

saltem amicis imparti. Vale meum decus. Ego quidem dies, ac noctes tuus sum.

Ant. Panhor. Cambio Viro Illustri. S. P. D.

 Vperioribus diebus à te plures quidem epistolas accepi, ornatas simul, & officiosas, quibus tamen omnibus meis ipse respondes, quare intelligo te cōtra totidem à me accepisse: oportere rursus & responsionum responsa, ea quidem fecimus, & misimus, nisi forsan tabellariorum perfidia, atq; inuidia fraudemur hac nostra literaria voluptate, quæ nimirum ingens est, mihi potissimum, qui & lectione tuarum mirificè oblector, & quod reddendarum officio te exupero: nam si meis semper ipse respondes, nihilq; noui renūcias, te victum, captiuumq; fateare necessum est. Igitur quod optas Maphæus tuus est, tu quod facis, mutuò eum dilige, & obserua. Illud enim meum fuerit, quoscunq; perspexero, aut ingenio valere, aut virtute pollere, tibi quotidie vindicare: dumq; aliud in te nequiro, amicos saltem tibi enixissimè comparabo, optimam, & præclaram vitæ supellectilem. Ego is sum mi Cambi, qui in amicitia summam voluptatem, parem vilitatem semper reposuerim. Gradus ad gloriam utiq; præcipuus amicitia est, & iā Cambinalia quædam celebrantur hic quotidie. verum id effici, non dici decet. Ab Andrea nostro viro clarissimo tandem literas accepi, breues qui

dem illas, sed officii, & beneuolentiæ plenæ. Scribit à Principe exoratas iam epistolas familiaritatis, tum reliquas & ad Regem, & propinquos meos, nihil prætereà addit, nisi se curaturum, vt ad me euestigiò dimittantur: id felix, & fortunatum sit. sed tu, siquid aliud intercesserit, scisciteris, & rescribas volo, nam Cremona noster Diis gratia mutus omniño est. De aduentu Thomæ fratris si quid innouatū est, renuntiato. Cum Iacobo filio dulcissimo vale. Ego tum demum valebo, cum non amplius speraui.

Ant. Panhor. Cambio Viro Illustri, S. P. D.

Hodierno die quatuor à te literas accepi non minus certè graues, & ornatas, quàm prolixas. Facis, si modò perseueres, vt addubitè, à teolumiri superatum, qui hætenus à nemine victus sim in honestissimo hoc epistolarum certamine. Quo fit, vt haud sciam, an lætari debeam tua hac inaudita, & incredibili diligentia, an angipotius, & inuidere virtuti tuæ. nam exuperari reliquis in officiis, id quam turpe est, à te tamè vinci, facile & patior, & confiteor. Verum hac vna diligentia, quæ maxima ex parte ad amorem spectat, neq; à te, neq; à quoquam alio vinci patiar, aut confitear. Si quidem à me eximeris diligentiam, & obseruantiam in amicos, nudus, inermisq; remaneam oportebit. Itaq; monoculorum more vnus huius mei epistolaris officii, atq; exercitiū

custos accuratissimus existo:qua in re,vt ante dixi, ne
 mini vel primo loco vsq; huc cedo. Proinde tuas ha-
 sce epistolas scenerabis potius,quàm de me triūphes,
 & binis, & quinis agas licebit: ego fasciculis tecum
 agam. Sed de his satis, nunc audi sermō. Iussi, vt in meā
 re Principi scriberes ratus te maturius digressurum,
 nūc quoniā extollitur profectio tua, reiicias æquē scri-
 ptionem in abitum tuū. Tunc verò suadeo, vt ad Prin-
 cipē literas des, quibus nulla ex parte per me stetisse
 cognoscat, neq; per amicos meos, quo minus ei fierē
 quodāmodo adscriptitius: verū id ita si tuæ pruden-
 tiæ, ita quoq; visum fuerit. Alteris autem illis epistolis,
 quibus tā bellē mecū philosopharis, monesq; ne cui-
 piam magis, q̄ mihi ipsi confidā, & cætera ad hæc gra-
 uiter, & sapienter, respondeo, pariter & tibi assentior,
 si nobis non tam viuendi, q̄ benē viuendi ratio haben-
 da esset. Sed corrupta, & peruersa sunt omnia, eosq;
 nostra memoria rectē, & insignitē philosophari, aut
 poetari putant, quos etiā saturos, nummatos, affluētes
 aspiciunt, quasi verò plurimum conducant diuitiæ stu-
 diis literarum, & gloriæ. Sed quid ego nostræ tempe-
 statis viros recenseam? non ne ipsi veteres, si Virgilio
 inquit puer, & tolerabile desit

Hospitium, caderent omnes à crinibus hydri,
 Surda nihil gerneret graue buccina. Nonne et
 Ipse Deus varum palla spectabilis aurea
 Tractat inauratæ consona fila lyra?

Et quando poëtis libenter vtimur hac epistola, non ne illud etiam eleganter?

Neq; enim cantare sub antro

Pyerio, thyrsun ue potest contingere sana,
Immò sua paupertas, atq; æris inops. Sed dices, tū Deorum, & parctum gratia habes vnde viuas, etiam ad voluptatem. est ita sanè, sed Panhormii: Papiæ verò ita demum agere possum, ita mihi quicquam habere, si modò id meis collibuerit: alioqui nauigandum potius, quàm poëtandum mihi est. Pudet me equidē dinumerare quot millia aureorum absumpserim in Italia, dum confector hęc paupertatis, volui humanitatis studia dicere, & dum fructum aliquem vigiliarū mearum expecto. Cumq; & id ita sit, fac etiam meos velle, profundam etiam quod superest facultatum, ac patrimonii, degamq; perpetuò apud hunc Principem, nihil prorsus ab eo expetēs, nihil expectans præter meram animi charitatem, & beneuolentiam. Iam intelligis & poëtis ipsis necessarium argētum, & mihi aliis, dum hic vitam duco, confidentem esse potius, quàm mihi ipsi. Cæterū me etiam, atq; etiā admones, vt philosopher, quod interpretaris, vt naturæ viuat, cōtentus dumtaxat rebus necessariis. Id ego quidem posse peroptarim, sine meorum auxilio: nihil enim ad voluptatē refero, sed peregrinus sum. àër, aqua, ignis, omnia deniq; mihi cōparanda sunt. num hęc tibi videbuntur necessaria? sunt sanè, mihi tamē non donantur,

sed pretio emuntur, vt dixi. Quid igitur sibi velit istud tuum philosophari, nomen sanè odiosum, non intelligo, nisi vt mendicem, id tandem hortaris, & intendis. Id quandoquidem tibi placitum est, facerè perlibenter, si meorū dignitas, & Equestris ille, & Prætorius gradus pateretur. Nimirum plurimi facio has regiones, hos mores, hos amicos, te præsertim, ac Principem ipsum: vt vel ipsi patriæ vos propèmodum ante ponam, & propinquis omnibus. Verum nō vsq; adeo à meis alienus sum, vti apud vos malè, & ignominiosè viuere perpetiar, potiusquàm ad illos reuerti, satis, superq; vobis est si id solum patriæ, meisq; reseruo, ac tribuo, neu hic miserè degam. Et postquam me philosophari vis, id est tuo more necessariis tantū frui, adicias salua dignitate, necessaria illa quidem. alioqui tibi habeas eam philosophiam, quæ generi pariat ignominiam, & Philosopho ipsi miseriam. Ego verò, vt existimas, neq; habeo, neq; possideo, sed pendeo iam, vt vides, aliorum arbitrio, & potestate. Itaq; quod tantopere concupisco est, vt mecum aliquando possim viuere, & constituere iam vitæ rationem, ac statum, vt si hic fieri nequeat, aliò animum intendam, quando per me, neq; familiares meos steterit, quo minus hic gentium vitam traducerem. Hoc inquam est, quod postulo, includi scilicet, aut excludi: non magistratus, aut imperium, quæ tecum sentio fugienda potius esse, quàm expetenda, perinde quasi musis infesta, & tranquill-

tati contraria, & à nostro proposito, nostrisq; consiliis prorsus abhorrentia. sed ut finem epistolæ faciam, ita hodie comparatum est, ut satiri solum philosophentur, & inopes philosophari cupiant. Vale cum Iacobo filio. Papiæ.

Ant. Panhor. Cambio Viro Illustri. S. P. D.



Nas à te literas accepi tantum ab digressu meo, suaves tamen illas, & verè Cambianas. à me verò plures, & quotidianas accipere debuisti, ut iam verear, ne fastidio tibi sint ita crebræ, tamq; inanes ab Antonio epistolæ. Sed quæso des hanc veniam desiderio meo, ut dum absens sum, te cogitem, te somniem, te oblecter, deniq; te obtundam si non viuo sermone, saltem epistolari colloquio, donec Dii boni mihi cōcedant, tuis suauissimis moribus frui posse propius, coniunctiusq;. Caterum suades, & hortaris ad extremum epistolæ, uti pacem, & tranquillitatem mihi dem, id ego velim vel præcipuè posse mi Cambi. sed qui sperant, ii propè mortui mihi videntur: nam dum futura expectant, præsentia omittunt, ac negligunt, neq; interim sibi, neq; aliis viuunt. Nunc primum experior, ingenio nihil incommodius esse, quàm spem, nec quicquam magis contrarium tranquillitati. Nullo equidem pacto adduci possum inter sperandum, ut aut commenter, aut interpreter, aut philosopher, aut poëter, aut quicquam laudis exer-

ceam, aut virtutis. Vt mihi quidem videtur, ignauia, atq; desidia mater est spes, & animorum aegritudo vel maxima. Hæc hæctenus. Neq; ex Palatio, neq; ex Cremona nostris quicquam literarum adhuc suscepi: vereor ne morbus ille lethargicus eos teneat. si perrexerint mecum silere, dispereâ, nisi ambobus quasi vita functis faciam epitaphia. Vale.

Ant. Panhor. Cambio Viro Illustri. S. P. D.



On est quod amplius queraris de Antonio Abbate viro terribissimo, & nostrum vtriusq; amicissimo, pro eo quod Cornelius Celsus adhuc tibi redditus nō fuerit, quod ipse agrius, quàm tu, agrius profectò, quàm tu fert: nam cum mandasset tibi codicem reddi Mediolani, erat enim eo tempore Mediolani codex, interim ad se deferretur Papiâ. Commendabitur itaq; fidei Feruffini nostri viri amplissimi euntis ad te cras, qui non grauabitur ad te id librorum deferre. Tu verò suauissimum Abbatem nostrū, meq; simul haud iniuria expurgatos habeas. Quod sequitur audies, vt opinor, fronte contracta, sed audies tamen factorum, siderumq; voluntatem. Hesterno vesperi redditæ mihi sunt ex Bononia literæ à Ioāne Farafalla Siculo quodā conterraneo meo viro eloquenti, & iuris ciuilib non solum doctore, sed etiam docto. Renuntiat mihi, Augustam necessarium meum aduenturum Genuam, & aduenisse iam nunc fortassis

fortassis mea causa, hoc est, ut me secum reducat Panhormium. est is industria, auctoritate, elegantia in primis præditus, cui quidem refragari, ut nefas, sic & difficile, & penè calamitosum mihi erit. In Principem nostrum maximè afficitur, pro quo, ut ab eo aliquando intelliges, pericula etiam capitis adiuit. Id ego vaticinabar fore mi Cambi, tecumq; rem, & vaticinium contuli, si ritè memineris, & nunc etiam ut præsentires meam profectiōem, immò relegationem, id tecum communico, ut mecum angaris, mecumq; deplores, simulq; deterrimum meum fatum incuses, & damnes. Res ita se habet, & hisdem epistolis narrat Farafalla meus nescio quos proximos tumultus in Ciuitate tua Bononia, tua inquam, nam mea erit apud Barbaros, ut audisti. Farafallæ literas si legere concupiscis, ad te dimittam. Ego verò confusus mœrore rerum mearum, & noua vitæ ratione, totam adhuc epistolâ legere nequiui, & hanc inter lachrimandum ad te exaraui. Vale. Papia.

Antonius Panhor. Bartholomeo Pontifici. S. P. D.



Lures ad te iam dudum literas dedi, meoque satis, ut arbitror, officio feci. Tu contra nihil respondes ob melle, ut arbitror, occupationes, quæ te vehementer,

Q

& vndequaq; distringunt, maximè cum Reipublica Genuensium præsitis. verū ea opera, quæ amicis impenditur, primam esse debere, aut saltem primæ, id est virtuti proximam, monumentis Philosophorum traditum est. Odi equidem negotium, quod quidem honestum, aut vtile sit, si modò amicitia vel minima ex parte sit obfuturum. sed sus Mineruam. tu quidem id altius prospicis, & non sine potissima ratione hæc nus siluisti. Ego iam pro lumine sapientia tuæ mihi persuasi, rectè, & prudenter actum iri quicquid agatur consilio tuo. Vale, nam quicquid ad me attinet, accipies ex epistolis meis ad Bonacursium Panhormitanum beneuolum, & necessarium meum. Iterum vale mea spes.

Ant. Panhor. Bartholomeo Pontifici. S. P. D.

DUm tu isthinc, ego autem hinc ob aëris inclementiam vagamur, factū est, ne iam pridem ad te scribere potuerim, aut si potuerim, cer tē nesciuerim quò. nec proinde velim putes, te à me remissius obseruari, quia iam pridem sileo: nā si uel omnino mutus efficiar, non propterea te colere desistam, quinimò & si prorsus loqui obnegetur, capite tamen annuam, te per benignitatem meum benefactorem, per doctrinam meum præceptorem, per virtutem meum Deum: verum absis licebit, tecum sum, tecum loquor, tecum poëtor. Quod autē in præ

sentia à te peto, audio enim te Genuā reuersum, id est
ut Iacobum Modociensem præclarum adolescentem
ames, & honestes, etiam causa mea : nam etsi per
se, ac propter se eum diligis, quippe humanitatis arti
bus, quarū tu princeps es, plurimum valet : hoc meū
tamen de homine iudicium quæso aliquid beneuolen
tiæ adiiciat, aut si tota eum beneuolentia iam comple
xus es, illam firmet in posterum. eiusmodi enim est
hic Iacobus, quod in adolescentia potissimum miror,
ut ad ostentationem nihil referat : tacitus secum ga
udeat, sermone urbanus, vita simplex, lectione assiduus
& supra ætatē eruditus, ut Gasparini discipulum pos
sis agnoscere. epistolas scribit, quales à te, ne ornatius
quicquam dicā, tuoq; ingenio profectas arbitremur.
postremò & à magno, ac diuino nostro Frāncisco Bar
bauaria amatur, & amatur vnice, clarissimum ipsius
Iacobi virtutis, ac probitatis argumentum. quos ille
amat, spectatæ medijs fidijs, ac inspectæ virtutis ho
mines habentur, & quodammodo insignes. Siquid
igitur mihi tribuis, siquid Barbauariæ nostro, hunc,
de quo loquimur, adolescentem tua gratia, tuaq; suf
fragatione dignum puta, quem si tua opera auctum,
& ornatum aliquando intelligemus, ego, quod solum
possum, tibi laudes, & gratias decantabo : Barbauaria
verò, ut est omnium gratissimus, quàm cumulatissi
mas referet. Vale.



A quæ ad dignitatem meam spectant accipies ab Augusta meo, qua ex re abundè lætaberis scio. non is enim es, qui amicorum absentia angaris, si modò absentix iusta, & fortunata sit causa, verum hæc ab Augusta. Aurispa noster sacerdos effectus est, et Plebanus designatus. Farfalla verò vir suauissimus Bononiæ agit, dabo operam ad me veniat: perfacile quidem hic gentium magistratus exorauero, si modò id illi animi est. Henricus noster Forliuii est apud Franciscum Phisicum hospitem familiarem suum, si sarcinulam hic suam reluat, transeat ad nos. Franciscus Pontanus poculo amatorio iam annum insanus est: spero tamen hominis salutem. verum hæc à Viterbione proximè accepimus Mediolani, qui hac in re velim ut in cæteris vanus comperiat, & mendax. Viterbio verò causam captiui fratris agit apud hunc Principem. tandem intelligit veterem nostram amicitiam sibi, & fratri reo capitis plurimum, atque feliciter conduxisse, Glelmus vnà cum Russo Gonzago balneas colunt apud Pisas, alter ille seruus verna mala scabie correptus est, alter mira animi constantia Orestem prosequitur, eique subministrat. Tuscanella noster Sarzanæ degit, Philel-

phus adhuc Florentiæ, Gasparinus hic senio iam,
& inualetudine confectus. Tu vale, meq; perseue-
ranter ama. Papiæ.

*Antonius Panhor. Xanthio
suo. S. P. D.*



I vales benè est, ego sine te valere uix
possum. spero ad perpauca menses, hinc
me Panhormium conferre, cum ob alias
causas, quas tu nosti, tum quòd Xanthius meus ed
gentium agit. Interea si quid aduentui meo astrue-
re potes, nam debes, feceris vt te decet, & ami-
cum verum. Ab Augusta viro optimo mittentur
mihi Alphonsei centum, perbreuem quidem via-
ticum, & ad necessarias res tantum vix opportu-
num, ad voluptarias nihil omnino. hoc velim & tu
mecum prospiceres, & non ignara mali & reliqua:
eo pacto & amoris contractus fiunt, & culpæ di-
strahuntur, & expurgantur errata. A Farafalla no-
stro literas accepi, valet, sed in re tenui. Seruus ille
verna Glelmus Mamertinus adhuc carcerem co-
lit: subuenissem hinc illi cum Cambio familiarissi-
mo meo, si de me tale beneficium impurus, & in-
gratus seruus meruisset. Concordiam inter Ponti-
ficem & urbem Bononiæ factam affirmant, non
sine laude & gloria ciuitatis: quanquam ex Cam-

bio meo nihil tale adhuc accipio. Tu benè vale, nā cætera ex iucundissimo nostro Henrico corā intelliges.

Ant. Panhor. Davidi Viro Clariss. S. P. D.



I uales, ualeo, nam proximè te valentem, meiꝑ; & memorem, & in primis studiosum accepi: qua ex re cum mihi plurimum gaudius tum, tum maximè sum admiratus tuam animicōstantiam. non temporum, non locorum distantia abduci potuisti, quin memoria saltē honestissimæ illius nostræ consuetudinis fruerere: facis quod debes, eoꝑ; præclarius, quò perrarum genus est perseueranter amantium: neꝑ; meo quidem iudicio plus laudis ac gloriæ aucupaberis ea qua plurimum præstas eloquentia, quàm beneuolentia: illa quidem admirabilè, hæc & amabilem te reddet: tum illa hominum voces, hæc & animos tibi comparabit. ea demū gloria præcipua est, quæ ex amore, & charitate profiscitur. Demosthenem, & Ciceronē admiratione prosequimur, at Pyladem, & Damonem etiam veneramur, colimus obseruamus: horum enim facta celebrantur, illorum dicta. verum ego mi David vtrumlibet id in te diligo & deosculor: neꝑ; te dehortor ab eloquentia, sine qua fieri posse virum egregium haud quaquam putaue- rim: sed præcipuè te ad amicitiam hortor, & currentem, vt aiunt, excito, illincꝑ; tibi laudem parari concupisco, vnde perrarius, perꝑ; difficilior parari consue-

uit, & parta luculentius, ac præstabilius elucere. Ego quidem pro virili nunquam defuturus sum tam præclaro ac planè sanctissimo sanctitatis officio teq; mutuo, teq; constanter amabo, atq; ita ut posthac magis neminem: deniq; & te licet absente obletabor suauissima virtutum tuarum memoria, studeboq; saltem in amore à te non iri superatum: verum hac hætenus. Aurispa tuus sacerdos Plebanus creatus est, & Ferrariensi gleba quodammodo adscriptus, horridus quidem ille desidia, latamq; trahens inglorius aluum. Vale. Papiæ.

Ant. Panhor. Viterbioni. S. P. D.



Olo, & item peto ut Antonio Cremonæ nostro viro optimo meo nomine restituas illos aureos Philippeos, quos tibi iam dudum in tua inopia mea cum incommoditate mutuaui: facies iam iā amodò officium grati, ac iusti hominis meum mihi tribuere, ne nomen induas & ingrati, & nullius si dei viri. nosti quid mihi debeat Blasius frater, nosti quid de vobis omnibus merear, nosti quod periculum iniuerim tua, ac tuorum causa. quid est quod vnquam de te sperent ceteri, si mihi omnia debes, nec quod meum est tradis? qua spe reposcam à te Valerium tuum, si tardas in restituendo quod meum est? pollicitus enim es mihi Valerium tuum, quem si Cremonæ nostro reddideris non grauabitur ad me de-

ferre cum pecunia codicem. iam verò uides quid facturus sis, nisi pluris facias breuem pecuniam, quàm amicitiam meā, & nominis mei notam. Vale. ex Lau-
da manu turbata.

Antonius Panhor. Iacobo Abbati.

V. C. S. P. D.



I vales benè est, ego valeo, & te sitio. si iam pridem ad te non scribo, scio me excusabis, ac præpeditum potius arbitraberis, quàm aliqua ex parte violes beneuolentiam in te meam: eo quidem ingenio es, ut & constanter ames, & amicum verum haud quaquam peccare posse existimes. ego, quanquam occupatus sum, non propterea me expurgo: sed ira sæpe vlu venit, ut quos maximè amemus, cū eis maximè sileamus: atqui venia dāda est, modò per seueremus amando, tantumq; beneuolentiæ quotidie adiiciamus, quantum sermoni detrahimus, & epistolis. amor verus nō verbis, sed virtute gignitur, atq; continetur: ego nisi te perseueranter amo dispeream, de his satis. Antonius Cremona vir apprime suavis, & amicus meus ad te it, neq; putes abs te contendat quid Romæ potes, aut bullas frullas: cordi tuo inhiat, hoc petit, hoc sibi perpetuò deuinciri desiderat: accepit enim te humanitatis, & eloquētiæ, cuius & ipse studiosissimus est, esse iam principem atq; pontificē maximum: id est, quod in te colit, ac coram cupit exosculari,

lari.tu, si me amas, hunc hominem, quem singulariter diligo, comiter, ac pro tua solita in meos omnes facilitate, ac festiuitate suscipias: quem & Cardinali nostro viro maximo periucūdum efficias. quæ verò ad meū statum attinent, & fortunam, ab hoc viro suauissimo accipies viuo sermone, quarum rerum & ipse magna pars fuit. Vale, meq; mutuò ama. Ex Lauda.

Ant. Panhor. Riccardo suauissimo. S. P. D.

A Digressu tuo hinc neq; literas, neq; nuntium accipio, quod proinde mihi graue est, nam in amore mollis sum nimis, in te præsertim amando, quippe qui me tuis pharmacis, idest humanitate tua irretitum reliquisti, vt præ tui desiderio timuerim aliquando tabescere. hocine amicitia est, si lere tamdiu? hocine pietatis, amicum deserere? verū pro tua hac lentitudine mihi pœnas licebit rependas, videlicet ne graueris, aut graueris licebit, hunc tamen adlatorem epistolarum virum eloquentissimum conducas, ac perducas volo per omnes istas ruinas, perq; loca omnia Romanæ vrbis insignia: id enim ipsum, vt est solertissimus antiquitatis scrutator, in primis auet, atq; à te efflagitat. Enimuero vt paucis deprehendas, meo huic diuino Principi, ac principibus his viris omnibus gratus, & iucundus est, proq; suis literis, proq; sua egregia virtute dignus nimirum qui à summis viris diligatur, & obseruetur:

eum igitur ama, & amorem fœneraberis, scio ei quantum in te benefacias, neq; oleum perdes, aut impēsas: mihi verò nihil è Roma voluptosius referre potest, quàm si intellexero eum tecum coiuisse gratiam immortalem. reliqua aget ipse præsentis sermone. Francisco Alberto viro splendidissimo me simul, & tabellarium meum Antonium Cremonam etiam, atq; etiã commenda. Cathalanus ex me saluus, ac lætus sit. Vale meum suauium. Ex Lauda.

Ant. Panhor. Cathalano Lasela viro humanissimo. S. P. D.



Nullò antehac plenius, aut suauius accipere potuisti fortunas meas, quàm ab hoc potes adlatore literarum, viro pereloquenti, ac mihiarctissimi deuincto familiaritate. quod facias velim, nam & iucunditate narrantis oblectabere multū, & meas vices gaudebis certè scio. Viuo equidem lætus, & à summo, ac diuino hoc Principe dilectus vel supra morem. verum hæc, & similia plura de me intelliges à Cremona meo: in quibus si quid est quod possim aut tuo, aut Bornii fratris nomine, summa, atq; omni diligentia, ac perlibenter id quod libuerit deducam: tibi quidē, & per te tuis omnibus perpetuò sum obnoxius, idq; & fateor, ac cōtinuè fatebor apud gentes. Iā verò puto tua tibi pecunia restituta sit integra, aut magna saltem ex parte: sin minus non mea culpa,

aut ingratitudine accidit, sed mensariorum Mediolanensium, quibus mandaui iam dudum uti gemmae illae proscriberentur, deq; pretio fieret satis Cathalano meo: item aliam quandam pecuniam quam tenebant meam, tibi ut traderent iussi: id sit nec ne tandem dissolutum ignoro, & à te certior fieri concupisco. Interim Panhormitam tuum amato, à quo redamaris in mirum modum. Dionisium audio Roma discessisse virum aureum, & de me bene merentem: sit felix ubicunq; sit. Tu vale. Ex Lauda.

*Antonius Panhor. Marcolino Barba-
uario. S. P. D.*



X literis nuper ad Mercurium tuis, quamquam ex tempore, ac raptim editis, licuit tamen animaduvertere & ingenium tuum ad eloquentiam natum, & quod magnifacio, modestiam animi singularem. nam cum sis natura dulcis, & suavis, nec minus planè doctus & eruditus, maius more Socratico esse, quàm videri, ac prædicare te vnum scire, nihil scire. Præclarè medius fidius, atq; hac temporis licentia, ideo mirabilius, atq; laudabilius, quòd cum omnes penè dixerim elingues simus. Cicerones & Virgilios apparere contendimus: adeo quidem omnia referuntur ad ostentationem, ad veram animi sapientiã nihil. Furata sunt omnia, accersita, temeraria, atq; adeo ardua audemus, ut iam Dii superi cœlo re-

formident. Tu cōtrà, nihil mehercle blandior, solus fè
 rè intra te gaudes, & est intra te sanè vt gaudeas, ne va
 nam aliunde adsciscas voluptatem. est inquam in te
 Deus ille Socraticus, id est vera virtus, veraq; sapien
 tia: nec in te solū effulget illustre illud Barbauariorū
 genus, sed etiam maiorum tuorum mores, aurei qui
 dem illi, & liberales in te efflorescunt, videnturq; præ
 ferre quandam laudis spem certam, & hæreditariā:
 sed de hoc aliàs accuratius, prolixiusq;. Tibi mitto epi
 stolam quandam Gaudentii mei versibus ad me pro
 ximè exaratam, meo quidem animo elegantem, & te
 dignā: redolent in ea omnia antiquitatē, & vt auctor
 ipse Romanus est, sic & hoc: & quicquid ab eo quoti
 die emanat, quandam spirat, sapitq; Romanitatē. om
 nia sunt in eo terfa, luculenta, omnia crebra, & sonora.
 eam per legas te oro, tametsi vel inuitū te trahet scio.
 eam æstimes, & si quid est, quod in ea te fortassis oble
 ctet, quod spero fore, id ingenuè, & sincerè, vt cætera,
 pronunties. qui mihi enim in hac re per amicitia for
 rasse non credunt, tibi pro tuo graui, & seuerio iudicio
 adsentiant oportebit. Equidem nolim illi amorem, &
 officium meum obesse, virumq; doctum mea causa
 sua laude fraudari. Vale.

Ant. Panhor. Andrea Theologo, S. P. D.



Ellem pluribus, sed de via fessus, pluribus te
 cum agere non possum. Veni, fortuna tibi
 partita est honorificētissima, & satis utilis, etiā

præter le&uram, quam tibi facillè impetrabimus. Et tu putabas me fortassis oblitum tui: at ego feci vt creare studiū, vt vulgò loquar, Cācellarius. honor vt nō si summus, & vtilitas magna. tu viam uora, teq; confer ad Stratellæ oppidum, vbi pestilentiā fugiens ago in præsentiarum. Vale.

Antonius Panhor. Marcetto uiro splendidiſſimo. S. P. D.



Iceat affari te Marcette hiſdem carminibus, quibus affatur Fuscum Poëta quidam non illepidus.

Siquid Marce vacas adhuc amari,
Nam ſunt hinc tibi, ſunt & hinc amici,
Vnum ſi ſupereſt locum rogamus,
Ne me, quòd tibi ſum nouus, recuſes,
Omnes hoc veteres tui fuere,
Tu tantum inſpice qui nouus paratur,
An poſſit fieri vetus ſodalis.

Quòd ſi id poſtulando cuiſciam forſan importunus, atq; inſolens viſus fuero, magnum proſectò munus amicitia, tuæ præſertim eſt, id egregia atq; eximia virtuti, & probitati tuæ potius imputet: quippe quæ facit vt qui te nunquam viderint, te & diligant, & admirentur, & abs te diligì magnopere concupiſcant: idq; ſi acciderit, ſe ſe tali beneuolentia

fortuna tos existiment, & rectè quidem: amari enim à
 spectatis, & maximis viris, id non ultimā hominis lau-
 dem esse maiores tradiderunt. quo fit, vt tu quoq; pro
 inde quia diuino nostro Principi mirificè places, clarif-
 simum argumentum exhibeas humanitatis atq; mo-
 destiæ. Virtute quidē ac probitate præditi homines
 natura malos exhorrent, & haud secus atq; venenum
 euitant: contrā autē, bonos, ac puros toto pectore am-
 plexantur, iisq; tantummodo oblectantur: in quibus
 imaginem quandam & similitudinem sui cernere vi-
 deantur. Itaq; mea quidem sententia non potest non
 tersus, & non emendatus esse, qui magnis viris, & or-
 natissimis collibuerit. quamobrem non absurdè fortas-
 se id fecerit, si quis tuam gratiā inire studuerit, velut
 locupletissimum testem quærens, à quo virtus, si qua
 sit, illustretur sua. sed vt ipse finem faciam, teq; non ab-
 ducam amplius ab honestissimis officiis tuis, ardeo &
 quidem cupiditate incredibili abs te amari, & in tuis
 vel minimis familiaribus adscribi: quod si pro tua illa
 benignitate, qua inter mortales excellis, à te exoraue-
 ro, vitam Deorum immortalium adeptum me esse
 crediderim: illudq; poetæ nostri ad te sapius decanta-
 bo, Tu das epulis accumbere Diuum: hæc hætenus.
 Cambius noster vir amplissimus quādā, quæ ad me
 pertinent, viuo sermone tecū ager: qua in re si tuo stu-
 dio, tuaq; diligētia vti velis, nihil addubitamus voti no-
 stri, desideriiq; compotes fieri. ex quo vel ad glebam

vsq; me obligabis, nec non musulas meas tibi perpetuum constitues debitrices: quæ si tua opera otii nanciscatur, vnà cum Casare nostro ad cœlum, ni fallor, laudibus efferere: per gratæ enim musulæ sunt, & beneficia perire non sinunt. Vale.

Ant. Panhor. Gaudentio. S. P. D.

F Ram & ipse de te vehemēter anxius, hoc maxime rure agēs, vbi innumerabilibus ferme incommoditatibus, atq; molestiis deiectus, ac propè confectus sum, cum tuis interim epistolis, id est suauitate incredibili recreatus, atq; restitutus sum: quibus haud scio an fortunatius fortasse aliquid, sed nihil certè iucundius, aut opportunius mihi in hoc præsertim loco potuisset accidere: quodq; me erigeret promptius, atq; redimeret ab hisceurbationibus, oppugnationibusq; rusticanis. Audi quid hoc est, te obsecro, paucis absoluiam. Est hoc in loco pro domicilio mihi casa quædam, quam rectius haram porcariam appellarim, atra, atq; adeo obscura, vt ne noctuæ quidem, aut cuculi inhabitent: fuligine, rubigine, araneis, & squalore obsita, ac mucida, tibi cine circumquaq; fulta, & ruinam minitans, atq; mortem. hanc interdum ac noctu perpetuò circum excubant fastidiosæ foeminae linũ tudentes, & nescias an rudētes potius, quàm ridentes, & latrantes magis, quàm cantantes: sed quicquid id est certè molestum, atq; perpetuū est: prope

autem area messes terit non sine crepitu, strepituq;. Hinc igitur ut vides obtusus, illinc oppressus, ac promodum oppugnatus sum à porcis, pullis gallinaeis, anseribus, asinis, bobus: circumuallarunt me plaustris, & claustris, merdis liquidioribus, & alto luto: effeceruntq;, ut me domi continuè retinerem, nec pedem proferre auderem etiam caligatus: neq; domi tutus sum, nam præterquam quòd per breuis illa est, & fur non magis, quàm domui similis, & qualiscunq; etiam ruinosà, excursionè soricum, & acerba, & perpetua inter se prælia, & tumultus, me territant, & in primis infestant. Iam verò, ut Codrus ille satyricus diceret, Et diuina opicis roserunt carmina mures: roserunt vestes, roserunt calceos, soleas, bracas, roserunt deniq; palpebras Ergotelis, & Palatioli os, & aures. Hiccine me poetari putas? hiccine philosophari? Quid dicam præterea? aut quid non dicam? de culicibus, pulicibus, muscis, crabronibus, fucis, & his, & sexcētis aliis crucibus, quibus hic exedor, exenteror, mactor? quæ omnia in præsentiarum prætereo, ut ad te veniam. Tu quidem sanè aruspex, & mearum quasi conscius ærurnarum amicè pariter, & humaniter effecisti, literas ad me dādo peruenistas quidem, ac meis hisce infortuniis vnicum profectò remedium. Scribis ut in scribendo eam gloriam adepturus sis, quam adhuc iuuenum adsecutus est nemo: prouocas adolescens senes, prouocas, & vincis, ingenio, & natura felix, doctrina eruditissimus,

oratione

oratione adeo dulcis & suavis, vt quæ ipse componis, efficere ac complere apes floribus, & innectere videantur : sed de te apud te non dicam vltcrius. De profectiōe autem tua sic sentio, vt siquidem à summo Pontifice accersitus es, eas, nihil te moror: dignitas enim tua simul & vtilitas me licet desertum, proq; tua absentia semianimem eriget atq; exuscitabit scio: sin verò intemperata quadam propinquorum tuorum beneuolentia euocaris, itaq; in rem minus certam profecturus es, ne decedas te hortor, atq; rogo, ne illorum mollities te infirmet, deq; gradu deiiciat, vt dicitur. Præterea illuc accessurus es, vnde omnes exeunt, fugiuntq; propter famem, bellum ciuile, & pestilentiam: vt beati quodammodo habeantur, si quibus illinc se recipere potestas aut facultas data est. est nimirum tibi hic gentium tenue salarium, tuaq; doctrina ac meritis non satis dignum: id fateor, verum illud meminisse præstabit, quid Turpilius Limpia eleganter ait, Profectò vt quisq; minimo contentus fuit, ita fortunatam vitam vixit maxime, vt Philosophi nunc isti, quibus quiduis sat est. Quod si grandiorē tibi pecuniam expetiscis, erit tibi publica Ticiui lectura, & de meo salario tibi quātumuis impartias, tuoq; superadiicias volo, spondeo, recipio, atq; adeo omnia quæ mea sunt, tibi habeas cōmunia, & vtaris, & fruaris. Postremò eum librum, quem

de voluptate nuper edidisti, videre ardeo cupiditate incredibile, èd magis quòd de dolore scribere mihi cordi est. Opus id igitur quàm maturrimè ad me mittas te oro, & obtellor: aut si vacat, ipsi. me visens adferas tecum optatissime mi Gaudenti.

Vale literarum spes, & Bossio Pontifici, & Bossiolo tuo meo nomine.

salutem plurimam im-

partias. Ex

Stratella.

ANTONII BECCATELLI

SICVLI COGNOMENTO PANHORMI-
TAE EPISTOLARVM GALLICARVM

LIBER QVARTVS.

*Antonius Panhor. Dominico Ferussino
uiro humanissimo. S. P. D.*

Vonam vsq; tandem te moratu-
ri sumus, an vsq; dum tui deside-
rio tabescamus? te quidem in diē
ex die iam dudum expectamus,
neque adhuc ista illucescit dies,
neq; vsquam appares. Quod &
si me fortasse æquius ferre, vt vi-
rum decet, arbitraris, an ignoras mulieres esse, & mō-
ræ, & amoris omnino impatientes? cum dico mulie-
res, sororias tuas interpretare, quæ, vt tuæ salutis te-
nerrimæ sunt, ita te efflictim amant, ita tuum huc ad-
uentum vel præcipuè optant, etiam supplicationibus,
& votis. pararunt tibi sexcentas delicias, quæ non mo-
dò te febribus debilitatum in pristinam valetudinem
restituere queant, sed etiā Lazarum à mortuis susci-
tare. cultæ tibi sunt pulcherrimæ quæq; Ticinenses
nymphæ, ad harmoniā tibi instrumenta omnia ador-
nata, simul & temperata, purgata pauimenta, aulæ.

recti parietes, floribus, fertis, & suauibus herbis ridet,
 ac redolent omnia, teq; ad voluptatem quasi expo-
 scere videntur. Vinum præterea non præteribo,
 tum Chium, tum Cretense, tum Vltrinalcum: quæ
 tibi quanquam parata sordeant, ac floccifiant, fe-
 brientibus enim vina non sapiunt, tamen lætitiæ, ac
 voluptatis condimentum est Bacchus, poteritq; si
 non te, tuum saltem sodalem huc facile pellicere.
 Tibi verò, si aquula per hæc tempora magis pla-
 cet, vbi illa vel gustu suauiore, vel visu iucundio-
 rem, vel tactu leuiorem inuenias, quàm in Ticini
 fluento, quàm in pomario Principis, quod Bar-
 chum vocant? vbi præter limpidissimos riuulos pra-
 ta extant perpetuò viridantia, luci amœnissimi, ar-
 bores, ac fructus cuiusvis generis, auicularum per-
 petuicantus, piscinæ, cuniculinæ, atque hinc lepo-
 res obambulant, hinc damæ pascuntur, hinc cerui
 ob amorem præliantur: atque hæc omnia hic tam
 varia, tam multa, tam amœna, vt nuspiam in to-
 to orbe terrarum aut varia magis, aut plura, aut
 iucundiora esse dicantur. Quid urbem loquar,
 quid pontem, quid palatia, quid viarum strata,
 quid arcem præstantissimam? quæ, quanquam tibi
 neque emenda, neque incolenda diu sunt, tamen
 quia præclara, & magnifica sunt, poterunt ad pau-
 cos dies oculos pascere, ac recuperandæ valetu-
 dini plurimum adiumento esse. Nescio an adhuc

videris has triumphales naues, quas Galli vos Galliones appellatis: si nondum videris, hoc vel vnum herclè spectaculum te recreare, ac protinus reintegrare potis est. earum sanè mirum artificium, & inauditam fluminibus molem ab aliis accepisti: verum hoc maximè iuuabit, si quando eas ipse oculis legens, illius inclytæ victoriæ excitabitur memoria, quæ salutis nostri Principis causa est, & sempiternæ gloriæ. Ego, vt de illis meum aliquando testimonium afferam, nunquam huiusmodi naues inuiso, quin mihi ad cælum animus erigatur, & ex Poëta Imperator factus mihi videar. Quæris præterea oblectamenta literarum: hic vt nosti, gymnasium & est, & floret artium bonarum, ago & hic tuus ego, qui tibi cum Poëtarum iucundissima lectione nusquam defuero. suadent hæc, & plura etiam, vt ad nos aduoles mi Dominice: tum denique te illud impellit, quòd mutatio aëris agrotantibus vnicum est remedium: relaxamenta interdum ipsis fortibus conceduntur. Hæc adeo raptim, & festinanter à me scripta sunt, quàm à te velociter lecta: ne dum inaccuratè tempus tererem, tu in veniendo tempus differres. Vale mea lux, & veni.

Ant. Panhor. Feruffino. S. P. D.



Aufam Ceciliæ meæ, mulieris vrbaniſſimæ, quæ tuis auſpiciis, vt illa ſcribit, commiſſa eſt Nicolao amico, & familiari tuo, te peto, ac rogo commendatam habe, dumq; Alexandria agit, accelera vt victrix euadat Guarinaſtria noſtra: id mihi pergratum erit, vt per hæc tempora, præter victoriam noſtri Principis, nihil poſſit eſſe iucundius. Rogarem te efficacius, niſi preces amicorum moleſtas haberes, mallesq; illis non rogatus, quàm rogatus bene facere. Expecto vt epiſtolam tu ipſe deferas ad Philip-pum Ducem, quæ de laudibus Antonii inſcribitur: abſoluta etenim diu te vnum adlatorem præſtolatur, vt ſi per ſe ſuauiſ ipſa non ſit, auctoritate cerè tabellarii ſuauiſ, & amœna reddatur. Vale decus amicitia, ego ita valeo, vt inter hos ſtrepitus, crepitus, muſcas, & crabrones valere poſſum.

Ant. Panhor. Dominico Feruffino. S. P. D.



Vdio tibi iniunctam eſſe provinciam deſcribendi literas familiaritatis meæ, tum ad Alphoſum commendatitias, tum alias ad propinquos, & neceſſarios meos, proinde mihi maximè gratulor: nam tu, cum diſertus atq; eloquens per te ſis, accedet etiam eloquentiæ charitas illa, qua verſus me ſlagras mirum in modum. tum enim præclare

scribimus, aut facimus, nosq; met ipsos exuperamus, si ingenio & doctrinæ amor, aut odiū congeratur. spero itaq; illas ornatè, accurateq; scriptas, mihi admodum fortunatas aduēcturas, cures modò statim absoluantur: per durum nanq; est diutius ferre desiderium, verum id ita si modò celeritas obfutura non sit. studio tuo inuigiles ad illas familiaritatis, præsertim quibus quantum in similibus aut dignitatis, aut prærogatiuæ aut commoditatis cōcedi solet, nihil prætermittas velim: non quòd ambitiosus sim ego, nihil enim magna exhorreo, sed vt hisce sermonibus impleantur vtres agnatorum meorū, quò mihi facilius, liberiusq; concedatur licentia remorandi, & habitandi cum Philippo Principe: ab eis enim pendeo mi Dominice, vt nihil inuita dicam, faciamq; Minerva. deprehendis itaq; quid illis scribere necesse habeas, vt cōtententur, quid ue sperandum eis item sit de hac Principis nostri deliberatione, deq; eius in me tam singulari & opinione & affectione. Exemplum verò epistolarum cum ad Regem, tum ad propinquos meos ad me prius mitto: nec non illas ipsas primogenias sigillo Principis occlusas, & insignitas. vide quid stultus, & ineptus curē, cum potius philosophari, aut poetari deberem: sed amor, & pietas in propinquos hoc ipsum persuasit, ac compulit mi suauissime Feruffine. Vale cum scribis collegis tuis vir clarissime.

*Antonius Panhor. Dominico Feruffino.**V. C. S. P. D.*

Vm expecto vt per otium mihi liceat aliquid
 paulò accuratius ad te scribere , atq; eo pa-
 cto saltem præclaro illi tuo dono gratiã re-
 ferre, hætenus neq; tibi, neq; desiderio satis meo face-
 re potui. confundor equidem animi quadam ægritu-
 dine, & ita confundor, vt neq; amicis vacare, neq; lau-
 di, neq; ingenio queam: quod & tu nosti, & pro tua in
 me singulari pietate compateris, & angeris mihi cer-
 tè scio. nam qui sperant, atq; animo suspenduntur , in
 vita quodãmodo vitales non sunt, hoc est ignaui sunt,
 desides sunt, & prorsus inutiles, ac propè mortui, quip-
 pe dum futuris inhiant, instantia prætermittunt, ac ne-
 gligunt, quasi Virgilianus ille horridus, Ater desidia,
 latamq; trahens inglorius aluum. In hunc igitur mo-
 dum in præsentia dego, degãq; quoad vel Poëta Prin-
 cipis prodeam, vel famulus, vel si superbum id utrũq;
 est, quoad coquus, vel si quid coquo humilior est, pro-
 nuntier. Quare per sinceritatẽ animi tui, perq; in me
 studium illud incredibile te rogo, Meccenatẽ, atq; he-
 rum nostrum sollicites, vt me ab hac animi tristitia ali-
 quando liberet, me sibi vendicet, seu seruitorẽ, vt vul-
 gò, seu Poëtam me dici suum maluerit. Eius iussu epi-
 taphium Ioliæ suæ fecimus, non quidẽ quale fortassis
 ipse desiderabat, aut merebatur catella illa præcæte-
 ris

ris pulchra, & suavis, sed quale ex media spe illa eadem animi agitudine quivi componere. A Cremona nostro, neq; ab Andrea Palatio viris clarissimis mihi quicquam renuntiatum est post digressum meum, quod non admiror, quinimmo execror. tu igitur sustineas vices omnium oportebit, alioqui silentiū istud amicorum omni passione, & ne quid molestius dicā, etiam spe ipsa mihi deterius erit. Marcolino viro spectato, & insigni commissum, deditumq; me facias, cui dum itidem expecto aliquid eo dignum exarare, vereor ne ingrati, & negligentis nomen induam apud virum omni laude dignissimum. Vale.

*Antonius Panhor. Ioanni Feruffino viro
consulto. S. P. D.*



Nas, & itē alteras à te literas accepi à digressu meo, quibus ideo nihil respondi, quòd me literis purgare non erat necesse, velut fecissem, dixissemve aliquid excusatione dignum. si me nosti retuli semper omnia ad conscientiam, floccifaciens vulgi opinionem, vixi luculenter, & apertè nemini assentiens, praterquàm vera præcipienti. loquatur de me vulgus, vt lubet, ego semper amabo perseveranter, simpliciter, fideliter: contemnā obtrectatores, oderò delatores genus hominū pessimū: tumq; mecum benè actū esse existimabo, cū hominū fæci displicuero,

charus tibi, charus & sapiētibus paucis. Tandē animi
 puritas eluxit, elucebitq; , & veritas diu obtegi non po-
 test, & de his satis. Renuntias te receptum esse in Sena-
 torum numerū à Philippo Duce, & Principe diuino,
 gaudeo medius fidius, & tibi gratulor: quippe qui
 hoc in loco promptius queas animi virtutem ostende-
 re, prudentiam, iustitiam, grauitatem, animi excellen-
 tiam, quàm in schola illa Leguleorum, vbi quāquam
 laus aliqua ingenii, aut memoriæ sit, tamē odiosa hoc
 tēpore efficitur scholasticorū immodestia: multumq;
 refert doceas ne iustitiam, an illam exerceas: etenim
 in legendo clarus efficeris, in exercendo etiā bonus.
 Memini me tibi hunc locum iampridem vaticinatum
 esse, nec me vatē poësis fecerat, sed grauissimi mores
 tui, qui sibi amplissimā hanc sedem suo quodam mo-
 do iure vindicare videbantur, nec non Principis natu-
 ra, quæ talis est, vt prudentissimos, atq; integerrimos
 quosq; in cōsuetudinem adhibeat, si adsint, sin minus,
 accersat. meritò itaq; gaudeo, vbi videam virtutem,
 quod plerunq; fit, tibi peperisse fortunam, & hominī
 summam dignitatē obligasse, qui ex amicis certis mi-
 hi sit planè certissimus. Nūc Ludouicum Ferrarium
 istum tuum, olim meum familiarem compello, homi-
 nem verè ferreum, & vt rugas contrahat, etiam ingra-
 tum: is enim causa est omnis cōtractiunculæ Guarini
 viri cōstantissimi contra me: cum enim sua omnis cul-
 pa, & leuitas sit, in me reiicit crimen Ludouicus: si qui-

dem abeunti mihi, atq; addubitanti mecum deferre Guarini codicem suavit, iussit, perpulit, voluit ut deferrem illum omnino, recipiens in se Guarini auunculi onus: immò contradicenti mihi respondit, si molestè tandè id laturus est Guarinus, quod nequaquam putes, hisce meis digitis exscribam illi longè pulchriorè Plautum, ac pretiosiorè: adfensi tandem, ut de Ludouico utiq; benemeritus. Nosti tu quidè beneficia mea erga Ludouicum, quem nos eundem Guarinastrum appellabamus, & nisi illa exprobrare videremur, memorarem ei, quot menses etiam a grotantem acceperim domi meæ, ac matrem vnà: quoties me Mediolanum dimisere pro se oratum inclytum ductorem tūc iustitiæ præsidem Piccininum, quem tādē in re Guarinianorum deperdita, non solum orauit, sed exorauit, obtinuiq; cōtra eorum aduersarios veteratores quidem, sed beneuolos meos. Miseros iuui, erexi, direxi, protexi, beaui deniq; eo tempore beneficiorū memores, ut potè recentium & satis gratos: nam me Genuam vsq; Ludouicus comitatus est. Me verò abeunte, & ab oculis eius semoto, vide obsecro quid fecerit, aut quid potius non fecerit, non me modò non excusauit, sed inculcauit, nec se id fecisse, sed me criminatus est: in me transtulit culpam, in me pœnā, hoc est Guarini indignationem, omnia mihi promissa mentitus. Ego verò id fore prospiciens, ut primum licuit, librū transcribi curauit, suum Guarino seponēs: quem cum

inuenissem qui deferre non grauaretur, domino resti-
 tuerem. Cum verò Florentiam me contuli Regis le-
 gatus, ideo librum ipse mecum non attuli, quòd Panhor-
 mii liber erat, non Caietæ: vnde subitò proficisci mihi
 fuit necesse Principis mei iussu. Iniustam vbi primum
 libri huius querimoniam accepi, statim per episto-
 lam Guarino me excusavi hisdem ferè verbis, quibus
 nunc me purgo compater apud te: literas ad Guarini-
 num dedimus Scipioni Ferrariensi vtriusq; nostrum
 amantissimo, nunc vt audio Pontifici Vtinenfis red-
 diderit nec ne mihi satis incertum est, nam Guarinus
 super hac re nunquam mihi aut scripsit aliquid, nec
 respondit, subiratus, vt arbitror: sed quid vltra immo-
 ror? consignauimus librum Hieronymo Senensi Phi-
 lippi Ducis Nuntio ad Alphonsum, tibi vt admones
 deferendum, quò Guarino tutius, certiusq; redda-
 tur. Interim Guarinum virum humanissimum mihi
 recôciliabis: quem nisi plus quàm oculos meos amo,
 Dii mihi oculos exturbent. Vxor mea Philippa com-
 mater tua pulchrè valet, grauida iam septem mensi-
 bus. cum pariet, quid ni pariet, statim tibi, & Ergo-
 teli significabitur: si masculû, quod Dii faxint, exol-
 uet, vocabitur Ergoteles, sin foeminam, Feruffina.
 De tuis autem quatuor Feruffinulis gratanter, ac
 volupè intellexi, quos certo scio ita institues, vt pa-
 trem, patruosq; repræscentent, & effingant. Quòd Er-
 goteles Dominico deuinctus sit, maximè gaudeo,

par pari coniunctus est, moratus morato, simplici simplex, inter quos ut necessaria, sic & diuturna, ac perpetua amicitia est. sed 'de his aliâs, nam etiam epistolæ modus habendus est. Vale decus amicitia, & Barbauarios, & Grottos, & Castilioneos ex me plurimum saluta.

Ant. Panhor. Guarino Veronensi. S. P. D.



T si acceperam Herniafroditum meum plurimorum iudicio probatum, laudatumque magnifice, nihilomagus tamen animo mouebar, quod satis sciebam partim exuberantia quadam amoris erga me, partim nouitate, quam veritate magis, illorum iudicia esse: Verum cum te virum simplicem, verum, apertum, & qui in manibus quodammodo mentem geras, idem de me, meoque libello sentientem animaduertam: non modò moueri non possum, sed, ut fatear mollitiæ meam, gaudio distrahor: præsertim cum antehac nulla mecum amicitia, nulla familiaritate fueris deuiectus: neque illud puto, te scilicet in causa hac sententiam dedisse gratia nouitatis ductum: quippe viro prudenti atque spectato nihil nouum, nihil mirabile, nihil denique quod hominum industria atque ingenio fieri non possit videri solitum. Ex quo quidē mihi plurimum gratulor, ac penè blandior mi Guarine, atque id quidē non temerè: summa mehercè laus ab laudatis atque probatis viris egregiis laudibus efferri. Bel-

lissimè quidem is alios laudat, qui semper inde à pue-
 ro in laude vixit, cui nunquam humile, contemptum,
 aut vulgare aliquod gratum exitit. O' felicem meum
 Hermafroditum, vocalissimū tibi buccinatorem forti-
 tum. ò fortunatam lasciuia libelli, iam modò ab inui-
 dorum, ac vulgi sagittis tuta es septemplex & Aia-
 cis ymbone, idest Guarini auctoritate. Sed quāquam
 hæc tua de me sententia mihi iucunda est, vereor ta-
 men ne modum excedat, plurisq; me æstimes, quā
 ipse sim: nam per Deū immortalem, si modò me ve-
 lim ipse cognoscere, quid tam illustri prædicatione di-
 gnum edere potui, homo ciuili studio distractus, atq;
 aliis mille occupationibus ferè contritus? Quā pul-
 chrè Iunius Iuuenalis, Quis locus ingenio, nisi cum se
 carmine solo vexant. Quamobrem te quæso mi Gua-
 rine honora mensuram: nam cum in omnibus mensu-
 ra adhibenda sit, tum maximè puto, cum aliquem lau-
 dare studemus. Solon Atheniensis, vnus ille ex septē
 sapientibus habitus, legem apud Græcos ediderat de
 decipientibus, qua cum his actio erat, qui alios in lau-
 dibus cuiuspiam decipiebant. Aderunt itaq; vt arbi-
 tror, qui te etiam in ius vocabunt, quādoquidem se de-
 ceptos, & dicent, & docebunt. Proinde tutius atq; con-
 sultius facies, si ab hisce laudibus omnino destiteris.
 Quòd si naturæ tuæ benignitas, & incredibilis illa cha-
 ritas, quam in studiosos omnes, tum vel magis in Poë-
 tas intenderis, te vltro cogit, nec potes desistere, par-

cius lauda, quo neminitenearis lege Solonis: nè ue illud præceptum Delphis cōsecratum aureis literis negligere videaris. Ne quid nimis. Ioāni verò Lamolæ viro docto, & emendato, & verè ex Guarini ludo literario profecto discipulo, gratias & ingētes habeo, propterea quòd, insciente me quidem, Hermafroditum ad te miserit meum, measq; partes vltro sustinuerit. nam cum illum tibi vt exhiberem accingerer, præuenit me vir diligentissimus. Postremò te magnopere oro, & obsecro, vt libellum, quem inter cœnandum lusimus, recognoscas, emendes, & malè tornatum incudi reddas. nam si qua ex parte displicuisse intellexero, quod reliqui fuerit, tibi cōplacuisse non dubitauerim. Plura tecū agere animo infedebat, sed abs te inuitus auocor ad auditorium Iuriscōsulti nostri. Illius autem versus, qui superant, tibi plenius explicabo, quos vt ex epistolis tuis colligo, non parua cum voluptate leges. Interea me amare perge, ego enitar vt amore tuo dignus veniam. Vale decus nostrum. Bononia.

Antonius Panbor. Guarino uiro clarissimo. S. P. D.



Erat id solum uoluptati meæ vir humanissimè me, vt & te, quem iam dudum vnicè diligo, fortem pariter, atq; felicem acciperem. id cū vehementer auerem, ac crebrò peruestigare audire, tu præsagus, & quasi aruspex desiderii mei, Ludo-

uicum nepotem ad me mittis, & cum nepote literas tuas, tuas inquam: nam præ literis aliorum, pace aliorum, graues, & iucundæ sunt, ac meo quidem animo redolent musas ipsas. his itaq; te incolumem, atq; animi tranquillum accepi, tum Principi, tum Iuliolo Meccenati tuo viris illustribus quàm maximè gratū esse, reliquisq; Ferrariensibus valde, & tua pro dignitate cultum & obseruatum. eo nuntio haud facillè scripserim quātopere sum oblectatus, & adfectus: sed tu pro firmo & incredibili meo in Guarinum amore id facillè coniectabis scio: & aderat Ludouicus nepos, adolescens & ipse dulcis, & moratus, qui me non gestiētem modò, sed insanientem præ lætitia vidit: nam cum cæteris in rebus satis fortem, ac constantem animū præstare consueuerim, amor est, qui me solum frangit, & enervat. equidem possum inedia, inualetudinem, paupertatem, inuidiam, & reliqua id genus ferre moderate, amici lætam fortunā ferre non possum: immò cum mea ipse voluptate nihil mouear, amici beatitate non possum etiā vehementer non commoueri: ut aliquid nescio quid mollius, aut certè flagrantius in amicum diligā, quàm in mēmēt. hoc est, quod sæpiuscule dico, amoris palmā mihi iure ac merito deberi. liceat apud te loqui Magnifice mi Guarine, qui te cū tantū diligam, ut nec Pylades Orestē magis, aut Damon Pithiam facis tu maximè ut amicitia gloria excellam, tum siquid erro, ne erratū quidem amico celandum puto,

pūto. sed de hoc in te meo amore loquetur res ipsa ali-
quando simplicius effusiusq; . Nunc audi quo in loco
res & fortuna mea, quæ & tua est, sita est, nec cœnam
mensualem, sed Deorum simul accubitū spondeas
licebit. igitur ne altius in præsentia exordiar Philippi
Mariæ Angli Mediolanensium amplissimi, atq; illu-
strissimi Principis, ac mei Cæsaris gratiam vel intimā
adsecutus sum: nec non Francisci Barbauariæ Mecœ-
natis mei, viri omnium, quos nostra ætas fert, & hu-
manissimi, & beneficentissimi, tum curialium, patrum
cōscriptorum, scribarum, deniq; primorum ferè om-
nium apud Cæsarem hunc virorum ac procerum:
idq; potissimum mihi felix, & fortunatū est, magnorū
ac spectatissimorū hominum gratiam iniisse. nam &
si salarium quoq; grande satis mihi cōferatur, hoc fa-
cultates arguit, illud virtutes: collibuisse enim viris pri-
mariis laus quidem illa præcipua, & æterna est, sa-
pientum amor non nisi virtutem complectitur. at-
quanquam in me virtus aut vis ingenii nulla, aut cer-
tè minima est, Cæsar tamen meus & Cæsariani no-
stri, & Mecœnas ipse ita in virtutes flagrant, ita in mu-
sas incenduntur, id est in suam ipsorum gloriam, vt
vel opinionem, quam de me meoq; ingenio, meisq;
moribus habuerint, dilexerint, auxerint, honesta-
uerint: vt si quidem ea in re tribuas, non meo qui-
dem merito, quod nullum est, sed incredibili no-
stri Augusti benignitati ac liberalitati id tribuas.

oportebit. Est hic verè alter Augustus mi Guarine, & ut armorum industria inter mortales excellens ipse, excellentes quoq; ea in re summa affectione prosequitur, fouet, & exornat: ita & literatos, & bonarum artium studiosos pari charitate, indulgentiaq; cõpletur, nec domi minus, quàm militiæ præstans. me velim contempleris, ut omittam alios longè doctiores & eruditiores, quibus hæc sua partim academia, partim curia redundat: me inquam contempleris, quæ quantū faciat audisti supra, & luculentius, & prolixius aliquādo ab aliis cognosces: sed Dii nobis illum sospitent, sustinentq;: tu nunc partem mearum audis fortunarum ac status: nam commoditates præterea, honores prærogatiuas ab nepote tuo accipies viuo sermone: Illud penè exciderat, quod tu vel in primis admiraberis, quòd neq; lecturæ, neq; scriptioni, nisi quantum libeat, obstrictus sum: salarium quoq; si cui soluitur, mihi percommode soluitur, & perlibenter. sunt & alia præter hæc æquè fortunata & voluptuosa, quæ ab aliis honestius potes, si sciscitaueris, intelligere. Ego quidem vereor, ne dum tibi morem gero, hoc est de mea fortuna te certiore reddo, & epistolæ, & continentię modum exceßerim: quanquā id feci non quidem. ut gloriër immerito mihi, sed ut diuini huius Principis & Mecænatis mei naturam paucis deprehenderes, quam tu quoq; deamares, ac laudibus velheres sempiternis. Lamola verò tuæ, meaq; deli-

tia saluus & latus sit , aut si illud mauult, Græcus euadat. Vale.

Ant. Panhor. Guarino. V. C. S. P. D.



Gitur expecto à te latiores illas, quibus mecum verbosius, utq; & amicum decet, gratulaturus es: atq; ita illas expecto, ut cœlestem quasi quandam voluptatem, & lætitiā inauditam. nam scripsissem ad te prolixius, sed argumentum gratulationis intercipere nolui. Ludouicus tuus fortis ac liber est, mecū est, hodie enim se recepit ex volpedo: mecū lætatur, & poëtatur, suauis, humanus, comis est, & verè Guarini nepos. ibi ad te propediem suspirat longo non visam tempore matrem, à quo reliqua accipies. Vale meum desiderium, & Giliolo isti magno, & illustri viro me iterum, atq; iterum gratum ac datum facito. Vale.

Antonius Panhor. Guarino uiro clarissimo. S. P. D.



Acobus hic literarum adlator adolescens haud magna cū re, sed doctus & modestus, & amicus meus ad te it, solum ut te inuisat, & legentem audiat: tuo enim nomine & doctrina iā pridem adlectus usq; adeo est, ut nisi aliquādo voticompos fiat, desiderio faciliè contabescat. Quare tu officiū tuum feceris, & mihi admodum gratum, si quod ve-

hementissimè cupit, latanter impleueris. rem præterea perhonestam, neq; factu difficilem attentabit, ei auxilium & consilium præstabis, quod bonis, ac pauperibus præstare consueuisti. Vale.

Antonius Panhor. Poggio uiro clarissimo. S. P. D.



Cio nihil esse, quod tanti facias, quàm hominum amicitiam, eorum præsertim, qui & uirtute sunt præditi, & studiis Romanæ eloquætiæ clari. id itaq; de te ratus, dū maiora nequeo, si modò virorum gratia maius sit quicquam, quot semper potui huius generis homines, tot semper tibi aucupatus sum: in quibus vel naximè tua beneuolentia dignum existimaui Antonium Cremonam, harū adlatozem, virum meo iudicio doctum & suauem, tuiq; ingenii in primis admiratorem. is nunc Romā, & te petit, te quidem magis, ut quem tantopere colit, ac celebrat, aliquando etiam inuisat, ac saluter: magnā quandam felicitatem arbitratus se inuenturum, si quando detur, te coram exosculari, & uiuas audire, & reddere voces. Quare te peto, & quoniā quidem id vehementer volo, te etiam atq; etiam oro, sine te utatur, ac fruatur quoad licet Antonius meus, vir quidem tersus, ac simplex, nobisq; , atq; his omnibus primoribus uiris vnice dilectus: sanè te dignum iudicabis hominem, si periculum feceris: alioqui mihi quoq; pergratum fa-

ties, nec non debitum exolues, si quos tibi concilio, humaniter exceperis. Quæ autem ad meam attinent fortunam, & reliqua, accipies ab hoc tam eleganti tabellario, à quo si quid in me lautum, & fortunatū esse intelliges, eo utere, atq; abutere arbitrato tuo, tuus enim persto anima ipsa, ut aiunt, & membris. Vale cum Lucio nostro Poëta illustri. Ex Lauda.

Poggius Florentinus Antonio Panhor. S. P. D.

Ioannes Lamola adolescens, ut percepi, tum doctus, tum studiosus tui, attulit ad nos libellum epigrammatum tuorum, quem inscribis Hermafroditum, opus & iocosum, & plenū voluptate. Hunc cum legisset primò vir clarissimus Antonius Luscus, multisq; verbis laudasset & ingeniū, & facilitatē dicendi tuam, nam liber est suauissimus, misit deinde illū ad me legendum. delectatus sum meherculè varietate rerū, & elegantia versuum: simulq; admiratus sum res impudicas, tā venustè, tam copiosè à te dici: atq; ita multa exprimi turpiuscula, ut non enarrari, sed agi videantur: neq; ficta iocandi causa, ut existimo, sed acta existimari possint. Laudo igitur doctrinam tuam, iucunditatem carminis, iocos, & sales: tibiq; gratias ago pro portiuncula mea, qui latinas musas, quæ iam diu nimium dormierunt, à somno excitas. Pro charitate tamen, qua omnibus debitores sumus, unum est, quod te monere & debeo & volo: ut scilicet

deinceps grauiora quædã mediteris : hæc enim, quæ
adhuc edidisti, vel ætati concedi possunt, vel licentiæ
iocandi. Ita & Virgilius adolescens lusit in Priapea,
et multi præterea, qui post lasciuos versus, seueriori-
bus vacauerunt. ut enim Terentius noster refert hæc
ætas aliã vitam affert, alios mores postulat. Ita quæ tuũ
est iam missam facere licentiam, & res serias describere,
ne arguatur vita impura libelli obscœnitate. scis
enim non licere idẽ nobis, qui Christiani sumus, quod
olim Poëtis, qui Deum ignorabant. Sed fortasse sus
Mineruam. Tu ipse hoc idem sentis, quod laudo, pro
bo quæ, & te ad maiora hortor. hæc bono animo acci-
pias rogo. ego enim tuus sum : tu Poggium ascribe
tuis. Plura scripsissem si per otium licuisset: verũ aliàs
erimus longiores, si hæc nõ displicuerint. Vale, & me,
quando id mutuum tibi fieri intelliges, ama. Romæ.
iiii. Non. Aprilis.

Antonius Panhor. Poggio Florentino.
V. C. S. P. D.



Pistola tua, quæ veterem sanè & antiquum
illum eloquentiæ Romanæ morem præ cæ-
teris mea sententia exprimunt, ad me, vt ius-
seras, perlata sunt: eas tametsi auctorem obticuisses,
abs te tamen pro singulari quadam elegantia profe-
ctas animaduertèrim. habent enim epistolæ tuæ ne-
scio quid excelsum, suaue, acre, opulentũ, graue, atque

ea quidem insigniter, vt qui tuas illas esse dubitarit, auctorem quoq; præter te non inueniat oportebit. oblectarunt me itaq; & affecerunt, cum ob alias causas, tum vel maximè, quòd opusculum meum tibi nõ iniucundum extitisse significas, nec non Antonii Lusci Poëtæ non obscuri iudicio laudatum, probatumq;. qua quidem ex re mihi, atq; libello meo plurimum gratulari licet: mihi, quia locupletissimos hos mihi laudatores compererim, qui pro sua ipsorum singulari eloquentia queant ex fumo fulgorem exhibere, atq; ipsum, si modò velint, Tersitem vel quẽuis alium abiectionissimæ conditionis virum illustri laude perspicuum reddere: libello, quia in doctissimorum hominum manus tandem peruenerit, quos certus equidem eram minimè reprehensuros lasciuiam eius: quippe cum plurimos norint viros doctos, graues, sanctos, & græcos, & nostros talia scriptitasse, atq; inter manus adhuc versari Catullum, Albium Tibullum, Propertium, Iunium Iuvenalem, M. Valerium Martialem, & prius P. Virgilium, P. Nasonem, Poëtæ egregios, & latinos, qui plerunq; verba adeo nuda proferunt, & dictu fœda, vt haud sciam, scenâ ne magis, an lupanari dignâ videantur. Ego quidem vir humanissime tot summos oratores, tot summos viros memoriæ proditum comperio se se hoc generis studio & oblectasse, & exercuisse, vt ignorem medius fidius qui se potius non oblectarint, quàm qui se oblectarint. nam ipsum Philoso-

phorum principem Platonem non quidem Christia-
num hominem, sed qui Deum nō ignorauerit, immò
vnum Deum seruauerit, ceteros verò Angelos, vel
Dæmones dixerit, constat versus, & quidem petu-
lantes fecisse in Astera, in Alexim, in Phædrum pue-
ros: item & de Dione Siracusano, & generaliter ver-
sus eius uō nisi molles & amatorios extitisse, è quibus
hos tantum hoc loco commemorem, quāuis aliquan-
tò licentius, vt ait Gellius, liberiusq; ex græco in lati-
num conuersos. tu Platonem lepidissimum Poëtam
audi, audi inquam Platonem Poëtam lepidissimum.

Dum semiulco, suauius,
Meum puellum suauior,
Dulcemq; florem spiritus
Duco ex aperto tramite,
Anima ægra & faucibus
Currit mihi ad labia,
Rictumq; oris peruium,
Et labra pueri mollia
Rimata, itineri transitum
Vt transiliret nititur:
Tum si moræ quid plusculæ
Fuisset in cœtu osculi,
Amoris igni percita
Transisset, & me linqueret,
Et mira prorsum res foret,
Vt ad me essem mortuus,

Ad puerum interuiuerem. Solonem quoq; , & vnum ex septem sapientibus habitum & seuerum virum, & verum Philosophum, nemo est qui nesciat: at tamen eum similiter quidem versus lasciuos edidisse palam est. Item Diogenem Cynicum, Zenonē Stoicū, Zeium Lacedæmonium, Calimacum: in quibus vel præcipuè numeranda est Sapho Lesbica, cuius versus, qui etiam latini extant, ad Phaonem Sici-liensem amatorem suum, adeo impudici, adeo proca-ces, alioqui adeo elegantes sunt, vt cuilibet legenti pruriginem excitent, etiam ipsi Nestori, Priamōq;. Enimuerò, vt Horatius in poëticiis institutionibus scri-ptum reliquit, semper Poëtis, atq; pictoribus concessum fuit quodlibet audere, licere. cum verò lasciuia de-legerint, ea lex est Poëtis, & verissima illa quidem, quā Catullus dixit. Nam castum decet, & pium Poë-tam Ipsum, versiculos nihil necesse est, Qui tum de-niq; habent salem, ac lepōrem, Si sint molliculi, ac pa-rum pudici, Et quod pruriat incitare possint. quod & Valerius Martialis eruditissimè simul & facetissi-mè probat in hæc verba: Sed hi libelli, tanquam con-iugibus suis mariti, non possunt sine mentula pla-cere. Ego itaq; tantorum virorum exemplo uitor, maiorum præcepta custodio, deniq; aliquid strue-re studeo, quod sit in suo genere perfectum, fremat licet Odus nescio quis ex vltima vulgi face: qui ni-hil furiosi habet, præter cerebrum, utiq; vir male-

uolus, falsoq; putans me proinde parum pudicum, quia versiculi mei molles, ludicriq; sunt: quasi ut cetera bona, ita illud quoq; nescierim, quod scilicet eò iucundiores futuri sunt huiusmodi versus, quò minori cum seueritate compositi, atq; eò sanctiores iudicandi, quò apertiores sunt. qua in re si meo testimonio satis non fidit. Madaurense illi magnæ auctoritatis viro nō potest non adsentiri, qui non ineleganter ait, Platonis versus tantò pudicitius compositi, quantò simplicius professi. dissimulare enim, & occultare peccantis, profiteri, & promulgare ludentis est. Et sanè perquam ridiculum est, eos impuros interpretari, qui spurcis verbis utantur, cum res exigit. sanè qui medendi scientia morbos curāt, hi cum obscœnis partibus medicamenta adhibere volunt, obscœnis vocabulis id explicent opus est: an idcirco eos vita obscœnos arbitrare? Scimus Voconium Poëtam summa castimonia præditum fuisse, & tamen eum parem lasciuia exercuisse satis indicat epigrāma, quod diuus Adrianus eius sepulchro inscripsit, Lasciuus versu, mēte pudicus erat. Rursum quis ambigit Anneum Senecam Christum nouisse, & Apostoli Pauli amicum fuisse, & in catalogo sanctorum positum? cæterū si quid Plinio secundo credimus, non seria modò, verum etiam lusus, & sales descripsit. Præterea floret hac in nostra tempestate sacerdos quidam, non minus cōtinens, quàm disertus, atq; eloquens habitus, cuius, ut vulgò loquar,

prædicationibus sæpenumero ipse adfui, & nisi surdus omnino sum, ita nudis, ac deturpatis affatibus interdum exandescentem in frequentissimum populū audiui, ut non dicam in templo, sed ne in foro quidem adesse crediderim. an illum propterea turpem iudicabis, quia turpia turpiter, id est scædioribus verbis castiget? minimè herclè. Mihi quidè, si nescis, eadem mens est, & intentio, nec refert si per lusus ac iocos id ago: namq; eo modo & nos agere posse maiores nostri, ut prædiximus, instituerunt, & instituta perpetuò obseruarunt, & sanè omnes: nam si veterum scriptorū monumentis fides præstāda est, quicumq; perlegitur, aut rerum, aut verborum simul & rerum lasciuia præluse, quorum ex nostris per paucos nominabo: nam si singulos exequi velim, equidem scribam Orestem alterum, & in tergo scriptum, nec dum finitum necesse est. Igitur, ut Plinii verbis utar, verear ne me non satis deceat, quod decuit M. Tul. Ciceronem, C. Caluum Pollionem, M. Messalamq; & Hortensium, ac M. Brutum, L. Sillamq;, ac Sceuolam, Seruium Sulpitium, Varronem, Torquatū, immò Torquatos, C. Memmium, Lentilium, Gerilicū, Virgilium, Ruffum, Cornelium Nepotem, & deniq; Plinium ipsum: & quos penè præterieram, Ennium, Acciumq;: & si non sufficiunt exempla priuata, diuum Iulium, diuum Augustum, Neruam, Tiberium Cæsarem, atq; alios ferè innumerabiles. Ego quoq; tot, tantorumq; viro-

rum exemplo atq; auctoritate fretus, nō est quodd ve-
 rear hisce carminibus iocari, ludere, ridere: cum sciā
 iras, fletus hac quoq; ratione mitigari posse. mirē
 quidem his opusculis animus remittitur, refouetur,
 & ad maiora succenditur. Verum enim verò epi-
 grammata quia breuia licet, arguta sunt, & quibus
 non copia, sed acumine certamus, potest non otiosus
 quisq; perficere: seria verò quia continua & longa
 sunt, sanè nisi otiosus, securusq; non potest. quò fit, vt
 si maximè id concupiscam, serias res tamen repone-
 re non queam in præsentiarum. distringor etenim
 mille, atq; iterum mille occupationibus, quibus nullo
 pacto carere nunc possum. sin verò, quod Deus opti-
 mus maximus sinat, aliquando extricer,

Condere victuras tentem per secula curas,

Et nomen flammis eripuisse meum. Sed quid
 ego hæc tecū, qui itidem, quod ego, sentis, quiq; pro
 tua eruditione facile cōcedis me, sed cum tot tantisq;
 viris errare potuisse? nam cum neq; Odum, neq; reli-
 quum vulgus tanti fecerim, vt eius maledicentiæ ad
 ipsum responderem, tecum id agere consilii fuit, sci-
 licet apud te virum doctissimum, & qui vulgi imperi-
 tiam satis exploratam habes. quereretur de eius in me;
 meosq; mores opinione, falsa præsertim, sed iā mul-
 ta satis superq; satis. Redeo igitur ad epistolam tuam;
 vt ornatissimam, atq; officii plenam, ita mihi admodū
 gratam, & iucundam: in qua quidem nihil legi, nihil

vidi, quin læto animo, quin læta frõte acceperim, præter breuitatem. proinde cura vt posthac ad me longior fias, quod tute perhumaniter polliceris, vt intelligas nihil mihi breuius videri, quàm Poggii epistola longissimæ. Vale.

Ant. Panhor. Poggio viro illustri. S. P. D.



Eruenit ad nos tandē Xenophon tuus, opus profectò dignum, quod Cicero legēdo contereret, & Scipio velut speculum ad bene, beateq; viuendum sibi proponeret. nunc demum intelligo Cyri Pediam scriptam esse ad æmulationem Reip. Platonis: nam hîc quoq; religionis, pietatis, iustitiæ, clementiæ, liberalitatis, moderationis, cōtinentiæ, fortitudinis, constantiæ, cæterarumq; virtutum omnium exempla licet intueri: Regum instituta, & ornamenta domi militiæq; non dico traduntur, sed ita exprimuntur, vt non legere, sed quodammodo videre, & amplecti omnia videaris. Mentior ni Xenophontem legens, mihi visus sim belli Dux factus, audax ad obeunda quæuis pericula, doctus ad conciliandum militum animos, inflammatus ad decus & gloriam: tantaq; mei mihi fiducia incessit, vt si quis interim lectione huiusmodi excitato, ac propè alienato mihi exercitū ductandum obtulisset, oblatus mei, conditionem haud quaquam renuissem. magna nimirum, ac quippe incredibilis Xenophontis vis, vt non iniuria à

veteribus traditum sit, in labris eius sedisse quandam
 persuadendi Deam, talis quidem est Xenophon, sed
 & qualis Xenophontis interpres? nempe illi persimi-
 lis: nam vt Xenophon in affectata illa dicendi iucundi-
 tate inter græcos facile excellit, ita noster hic iucundi-
 tate & gratia latinorum nemini vel primo loco con-
 cessit: quin adeo ingenii facilitate, & cœlesti quodā im-
 petu peruehitur, vt interdum quæ suauissima ac dul-
 cissima fluunt, ipse contemperet, & naturæ vim de in-
 dustria compescat, & reprimat: elegans præterea, cla-
 rus, pulcher, fusus, tersus, lenis, & æqualis: adeoq; om-
 nibus præter amētes eius oratio grata, probataq; est,
 vt æquē ei atq; olim Xenophonti influere sermonem
 Gratias vsurpari cœptū sit. Meritò ergo tibi gratias,
 & quidem ingentes habebunt, ac referent, nisi ingrati
 esse volunt, Reges ac terrarum Principes, quibus ius-
 tissimi imperii formam exhibuisti. meritò & tibi sta-
 tuas erigent populi omnes, ac Principum subditi: qui
 bus persæpe accidit, vt felices sint, si bonum Principē
 fortiantur, miseri si malum. merito & tibi Poggialia
 celebrabit seculum nostrum, cuius tu tam illustri, &
 æterna laude gloriam exornasti. Hæc cum ita futura
 sint, non tu nunc obrectatoris tui immò omnium in-
 uidi, teterrimi, atq; impurissimi hominis maledicta cō-
 temnes: illius dico, qui tam multa insipienter sapit, qui
 literas tantum & syllabas scribentum aucupatur, gra-
 uitatem sententiarum, aut verborum pondera nihil

omnino perspicieus. bellissimè hic quidè à Faccio nostro araneus appellatur, quòd muscas aranearū more tantummodo confectetur: à nonnullis capra, quòd nucleum cum nequeat, corticem obrodar: à me verò non absurdè fortassis cymex iam pridem vocari consuevit, quòd ex spurcissimi pectoris sentina putidissima, & vt poetice loquar, mephitica verba frequenter exhalat. & profecto nihil bonicum inest homini infano, vnde eius animus gaudeat, maledicentia nutritur, liuore disrumpitur, infania concitatur: omnesq; sui similes, flagitiosos videlicet, & indoctos haberi concupiscit. ab hoc, & huiusmodi hominibus quicunq; laudatur, à sapientibus negligatur oportebit: contra malorum omnis vituperatio laus est. Vale.

*Antonius Panhor. Ioanni Lamolæ viro
humanissimo. S. P. D.*



Tomachaberis scio, cum tam breuem literarum faciem intuebere, quanquā tu, & si Orestem alterum ad me scribis, videris tamen admodum brevis, & Laconum more circūcisus: Nō sunt lōga, quibus nihil est quod demere possis, ait Poëta. ceterum existimato meam erga te benevolentiam tantò prolixiorē, quantò breuiorem epistolam. Saluiam quidem in ore gerimus, Lamolam in corde, & eum quidem fixū clauo veri cupidinis: sed missis quæ ubi iā explorata sunt, velim deleres ex animo Floren-

tiam, sit licet Deorum, ut ais, domiciliū. Non tali auxilio, nec defensoribus istis tempus eget: satis enim superq̃; discipulus, & scholasticus fuisti: nunquam ne repones, nunquam ne prospicies utilitati: senesces iam inter pueros, inter ludos literarios senesces? Quos Ambrosios à te audio, quos Aretinos? non tibi præptore opus, sed libris, sed otio, sed Panhormita. proinde mihi renunties velim, & quidem maturè, an mecum optes vivere, an sedem tibi conquiram, & firmam hinc gentium: nam spero præter mea omnia, quæ tibi communia sunt, comperturum me virum tibi magnificū & eruditum, cui si literarum græcarum rudimēta impartias, retribuatur tibi Philippeos centum annuos, & victum, & spem etiā amplioris fortunæ. habebis præterea me, habebis Meccænatem, & amicos meos omnes propitios, faciles, ac perpetuò benefactores. ad summā tibi persuadeas mihi nihil fixius sedere, quàm te cum laude honestare, tum diuitiis augere, modò Diiboni secudent propositum meum. Vale meus ocellus aureus.

Antonius Panhor. Carolo Aretino
V. C. S. P. D.



Audentius Vanius, qui pariter ad te scribit, & libelli sui quoddam quasi præludium mittit, à me pro egregiis virtutibus prolixè diligitur: mira quidem hominis continentia, morum sobrietas,

brietas, & incredibilis ardor ad studia literarum, & bonas artes. Facit ac monumentis literarum tradit quandam inter M. T. Ciceronem, & M. Fa. Quintilianum comparationem, odiosam quidem illam, sed proinde excusandam: quia solum ut sese exerceat, tum ut quosdam a somno excitet, id agere respondet. praestantiam verò nostri Ciceronis cognitam habet, illamque & obseruat, & colit, ac pro virili sua sequi magnopere studet. adficitur tamen in primis ad Fa. Quintilianum, qui tamen si mirifice instituerit vel ipsis incubulis oratorem, & causas, siue maius declamationes scripserit etiam egregie, tamen, Quintiliani & Gaudentii pace dixerim, nequaquam Ciceroni latinæ eloquentiæ principi fuerat, non dico præponendus, sed ne æquandus quidem. Sed stultior ego, qui in Gaudentii causa patronus datus contra eum postulemi. excusandus est inquam Gaudentius noster, qui exercitationis gratia id facit, ut modò dixi, & ut nonnullis dormientibus eo pacto prospiciat: interdum enim quos summissa voce non possumus, clamore ac manibus excitamus. Caterum hac in re tuum officium erit primò Gaudentii virtutes & ornamenta diligere, eò magis quòd te in amicitiam id est amorem prouocauit: deinde eius hanc exercitationem potius quàm comparationem æquo animo ferre, & ut nos facimus, etiam excusare: postremò illum hortari ad humanitatis studia, ad quæ quidē natura meo quidē iudicio natus est.

Nam si tu quoq; vt feueri quidam, ac rigidi iudices, & studiorum censores eum increpes, atq; luccenseas, facile ab incœptis sanè humanissimis destiterit, tantum apud illum valet auctoritas tua. Vale decus nostrū, & Nicolao Nicocli, & Ambrosio Monacho viris clarissimis ex me salutem plurimam dicas. Romæ.

Antonius Panhor. Carolo Aretino.

V. C. S. P. D.



Audeo sic nobilitatā esse amicitiam nostrā, vt qui Florentiam se collaturi sunt, literas ad te meas commendatitias magnopere desiderēt. in his præcipuè est Bartholomeus Faccius Spe diensis haud vulgari mecumbeneuolētia deuinctus: vir apprimè doctus, doctus inquam literis latinis, nā vt gr̃acas addiscat, ea potissima causa est cūr Florentiam petat. huius verò ingeniū ac suauitatem, si rectè auguror, non poteris non etiā vehementer amare: si modò morum studiorumq; similitudo quid possit exploratum habeo. Hunc itaq; mi Carole ita tibi cōmendō, vt magis ex animo fratrem nō queam: amo vtriq; illū ardentissimè, & haud scio, an te excepto, quempiā magis. Quid ille concupiscat ex Nicolao & Tuscanella viris clarissimis accipies. fac quāso sentiā commendatitias, quas ille summo studio ac spe à me efflagitauit, suis desideriis non nihilum conduxisse. Vale.

Antonius Panhor. Nicolao Nicodli.
V. C. S. P. D.

BArtholomeus Faccius Spediēsis meus Anconem proficiscens, isthac trāsitum daturus est: primum vt te inuisat, reliquosq; istos Heroas, qui studiis nostris Florentiæ præstant: graue quidem est, eos aliquando non visere, quorum doctrina aut gloria fueris adlectus: deinde literas gracas hauriendi cupidus libenter se Florentiæ contineret, modò suppeditaret sibi pecunia, est enim re non grandi, virtutis tamen, & humanitatis plenus. facies ea propter officium tuum, si tua omni opera, atq; industria cum iuueris, auxerisq;, quod probè feceris, si hominē isthic apud quempiā primorem ciuem non sine vtilitate locaueris, habebis illum huius tuæ beneficentiæ gratum ac perpetuum, vel ipsius animæ debitorem: mihi verò nihil iucundius efficere poteris: amo equidem illum mirificè, eidemq; æquè ac mihi benè, prospereq; semp optaui. De mea isthac peregrinatione dicemus aliàs, & fortasse aliquid tibi non ingratum. Quæcus noster Cherii rhetoricā profitetur. deq; Faccio verbosius cognosces in epistolis ad Tuscanellam meis. Ambrosius Monachus vir clarissimus ex me saluus sit. Vale.

Ant. Panhor. Nicocli suo. S. P. D.

Ioannes familiaris tuus, & idē meus vir modestus & prudens, & in omni genere diligendus, cui id dederas negotii, vt me tuis cum literis conueniret Romæ, inter ambulandum me offendit: & mihi tuas suauissimas literas reddidit, quibus ac curatius respondebo, cum plus otii nactus ero. Vale.

Ant. Panhor. Nicocli. S. P. D.

Noli existimare mi iucundissime Nicocli idcirco me aliquandiu siluisse, quia tui nominis; tuæq; pietatis oblitus sim. obuersatur enim quotidie oculis meis tua humanitas, tua sapientia, tua deniq; in studiosos omnes, in me verò præcipua charitas: vt siquidē tua hæc singularia officia obliuioni tradam, aut negligens, & ingratus, aut mei ipsius immemor sim necesse est. Iucundæ admodū sunt, fateor, epistolæ vices, nam & absentes quasi præsentēs per epistolas alloqui videmur, & vt ciuiles quædam obligationes literis contrahuntur, sic & nonnunquā amicitia literis conciliantur. Sed perquam ridiculum est putare, si quando amicorū epistolæ repescant, amorem quoq; ipsum algere oportere: quasi non fides ipsa, sed atramentum sit stabilitatis, atq; constantia eius, quam in amicitia quærimus firmentum. Vt si

quando, vt fit, præter consuetudinem tacuerim, tibi persuades, me non minus erga te, tuosq; facillimos mores incendi, sed potius nihil auditu, aut fatu dignū, quod ad te scriberem, extitisse. Vale, & si quid auditu iucundum ipse habes, quod plerunq; soles, illud renunties velim.

*Ant. Panhor. Antonio Petruccio Equiti
clarissimo. S. P. D.*



I vales gaudeo, res hîc nostræ prosperè cedunt, atq; in dies cedent Diis benè iuuantibus: quo verò in loco res isthic procedant à te saltem minimè scio: sed sileas licebit, & si vis etiam mutus & elinguis fias, perpetuè te & singulariter amabo: non tuas epistolas quamlibet suauissimas diligo, sed auctorem ipsum, sed virtutem & probitatem tuam: sed de hoc aliàs. at si gratiam cupis taciturnitati tuæ, ita demum impetras, si Lampogninum hunc literarum adlatorem militem sanè egregium respexeris iuuerisq; etiam mea causa: vir quidem est adprimè literatus, eò magis à te diligendus, quòd militiam literis exornat: qui cum non minus de re bellica, quàm de studiis humanitatis conferre consilia potes. Adde necessarius est tui Pontificis Laudēsis, & mei ita amantissimus, vt tecum possit de benevolentia certare. Hunc tu igitur si non amas, barbarus es, si non aues & honestas, illiberalis scribit. eleganter, nec minus

carmine,quàm proſa oratione:atq; vtinam in primis reſcribat meas commendatitias fuiſſe ſibi commodo & honori,measq; amicitias ſuis rebus plurimum conduxiſſe. Andreas noſter euſit iam ad ſumma rerum faſtigia:is enim apud inclytum Ducem noſtrum primus aut primo proximus habetur: qua de re ſi plenius voles,audies à Lampognino ſuauiſſimo. Tu vale,& me tuum ama.

Ant. Panhor. Ant. Petruccio, S. P. D.



I vales iſthic tu,benè eſt,nos hîc quoq; valemus, & triumphamus. ab digreſſu tuo à te de te nihil accipio: quod proinde maximè ægreſero,quodd in negotiis & laboribus tuis nihil vteris,quo etiam abuti potes,opera & obſequio Panhor mita:tui quidem gratia nihil vſpiã declinaturus ſum, ne mortē quidem.hoc à te quæſo,neſcius ne ſis,quod cum erit,ita demum intelligam ſi me tuis in rebus immiſcueris,vterisq; vetere,& inſpecto amico:hæc hætenus. Antonius Cremona vir doctus egregiè, ac Principis noſtri, & Barbauariorū familiariffimus ad te vnà cum Ludouico Harculæ armorum,immò armatorum ductore proficiſcitur:eum benignè atq; ſuauiter ſuſcipe,ama,auge:tum quia rectè,& ex conſuetudine tua facies, tum quia gratiam ac beneficentiam fœneraturus es.plurimū in hac noſtra curia poteſt,vt dixi,omnium quos terra nutrit gratiſſimus iu-

cunditatem hominis, suauitatem, grauitatem, fidem
tute experieris, afficerisq; vehementer. Venit socius,
& quasi Achatēs alter Ludouici, & Principis iussu. tu,
quem Dii amāt, suspice, & obserua: postremò fac eius
literæ non minus tuam magnificentiam, quàm animi
magnitudinem commendent apud Principē, & prin-
cipales nostros: nihil profectò aut frequentius aut li-
bentius ab illis legitur, quàm Cremonæ mei epistoliū.
Vale militiæ decus. Andreocium singularis exempli
virum, & domum omnem Petrucciam ex me saluta.

*Antonius Panhor. Francisco Barbauariæ viro
indlyto. S. P. D.*



Roximè cum euocarer ad Portarberam à
Francisco Pontifice Papiense, agerēq; mul-
ta ac varia, quæ familiares & amici inter se
se consueuere: tandem ille nescio quomodo in hunc
incidit sermonem, vt optaret, quanquam modeste ad-
modum, ab hoc suo Pontificatu transferri ad Bono-
niensem: cum ob alias causas, tum vel eò magis, quòd
illic plus conducere rebus nostri Principis posse confi-
deret, quàm hîc gentium: atq; id cessurum existimat,
si modò Abbatia sancti Ambrosii, vel alia similis con-
feratur in commendam Cardinali sanctæ Crucis, ita
quod Riccius noster Abbas Ambrosianus Pontifica-
tum obeat Papiensem, Bononiensem ille: mirificè qui-
dem gratus est Abbas noster Francisco Pontifici, nā

& suauitate ingenii, doctrina, & candore animi, ac lingua, omnibus ferè sacerdotibus huius vestræ Galliæ illum anteponit, ac putat dignum magno omni Pontificatu. cumq; hic ego interrogarem num summus Pontifex, num Cardinalis permutationi huiusmodi assentiret, vtrunq; respondit in nostram sententiã ituros, si res prudenter diligenterq; deducatur. qua ex re ego quidem magnopere sum lætatus: nã siue Principis nostri negotium considero, erit hic Pontifex noster longè illi Bononiæ vtilior, ac propè necessarius: afficitur enim vix credibiliter ad nostrum Principem, tum hac tempestate, ac rerum peruersione. si vera faceri volumus, facilius charitas eius hic degentis minui poterit, quàm augeri: vexatur enim quotidie à Quæstoribus, & quia inopia laborat, & quia id nequit, quod vehementer vult, animi excruciat, vt hinc impotentia, illinc amor in Principem penitus eum cõfundant. sin verò abfuerit, & cessabunt hæc, & amor eius exardescet in dies magis, magisq; præsertim si opera nostri Principis intelliget se adsecutum Bononiensem Episcopatum. si autem Cardinalis rationem habeo, minus certè eum pigebit, pudebitq; tenere Abbatia, quàm Episcopatum in commendam, præsertim patriæ suæ Episcopatũ, quod est quasi tyrãnidem quandam in patria exercere. vtilitas præterea ex Abbatia maior, vt affirmat noster Episcopus, propter impensam Bononiensis Episcopatus. verũ hæc, & id genus
plura

plura differemus verbosius, si cognouero rem hanc tibi ac Principi haud ingratam fore. Vale.

*Ant. Panhor. Henrigetto Assensi ingenuo
& insigni adolescenti. S. P. D.*



On poteram admirari satis tarditatem ac silentium tuum, verebarq; , vt pote studiosus tui, ne cum fortuna mores simul immutasses: cum inter hæc tandem à te mihi literæ redduntur suaues certè, ac voluptatis plenæ, in quibus permulta quidem, sed in primis prudentiam tuam exosculatus sum: quippe qui tam rectè prospexeris quid auerem, prospiciensq; satisfeceris. nihil enim iucundius, nihil antiquius mihi renuntiari potest, quàm victoria, & laus Piccinini viri magni, maximiq; Imperatoris: quem profectò tantum diligo, quantum miror: tantum verò miror, vt de eo iam illud verissimè dici posse existimem, quod de Alexandro literis consecratum est. Cum nullo vnquam hostium congressus, quem non vicerit, nullam urbem obsedit, quam non expugnauerit, nullam gentem adiit, quam non calcauerit. Hoc verò recens trophæum proinde magis ac magis miror, & cordi est, quòd tam breui manu cum infinita penè hostium multitudine conflixerit, eosq; profligauerit, cœperitq; , nō quidē incautos, sed instructos, nō sine ductore palantes, sed acet-

rimo, fortissimoq; duce munitos: sunt hæc nimirum indicia futuri triumphi. Iam verò intelligimus fortitudinem præstare multitudini, nec esse quòd ulterius hostes, quia multi sunt, extimescamus. Memoria quoq; literarum est proditum sexcentos duntaxat milites castra quingentorum milium irrupisse, vicisse: Virtus in bello, non multitudo victoriam parit: verū hæc aliàs accuratius, & quidem in libro, si modò certa aliqua ratione deprehendero nostrum hunc strenuum Piccininū gloria & musis oblectari, velut mercede quadam tot tantorumq; laborum eius, ac periculorum. Tu vale, & si quid noui quotidie accidit, fac me quæso participem voluptatis.

Ant. Panhor. Catoni, S. P. D.



Atis & super addubitaui, an Cato, an Canis à me hodie inscriberè, pro eo maximè, quòd nuntium ad me mittis, & eundem hominem uastum, & terribilem, literas verò nullas ad me mittis. Quid est quæso quod à te potius expectè, quàm epistolas, quæ loquuntur & amicè & simpliciter, & ornatè, & amicum, si quem habeas, laudibus efferunt? disce Cato suauissime, si posthac huiuscemodi portenta hominū ad me missurus es, haud vacuos literarum mittere: ut quantum ex portento inficior, tantum adficiar literis & oblecter. Dominum Priorē nostrum non Flaminem solum, sed Apostolum, & vi

rum rarum verbis meis circumplectere, & osculare: ad quem ne tecum, & cum Cremona proficiscerer, per me cerè non stetit: vos igitur meritò causetur, nō Panhormitam suum. Maphæi versus abundè placuerunt: est tamē in illis aliquid, quod potius corā, quā literis moneam: laudo & versus, & studium viri, & si ut cœperit perrexerit, nominabitur, modò sibi tātum nō indulgeat. Auetote ex Stratellæ locustis. Quod penè præterieram Miola noster suauitatis Deus mecū est, te amat, & absentem suspirat: contendit me Parmam conducere: quod si minus impetrabit, studiis adscribe meis. Tu vale.

Ant. Panhor. Miniato dulcissimo. S. P. D.



X literis hisce tuis nouissimis, fateor, ægri plus quā voluptatis accepi: nec tantum quòd febriculas passus sis, quā quòd febrics Roma discessisti. deseris utiq; amicitia officium, dum illud omni ex parte complecti studes. verè probatum est illud verbum Summum ius iniustitia: nam per immortales Deos, quid simulatione opus erat, præsertim tuo cum incommodo, quod nostrum est? sed missa hæc faciamus, quæ sine tui contumelia dici nequeunt. Si liber factus non es in hunc diem, ipse ad uolabo salutaris herbis: aderit medicus, ut Plautus ait, qui te curabit. consulendum vel in primis est saluti posthabita re omni: sin verò saluus euaseris, omni

cole literatos, & bonos viros. statim ad te mittam epistolas, quas petis: & si quid præterea requisieris, facile impetrabis, modò literas ames, atq; homines doctos. viuas liber vbicunq; mauis, ego si isthic etiam benefeceris te velut præsentem vtar, fruamq; , absensq; absentem iuuabo. & generaliter si modestum, si stabilem, si studiosum, & literatum te sensero, non minus absentem diligam, & fovebo, quàm præsentem sum solitus diligere, ac fouere. Tu vale: literæ illæ quas Ergoteli & Marraſio per te miſi redditæ nuſquam fuere, quod iniquo animo tuli: at dices miſi ego illas: ſed ita miſiſti inquam, vt nuſpiam redderentur. Vale iterum.

Ant. Panhor. Leonardo ſuo. S. P. D.



I vales gaudeo, ego ſaltem viuo. inſtitui animo ad ver me Panhormium recipere, modò per Auguſtam meum ne fiat, quo minus accedam. inceſſit mihi iam amor patriæ, deſiderium propinquorum, cupiditas neceſſariorum, tui præſertim, quem germani loco ſemper dilexi, & in præſentia niſi perſeueranter atque vnicè amo, non me amet qui cuncta amore creat & regit. te verò an fortuna mutauerit, eneruaueritq; ſatis ad dubito: plerunque enim quos illa complectitur, cæcos reddit, & quidem cæca depingitur apud

Poëtas : quanquam ita mihi persuadeo commutet & commisceat in te omnia , attamen tuam in me solidam & puram illam animi charitatem neutiquam flectet. Ego igitur primo vere te petam , tu si quid aduentui meo consules , officium amici facies , & benigni & benefici viri . de his satis : is enim es , in quem minimè cadit ignorantia . Vale
spes aurea. Cætera ex facetissimo
nostro Henrico accipies
miro sermone.
Papix .

91

ANTONII BECCATELLI
SICVLI COGNOMENTO PANHORMI-
TAE EPISTOLARVM CAMPA-
NARVM LIBER.

Ant. Panhor. Nicolao Buczuto. S. P. D.



V quidē efflagitas quotidie Buczute nobilitatis splendor, vti literas, quas in Cāpania scripserim, in corpus redigam, & ad te mit- tam: at ego, si nescis, nihil profe- ctò minus curo, quàm meas in- eptias in vulgus dare, aut minus credo, quàm epistolas raptim, cursimq; compositas doctis auribus placituras. Verū tibi utcunq; mos ge- rendus fuit, primum ne diutius postulando me ene- cares, deinde quia à te saltem epistolas lectum iri non dubito, vt qui, nescio quomodo, fœminarū more sem- per in uetitum obnitaris, eoq; magis eas legendas pu- tes, quò magis eas ne legas admonearis. Sempronius quidam fuit: is cum vxorem mortuam cuperet, ap- posuit ei vinum suaue quidem, sed veneno corruptū, præmonuitq; iterum, atq; iterū, ne illud biberet, quòd scilicet veneno esset infectum: illa verò, vt primum ma- ritus è conspectu abiit, quod sibi vetitum potissimum fuerat, hausit, & simul extincta est. Itidem tibi, vt dixi,

euenturum suspicor de epistolis meis, vt quantò magis eas tibi denegem, tantò tu magis eas lectione dignas existimes, & inesse aliquid putes, quod ego haud ab re suppressere studeam, & quod tu haud quidem temerè concupiscas. Verum ego in hoc, vt in cæteris ingenuè tecum ago, atq; iterum exclamās admoneo, ne id tibi legendum assumas, quod semel lectum pariat fastidium. extant epistolæ Ciceronis, Senecæ, extant Hieronimi, Plinii, quarum lectione nunquam te satias capiat, tum facundior, tum etiam melior effici queas. illud postmodum pro mea hac facilitate, aut rectius leuitate te peto, ne epistolas villo modo efferas, sed vni tibi vel legendas, vel deridendas habeas, vtinam tibi ipsa saltem ineptitudine placituras, & risum excitaturas. Vale.

Antonius Panhormita Alphonso Regi clementissimo. S. P. D.



Vòd vincis, meritò omnes gaudent: ego verò & quòd vincis gaudeo, & quòd victorià clementer & moderatè vteris. rectè quidem virtus tibi victoriàm peperit: verum hoc ipsum commune cum multis: nam & qui fuerunt, & qui sunt, vicerunt, triumphauerunt, imperarunt: hiq; innumera- biles, & interdum etiam iniusti, ac penitus indigni: qui verò & vicerint, & victis pepercerint, nihil intemperanter, nihil auarè, nihil crudeliter agentes, hi nostrò,

atq;

atq; omni tempore perpauci, sed & dissimiles habiti sunt, & habebuntur. Cato tuus aiebat pessimum Imperatorem esse, qui sibi ipsi imperare nesciret, ideo, ut arbitror, quoniam absurdum videretur eum plures vincere, qui vnum ipse non vinceret. Macedo ille magnus armis inuictus laudatur, ira victus vituperatur. Annibalis gloriæ multum crudelitas detrahit. Equidē malo tibi victoria laudem inueniat, quàm fortuna victoriam. quicquid in bello accidit, fortunæ laus est: verū si vincendo, benignè, misericorditer, castè, mansuetè, constanter te gesseris, fortunam sua laude fraudabis: tuamq; prorsus efficies victoriæ commendationem. Cum igitur tute is sis, qui hostes pariter, & te ipsum superes, iure ac meritò tibi gratulor, mihi gaudeo: tibi, quia perpetuam ex virtute, & continentia laudem tibi comparabis, erisq; posteris omnibus clementiæ, & humanitatis exemplum: mihi, quia tali Rege, ac domino fortunatus sum: vbi possim & viuendo melior fieri, & scribendo clarior. Vale, & triumphha.

Philippo Mariæ indyco Mediolanensi Duci Ferdinandus Alphonsi filius.



Iu veritus sum si puerulus ego tibi tãto Principi scriberem, ne arrogans viderer, contra si benefico non scriberem ingratus. vicit tandem sententia ut scriberem, haberet'que

potius arrogans, quàm ingratus: eò maximè, quòd si
 quid ineptè locutus fuerim, danda erit ætati venia.
 Salue igitur Dux inuictissime, Ego Ferdinandus Al-
 phonsi Regis filius nuper ex Hispania me contuli in
 Italiam nō minus herculè tui uisendi gratia, quàm pa-
 tris: nec tam patris charitate adlectus, quàm meri-
 tis & virtute tua planè diuina. dego, atq; educor in
 præsentia sub patre optimo, studeoq; eius institutis ta-
 lis euadere, qualis & esse, & videri debeat Regis filius.
 Duo mihi maximè proponuntur, virtus, & amor tui.
 Virtutem Deus ipse tribuerit, & patris cura. Ego qui
 dem, vt dixi, ne à maioribus meis degenerem, operā
 do. amorem verò tui vsq; ad postremos cineres ser-
 uaturus sum, colam te, obseruabo te, venerabor te,
 meq; semper debitorem inclytæ virtutis profitebor.
 Signum verò meæ huius voluntatis, ac propositi, non
 quidem aurum, aut equos, aut lapillos pretiosos tibi
 mitto, sed memet ipsum tibi dono do, exiguum profe-
 ctò donum, sed si tu libenter acceperis, magnum: sole-
 tis enim uos maximi ac principes viri quæ vilia sunt,
 cum illa acceptatis, pretiosa & præclara reddere. Su-
 scipe igitur munusculum meum, te quaeso, atq; obse-
 cro Princeps humanissime, saltem vt ob hoc mihi
 onus iniunctum videatur ita viuendi, ita adolescendi,
 vt te aliquando dignum donum iudicari queā. Vale.

Ant. Panhor. Alphonso Regi. S. P. D.



Vrum est amorem cohibere, & ego te amo, & colo, & nisi loquar, disrumpor. Fama est inclytum Ducem Mediolanensium Philip-pum Mariam nuptui dare velle vnicam filiola, eamq; locaturum arbitrato tuo. vide quàm magna sit homi-nis illius fiducia, atq; obseruantia erga te, vt sua visce-ra, suam omnem iucunditatem, suum cõsiliu, suam spem in te vno reponat. noui ego illum, ex animo lo-quitur, nec minus etiam te noui, videlicet qui virtute ac animi gratitudine vinci non pateris. videre itaq; mi hi videor hac in re cõsiliu tuu, graue quidem il-lud, atq; vtilissimu, iucundissimu fratrẽ tuu Pe-trum, nisi vates malè vaticinor, puellæ illi honestissimæ maritum deligis, ac destinas: id si ita est, quid maximo illi Duci gratius, quid Petro fratri fortunatius, quid ti-bi laudabilius excogitari potest? Hoc vno beneficio Ducem ex creditore adhuc debitorem tibi cõstitues, ex amico amicissimu, ex patre filiu. Sileo vtilitatẽ ex matrimonio futuram, & ex patre ipso Duce, qui fi-lius Ducis erit, idem & hæres erit. postremò nemo eo rum erit, qui merita clementissimi huius Ducis erga te cognorit, quin te hoc facto laudibus in cœlum fe-rat, & matrimoniu non iudicet pro meritis tam di-gni Ducis honorificentissimè ac sapientissimè factu. Hæc ergo Rex humanissime ex amore & obseruan-

tia, quam erga te, tuosq; omnes maximam gero, locutus sum, si malè, non me, sed amorem inculabis meū, sin benè, dabis operam vt celeriter exequaris quod prudenter à te cogitatum est. Vale Poëtarum spes.

Antonius Panhor. Francisco Xanthilio splendido Equiti. S. P. D.



Aieta digrediens, atq; ea ipsa hora qua digrederis, petis à me quid sit amor, quæ ue eius vis, aut potestas. facile intelligo de quo amore loqueris, cū sis iuuenis, otiosus, diuitiis atq; deliciis affluens. Amor est animi passio, & vt rectè ait Cicero, omnium animi perturbationū vehementissima: influit in homines, vt ait Plato, ab æstro quod Veneris vocant, cui aduenienti nisi fortiter obstitueris, fit furor, totasq; labitur in medullas, igne furtiuo populāte venas, alitur otio & luxu: potestas verò eius est mira. ex sapiente stultum hominem facit, ex sano furiosum. Hiis breuiter respondeo quæstioni tuæ, si copiosius cupis, fiet tam libenter, quàm diligenter in redditu tuo. Interim i felix, & ama quidem, sed pauxillum si potes. Vale.

Ant. Panhor. Olxinio. S. P. D.



Nunc, & Mecœnas esto: spes musarum, præsidium, decusq; Poëtarum, vt primum Panhormium applicuisti, inquit te regia aucto

ritate alienasse, proscriptissequi; vectigal vini, unde miserum mihi illud salariolū exolvebatur. Scin'tu quid egisti? perdidisti me funditus, redegisti Poëtam tuum ad vltimam miseriam: accidet mihi, atque vtinā fallar, quod olim Plauto tuo, qui perdita pecunia ad molas trufatiles id est manuarias redactus est. ò memorabile Meccœnatis nomen, Poëtam faciet asinum molendinarium, quanquam asinus factus scripsit tamen ille inter molendum diuinas comœdias: si me videas, haud dignoscas, ex lepido atque hilari, factus sum tristis, insulsus, & planè rusticus: credas non hominem, sed hominis simulachrum. abierunt musæ, abierunt Veneres, abierunt charites. infelix ego, unde sperabam beatus effici, à Meccœnate perditus sum. scribam cumulatius, cum à te intellexero cur & quomodo me euerteris. Vale calamitas Poëtarum.

*Antonius Panhor. Aloisio Cam-
po. S. P. D.*



Os fuit Romanis illis veteribus, vt si quis ciuis ciuem in bello seruaret, is corona ciuica donaretur. rectè sanè cum ad gratitudinem, tum ad virtutis excitamentum, & gloriæ. sed quæso si quis non vnum, aut alterum ciuem, sed vniuersam Remp. propè labefactatā restituerit, quo honore, qua prædicatione, qua denique corona dignū existimabis? nosti tu, quippe qui patriam in primis

& amas, & luges, quantum ex decore, quantum ex dignitate, quantum deniq; ex libertate iam pridem amiserit nostra ista non felix, sed misera vrbs: neq; haftenus inuentus fuerit, qui patriam vel pauxillum curauerit, ne dicam, iuuerit, aut auxerit. itaq; vt mihi quidem videtur, magis magisq; laudandi, ac celebrandi videbuntur, si qui nunc prostratis rebus, ac ferè extinctis emerferint, qui patriam amplectantur, erigant, amplificent. Diis gratia tandem inuenti sunt viri constantes & boni ciues nostri duo Diocles, & Nicocles proximè ad Alphonsum Regem dominum nostrum legati. vix dici, vix credi potest, quo studio, qua industria, quibus lateribus contēderint pro salute, & restauratione Reip. & impetrarunt à gratissimo, & iusto Rege quicquid nostrorum ciuium incuria, ne peius dicam, haftenus neq; postulatum, neq; etiam tentatum fuerat. Fortuna iuuat audentes, & ita iuuat, vt opinione expectatio, expectationem industria, industriam latitia superatura sit. hoc quicquid est, & est sanè decus & amplitudo ciuitatis nostræ, & ab ipsis auctoribus, & ab omnibus hinc quotidie venientibus intelligetis. Tux partes sunt Aloisi dulcissime mihi renuntiare quas laudes, quos honores instituerit patria nostra his viris, qui non vnum aliquem ciuem, sed vniuersos ciues seruauerint, honestauerintq; an quasi verò Philenis illis fratribus Sallustianis aras gratissimi cōsecrarent. Vale. Ex Capua.

Ant. Panhor. Aurispa. V.C. perseverantiā.



Ec tu mireris, si pro salute tibi perseverantiam deprecatus sum: nam posteaquam Flamen Plebanus effectus es, missis iocis ac salibus mecum philosopharis, hortarisq; ad benè viuendi viam. rectè id quidem Aurispa ne irrideamur, ut Epicurus, qui dum palato quid sit optimum iudicat, cœli palatium, ut ait Ennius, non suspexit. Cæterum tu solum memineris, quòd Flamine Diali fabā nec tangere, nec nominare licet, ut Festus refert, quia ea putatur ad mortuos pertinere: si quidem ea vescere multum, ea gratia, ut arbitror, quòd legumina pruriturum sedant, sed & ut ei parcas suadet etiam, quòd Pythagoræ tui cognata est faba. Ea igitur abstineas quæso, ne dum hisce leguminibus carnem domas, venias contra Flamini leges ac præcepta: cum Samnii illius patris cognata nec violanda, nec contaminanda est. Ego posthac non solum viuendi, sed quod mones etiam benè viuendi rationem habuero, tu modò ut cœpisti perge animarum curam habere: sed fabam illam Flamineam ne obrecta. contractiunculam verò illam, quam in te iure ac merito cœperam, depono, & quidem animo libens, eoq; ardentius amare te occipio, quia si quæ inter amantes, ut ait ille, eueniunt huiusmodi iræ, rursus si reuentum in gratiam est, amoris vincula conduplicantur. verum vlcera refricare

non licet: vt deinceps non de odio, sed de amicitia, non de dolo, sed de lætitia, non de præterito, sed de præsentibus inter nos verba habeantur. immò posthac velim ita rescribas, vt epistolæ efferri, legi, ac probari queant à meo Principe, & à magno atq; prudentissimo Mecenate: sintq; familiaritatis nostræ potius quàm rixæ, aut inconstantiæ testes. Nam si qua est in te dicendi sua uitas, & est meo quidem animo penè incredibilis, nuspiam tibi maiorem laudem, ac gloriam parturire, quàm hic potest apud acerrimos iudices, & præclaros Heroas: oblectantur, afficiuntur oratione graui & ornata, & filum orationis tuæ iam pridem hic nobilitatum, probatumq;. Cum ad hæc, vt polliceris, familiarius vberiusq; responderis, accipies & à me frequentes, & æquè prolixas epistolas, tuaq; officia veneraberis. Lisander puer aureus & à me & ab Ergotele saluus & fortis sit. ab eo munusculum per quàm auidè expectamus, neq; herclè beneficium perdet. Tu secum vale, nosq; mutuò amate.

Ant. Panbor. Auriſſa. V. C. S. P. D.



Vm vterq; nostrum Florentia decederet, tu Bononiam versus, ego Caietam, nescio an hoc tibi exciderit, vt pleraq; sed tunc profectò atq; eo loci pollicitus es mihi ex græco in latinum transferre Homeri vitam, quæ esset apud te solum vt aiebas inter Italicos, atq; id perficere intra dies non amplius

Amplius. xv. à digressu tuo. abii tua ista pollicitatione
latus ac gestiens, multisq; in via Poëtarum studiosis
renuntiaui promissum tuum, quod summa cum vo-
luptate, pariq; desiderio & audierunt, & expectarūt:
quin stultior ego Regi ipsi Alphonso rem significauī,
ratus Aurispæ verbum perinde ac folium Sybillæ ra-
tum fixumq; fore. Interea magnum sol circumuolui-
tur annum, & Homeri vita nusquā apparet. obsecro
quid in causa est, si ignauia non est? an ingens volu-
men? vidi hisce oculis, brevis erat libellus. an occupa-
tiones tuæ, quæ nullæ sunt, præterquàm cum vngu-
las purgas, aut ventrem scalpuris? videas ne Homeri
vitam supprimendo, aut protrahendo, tuæ vitæ de-
clares ignauiam. & sanè mirum est, cur tantopere à
studio abhorreas, laboremq; refugias: cum Socra-
tes græcus tuus apud Platonem non quidem igna-
uis, aut secordibus, sed temperantibus simul, ac lite-
ris insudantibus post huiusce vitæ demigrationem,
cælum repromittat. Sed tu, vti ego arbitror, ex So-
crate nihil probas, nihil etiam habes, nisi quodd tauri-
nè respicis. videre nunc videor vt mihi succēseas, vtq;
taurinè intruearis epistolam. sed heus tu, si cupis alios
malè non loqui, desine tu prius malè aliquid polliceri:
hoc est, cum dicacitatis arguis quempiam, desine tu
prius leuis esse. Vale.



Ereor ne superioribus literis tecum nimis familiariter iocatus sim, tuq; adeo me tibi familiarē esse non putaueris, ægreq; tuleris dicta mea. id si ita est, non mihi, te obsecro, sed patriæ nostræ quod quereris imputabis. Didacula est enim Insula, vt nosti, & dicaces producere, ac nutrire homines consuevit. proinde nobis vel maximè ita viuendū est, ne Siculorum distētiis locum relinquamus, quod eueniet utiq; si consideratē ad promittendum descenderimus: quod autem semel ipsi promissimus, religiosissimè seruauerimus. nihil alienius à viro bono, quàm promissa mentiri. sed his missis, redeamus aliquando, si placet, ad iucundissimum inter nos illud epistolare certamen, quod diu iam culpa nescio cuius intermissum, mea nunc diligentia, aut potius pietate resumamus, atq; ita resumamus, vt à nobis posthac non modò non intermittatur, sed ne remittatur quidem. Hac igitur epistola te prouoco, tibi bellum indico, bellum inquam non beneuolentiæ minus quàm eloquentiæ. sed vnde melius initium sumam, quàm ab ea re, quā tibi auditu & mihi relatu iucundissimā fore intelligo? Nicolaus Specarius tuus, immò noster Caietæ agit, nobiscum lēctitat, nobiscum disputat, nobiscum iocatur, superiora illa frequentius: vir grauis est, etiam & suauis, dignusq; qui in medio vestræ illius Aetnensis

Hyblæ natus sit. progignit Hybla mel omnium optimum, progeniuit & virum hunc melli simillimū: magna præterea in homine humanitas, maior benignitas, sed maxima rerum quaruncunq; prudentia: ingenium habet vt Siculus & acutum & fertile. ego ex eius consuetudine incredibilem capio voluptatem ac fructum: tuq; in sermonibus nostris sæpe incidis, absensq; tanquam præsens constitueris. Legit mihi nuper epistolam, quam ex Bononia ad se mittis, illam quidem elegantem, sed aliquantò nescio quomodo elegantiorē factam eo legente: quid verò de te, tuisq; fortunis serio & egimus, & quotidie agimus, multaq; præterea intelliges mox aliis epistolis. Interim nihil est quod desperes te posse adsequi tali viro procuratore, vel benefactore. puto te hoc nuntio delinitum & mihi reconciliatum esse, si quam ex principio epistolæ cōtractiunculam ceperis, alioqui vtar ad te placandum placenta mellita. tu tamē nisi erratum castigas, & Homeri vitam in latinum conuertis, nunquam per suadebis quantumuis maxima eloquentia, te non errasse, & de Homero, ac Poëtis omnibus malè meritum non esse. Vale.

Ant. Panhor. Ergotelt. suo. S. P. D.



Erplures ad me literas te dedisse significas: ego quidem eas tantum accēpi, quas tu pridie cal. Nouembris exarasti: quibus non ipse

respōdeo utiq; tardè, sed tardè literas accepi tuas. Pri-
 mum, ut par est, adhortaris me ut Baccillerio gratu-
 ler, quia declaratus sit Prætor vrbis Birinozonæ: qua
 de re gaudes tu quidem in primis, & ego tuum hoc
 gaudium gaudeo: Baccillerio autem tum demū gra-
 tulabor, cum intellexero quonam pacto magistratu
 uti sciuerit. Itaq; erit tibi curæ posthac mihi renuntia-
 re non quidem officii salarium aut lucrum, sed quàm
 comiter, quàm castè, quàm vigilanter, quàm iustè of-
 ficiū gesserit Pater tuus, idem & meus: licet verò
 coniectem atq; existimem ipsum omnia rectè riteq;
 habiturum, tamen quia plerunq; magistratus, atq; hō
 nor homines immutare solent, ut qui animo sollicito,
 anxiusq; sim, expecto à te denuò scire de Baccillerio
 aliquid, quod virtutem potius commendet, quàm for-
 tunam prædicet, aut extollat. Idem & de Masino fra-
 tre, quod nomen, quàm laudem videlicet ex magi-
 stratu consequatur, non quàm loculos expleat, hoc
 est quàm honestè se gerat, non quàm utiliter: de his
 satis. De Seneca isto miror quid me consulas, quasi
 hominem non noris: Fulginatis, ut video, amicitiam
 non magnificis, quem suasi tibi & suadeo ut patris lo-
 co veneris, ac serues, à quo si intellexero te proba-
 ri, probaberis & à me: contrà si accepero te vel amari
 vel laudari à viro aliquo malo, vituperaberis à me,
 nec amaberis à viris bonis. talem te esse arguent
 omnes, quales hii sunt, atque erunt, quorum con-

suetudine delectaberis. si sapias, meq; audis Cordubensem Senecam complectere, Mediolanensem abice, qui ex Seneca præter nomen nihil habet. Commentarioli illi ad Plautum cum cæteris meis libris Panhormii sunt, & hi quidem adhuc inemendati: cum emittentur tu eris omnium primus, qui librum habeas, & iudicium feras. Interea te obsecro pluris facias laudem meam, quàm desiderium tuum, siue tuum sit, siue, ut arbitror, Senecanum. Fortuna mea talis, qualis Philosopho homini satis superq; sit, honores aliquantò etiam plures, quàm Philosophum deceat, aut Poëtam. amamur à Rege plurimum, à quo quotidie & honestor, & amplificor, magis etiam quàm expetam. hæc si gaudenda tibi videbuntur, gaudebis. Restat ut tibi respondeam de fraterculo isto tuo, quem Cupidinem appellas, quem si cordi tibi est ad me mittere, nihil differas: malo, tua pace loquar, apud me educetur, quàm apud te: reddam tibi illum ex Cupidine Apollinem, & Bononiensibus nostris ciuem admirabilem. facit amor ut pollicear indecenter, sed idem amor præstabit, ut quod se auctore promiserim, exoluam, tu modò, ut dixi, ne protrahas rem: tener quidem mollisq; peraptè instituetur, fingeturque & moribus & literis: alioqui si semel imbuerit aut mores aut literas barbaras, seruabit odorem testadiu, ut Flaccus ait, & tunc ex Cupidine Apollo

tibi non restitueretur, non etiam ab ipso Apolline. De mittendo puero Florum consule hunc literarum adlatorem virum doctum, magnificū, & delictum meū: is dimittendi pueri viam inueniet, aderitq; Apollini Apollo. Vale cum Masino suauissimo & Cremona muto, & sideribus meis. Caietæ.

Ant. Panhor. Alphonso Regi. S. P. D.



I mihi satis superq; nota, & explorata esset humanitas, & benignitas tua, super sedissem nimirum commendatitias hasce ad te scribe re: sed quid ego id verear, cum sciam te quotidie vel indignorum hominum preces exaudire solitum, nec quenquam à te tristem discedere? Iacobus Ferrocus vir propter singularem industriam statui regio percommodus, ad sublimitatem tuam proficiscens, me rogat, ut se tibi per literas commendem. causam quidem acturus est apud te, omnium ferè opinione honestissimam, speratq; meas literas sibi plurimum pro futuras. ego verò, & si scio te non hortatu cuiusquam moueri, sed tuapte natura pronum esse ad probitatē, tamen amico, & viro optimo deesse nolui: non in mea eloquentia, quæ nulla est, sed in tua placabilitate, æquitate, qua inter Principes excellis, plurimum sperans. erit nihilominus & hoc ad virtutem & mansuetudinē pertinens, non solum tua sponte, tuoq; ingenio bene-

fecisse, sed etiam literulis ac precibus meis ostendere aliquid tribuisse. Vale literarum spes vnica.

Ant. Panhor. Alphonso Regi. S. P. D.



Ogam candidam competitores officiorum induebant, vt intelligerent ad dignitatis fastigium non sordibus, sed animi candore, & integritate esse peruenturos: nam qui pecunia ambiebant officia, ambitus damnabantur in exilium. Ego Rex inclyte profiteor me ex cādidatis vnum, sed qui pecunia caream, licet non indigeam: viginti enim annis ita tecum vixi, vt semper mihi curæ fuerit cumulandæ potius laudis, quàm pecuniæ. à me igitur Alphonse inclyte longè chariorē gratitudinē expecta, quàm pecuniam, tui nominis videlicet laudem & gloriam, ni fallimur, diutissimè permansurā, tum ad magistratum gerendum tibi polliceor animi integritatē, & iudicium incorruptum. Vale.

Ant. Panhor. Martorello suo. S. P. D.



Tiosus eras, ac nimium otiosus Martorelle, cū petebas à me num Deos olim Cloacales habuerit antiquitas: idq; cum tu non inueniris in commentario scriptum Basaliniano, scire expectis, nunquid ego fortassis hoc ipsum alibi legerim, & tibi illicò renuuiem: ego quidē vt breuiter quod quæris absoluam, legi apud grauissimos atq; doctissimos

etiam Christianos viros Deam Cloacinam præsidem
 cloacarum, & spurciora etiam Deorum nomina, ut
 puta Sterconiū, qui præsideret stercorebus: hic quoque
 ideo apud veteres Deus habitus est, quoniam inuen-
 tor fuerit agrorum stercorendorum, ac proinde Ster-
 conius vocatus. coluerunt item & Lubentinam appel-
 latam. Menam quoque præfecerunt menstruīs fœmi-
 narum: & Cuninam Deam, quæ tueretur infantium
 cunas. Numeria in primis honorata, quæ numerare
 doceat. hæc Dea, ni fallor, tibi propitia est: aiunt enim
 te proximè ad sexcentas vncias numerare docuisse:
 mihi quidē potius erit propitius & fautor Iugatinus
 Deus, qui coniuges iungit, & cum virgini vxori Zo-
 na soluitur, inuocatur. Diua Potina potionē ministra-
 bat: hæc adhuc veneratur Antonius Bona, & Bouarii
 magni aliquot viri. Diua Edulica escā præbebat: hæc
 & sex millia præterea Deorum Dearum'ue nomina,
 quæ rebus præfecerat stulta, & obscæcata gētilitas, nō
 modò à cloacis deducta, quod tibi mirū & obscœnū
 videbatur, sed etiam à fœdioribus ut vidisti & nomi-
 nibus & rebus. è multis autem pauca hæc ad te scrip-
 sisse epistolarum lex sua sit: reliqua coram agemus.
 Alphonso triumphatori, & domino meo benefico
 me iterum, atque iterum commendabis, cui etiam ali-
 quando explicabis causam moræ & absentię meæ.
 Tu Vale.

Ant.

Antonius Panbor. Alphonso Regi.
S. P. D.



Vi tibi aurum & argentum offerunt, hi mihi rem superuacuum agere videntur, & velut arenam litori adiicere: contra qui tibi viros doctos præsertim comparant, hi demum Regum necessitatem agnoscere. nam cum cætera tibi vt aliis conferas à Cœlitibus data sint, hoc vnum à doctis ipse accipis, vt immortalitati commenderis. Præclarè admodum Agasicles Rex Lacedæmoniorum rerum scriptores cum patres appellabat, tum vt patres venerabatur, quòd intelligebat res suas ab huiusmodi viris optimè celebrari posse. quorsum hæc? vt deditum tibi nuper Franciscum Aretinum & morum sanctimonia, & doctrina singularem virum consueta in doctos liberalitate complectaris: gratissimo hominum conferes beneficium, & qui quicquid contingit, aurum efficiat. cum eo habitant musæ, quæ mortalium beneficia perire non sinunt. Mitto sublimitati tuæ priuilegium, quod pro tua benignitate ei proximè concessisti, ut & legas, & de more subsignes. Vale, & cum Dianæ te satietas cœperit, ad musas Neapolitanas redi, quod vt facias Venus Regina te etiam atq; etiam rogat.

x *Ant. Panhor. Alphonso Regi. S. P. D.*



Ccepiliteras tuas, quæ licet inter arma scriptæ sint, plenæ sunt tamen & eruditionis & elegantia. gaudeo itaq; te operâ non perdidisse, quam musis, & ingenuis artibus diuidas. sed quod per literas polliceris te citò alas emissurû, quæis vel lapides ipsi queant volare, oro ne diutius differas: res quidem magnæ & memorabiles celeritate perfici consueuere. vnum interim vereor ne multi qui huiusmodi alas, quasi famelici canes, à te expectant, mihi per absentiam noceant hoc est ne cum aureæ illæ alæ adfulserint, absenti mihi à præsentibus præripiantur: quod tu ne eueniat pro tua singulari prudentia prouidebis. Vale & triumpha. XXIII. Septem. Neapoli.

Ant. Panhor. Alphonso Regi. S. P. D.



Vllas adhuc alas accipio, quanquam à Quæstore mihi in dies promittuntur, nec tamen exhibentur, & sunt illæ quidem valde tenues & exiles, quæ ue ad tam longum iter dimeriendû mille scilicet millia passuum, atq; eò amplius, nec satis idoneæ neq; sufficientes: spero tamen fore, vt cum apud tuam sacrosanctam maiestatem adfuero, pro tua singulari beneficentia ampliores mihi alas adfigas, quæ ne plumis careant rationem ostendam, qua honestè poteris pennas illis subministrare. Vale, & triumpha.

Ego cum primum alas habuero, ad te primum, dein de quò iusseris, euolabo.

Ant. Panhor. Grillio. S. P. D.



Quum tibi bellum indicitur optime adolescens, non quidem eloquentiæ, quod tu fortasse cupis, sed beneuolentiæ & amicitiae pura. amo te sanè singulariter, tuosq; suauissimos mores: ingenium ac vitæ sobrietatem exosculor, persuasus cum à pluribus, qui quotidie te laudibus celebrant, tum vel maximè à grauissimo, ac doctissimo homine Iacobo Curulo, cui tantum tribuo, vt què ille laudet, & ego laude dignum existimem: eius enim laus ex iudicio proficiscitur, neq; amat nisi quos antea iudicauit. igitur has epistolas mitto quasi Fetiales quosdam tibi bellum utiq; beneuolentiæ indicturos: in quo quidem bello is se victum fateatur oportebit, qui alteri demum in amore & officio concesserit. ingenuè pro mea consuetudine loquar, per durum tibi certamen erit cum milite veterano, quem vincere neutiq; poteris nisi Vulcania arma Dei cuiuspiam beneficio capeffas: etenim te consideratè diligere cœpit, pergetq; vt sœuit perseuerâter, nulla alia ratione cessurus, nisi prius de te triumphum egerit. plurima adicerem nisi te verbis potius terrefacere, quàm reuincere viderer. Vale decus adolescentiæ.

Ant. Panhor. Ergoteli suo. S. P. D.



Vtaui vel fortuna tui Ducis, vel desiderio meo fore, vt ad nos quandoq; te conferres: verum adhuc neq; fortuna illius, neq; desiderium illucescit meum: quodq; hactenus voluntate & prudentia factum non est, vereor ne id fiat necessitate. ego vtrumq; dummodo venias in bonam partem accepturus sum: intelligamq; te, quod aiunt, passus nō perdidisse. Interim te vehementer amo, etiam absens absentem, quanquam vera amicitia absens esse non potest. De me, deq; familia omni mea intelliges ab hoc suauissimo literarum adlatore: vicini sumus, & quod maius est, haud vulgari familiaritate deuinti. Vale.

Ant. Panhor. Platamonio. S. P. D.



Herculem ferunt cœlum humeris sustinere, quam ego Poëtarum fictionem, pace multo rum, ita interpretari solitus sum, Herculem fuisse virum aliquem prudentia atq; eloquentia excellentem, cuius consilio & opera vteretur Rex suus: statumq; & ditionem illius sapientiæ permitteret gubernandam, hoc est illius humeris acquiesceret. Hercules tu igitur, vt perhibent, qui quotidie ad nos abs te veniunt, effectus es. cœlum tangis, & Herculeam clauam omnia moderaris. qua de re incredibiliter gaudeo;

sed & te hortor vt fortunam serues. quæris quomodo: hisdem artibus quibus illam adsecutus es, humanitate, mansuetudine, diligentia, & gratitudine sis gratus Principi, qui te erexit ad cælum: sis diligens negotiis, quibus ille te proposuit, sis mansuetus ad omnia, benignus in omnes, denique, quod facis, fac laudem & Regis gratiã præponas omnibus rebus. ego adhuc impesa illa nuptiali oppressus iaceo, quàm primum extricabor, ad Regem perpetuò de nobis bene merentem aduolabo. Vale.

Antonius Panhor. Ergoteli suo. S. P. D.



Vdio non quidem à te tua diligentia, sed ab aliis studio meo te valere, gratumq; esse Philippo Duci domino nostro. postremum hoc maximè gaudeo, argumentum enim virtutis est, & quidem maximum placere summo, ac sapientissimo Principi, sed cum placere dicimus, interpretaris perplacere, hoc est ad finem vsque placere: nam placere: ne erres, fortunæ est, perplacere probitatis: atque eo pacto non decides, si quibus artibus gratiam iniisti, hisdem eam serues fide, simplicitate, amore, diligentia, & liberalitate. has animi virtutes in te exosculatur optimus & ipse Princeps, à quibus si defeceris cades à gratia: sin custodieris, placebis ac perplacebis, verum hac

de re scripsimus tibi aliàs prolixè satis, tu tamen nihil respondes. fortasse ægrefers monitus meos, aut quod malim credere, occupatus perarduis negotiis, perarduis herclè negotiis, si illorum gratia me postponis, quem vnice vnum ex omnibus amare cōsuefcis. Ego quidē, si de me vel audire tuæ te curæ non impediunt, valeo: Alphōso sapiētissimo Regi admodum charus, sunt & mihi negotia, nec tamē impediunt, quo minus te amem, ad te scribam, de te loquar, de te audiā summa etiam cum animi voluptate. hæc homini muto satis superq; sunt. Vale tu, beneq; valeat Masinus frater, & Cupido: Barbauarios Feruffinos, Piccininos à me plurimum saluta. Caietæ.

Ant. Panhor. Vgolino Parmensi. S. P. D.



Irificè gaudeo te Capuam aduenisse, eo animo, vt audio, vt Alphonso Regi nostro inferuias. Principem quidem nactus es tua virtute, tuoq; ingenio dignum. literatos colit, fouetq; : & quod tu magni facies, à vulgi iudicio incredibiliter abhorret: à se sapit, à se pendet, à se bonus & beneficus est: sed de eo plura coram ægemus. Tu quid veneris, & quorsum, nimis velim, quoad licet, a te met ipso intelligere. ita me Deus amet, cum hodie tuum aduentum accepi, mihi visus sum somniare: neq; credidero, nisi tuis literis certior fiam. Vgoline mel gentium venisti.

Iam veniam subito, nec quis prænuntiet ante.

Sed videar cœlo missus adesse tibi.

Ego in præsentia Caietæ ago, breui fortassis bona cū
Regis venia Panhormium petiturus, statimq; reditu-
rus. Interea loci si quid à me quod possim, vis, iube, vt
nostri, tuus sum : tardè quidem, sed perseveranter
amo. Vale.

Ant. Panhor. Alphonso. Regi S. P. D.



Acius, qui tuas res gestas mōnumentis tra-
dit, ad te it, deferens secum, quos videas, su-
dore & lucubrationes suas: ad triumphum
vsque Neapolitanum opus absolutum est, mea qui-
dem sententia elegās, purum, suaue, & peruenustum:
genus eloquentiæ Cæsaris secutus est: quo nihil can-
didius, nihil sincerius legimus in lingua latina. Vatici-
nor opus diutissimè permāsūrum, & cum summa tui
laude per ora mortalium, atq; immortalium volitatu-
rum. Erunt itaque partes tuæ virum hunc, vt sueuisti
literatos, & sapientes, per humaniter excipere, & de te
tam benè meritum honestare, & immortalia pari ali-
quo beneficio prosequi: quod, si te noui, facies certo
scio: gratissimus quidem Principum omnium & es, &
haberis. Vale, & triumphā.

*Antonius Panhor. Baptista Platamonio.
V. C. S. P. D.*



Acius noster vir diligentissimus absoluit iam rerum gestarum Alphonfi libros octo, meo quidem iudicio Rege, ac Regis immortalitate prædignos: leges tu quidem illos, & si te, tuumq; iudicium noui, nihil adhuc iucundius, nihil tersius, nihil splendidius te legisse profiteberis. Desert ad Alphonsum opus euigilatissimum, sperans à gratissimo Rege laboris laudem, & immortale aliquod præmiū vicissim cōsequi. nam si ei, qui equum sibi aut canem aliquando dono dat, gratias agit, quid faciat huic, qui tribuit immortalitatem? opera & suffragatione tua si qua Facius indigebit, memineris hunc esse alterum Panhormitam, tui obseruantissimum, hominem omnium quos terra nutriet gratissimum. Vale.

*Franciscus Barbarus Eloquentissimo
Facio. S. P. D.*



Larissimus vir Antonius Panhormita legatus Alphonfi Regis ad inclytum Senatum nostrum, cum de studiis humanitatis & doctrinæ pro nostra consuetudine loqueremur, significauit mihi curam tibi publicè datam esse scribendi vitam illius Regis, qui per se tam illustris est domi & foris, pace belloq;: vt tibi meritò congratulandum sit

extra

extra ordinem eam tibi causam oblatam esse, in qua nemini deesse oratio possit. nam cum ingenio excellas, & ut audio, facultate & copia ad veterum scriptorum laudem proximè accedas: gratulor tibi, verèq; gratulor te designatum esse ad ornandum excellentissimum Regem, qui suis institutis & artibus & gloria rerum gestarum non se ipsum solum, sed etiam scriptores rerum suarum illustrare possit ad memoriam posteritatis. Quàm amplum & honorificum fuerit artificibus illis Alexandri Macedonis decretum satis constat, cum ab Apelle se potissimum pingi, à Lyssippo fingi, à Pyrgotele ex ære duci iussit: tum quia illorum artem etiam sibi gloriæ fore declarauit, tum quia neminem eius imaginem pro dignitate exprimere posse censuit, nisi qui tantum in illo genere profecisset, ut alios omnes sine vlla dubitatione superaret. Quare tibi non minus gloriari licet; qui tanti Principis iudicio & testimonio non corporis simulachrum, ut illi, sed effigiem animi, & consilii sui, ac virtutis dignus habitus es, ut ita dicam, consecrare memoriæ sempiternæ. Aristoteles Philosophus, ut nosti, Protegeni suavit ut Alexandrum Magnum pingere, si cōmemorationem sui nominis cū omni posteritate adæquandā esse iudicaret. Quapropter cū ultra decora ac insignia regia ferè omnia in Alphonso plena sint laudis & gloriæ, nullum propè honorificentius tibi scribendi argumentum proponi potuisset, in quo

ornando, ac amplificando, sicut Phidias in Minerua, nomen tuum apud posteros commēdares. cæterum quia Rex ipse quodammodo decus esse videtur seculi nostri, pro suis meritis, & pro studiis literarum, quæ sunt apud eum in magno honore, & in magna auctoritate, quantum licet, & integrum est, laudi suæ fauendum puto. Ideoq; te hortor, vt non sicut Apelles Veneris caput summa arte perfecit, reliquam autem corporis partem, sicut scriptum est, inchoatam reliquit, sed ita mores illius Principis, & actiones explices, sic casus aduersos cum secundis rebus coniungas, vt temporum varietates, vicissitudinesq; fortunæ non tam delectare, quàm docere nos possint res humanas mille casibus subiectas esse: nec parum profecisse te putes si statua hæc literaria, vt ita loquar, togata & militaris eleganter scriptis illustretur ac celebretur tuis: quæ ad lætitiā animi & ad memoriæ dignitatem tantum habet in se splēdoris, vt ferè nulla honoris insignia, nulla monumenta virtutis sibi conferri possint: illam enim nulla obscuratura est obliuio: hæc autem postrema interire possunt tempestate, vi, verustate. Quæ cum ita sint, nihil prætermittendum est diligentia, vt dicendo immortalitatem quodammodo dare, & accipere posse videaris. ad quam rem rectè & ordine perficiendam maturandum, non festinandum est: quia, vt Octauii Cæsaris verbis utar, Nō fit serò, quod fit benè: Zeufis quoq; pictor ille nobilissimus dicere solebat, licet mul

to tempore pingeret, nunquam se tardè pingere putabat, quando summa arte faciebat opera, quæ semper duratura esse iudicaret. Plura fortè scripsi, quàm debui, sed ea in bonam partem accipies: quia licet nulla inter nos familiaritas intercedat, hæc tamen gratulatio historiæ tuæ testis erit sententiæ nostræ, & meæ erga te voluntatis. Vale, & ad illustrandum Alphonsum Regem non alios solū, sed te ipsum vince. Venetiis. XV. calendas Septemb. M. CCCC. LI.

*Bartholomeus Facius Francisco Barbaro Viro
Præclarissimo. S. P. D.*



Vlta sunt Antonii Panhormitæ in me officia, mihi quidem gratissima, & acceptissima: sed nullum profectò iucundius, quàm quoddam is Venetiis rediens tuam mihi amicitiam reportauit, quæ mihi quidem erat optatissima. nam cum singularem eruditionem, atq; eloquentiam cum summa probitate coniunctam tum ex multorū sermonibus, tum ex scriptis tuis illustribus, quæ cum tua summa gloria non modò per Italiam, verum etiam per omnem terrarum orbem circumferuntur, & lætitantur, in te inesse iam diu accepissem, vehementer profectò cupiebam aliquam mihi opportunitatem dari conciliandæ mihi beneuolentiæ, & amicitiae tuæ: nosti enim in rebus humanis nullam rem æquè atq; virtutem amabilem esse, nullam quæ magis hominum mentes ad diligen-

dum moueat, atq; impellat. Sed sanè quauis nulla ef-
 fet inter nos amicitia, te tamen diligebam, tuoq; nomi-
 ni & gloriæ in omni sermone meo fauebam, Italia no-
 stræ congratulans, quæ tales viros tam disertos, tam
 eruditos hac nostra tempestate Dei benignitate pepe-
 risset. dices fortasse, cur nō me prior in amicitiam per-
 literas tuas prouocabas? certè id sæpe aggredi volui,
 sed tenuit me pudor quidam meus penè subrusticus.
 veritus sum ego adolescentior hominem senem sum-
 ma grauitate, auctoritate & gloria præditum prouo-
 care. itaq; & Panhormitæ gratias habeo, qui amicitia
 nostræ fundamenta iecit, & tibi qui quasi præcurrens
 me officio anteuenisti: tibiq; illud de me polliceor,
 quod vnum & polliceri & præstare possum, vt nullq;
 vnquam tempore tuo honori, dignitati, & gloriæ de-
 futurus sim. cæterum vereor ne multò plus de me tibi
 persuadeas ex Antonii sermone, qui in amicorū lau-
 des solet esse profusior, quàm præstare ipse valeam:
 quod si contigerit non mihi vitio sed eius in me amo-
 ri assignabis: is enim vt multum me amat nescio qua
 de me opinione, quòd putet se aliquid in me videre;
 quod ipse non agnosco, nec video, ita in omni eius ser-
 mone me multū extollit ac prædicat. Quòd mihi ob
 id gratularis, quia mihi datum sit negotium scribendi
 res ab Alphonso Rege gestas, quoniam illum exor-
 nans me ipse exornem, eiusq; nomen immortalitati
 commendans, nomen meum immortale redditurus.

sim, facis amicè. fateor quidem id, quod ipse scribis, Apelli, Lisippo, Pyrgoteli, atq; Protogeni summis artificibus permagno honori fuisse, quòd Alexandrum illum Magnum eorū operibus posteritati notum fecerint: nec mihi proponi potuisse materiam, in qua mihi minus deesse posset oratio. Nec præterea sum nescius Q. Curtium non minus ferè nobilitatum esse, quòd Alexandri res gestas literis mandauit, quàm ipsum Alexandrū, qui illius scriptis commēdatus ac celebratus est. Nec minus Liuiū Po. Ro. rerum scriptione gestarum, quàm Po. Ro. eius viri laudibus ac præconiis, summaq; eloquentia illustratū esse. Cæterum ii tantū in sua quisq; arte, & facultate præstiterunt, vt nihil iis de alieno iudicio timendum videatur: tantā enim erāt in eo genere auctoritatē consecuti propter alia multa, quæ prius ediderāt, vt eorum opera in mediū proferre dubitare non possent. sed cum rei mihi iniectæ pondus, cū historiæ dignitatē, maiestatemq; animaduerto, fit vt multorum virorum, quos eruditissimos hæc ætas tulit, iudicia pertimescam: neq; enim opus meum huiusmodi esse agnosco, vt quasi Minerua illa Phidiæ in arce, vt inquit Cicero, poni possit: quoq; magis rerū gestarū magnitudinē animaduerto huius inclyti Regis, hoc magis magisq; ne tātō muneri nō satisfaciā metuo. quanquā grauissimū Antonii iudiciū aliquam partem huius timiditatis meæ mihi adimic, qui me hortatus est, vt ipsum in lucem proferā: quod

scio pro eius in me amore haud mihi suasisset, si mihi
 dedecorifore eius editionem existimasset: ego tamē,
 quod hætenus feci, conari posthac non desinā, quan-
 tum ingenii vires suppeditabunt, Regem hunc de me
 optimè meritum æternitati consecrare. in quo si for-
 tasse defecero, non sibi voluntatem meam, sed ingenii
 vim potius defuisse testabor. Quodd si quis est, qui se
 hæc elegantius literis mandare posse confidat, hanc
 mihi saltem habere debebit gratiam, quodd sibi iter, vt
 aiūt, per quod ei eundum sit, patefecero. Sed quoniā
 videris putare Regis vitā à me scribi, meq; ob id hor-
 taris ne tantum vitam & mores eius, sed multò magis
 facta conscribam: ne faciam sicut Apelles ille, qui Ve-
 neris caput, reliqua corporis parte prætermissa, sum-
 ma arte pinxit: scito me non vitam eius, sed res à se ge-
 stas scribere proposuisse: vbi tamē incidunt aliqua de
 eius laudibus, eos locos exornare, ac amplificare stu-
 deo: vita verò & laudatio, quæ duo genera à rerum
 gestarum narratione separata scis, vel alterius homi-
 nis fuerint, vel certè alterius temporis. Quodd autem
 in postrema epistolæ tuæ parte beneuolo & paterno
 animo me hortaris ne festinem ad operis editionem,
 sapienter mones: sed ita tempora tulere, vt mihi inte-
 grum non fuerit, quod mihi ipse proposueram. scie-
 bam quidem festinationem improuidam esse & cæ-
 cam, vt inquit apud Liuium Fabius, & Horatiū præ-
 cepisse, vt opus nonum in annum prematur: non po-

tui mihi obtemperare. itaq; libros septem iam edidi, quibus continetur quæ Rex gessit à primo eius in Italam aduentu, vsq; ad eum diem, quo triumphum egit. Nunc bellum Picenum in manu est, post Florétinum aggrediar: quæ vellem posses videre, quoniam ipsius Regis laudum cupidissimus per literas tuas mihi es visus: quas aliquândo Regi ostendam, vt intelligat quantum is tibi debeat, quantumq; ab eo amandus sis, à quo tantis laudibus afficiatur. Vale, meq; tuum habe, atq; ab Antonio nostro tui amantissimo salue. Ex Neapoli XXVI. Septemb. M. CCCC. LI.

Ant. Panhor. Aurissa. V.C. S.P.D.



Vdio te Romam tãdem peruenisse, verum id quidem non abs te, sed amicorum quorundam diligentia intelligo, quibus gratissimus mihi esse existimatur aduentus tuus. rectè quidẽ illi & sentiunt, & mihi de te gratificantur, quippe qui norint singularem erga te amorem & desiderium meum. Dii igitur illis, & officiosis omnibus benefaciant: verum tu vsq; adeo negotiis districtus es, vel beneficiis intentus, vt amici veteris oblitus sis: præsertim ita propior factus, vt si te loqui nõ tadeat, vox à me pro pmodum exaudiri possit. Erit igitur officii tui purgare te quàm ocissime, non utiq; excusando, aut causando aliquid, vt plerunq; fit, sed literis prolixioribus, quibus intelligam tui huius aduentus in Romanam

curiam consilium, remanendi, redeundiue propositum, & an nos fortassis petiturus, an patriam aliquando reperiturus sis, an, quod abhominor, Siciliam nostram prorsus ex animo deleueris. deniq; rationem omnem vitæ tuæ perscribe: & maximè quo animo se nequitiam feras: quæ iam, si benè supputo, septuagesimum, aut eo amplius annum amplexa est. Ego verò, ut de me non ab aliis, sed à me ipso aliquid sentias, cū Laura vxore singularis exempli iucundissimè dego, de qua filiulam iam suscepi, peramabilem, pulcherri-
 mamq; nomine Catherinam Panthiam. & dego quidem hic bona cum Regis venia, ut orq; illa vacatione, quæ nouis sponsis, ut nosti, etiam lege veteris testamēti cōceditur. Scriberem tibi verbosius aliquid de vxoria voluptate, ni surdo fabulam narraturus essem, & ab huiusmodi beatitudine penitus abhorrenti. Si diutius Romæ commoraturus es, te fortassis inuisam in via Regē aditurus. Et de libris si qui recēter emerferint, etiam rescribas. Vale. Neāpoli.

Ant. Panhor. Alphonso. Regi S. P. D.



EX multis, atq; immortalibus tuis erga me beneficiis Alphonse Rex nullum mihi iucundius, ac naturæ tuæ cōuenientius elargitus es, quàm quod proximè in me contulisti, villam videlicet, cui nomen est Sissæ: est ea quidē, supra quàm credi potest, amœna & delectabilis, ac musarū quasi proprium

prium domiciliū. ibi statuo cogitationes meas, si quā
modò cogitationes meae sunt, literis, monumentisq;
mandare, tuumq; nomē pro virili meā immortalitati
consecrare: atq; eo modo tibi non solum habere gra-
tias tot quotidie beneficiorum, sed aliquando etiā re-
ferre. sic diuus Augustus Poëtarū studiosus Virgilio
suo commodissimum Poëtae donum, villā dedit pro-
pe Baias in amœnissimo orbis terrarū loco: sic Hora-
tio Flacco villam Saminam habitatam quinq; focis: sic
& Messala suo Tibullo nil acceptius quā villam de-
dit. et rectē sanē: nam, ut ait Flaccus, Silva placet mu-
sis, vrbs est inimica Poëtis. ego quoq; Rex maxime
tuo hoc munere vehementer gaudeo: iamq; & Sisiā
cogito, Sisiā somnio, Sisia, musisq; vanis imaginibus
fruo: itaq; delector, licet absens, ut vel hac imaginaria
voluptate mihi perbeatus esse videar. sed tantæ huic
latitiæ scrupulus nuper iniectus est, sitq;, quod ait Pla-
to, ut volupratis comes sit dolor: scrupuli verò et dolo-
ris causam commissimus tuæ maiestati referendam
Ioanni Ixaritano viro magno: quem cum audieris, si
quidem honesta narrabit, te oro, atq; obsecro etiā ut
exaudias, nec permittas diuitū opes ac factiones plus
valere, quā Poëtarum simplicitatem, & musarum
harmoniam. Regum principumq; virorum cibus est
gloria, qua non locupletes diuitiis, quæ & fluxa sunt,
& Reges ipsi non indigent, sed Poëtae versibus dare
consueverunt. Vale musarum spes.

Ioannes Ixanensis Petro Ralmo. V. C. S. P. D.



Vis hisce ad me grauibus & ornatis epistolis, quibus abeuntem profecutus es, facile intellexi tuam erga me illam peculiarem beneuolentiam, nec minus in Alphonsum Regem & dominum nostrum incredibile studium ac pietatē, utrunq; mihi maximē gratum: nam & à te amari, qui prius iudicas quem amas, laus est illa quidem eximia: & quòd Regem, nosq; omnes de reditu in Hispaniam admones, è re est, & utilitate communi. ita quidem & ipse tecum sentiebam, dum essem in Hispania, abiens etiam in via proposito perstabam: applicans verò, videns, audiens, sciscitans, propositum magna ex parte mutauit: non quòd locus animum mutauerit, sed consilium. nam cū hac in re, ut ego arbitror, duo nobis maximē proponuntur, utilitas redeundi, & honestas remorandi, quis honestatem non præferat utilitati? conflato bello, coacto exercitu, prolatis signis, acie instructa, dato signo, milite victoriam sperante, deferat Dux, deferat Rex noster inceptum? oportuit bellum potius non suscipere, quàm susceptū per dedecus deferere. quòd si utilitatem æstimas, est nobis cum hoste non de gloria solum, sed etiam de regno certamen, ut sit non modò turpis, sed inutilis quoq; belli desertio: ac si quispiā contra sentiat, contendatq; de reditu cum Rege, scin?

tu quid faciet, impetum quidem retardabit fortasse, profuturum propositum neutiq; flectet, & ait Poëta dum furor in cursu est, furori cedendum esse. Expectandum igitur mea sententia tempus tuo immò nostro desiderio aptum magis, dum hæc belli rabies defæuiat, dum satietas rerum Italicarum eum capiat, dum parata, quod Diis beneiuuantibus spero fore, victoria, illi etiã cum dignitate suaderi possit vt redeat. Vale ex Caieta. XV. Augusti.

Ant. Panhor. Surisæ. V.C. S.P.D.

B Inis tuis nunc literis respondeo, breuiter quidem ac tumultuariè, vt qui rebus publicis, hoc est regiis, rebusq; priuatis, hoc est vxoribus obstrictus, nihil proluxius, nihil accuratius aut per otium queam. Igitur C. Cæsaris commentarios expectatissimos quidem adhuc non accepi, nondum enim se recepit Salernitanus Princeps Cæsaris, meaq; unica voluptatis adlator: speramus tamen eum prope diem adfuturum, vtinam satisfacturum. Quinterniones duos scribit Tuscanella noster ad codicem deesse, seq; procuraturum vti exscribatur, & ad te Romã, inde facilius ad me dimittantur: quod tu pro virili ac diligentia tua accelerabis, quò tuum munus non duobus veluti pedibus mutilatum, sed integrum & te dignum adueniat: de libro hætenus. Mariam filiam & a Venetis in via, & Ferrariæ à viro tam liberaliter, ac

magnificè exceptam Alphonsus Rex idem & pater
 per quàm libèter audiuit, tibiq; etiam gratias habuit,
 qui ferè omnium rem nobis ordine renuntiaueris: li-
 teras quidem tuas illas semel iterumq; perlegit: sed &
 maiores aliquantò tibi gratias habet, quòd milita- em
 illam disciplinam traducere aggressus es: ad quã qui
 dem rem, quod demiraberis, me quotidie quasi tra-
 ductorẽ ipsum sollicitat: ferens præ se nihil antiquius
 sibi futurum, quàm militare huiusmodi opus absolu-
 tum videre. iam vides qualem prouinciã suscep-
 sis, sed & qualem commendationem ac gratiam. Galli
 istius literã manumq; perspexit, nec satis placuit: quip-
 pè Ioannẽ Theutonicũ cupit, efflagitatq;: tantũq; pol-
 licitationibus tuis tribuit, vt speret, immò expectet.
 in primis Diogenem valde vult: quicquid enim vult,
 valde vult. Ego membranis chartis ideo non indigeo,
 quia librarium seu scriptorẽ in præsentia nullum ha-
 beo: si ad me vnum aliquem scriptorem miseris vel
 Gallum, vel gallinam, sic de chartis demum agere po-
 terimus. habeat, si tibi quoq; videbitur, Rex Theutoni-
 cum, ego Gallum. Procurabis subinde T. Liuium ex
 Florentia, libri domino satisfaciet Petrus de Galiano.
 Item procurabis, si me amas, si à me amari vis, com-
 mentarios Donati ad Terentiũ extorquere ab Areti-
 no tuo, olim meo. Profectio mea Panhormiũ adhuc
 suspenditur. singulis quidem diebus vnà cum Rege
 legimus, quo sibi nihil iucundius est in vita. expecto ve-

castra adeat, atq; moueat, vti & ego quoq; è portu sol uam. hanc vnam duntaxat occasionem nactus, ex templò tamen Diis ducibus rediturus, & ad Regem vbicunq; fuerit aditurus. Interim tu, quod facis, me li teris pulsa, & audacter gaude, nam Rex te quidè vni cè amat, ac prædicat. ego valeo. Vale. Neapoli.

Ant. Panhor. Alphonso. Regi S. P. D.

AM nouit sublimitas tua oratores Panhor-
mitanæ vrbis aduenisse, vt errata ciuiũ suo-
rum tecum componant, ac redimant: spe-
rantq; à benignitate ac clemētia tua impetrare quod
cupiunt: ego, vtcunq; res cessura est, meminerit, oro,
maiestas tua portiuiculæ meæ: quod pretium est lau-
dis, ac gloriæ tuæ, & exemplum singularis ac immor-
talis beneficentiæ. Epistolam ad collegium Cardina-
lium, quam à me per Matthæum Ioannem secreta-
rium petiisti, per eundem ad te misi corrigendam,
& emendam per acri iudicio, ac prudētia tua. ego
quidem, vti ille tuo nomine mandauit, informauitq;
ita mentem tuam verbis protinus explicare conatus
sum: si verò præsentia mea super ea re, vel alia ex cau-
sa opus fuerit, non grauabor ad te, cui omnia officia
debeo, uel nudis pedibus accedere. Interim tu ad fe-
ras venaberis, ego quotidie in tuas laudes, & tuā per-
petuitatem aliquid venor. Vale, & triumphā.

Ant. Panhor. Alphonso Regi. S. P. D.



Go Rex benignissime id solū intelligo, quòd scilicet mihi de salario satisfiat: quod si ex eo vestigali, quam vini Gabellam appellant, Panhormii exoluatur, id ea lege fiat, vt qui vestigal percipit, idest Gabellotus, mihi tamen de mea quantitate respondeat, & nō secreto aut cuius alteri officiali: alio qui, quod duobus annis expertus sum, omnis assignatio est irrita & sine effectu, & ita res toleratu grauis, vt statuam potius cum inopia & fame certare, quàm cū durissimis illis officialibus amplius agere: neq; minori beneficio adscribam, si me ab illorum manibus eximeris, quàm salarium ipsum. Quid prodest mihi beneficium, si Caietæ datum, Panhormii intercipitur? quid tua beneuola & benigna mens, si ab officialibus illis tuis non exauditur, sed opprimitur, sed contaminatur? Gratias, vt nosti, solutis tunicis fingunt, quod si significat beneficium alligatum non esse debere, non astrictum, non impeditum. Consueuerunt Reges præceptoribus suis aut Poëtis dare, & assignare vel prædia aliqua, vel oppidula: credo tum aliis rationibus, tū maximè ne salarium, si quod daretur, petentes repententesq; molesti essent. hoc ego summopere procuro scilicet ne molestus sim: sed mea hæc procuratio vel diligentia quid mihi aut tibi profutura est, nisi tute illā, Rex optime, aut iuueris, aut dixeris? quòd igitur

molestus aut iucundus sim, totum ex te pendet. si feceris uti salarium, quod mihi das, certo aliquo loco via quæ habeam, perpetuò tibi iucundus ero: sin minus, coget me mala necessitas uti molestus sim. Postremò vnum illud rogo, obsecro, supplico, quod super hac re facturus es, citò ut explices: mora quidem inficit beneficiū. Vale Regum humanissime & triumphā.

Antonius Panhor. Curispa Viro Clarissimo. S. P. D.



Cribis te maturè quidem ad nos profecturum Regis ac mei visendi gratia: facis si modò proposito perstare potes, rem tibi valdè vtilem, ac dignam grato viro. omnia quidem officia Regi benemerenti debes, tū glebæ Ferrariensi in perpetuum adscriptus esse non debes. hic etenim capitis tegmen me auctore confestim mutabis: & iam mutas, si vir esses, & voluptates istas Ferrarienses quantas libet posses relinquere. Cogita ætatem tuā iam grandem, ac propè decrepitam. cogita quo in loco, quàm procul à patria degas. Nudus in ignota Palimure iacebis arena: & quibus tua bona, tuam bibliothecam diripiendam relinquo: saltē hoc munus patriæ debebas, & gloriæ tuæ. Hic, Diis gratia, benè ac salubriter agitur, nec decretum illud contra aduenientes ex locis pestilentibus te comprehendet: dabitur tibi ad pauculos dies, cum adfueris, diuersoriū in uilla aliqua mea

instructa simul, & peramicenā. et deniq, vt huic literarum parti finem faciam, à Rege humanissimo quotidie optaris, & quidem desiderio constātissimo. Quod sequitur te rogo, vt si Abbatiam, quam in nostra Sicilia obtines, locare aut transferre cōstituis, illam loce, & transferas domino Blacco Speciali viro generoso, & abundè spectato. qua de re primum Deo ipsi, deinde Regi, postremò mihi rem gratissimam facies. à Deo quidem tibi gratiæ referentur, à Rege laudes, à me verò versiculi fortasse non illepidi. Vale cū Auerfanō nostro iucundissimo. Neapoli.

Antonius Panhor. Iurista Viro Clarissimo. S. P. D.



Theodorum tuum, quem mihi tantopere cōmendas, scito apud Alphonsum Regem, vt cupis, magnificè collocatum: mihi verò ea in re quas gratias habeat, si gratus est, ipse renuntiabit. certè nos desiderium tuum expleuimus, & quidem eo ipso die, quo Theodorus applicuit, vt duplici nobis officio obligetur, & quòd benè, & quòd citò fuerit expeditus: verum hæc, vt diximus, ipse scribet. tu verò si me audis, Regem repete, qui te diligit, & tibi meliuscule esse cupit: etenim ii maximè colendi & obseruandi sunt, qui quod cupiūt exequi possunt. cooptaberis, mihi credas, ad amplissimas dignitates, si huc ad nos veneris: nec temerè hæc tibi suadeo, sed ex oraculo.

Apollinis,

Apollinis depromo, ac foliis mando. noui multa, quæ te possunt etiam per tenebras huc pellicere, verum ea coram: nam nisi delirare incipis, maturabis: immò, vt Catullus ait, viam vorabis. veniens verò fac tecum de feras Apicium Coquinarium, & Cæsaris iter nuperri mē, vt refert Theodorus tuus, nunc iam meus, inuentos, Romamq; perductos. Laura verò quid de te speret, ex præterito coniecturam facit, Catherina Panthia deliciæ meæ te vehementer expectāt. Vises præterea Antonium Panhormitam ocellum aureum: deniq; mentior, nisi hic repuerasces, atq; adeo aliam ætatem viuere incipies. Vale. Quæ tibi de Cæsaris itinere scripsimus, ita accipe, vt nisi versibus compositum est, Iuli iter non sit, sed Antonini: hic enim prosa oratione iter edidit, Iulius carmine: Antonini verò iter iam pridem & verum habemus. Item vale. Neapoli.

Ant. Panhor. Martorello suo. S. P. D.



Cincto mihi, iterq; arripere volenti renuntiātū est vniuersam Remp. Neapolitanorū ad Cæsarem nostrum legatos mittere oratū vt ad aliquot dies Neapolim se recipiat: subesse etenim causam reuersionis & quidē probabilem: itaq; nobilitatē omnē sperare, breuiterq; expectare Cæsaris aduentū. Quare mihi psuadere primores ciuitatis, vt saltē expectarē legatorū responsū. interim cogitarē

ego epigramma ad arcū triumphalem, quē in honorem Alphonsi Caesaris construere sumptuosissimē intendunt. Item adornāt currum quadrigis albis auro coopertum, & multa id genus in memoriam ac triumphum victoris nostri. Ego nihilominus auribus arrectis, & simul ac sensero vos Calabriam, inde Siciliam petere, & iam ex Trano, Apuliaq; mouisse, digrediar vobis obuiam Consentiā. Nō decet vt Cyclopas adeatis omisso Polyphemo. Sed si quāsieris quid agā per hāc tēpora Neapoli, cogito, excudoq; aliquid, quod in gloriam Alphonsi benefactoris exuperet arcum Neapolitanorū, nec sit obnoxium aquā, pluuiā, neq; tonitruis, neq; vetustati. Intelliget aliquando Caesar, qui magis suā laudi & immortalitati consuluerit, vos ne qui castra armati sequimini, an ego qui vitam, vt vobis videtur, per inertiam atq; ignauiam traduco. Valeat ipse, vincat, triumphet. Tu quā potes ocissimē rescribe, num forsitan Neapolitanorū legatio flexerit Alphonsi profectiōem. Calen. Decemb.

Antonius Panbor. Iannotio Manetto.

V. C. S. P. D.



Iber tuus de hominis excellentia Alphonso Regi tam gratus fuit, quā esse debuit res singularis: atq; eò gratior fuit, quod elegantiae ac copiae dicendi auctoris ipsius probitas ac sanctitas accedebat. Te quidem, si nescis, non solum ob-

ingenii claritudinem, sed etiā ob animi ornamenta, ac morum sobrietatem prolixè diligit, & perseueranter amat. si qua igitur laus est à sapientissimo Rege diligi, & obseruari, tu vel in primis gaude & triumphā. Nec fuit opus rem verbis extollere, affatim se ipsa cōmendat, vt cui grata, & accepta nō fuerit, omnibus esse possit ingratus. Vale tu mea musa.

*Antonius Panhor. Gassari suauissimo
Barbaro. S. P. D.*



I me audis, caue Regi mea causa molestus sis. si intellexeris illum meas literas grauātē manu sua exaraturum, exemplum literarū quod penes te est, dilacerato. debemus Regem de nobis benemerentem per arduis negotiis pressum leuare potius, quā illi molesti esse. Dispereāt priuilegia, rescripta, literæ deniq; omnes, priusquā illi vel graues, vel importuni simus. Vale.

Ant. Panhor. Alphonso Regi. S. P. D.



Non potui quantacūq; diligentia me hactenus expedire, vt cū hac triremi, quod summē cupiebam, aduolarem ad pedes maiestatis tuæ. fuit in causa & in mora non quidem patria, aut propinqui: quæ omnia, quanquam suauia, & iucūda, præ te tamen & sordescunt, & nihili penduntur à me: sed illud fuit, quòd in rebus pernecessariis hactenus

expeditus non sum, & quòd expecto ex Messana libellum Macedonicum, quem librum statim habiturus sum: mox qualitercunq; expeditus, vel etiam non expeditus, ad te iturus sum, viamq; voraturus, vel cum cymba amiclea, deferens mecum patrē historię Romanę T. Liuium, quem in castris summa cum voluptate & vtilitate legamus. Interim peto, obsecro, obtestor, & per diuinū amorem tuū tibi supplico, nō feras, vt Ioan. Marchio me excludat à salariolo meo, quod pro tua liberalitate, & beneficentia ex vestigalibus Panhormii exponitur: quod mihi sæpe iā vt benignus es, pollicitus es augere, atq; amplificare. super eodem vestigali multi locupletes redditus habent, qui aliunde viuere etiam ad voluptatem possunt: at ego, vt nosti, nihil omnino possideo nisi tuum hoc salariolum, & liberalitas in pauperes laus est & virtus, in diuites vitium. ego verò ita in tua iustitia in omnes, in tua beneficentia in literatos, in tua pietate in Poëtas, in tua obseruantia in praeceptorem, & spero, & speraui semper, vt nullo modo adducar vt credam à quoquam vel potentissimo deiici posse, atq; iniuria affici. Vale spes unica Poëtarum. Panhormii.

Ant. Panhor. Alphonso Regi. S. P. D.



Voniam breuē Neapoli recessurus es, oro atq; obsecro memineris polliciti tui in nuptias Agathes filiolę meę, illud, si sapis, ne-

quaquam paruifaciens, quòd pro paruo dono ingēs
& immortale à me recepturus es. Vale.

Ant. Panhor. Alphonso Regi. S. P. D.



Eracta sunt iam omnia, ni fallor, cum fide &
diligentia, quæ Venetiis, & alibi à me effici
debuerunt ex mandato celsitudinis tuæ. Per
stat quidē Princeps iste & Senatus in proposito suo,
pacemq; expetunt potius, quàm bellum: quæ res, vt
plenius nouit maiestas tua, Romæ apud summū Pon
tificē transigenda est. interim hic otiosi sumus: quodq;
me maximè angit, Laura vxor mariti absentis, & eiul
dem senis desiderium ferre diutius non potest, meq;
flebilibus literis quotidie pulsat, ac reuocat: ostendens
planè verum esse, quod Catullus Poëta scribit, Aman
tes non longè à caro corpore abesse volunt. meritò re
damatur à me puella, etiam supramodum: non sum
cæcus, non sum ferreus, satisq; intelligo verissimum
esse & illud Catonis dictum, Amantium animas in
alieno corpore viuere. quare si satisfactum est in præ
sens mandatis tuis, si desiderium puellæ honestissimū
est, te peto, atq; oro mihi concedas, vt bona cum ve
nia reuertar ad animulam meam, sic Venūs Regina
tibi propitia sit Rex piissime. Vale, & triumphā. Vene
tiis. XXV. Iunii.

Ant. Panhor. Alphonso Regi. S. P. D.



Ratiunculam, quam apud Fredericum Imperatorem habituri sumus, per Martorellum mitto celsitudini tuæ, quam singularis prudentiæ & iudicii tui lima perpolias atq; emendes. scio fore ut correctâ per te & edi tutius, & proferri audacius queat. finita quidem adhuc non est: sed quæ deficiunt audies à literarum adlatore viro iucundissimo, cui referenda commisi viuis affatibus potius, quàm epistolæ mandare ausus sim. Vale, & triumphâ.

Franciscus Barbarus Ludouico Poggio, & Antonio Panhormita legatis Regis.



Vrgarem silentium meum, nisi res ipsa satis pro me loqueretur: quia cum Flavius Forliuensis eloquētissimus vir ad me vestro nomine complures libros græcos de re militari detulisset, omnes subitò percurri, sicut ipse testis est: & confestim summam rei sicut potui & scriptores ac auctores collegi, qui multum accuratè & copiosè tractauerunt de rebus bellicis. Cæterum cum apud Romanum Pontificem crederetur de concordia agendum esse, & magnitudo animi, & satietas gloriæ, sicut de P. Scipione Africano legitur, Serenissimum Aragonum Regem, & inclytum Senatum nostrum inclinasset ad dandam Italiæ pacem: ut omnes intelligerent eos suæ

potius clementiæ,quàm alienæ culpæ rationē habere velle, libros istos militares quasi belli consiliarios, & administratos mecum in æde musarum, vt ita dicam, vinctos cōtinui:ne spe victoriæ,quam se daturos esse pollicentur,signum proponerent pugnæ,& otium ac tranquillitatem turbarent cum magno motu totius Italiæ. Quare cum ad vos legatos prouocauerint,& ius legationis liberum sit,& regiones omnes regiæ à nostris hominibus,& græcos à barbaris hic benignè tractari debere contēderint:è Rep.censui legibus parendum esse,ne in hac ciuitate nostra benè instituta priuati carceris infamia locum habeat,& à viris illustribus ac sapientissimis nō sine quadam ignominia apud nos libertas ac æqualitas iuris cōsideretur: cum ideo, sicut à patribus accepimus,legum serui simus,vt liberi esse possimus. Quapropter cum relegationi, vt ita dicam,suæ finis imponendus,sit cum bona vestra venia reuertentur ad Magnificentias vestras, si prius cauerint se fore memores rerum humanarū,quæ mille casibus subiectæ sunt: nec vnquam dubia pro certis habituros,nec fortunam potius quàm rationem securos. Vadibus igitur datis illos dimittā ea lege, atq; conditione, vt neminem deinceps hortentur ad bellum,nisi necessitas ipsa pia induat arma, aut socii nominis dignitas cogat vim vi repellere ad benè beatèq; viuendum.sed quid ago? satis vobiscum de libris istis græcis iocatus sum:vt excusationem meam,quæ

vix sine quadam negligentia defendi potest, probabiliorem facerem, & ut ioco facile veniam impetrem, quam serio fortasse impetrare non potuissem. Bene & feliciter valete sicut opto. Venetiis. VII. Idus Iunias. M. CCCC. LI.

Index Librorum Græcorum.

Helianus de re militari.

Onosander ad Q. Veranium de re Imperatoria.

Mauritius de re Imperatoria.

Athenæus de machinis, & instrumentis bellicis cum pictura expressis.

Hiero de iaculis, quæ cum manu proiiciuntur.

Apollodorus de Urbibus obsidendis.

Philo ad Aristonem.

Iulius Africanus de cestis.

Digressiones de Imperatoriis institutis.

Qualem oportet esse ducem exercitus.

Epitoma Cyri Nicophori Regis.

Epitoma Leonis Imperatoris de re militari.

*Ludovicus Poggius, & Antonius Panhor. Regii
legati Francisco Barbaro Viro Illu-
stri. S. P. D.*



On tu Barbare omnium humanissimus, atque officiosissimus es? qui quamlibet acri morbo implicitus, nihilominus facere simul & grauter

grauiter nobiscum per literas iocaris in Græcos illos, qui de re militari, atq; imperatoria scripserunt: eos quidem ipsos, vt primum à nobis commodatò accepi sti, in vincula coniecisse significas, veritus ne cum scientia sua, quæ victoriam polliceri videatur, pacem Italiæ, de qua in præsentia agitur, liberi vagiq; perturbent. Rectè tu quidem illos & vinctos tenes, & prius quàm dissoluas, agis vt caueant, præstentq; rem aliquam certam: nam victoria res nimirum incerta est, & vt inquit Homerus, alterna, quæ ue cōplures mortales, dum sese in sinu illam tenere arbitrantur, falsos habuerit, egeritq; præcipites. Hinc infinitam multitudinem admodū paucos profligasse legimus, vt intelligamus victoriam nō præceptis Philosophorum constare, sed Deorum benignitate ac prouidentia concedi. Magna profectò res est, ac maior quàm vt hominum prudentia, aut spes, aut virtus, aut potētia sibi repromittere valeat. Quis igitur nisi qui temeritati fortunæ subiectus esse studeat, pacē victoræ præsertim futuræ non præferat? eò maximè, quòd victoriæ ipsius fructus omnis est pax. Nobis quoq; præclarè dicere visus est, quicumq; dixerit pacem esse summum bonum, ac certè summo bono pacem inesse. de pace igitur & cōcordia, vt vides, tecum sentimus, nec patrocinari hoc debet Græculis illis, quòd nos appellauerint, quòd ius gētium implorauerint. non sunt iure gentiū digni, qui contra gentes aliquid moliantur, aut gras-

santur: hiq; ipsi sunt, qui victoriæ, qua nihil incertius est, spe bellum suadentes, postea in calamitates ac miseriae gentes impellant. his igitur meliorem mentem Dii dederint: te verò, quem per ægritudinem tam sua uiter scribentē videmus, quales epistolas edidisse credendū est in bona & integra valetudine, & ætatis flore? Hoc eò spectat vt epistolas à te olim perscriptas, quas nūc in corpus redigis, regio munere dignas putes, hoc est Alphonso nostro triumphatori dedices. quòd illi, si benè eū nouimus, tam gratū acceptumq; futurum coniectamus, quàm benefactorum, & nominis sui famam, & immortalitatem. Vale.

Ant. Panhor. Cosmo Viro inclyto. S. P. D.



Vm proximis diebus Alphonſi rerum memoria dignarum librum abſoluiffem, opportunè mihi cupienti occaſio oblata eſt, id librorum tibi potiſſimum dedicandi. nam reconciliato nuper Sfortia tuo viro ac Duce præſtantiſſimo cum Alphonſo Rege, par fuit, vt tu quoq; qui illorū diſſenſionibus alienam fortasſe mentem à Rege aliquandiu geſſiſti, redires in gratiam, fieresq; beneuolentiæ particeps. Idq; cum ita cecidiſſet, Alphonſo etiam gratū admodum me facturum exiſtimaui, ſi eius dicta ac facta tibi viro grauiſſimo, atq; probatiſſimo præcenſenda exhiberem. quæ cum tibi probarentur, ea omnibus magnis ac ſapiētibus viris probatum iri non dubi

taret. Donec igitur licebit vos coram inuicē videre, ac viuas audire voces, & reddere, leges tu quidem interim hos libellos, qui tibi viuum, ni fallor, repræsenta bunt Alphonsum, & iam nunc tuum: ac quantum in eo olim vel temporum iniquitate, vel factorum inclementia perdideris, statim intelliges: simulq; si te pulchrē noui, tempus amissum amoris exuberantia, beneficiorumq; frequentia recuperabis. Iamq; id tibi de huiusmodi amore euenturum vaticinor, quod de vi no plerisq; aliis solet, qui diutius aqua vsi sunt, vt si quādo postea in vinum incidant, expleri nullo modo eo posse videantur. sed de hoc aliās. Nunc Alphonsum legas, aut audias, potius plura dicentem, quæ ad grauitatis, iustitiæ, magnanimitatis, clementiæ, vrbanitatis, ac penē innumerabilium virtutum exempla pertineant. cumq; eum perlegeris, communices velim cū Clarissimo, atq; eruditissimo viro Poggio nostro, cuius etiam iudicium super his commentariolis vehementer expecto. Vale.

Ant. Panhor. Alphonso Regi. S. P. D.



Ignificasti mihi nuper ex Florentia extare T. Liuii opera venalia, literis pulcherrimis, libri pretium esse CXX. aureos. Quare Maiestatem tuam oro, vt Liuium, quē Regem librorum appellare consueuimus, emi meo nomine, ac de ferri ad nos facias. interim ego pecuniā procurabo,

quam pro libri pretio tradam. Sed & illud à prudentia tua scire desidero, vter ego, an Poggius melius fecerit, is vt villam Floræ emeret, Liuium vendidit, quem sua manu pulcherrimè scripserat: ego vt Liuiū emā, fundū proscrispi. hæc vt familiariter à te peterē, suāsit humanitas, & modestia tua. Vale & triumphā.

Ant. Panhor. Alphonso Regi. S. P. D.




Q Ptaui vehementer his diebus Rex amplissime Maiestatem tuam adloqui super professione Reuerendissimi ac præstantissimi patris Patriarchæ Legati Pontificii: quod quia agere coram per otium nō potui propter occupationes tuas, nunc per epistolam agere constitui. Primò igitur huius honestissimæ expeditionis in Turchas à Pontifice Maximo designatus cum sis, & Dux & Imperator, te maximè Reip. Christianæ salutis, ac dignitati prospicere oportere existimo, ne quid, quantum consilio atq; auxilio valeas, detrimenti capiat: deinde non sum nescius, quàm valdè affecta sit Maiestas tua huic præclarissimo Legato propter eius summas, ac singulares virtutes, ac summam in te obseruantiam, atq; beneuolentiam: & ob eam rem mihi persuadeo Maiestatem tuam omnia cupere, quæ illi honori, gloriæq; cedant. Nescio quonam modo patiari vt hic tantus vir, tanto pere tibi affectus, quem tot, tantisq; beneficiis & honoribus exornasti, qui & tuum se prædicet, quem ue tuū

esse omnes existimant, cum tam paucis nauibus, nec satis instructis, quarum præfectis quantum fidei haberi possit, tu ipse nosti, contra Turcharum potentiam proficiscatur. Quid enim detrimenti, quid incommodi inferre poterit cum tanta & nauium & militum paucitate, communi Christianorum hosti? qui ipse & terrestribus & maritimis copiis tantum valeat, ut omnibus Christianis terrori sit. Nonne vides Rex consultissime hunc in manifestum periculum mitti? cum qui de hostis ipse vno si velit die multo maiores mari copias parare possit, quibus si hic velit obuiam ire, haud dubie in illius potestatem peruenturus sit. quod si accideret, quod superi auertant, hoc onus, atque hæc ignominia labes in Maiestatem tuam profecto reflecteretur: quoniam auxilium tuum, in quo spes eius sita est, exiguum fuisset, & aduersus tam hostem inualidum. Ad hæc Christianæ potentia auctoritas apud Barbaros longè profecto imminueretur, si hunc tantum Ducem & Imperatorem cum tam parua classe profectum intueretur. Quam nunc classem paratam habes, qua hic satis tutus contra Turcharum classes ac vires eat? At præter opem tuam nihil est in præsentia siue in Italia, siue extra Italiam, quod sperare, aut expectare valeat, ex quo si quid ei aduersi contingeret, ut dixi, quoniam tuo auxilio fretus, tuoque consilio ductus, tantam rem aggressus videretur, multi sanè forent, qui id tibi vel culpæ, vel negligentiæ verterent, quod in re amici,


& hominis tui deditissimi minus fortasse quàm debuisses, considerasses. Quantò satius, atq; opportunius fuerit hoc tuum auxilium, quod conferre in animo habes, in aliud tempus differre: quo maiores copias maritimas paratas habeas, quàm sinere hunc clarissimū virum, optimè de te meritum, in manifestissimum discrimen proficisci. Si à me quæris Rex humanissime quid agendum censeam, dicam, etsi tu es, qui consilio abundas, & prudentia. differendam primum censeo hanc profectionem, & scribendum, vel potius oratorem mittendum quàm ocissimè Pontifici Maximo, apud quem scio vales auctoritate & gratia, significatū, esse te eo animo circa expeditionem contra Turchas, quo esse dudum cœpisti. non habere te paratam eam classem, quæ digna sit tanto Duce, quantus est hic excellentissimus legatus eius, cū qua tutò in Græciam proficisci posse videatur. & propterea videri tibi sanius consilium, huius viri profectionē in aliud tempus differre, quod speres haud longum fore, quo maiore triremum numero à te iuvari poterit. tantum virum, & si is paratissimo animo videatur, vel cum vitæ periculo ad exequendum imperium Sanctitatis suæ, non esse tamen temerè periculo exponendum, sed in tempus commodius reseruandum. His & huiusmodi verbis, quæ ipse lōgè melius inuenire scies quàm ego, faciliè, vt arbitror, poteris Sanctitatem suam à proposito reuocare, ac per hunc modum saluti ac dignitati

hominis tui obseruantissimi, atq; amantiſſimi conſulere. quæ à me velim ſcripta & cogitata putes eodem animo, eadē ſimplicitate, qua vti in his, quæ ad dignitatem tuam pertinent, ſoleo. Vale.

Ant. Panhor. Martorello. S. P. D.

 Cripſimus heri ad Alphoſum Regē mūnificentiſſimum, & vt audio viſa eſt illi pecunia fortalliſſis grauior, quod vtiq; verū eſt, ſi me reſpectat: ſin ſe, erit admodum pauca. Itur ad nuptias, & quidē præclaras, ibitur ſine veſtibus, & apparatu nuptiali. Mihi emendi ſunt equi XX. toridē homines veſtiendi, iter longiſſimum. Cū me miſit Rex ad Venetos, dedit mihi aureos Alphōſeos DCC. & itē poſtea in eadē legatione CL. Erimus nunc in deteriori conditione ad nuptias proſecturi? primū te rōgo, ſi tamen vales, fac vt tranſeat à me calix iſte. ſenex ſum, hyems eſt, iter, vt dixi, per longum: ſin verò effici non poteſt, nam Regi omnia debemus, etiam vitam, fac ſaltem vt honori meo, immò regio conſulatur. Vale.

Carolo Nauaria Principi.

 Vm tua virtus ac probitas cum fortuna luctatur, ego incertus agitor, tamen expectās, vt cum Deus pro ſua benignitate ſedē tibi

EPIST. CAMPAN.

statuat, & virtuti præmium reddat, ego tunc quid mihi faciendum sit sciam. si quid interim de me constituis, impera. Reliqua intelliget sublimitas tua à Canione literarum adlatore. Vale Princeps Principum.

x *Antonius Panhor. Alphonso Regi.*
S. P. D.



Ræclara illa volumina habita, & locata sunt iam in arce tua illa inclyta & memorabili. Emptor ad te se conferet, veritus ne pecuniam perdat: nam probè intelligit furtum aut rectius sacrilegium commissum. erit humanitatis tuæ suam illi pecuniam reddere: sed & erit prudentiæ libros continere, neque in alienam regionem exportari sinere. optimo enim titulo id potes, in monasterium enim, ex quo furto subtracti sunt, ius patronatus geris. satius est aurum ex regno, quàm libros, veros Regum consiliarios extrahi permittere. de libris hæcenus. Sextam epistolam ad te mitto verbosiorē fortassis, quàm consueverim, sed ita magis profuturam arbitratus sum: vtrum verò placuerit, ita demum intelligam, si partem mihi feceris venationum tuarum. Vale, & triumphā.

Antonius

Antonius Panhor. Angelo Carazulo. S. P. D.



V quid agas per hac tempora scire cupio; ego verò pestis tempestate iactatus modò huc, modò illuc vagus, palàsq; erro. Primò Pomponianum, dein Granianum, postea Stabias, postremò Nuceriæ petram deuectus sum, sed Dei benignitate familia incolumi. vbi loci id maximè iucundum fuit, quòd te vicinum intellexi Sarni præsidem, inter nymphas, & lymphas fontis limpidissimi agentem. Igitur, vt Comicus dicit, flos veteris vini meis naribus obiectus est, & te visendi sitis incredibilis. Scire itaq; nō ab aliis, sed à te velim, an sanus & foris sis, an cœlum isthic salubre, an valens familia? hoc enim velut mei er roris solatium expecto. Vale.

*Antonius Panhor. Episcopo Stabienfi.
S. P. D.*



X tuis literis incredibilem capio voluptatem: eò enim loci deuectus sum, vbi non audiam, nec videam nisi cursus astrorum. tuū igitur officium est, quotidie, vt facis, mihi renuntiare Alphonfi Regum Regis valetudinem, & tuam: & si qua noua accidunt, mecum communicare. Vale humanissime Antistes. ego Dei benignitate cum familia valco.

Ant. Panhor. Alphonso Regi. S. P. D.



Vi quotidie à te veniunt, partim te citò redi-
turum Neapolim, partim te Apuliam peti-
turum affirmant: ego quidem, vt qui id ve-
hementer velim, cum illis sentio, qui te rediturum di-
cunt: nam si per hæc infecta tempora Apuliam affe-
ctas, nihil aliud agis, quàm amicis & beneficiariis tuis
committere, vt Aueruncum deprecetur, vt à te peri-
cula auertat. Si licet igitur, pro tua māsuetudine signi-
ficabis an pestem sine probabili causa aditurus sis, an
Neapolim, id est ad Insulas beatorum reuersurus.
Aucto, & priuilegium Francisci oratoris, si gloriam
diligis, subsignato.

Ant. Panhor. Nicoli suo. S. P. D.



Deram ego quidem Sulmonæ, cū magnò
pere Alphonfus Rex Sulmonenses lauda-
ret, quòd in eorum insignibus instar Roma-
norum inscriberent S.M.P.E. hoc est, Sulmo mihi
patria est, huiusmodi videlicet titulum in laudem Oui-
dii sui ciuis referentes. Ibidem etiam vidimus Regem
ipsum, vt pote Poëtarum illustrium studiosum, quoti-
die aliquos ducere ad visendum ipsius Poëtæ domus
ruinas, huiusmodi ruinis vel saxi numen nescio quo-
modo inesse videri existimantem. Hæc mi Nicocles,

quoniam tantopere Ouidii cultor, & amulator es, tibi nota esse volui: vt cum Ouidio Regis etiam obseruantiam in Poëtis suspiceres, ac mādares versibus. Vale.

Ant. Panhor. Nicodt. S. P. D.



Voniam tu quidem admirator & prædicator es non modò rerum gestarum Alphōsi, sed etiam virtutum, & humanitatis eius, accipe, & literis vt soles, manda, quod proximè de illo admiratu dignum accepimus. Alphonso itaq; è Stabiis Neapolim redeunti, cum renuntiaretur Ioānem Caietam præsidis de se bene meriti commilitonis filium adolescentem, cauponi famulantem, sordidā vitam degere, nouitate rei Regem substituisse aiunt: accersitumq; adolescentem interrogasse quid tam turpi ministerio se addixisset. cum ille respondisset aulici cuiusdam cōtumelia affectum, è paterna domo recessisse, malleq; procul ab hominum conspectu vtcunque vitam agere, quàm vilissimi hominis iniuriam pati. illū prius vehementer admonitum, pro dignitate induisse, & equo & pecunia abundè præbita patri filium remisisse cum literis, vt sui maximè causa: paterna pietate illum exciperet: & lenitate atq; indulgentia potius, quàm seueritate, aut asperitate ingenuum filium contineret. Vale.

ANTONII BECCATELLI
COGNOMENTO PANHORMITAE
AD ALPHONSVM SICILIAE
REGEM ORATIO.



Andem Rex Serenissime, quod à
superis immortalibus semper vo
ûis, & precibus optaui, illa mihi
dies illuxit, qua post maximos
studiorum meorû labores sospes
ad te redii. Agitur quidem Rex
optime XV. annus postquam ex
hoc felicissimo regno tuo penè puer cum hoc alio fra
tre meo excessi: cû enim tua extarent plurima, ac ma
xima in fratres meos, atq; in me ipsum beneficia, quid
aliud erat quod ego, & item is frater meus homo nûc
in iure civili eruditissimus possemus tuæ Maiestati re
giæ dignius, aut gratius referre, quàm si honestissi
mis artibus, optimisq; disciplinis imbuti id consecuti
essemus: vt vel in tua salute conseruanda, vel in hoc ip
so regno tuo honestando, atq; augendo, vtroq; no
strû quàm aptissime posses vti? Tua Rex inclyte me
moriam quories aliquid à nobis agendum, aut dicendû
erat, semper ante oculos nostros versabatur: tua ex
pectatio nos adhortabatur, omnes sollicitudines, om
nes molestias magno animo esse à nobis perferendas,
vt aliquando digni à te iudicaremur, quos inter fide
les regni tui innumerares. Tibi ergo Rex clemētissime

omnia studia nostra, omnes curas, atq; vigilias nō iniuria dedicauimus. Lustrauius terras ac maria vt tibi pergratissimi esse possemus. nulla fuit in toto Latio ciuitas, quæ studiorū fama insignis haberetur, in qua non semper eos, qui optimarum artium facilè omnium huius nostræ ætatis principes iudicarentur, in primis secuti fuerimus. Papia enim, Placentia, Bononia, Patauium vrbes literis, ac fama insignes nos ternis lustris his artibus disciplinisq; deditos viderunt: quas aut tuæ regię Maiestati, aut tuo regno magis conuenire, conducereq; arbitrabamur. Multa erant, quæ vt ita faceremus, optimis rationibus nos adhortabantur: amici scilicet, quibus pro perpetuis eorum in nos beneficiis aliquando à nobis satisfaciendum erat: patria, pro qua sæpe viri sapientissimi multa pericula, multos labores libenter, impigreq; susceperunt. mouebat nos præterea non nihil ipsa gloria, quæ si meritis, aut virtute parta extitit, semper est à summis viris magno studio quæsitā, & à sapientibus hominibus maximè laudatā. sed nulla certè alia res erat Princeps humanissime, quæ nos magis ad hæc nostra studia excitaret, quàm vt tuæ Maiestati, Celsitudiniq; cōplacere: incredibile enim est, quantus amor sapientiæ, quantum desiderium nos haberet, quoties ad tuas diuinas, & propè immortales virtutes animum nostrū conuertebamus. Quis enim te clementior? quis fortior? quis deniq; iustior aut melior iter Reges huiusce

nostræ ætatis reperiri potest. nam si percēdere omnes Imperatores, ac Principes voluero, & suas virtutes cū tuis comparare, neminem reperiam, quem cum tua excellenti, & natura, & virtute satis dignè possim conferre. In te quidem summa æquitas, in te modestia, liberalitas, magnificentia, in te omnes regiæ virtutes, in te plurimæ artes nobiles, atq; egregiæ. tu regnū tuū hoc ipso tempore, quo totus ferè orbis terrarum bellis, atq; odiis ardet, solus in perpetua pace, atq; in summo otio tua virtute, ac sapientia contines: te regnante nulla ab externis hostibus sensimus nobis ex aliqua parte inferri bella. tu pater patriæ, tu clementissimus tutor, ac protector ciuium tuorum semper fuisti. Iure itaq; beatam, ac felicem Insulam nostram, nosq; omnium fore fortunatissimos omnes prædicant, quibus te Rege fortissimo, te Principe sapientissimo nasci contigit. quando enim hoc tuum regnum, hæc nobilissima Insula sæpe illustrium Poëtarum carminibus atque oratione celebrata satis grata in te esse poterit? quæ nisi tua diuina providentia, nisi consilio tuo coleretur, iam omnino deserta, ac vacua prorsus esset. quis enim alius cum propter crebras huiusmodi aëris infectiones hæc nostra Insula penè esset cultoribus exhausta nouos incolas in eadem introduxit? quis alius eam temporibus difficillimis non solum ab externis bellis defendit, sed etiam auxit, atq; exornauit? Tuum ergo est, quòd ipsa hodie incolitur: quòd

nos qui hic sumus nunc in florentissimo, ac pulcherri-
mo regno habitamus. Tuum est, vt aliquando conclu-
dā, quod ego ipse, quod is optimus frater meus egre-
giis maiorum nostrorum disciplinis, atque artibus or-
nati hodierno die ad te accessimus. habemus itaq; tibi
vni immortales gratias, ac maximè te ipsum non tan-
tum perpetuis in nos omnes pro meritis, sed etiā pro
tot regiis virtutibus tuis diligimus, & admiramur, ob-
secramusq; Rex clarissime, vt qua charitate, ac bene-
uolentia semper hoc regnum tuum excoluisti, eadem
vtrunq; nostrum diligas, & dignos gratia tua iudi-
ces. Nos enim Rex mitissime quod possumus, hoc tibi
audissimè pollicemur, nunquam tuorum in
nos beneficiorū immemores futuros, sed
omni cura, studio, ac diligētia sem-
per ea facturos, quæ vel ad
conseruationē tui sta-
tus, vel ad diutur-
nitatē nominis
tui pertine-
bunt.

EIVSDEM AD GENVENSES
O R A T I O.



I quis vestrū fortasse admiretur
ò Viri Genuenses , quòd ego vir
Siciliensis, & à vestra longè Repu-
blica remotus hodierno die pro-
siluerim ad vos cohortandum,
classem struere, ac bellum exerce-
re : is velim arbitretur , me pro
vestra dignitate , ac gloria , ac vniuersæ simul Ita-
liæ salute , & libertate adductum potius , quàm
per imprudentiam aliquam fecisse : nam cum fue-
rim semper , ac sim vestræ laudis apprimè studio-
sus, ac rerum à vobis gloriosissimè gestarum & admi-
rator, & prædicator: etiam ad me pertinere visum est,
si quid in rem vestram fore intelligerē, id vltro apud
vos ac liberè promerem, nec dissimularem. Quæ nā
ciuitas vnquam fuit aut scientia rei militaris peritior,
aut virtute audacior, aut in bello præstantior , aut vi-
ctoriis felicior, aut ditione amplior, aut deniq; vlla ex
parte comparanda cum ciuitate Romana? at post pri-
mum Punicum bellum aliquot annorum pax ita Ro-
manos vbiq; victores otio, & armorum desuetudine
eneruauit, infirmioresq; reddidit, vt secundo Punico
bello Annibali pares esse non possent : tum demum,
nec prius perhibentur ad victoriam rediisse, quàm cū
per

per tot Consulum, Ducum, legionum, exercituum
amissionem, ad vsum, ac vetus illud exercitium mili-
tare reuerti potuerūt. Longæua quidem pacis securi-
tas venenum est rerum publicarum: tunc enim pro
virtute ignauia, pro industria luxus, pro triumphis ci-
uium discordia sensim obrepit. vnde potētissimæ, ac
florentes vrbes sæpenumero euersæ funditus, ac dele-
tæ sunt: vt enim bellum laudabile illud quidem, quod
assumitur pacis, ac tranquillitatis causa, sic & pax illa
repudianda, & execrabilis, quæ ciuitatem effœminet,
exitium nutriet, hostes augeat, victos vlciscatur. Cato
vir ille omnium prudentissimus nunquam animo in-
duci potuit, vt optaret Rempublicam Romanorum
hoste carere, omnino veritus ne sublato hostium me-
tu Romanum illud robur, atq; armorum peritia in se-
cordiam abiret, atq; luxuriam. Domi quidem hostis,
id est voluptas, ea sanè perniciosissima est, eoq; maius
periculum, atq; discrimen, quò familiaris bellū. Age
verò Romanos consideremus d̃ Viri Genuenses, qui
bus, dum eorū Respublica florebat, semper & in om-
ni fortuna socii extitistis, & amici: age inquam confi-
deremus Romanos vestros. Quæ nam res ea esse po-
tuit potissimum, quæ vniuersum his orbem terrarū
subegerit? num militum multitudo? at Gallorum exer-
citus constat copiosiores multò fuisse: num corporum
vires? at Hispanorū corpora longè robustiora. num
doli, opes, diuitiæ? at hisce rebus facile semper concess-

fere Carthaginensibus: num deniq; ars vlla, vel eloquentia, vel prudentia? & his Græcos præstitisse palam est. Solum igitur armorum exercitatio, disciplina castrorum, vsusq; militiæ Romanos orbis terrarum dominos fecit, & euexit ad cælos. Nemo quidem bello, aut aliqua iniuria eum laceßere audebit, quem accinctum ad obsistendum, tum ad vindicandum expeditum, & promptum intellexerit. Aliquâdo in rebus bellicis celeritas multò magis, quàm virtus, & fortitudo prodesse consuevit. Nulla res alia Philippum Macedoniæ Regem victorem, & sæpe triumphantem effecit, quàm celeritas ipsa, & præuentio rerum agenda rum. Iam verò viri Genuenses quantum exercitatio, quantum uel celeritas conducat Reipub. videtis, tum ad parandam gloriam, tum etiam ad conseruandam. Qua ex re vestrum hoc tam longæuum otium, & exorsam semper maioribus vestris lentitudinem non possum non vehementer odisse, veritus iam vobis posse contingere, quod abominor, ea quæ & amplioribus, atque potentioribus per ignauiam accidisse ciuitatibus legi. Ponite iam reuiuiscat aliquis ex illis inclytis belli maritimi Imperatoribus vestris, ac reuisat portum, armamentaria, castram, ac reliqua id genus loca. Exuscitate igitur vestrum hoc verè peculiare munus, ac bellandi decus, & dignitatem illam Reipub. quam à maioribus amplissimam, clarissimamq; accepistis: curate ne per inertiam, & diurnam quietem lan-

guescat, ac contabescat. Quid est per immortales
Deos Viri Genuenses cur non putem, atque vatici-
ner, vos contra Turchas victores, atque felices euasu-
ros? quos sciam fortes contra timidos, strenuos con-
tra ignauos, iustos contra iniustos fore dimicatu-
ros. Gerunt quidem rem semper, vt videtis, seruo milite,
ac mercede conducto: vos contra vnanimis liberi, &
patriæ amantes non pro stipendiis, aut pecunia decer-
tatis, sed pro imperio, pro gloria, pro libertate, pro so-
ciis, & amicis: deniq; pro religione, & vera in Christū
seruatorem pietate, cuius nomini insensissimi hostes
sunt. Alacres itaque bellum suscipite, victoriamq; ne-
dum vestræ patriæ imperio magna cum laude pro-
pagando, sed etiam salutē, & incolumitati exterorum,
& cum Dei Max. opt. gloria dubio procul rela-
turi. Sed iam finem dicendi facio. tantum
id velim vobis persuasum iri, om-
nem Turcharum amplitudi-
nem, atq; incrementum
vestram fore immi-
nutionem, atq;
iacturam.

CARMINA, QUAE SEQUUNTUR,
sunt ab Antonio Panhormita iam olim, dum adoles-
ceret scripta. utinam ea, quae prouectiore aetate, &
maturiore stylo edidit, habere potuissemus, quod ali-
quando futurum non desperamus. His tamen il-
lius ingenii & musae specimen facile agnosci
potest, & cum non immerito à Iouia-
no Pontano, & à Tito Strozio, &
ab aliis nobilibus Poëtis
saepe laudatum.

Ad Cosmum Medicum Virum Clarissimum.



I vacat à patrii cura, studioq;
Senatus,
Quicquid id est, placido lumi-
ne Cosme legas.
Eliciet quàm vis rigido de pe-
ctore risus,
Sollicitae & menti dulce leua-
men erit.

Hac quoq; parte sequor doctos, veteresq; Poëtas,
Quos etiam lusus composuisse liquet:
Quos & perspicuum est vitam duxisse pudicam,
Sit licet interdum plena tabella ioci.
Id latet ignauum vulgus, cui nulla priores
Visere, sed ventri dedita cura fuit:

Cuius & hos lusus nostros insitia carpet :

O ita sit, doctis irreprehensus ero.

Tu lege, tuq; rudem nihili fac Cosme popellum,

Tu mecum aternos ipse sequare viros.

In laudem eiusdem.

Cosme quis est Latiis vir felicissimus oris

Coniugio, gazis, prole, parente, domo?

Quis patriæ spes est? quis sanguine clarus auito,

Vates qui priscos seruet, ametq; novos.

Pace quis Augustus? Cæsar quis Iulius armis?

Quis fiet mira pro probitate Deus?

Cosme quis hic est? aut certè tu Cosme vir hic es:

Aut certè quis sit nescio, Cosmus is est.

Ad eundem.

Cosme vir Hetruscas inter celeberrimus vrbes,

Quauis nunc sileas, mens mihi nota tua.

Malles posthabitis nugis, lusuq; iocoq;

Claudere me forti strenua bella pede.

Vt tu magnanimus, sic & permagna cupiscis,

Hei mihi sed nostro tempore Cæsar abest.

Hic tibi sit largo pro Cæsare gloria dices:

Non tales epulas venter inanis amat.

Laurea sit cuiuis, dum sit domus aurea nobis,

Auratam facient aurea iura domum.

Dant lites nummos, donant cyrographa nummos,

Hoc lex dat, voces gloria sola dabit,
 Hæc alit, hæc fatuas duntaxat inebriat aures,
 Scilicet & venter charior aure mihi est:
 Famaq; quantalibet veniat post funera nobis,
 Excipiam nullos mortuus aure sonos.
 Ergo sequor prudens leges, ac iura Quiritum,
 Prostituo prudens verba diserta foro.
 Cum vacat officio regali, ludicra condo,
 Dum bibo, quæ nobis immeditata fluunt.
 In mensa nequeunt Heroum gesta reponi,
 Non sunt implicitæ prælia mentis opus.
 Sit mihi Mecænas, claros Heroas, & arma
 Cantabo, & nugis præ fera bella feram.

Ad eundem de Aurifsa.

Si quis erit priscis æquandus Cosme Poëtis,
 Et si cui Phæbus, pieridesq; fauent:
 Si quis cum loquitur, vel splendida facta reponit,
 Mercurium iures eius ab ore loqui:
 Quiq; alios laudet, cum sit laudabilis ipse,
 Quiq; hedera meritò tempora nexa ferat:
 Si quis erit linguæ doctus Graiæ, atq; Latinæ,
 Si non Aurifsa hic est, periisse velim.
 Quisquis in hoc mecum non senserit, arbiter æquus
 Non fuit, aut certè Zoilus ille fuit.

Sena Ciuitas ad Iouem pro Lucia.

Iuppiter omnipotens, & clementissime Diuûm
Exaudi, fundit quas tuâ Sena, preces.
Iusta precor, iustas audi iustissime voces,
Vrbis & ò miseræ commiserere Deus.
Postquam me affligit tantorum morte virorum
Est visum, at saltem uiuat alumna precor:
Viuat alumna precor, quam scis proluxius vnam
Mater amem, stabile est matris alumna decus.
Nimpha diu superet patriæ faustissima proles,
Et decus, & laudis gloria prima meâ.
Vt peritent cuncti, maneat modò Nimpha superstes,
Damna potest patriæ restituisse suâ.
Si uiuit, mecum & virtus, victoria, mos, pax,
Nobilitas, & cum nobilitate salus.
Si migrat, sanè cuncta hac, & plura peribunt,
Mors sua, mors nobis omnibus acer erit.
Non amor, aut cultus, nec erit iocus vllus in vrbe,
Plausus, nec risus, læta nec vlla dies.
Gymnasium pariter soluetur gloria Senæ,
Quod mea iucundo lumine Nimpha tenet.
Credite vos superi, celebris curate puella
Viuat, longæ uo est digna puella die:
Diiq; Deaq; iterum moneo seruate puellam,
Et sinite Hetruria stet decus vrbe suum.
Credite, si nigra truncant sua pensa sorores

ANT. P A N H O R.

Ingens Cœlicolis pugna Deabus erit:
 Suscipiet siquidem cœlestis regia Nympham,
 Atq; opus est primo cedat & vna loco:
 Aut si promerita decimum statuetis olympum.
 Nimpha quidem cœlo est Lucia Nimpha suo.
 Dicite vos cœlum si pro virtute securæ
 Sitis, an vlla poli munere digna mage est?
 Nulla fuit vestrum (veniam date) purior illa,
 Moribus, ingenio, vel pietate prior.
 Deniq; centenos operam date victitet annos,
 Neu cedat vestris mors sua fortè malis.
 Ergo simul Diuæ mecum exorate Tonantem,
 Vt præstet Nymphæ tempora longa meæ.

Ad Cosmum.

Quæ modò legisti, si non tibi grata fuere
 Carmina, nil miror, Sena loquuta fuit.

Ad sanctum Ballum.

Sancti nugarum lector studiose mearum,
 Cui plusquam satis est nostra Thalia placet:
 Desine mirari versus, quos inter edendum
 Edimus, aut hora carmina lusa breui.
 Testis es, vt cum iam versu deffixior essem,
 E digitis calamos abstulit Vrsa meis:
 Carmina iam nosti strepitu persæpe, foroq;
 Condita sint medio qualiacunq; legis.

Verum

Verum adeo longè me diligis, vt tibi Vatis
Thraciici videar continuisse lyram.

Si qua tamen nostræ dederit fors otia pennæ,

Et me tranquilla scribere mente sinat:

Est animo versus, quos non oblitteret ætas,

Conficere, ingenii ni mihi vana fides.

Interea felix, & amans mi Balle valeto,

Fiant & Parcæ ferrea fila tuæ:

Et tua crudelis deponat Masia fastus,

Atq; iterum felix dulcis amice vale.

Preces præmittit ad Siculum, ut librum impetret.

Ite preces genitæ magni Iouis, en preit Atis,

Atis quæ vobis præuia monstret iter:

Si multum validis nocumentum passibus anteit,

Ite citæ lippæ, loripidesq; preces:

Iuit Ate velox omnem nocitura per orbem,

Ite citæ vestris gressibus, iuit Ate.

Est Florentina celeberrima virtute Poëta,

Quem numerat genitis Sicilis ora suis:

Illius ex lepido cantant Heliconides ore:

Illius ex digitis pulsat Apollo Chelimum.

Non peperit Latium, non Græcia mille per annos

Eloquio similem, vel probitate virum.

Ille ego non paruo iam pridem iungor amore,

Iam pridem nobis mutuus extat amor.

Hunc petite, hunc vigili vos offenderis in æde
 Cantantem altisonis regia gesta modis.
 Hunc igitur magni Iouis exorate puellæ
 Per si qua est scriptis fama futura suis,
 Ut mihi concedat perrara epigrammata Marci,
 Illa libens relegam, restitua miq; libens.
 Si facilis Diuæ coram venientibus extat,
 Et meritis vobis exhibeatur honos,
 Vos adiutrices hunc exaudite rogantem,
 Siris & huic placida, parq; referte pari:
 Quid si vos nihili faciat, dureq; repellat,
 Poscite confestim turba repulsa Iouem:
 Hunc ut terribili nocumentum voce sequatur,
 Et meritis pœnas detq; luatq; graues.

Ad Sanseuerinum ut uersus facere pergat.

Sanseuerine tuam legibis, terq; Camœnam,
 Et placet, & nullo claudicat illa pede:
 Dii simul ac facili præstent tibi tempora vena,
 Hortor pierios condere perge modos.
 Res sanè e regia est, mortalia fingit, & ornat
 Pectora, post obitum miscet & illa Deis.
 Tu duce me actutum vises Parnasea Tèmpè,
 Deq; sacro pleno pectore fonte bibes:
 Nec te deslituam, modò tu consortia vites
 Cum rudis, atq; hebetis, tum rudis, atq; hebetis.

Crasſa quidem ruditas paruo te polluet uſu,
Inficietq; tuos tranſitione ſinus.

De Alda.

Alda puellarum tu formoſiſſima gaude,
Vincitur omnipotens igne Cupido tuo.
Alda Deos omnes ſpecieq; & moribus æquat,
Sit minimè mirum ſi capit Alda Deos.

Ad Luciam Mauram cur promiſſa non ſeruet.

Cur non Maura venis? cur non promiſſa, fidemq;
Soluis? cur nullo pondere verba refers?
Nam memini dixti nobis venientibus ex te,
Ite alacres, cras hinc vos petitura ſequar.
Cras uenit, aërea nec te deducis ab arce,
Cras it, nec tu nunc perfida Maura venis.
Quòd ſi nos flocci facias, & ludere iam fas
Eſſe putas, noli ſpernere Maura Deos.
Maura Deos temnit, iurauit numina Diuum,
Quòd nos Paganico viſeret ipſa ſolo.
Maura Deos temnit memores fandi, atq; nefandi,
Spernit & illa viros, ſpernit & illa Deos.
Oleuior foliis, auium ventoſior alis,
Fœmineum, & turpe eſt fallere ſic alios:
Si te Maura iuuat me fallere, falle, ſed illum
Carminè qui pollet ludere Maura caue.

Ad Galeaz, quem orat, ut Catullum inueniat.

Ardeo mi Galeaz mollem reperire Catullum,
 Ut possim Dominæ moriger esse meæ.
 Lætitat illa libens teneros læscia Poëtas,
 Et præfert numeros doctæ Catulle tuos:
 Nuper & hos à me multa prece blanda poposcit,
 Fortè suum Vatem me penes esse putans.
 Non teneo hūc dixi mea lux, mea Nympha libellum,
 Id tamen efficiam forsan habebis opus.
 Instat, & omnino librum me poscit amicum,
 Et mecum grauibz nunc agit illa minis.
 Quare ego per superos omnes ò chare sodalis,
 Sic precibus lenis sit Citherea tuis:
 Te precor, atq; iterum precor, id mihi quære libelli,
 Quò fiam nostræ gratior ipse Deæ.

Ad Mammum de partu Lucia Nympha.

Nunc age, nunc Lucina meæ succurre puellæ,
 Quæ parit, atq; aliquem iam paritura Deum:
 Quid tardas, Lucina veni faultissima Nympha,
 Læuis Io Nympha prospera Diua veni.
 Post modò solennes certè tibi construet aras,
 Imponetq; tuis menstrua thura focis.
 Hæc ego, sed quoniam Dea sit tibi promptior, oro,
 Ipse tuas præstes splendide Mamme preces:

Nil dubito, quin flore dato, votisq; sol utis,
Exoluet partus molliter illa suos.

De suo occulto amore.

Vror, & occultæ rodunt præcordia flammæ,
Ergo si sileam terq; quaterq; miser.

Conqueritur quod à Domina abesse cogatur.

Quando erit, vt Senas repetā, Dominamq; reuisam,
Me miserum molli pestis ab vrbe fugat.

In Mathiam Lupium claudum maledicum.

Nescio quis nostram fertur carpisse camœnam:

Si non decipior, Lupius ille fuit.

Illa sibi solita est nimium lasciua videri,

Nec videt hanc similem moribus esse suis:

Est vir is obscœnus, nostræ est la sciua Musæ,

Illa leuis cursu, morsibus ille leuis:

Adde quod id monstri pedibus non ambulat æquis,

Imparibus constat nostra Thalia modis.

Si culpat versus, & se culpare necesse est,

Si sapiis ergo tace prodigiose senex.

Ad eundem.

Dic mihi cur longo Lupi vestiris amictu?

An vitium furæ vis operire toga?

Nil agis ò demens, humeri, latera atq; mouentur,

Vt tumida nullo remige lembus aqua.

In eundem.

Aonia rediens Mathias Lupius ora,
 Castalidum steriles nuntiat esse lacus,
 Et siccas lauros, nullam & superesse puellam,
 Singula contatus comperit esse nihil.
 Impuri nequeunt oculi spectare sorores,
 Scilicet impuris Pegasis vnda latet.

In eundem.

Lupius abs poscis me rara epigrammata Marci,
 Concedam, rectis passibus ipse veni.

In eundem.

Annua publicitus tibi larga pecunia Lupi
 Soluitur, & pueris quod legis ipse tribus.

In eundem.

Tres habet arcana Mathias Lupius aula
 Discipulos, vnus de tribus est famulus.

In eundem.

Inde tui libri sint, inde scientia Lupi,
 Qui non desipiat mallet habere libros.

Pro Centia ad Contem ut ex rure redeat,

Centia chara olim tibi mittit ab Vrbe salutem
 Lux mea mi Contes, dimidiumq; animæ.

Nil mihi lætitiæ superest vbi rura petisti,
Sanguis & è venis visus abire meis.
Hoc mihi lenimen tantum est, puer Vrbe remansit,
Cuius in effigie conspicio ipsa tuam:
Ne fuge chare puer, sine te mi nate videri,
Dum pater hinc aberit ne fuge chare puer.
Plura velim, sed plura loqui dolor impedit, ergo
Viuere si me vis, ocius, oro, redi.

Ad Galganum.

Quòd tibi tam serò mitto Galgane libellum,
Da veniam, mitti noluit ipse liber.
Sape equidem monui, dominum pete cādide codex:
Respondit, lapides, non mea scripta legit.

Epitaphium Horiectæ Senensis.

Postquam marmoreo iacet hoc Horiecta sepulchro,
Ipsa Deū credam numina posse mori.
Non fuit absimilis forma, aut virtutibus ipsis
Cœlitibus, Senæ gloria magna suæ:
Heu heu non prohibitas, species aut vnica quenquam
Abs inclementi demere morte potest.
Quòd si clara Deos faciat mortalia virtus
Pectora, si cœlum simplicibus pateat,
Non dubito (per vim modò non sibi iura negentur)
Quin magno absideat casta puella Ioui.

ANT. P A N H O R.

Epitaphium Baptista Senensis.

Hic tumulus longè tumulo felicior omni
Baptistæ auricomæ virginis ossa tegit :
Dulciter hæc agili pulsabat cymbala dextra,
Mouit & artifices saltibus apta pedes:
Omnibus & cantu plusquam philomella placebat,
Matre quidem pulchra pulchrior illa fuit:
Indolis egregiæ minimo pro errore rubebat,
Sparsa rubore placens, fusa rubore decens.
Cum satis hæc fecit naturæ luce suprema,
Transierat vitæ vix duo lustra suæ.

Epitaphium Catherina.

Hoc iacet ingenuæ formæ Catherina sepulchro,
Grata fuit multis scita puella procis.
Morte sua lugent cantus, lugentq; choræ,
Flet Venus, & mæsto corpore mæret amor.

Epitaphium Sanzi Ligoris.

Temporibus lætis in me Romana refulsit
Virtus, prisca domi, militiæq; simul.
Nomen erat Sanzus clara de stirpe Ligori,
Sarcophago hoc tegitur corpus, & umbra polo est.

Orat pro Nichina defuncta.

Oro tuum violas spiret Nichina sepulchrum,
Sitq; tuo cineri non onerosa silex.

Pieris

Pieria constant circum tua busta puella,
Et Phoebus lyricis mulceat ossa sonis.

Epitaphium Herafini Biberij.

Qui legis, Herafini sunt contumulata Biberi
Ossa sub hoc sicco non requieta loco:
Eripe, vel saltem vino consperge cadauer,
Eripe, sic quæso sint rata quæq; voles:
Ossa sub enophoro posthac erepta madenti
Conde, natent temeto fac, requietus ero.

Epitaphium Martini Polyphemi.

Siste precor, lachrymisq; meū consperge sepulchrū,
Quicumq; hâc iuuenis fortè tenebis iter:
Sum Polyphemus ego vasto pro corpore dictus,
Martinus proprio nomine notus eram.
Qui domino ingrato frustra famulabar in arte,
Qua celebror celebres exuperasse coquos.
Nunc hic funebri tandem spoliatus honore,
Thure carens summa sum tumulatus humo.
Me Mateſilanus latebroſa in nocte recondi
Iuſſit, & eſlequias luce carere meas:
Nec eruce, nec cantu celebrauit noſtra ſacerdos
Funera, nec requies vltima dicta mihi:
Clamq; fui ſacro latitans, raptimq; ſepultus,
Nec ventrem capiunt arcta ſepulchra meum:
Dum feror obſtupui, timuiq; ſubire latebras,

Nec loca crediderim religiosa dari.
 Oro pedem iniecta condas tellure parumper,
 Qui patet: heu vereor, ne lanient catuli.
 Continuo domini complebo vlulatus ædem,
 Inferiis pœnas has dabit ille meis.

*Caballus fame moriens de Lelphe Do-
 mino conqueritur.*

Si qua tuus queritur cupidissime Lelphe caballus,
 Da veniam, macies cogit, & alta fames.
 Pulcher equus, certus, velox, pinguisq; fuisset,
 Pectora quàm mea sint fortia, & ampla vides,
 Aptaq; sint videas quàm cætera membra per æquè,
 Quod natura dedit sumplit auara manus.
 Ah quoties phaleris tectus fera bella subissem,
 Ah quoties cursus præstitus esset honos.
 Rodo nihil, nostras sed rodit inedia vires,
 Non etiam nostris dentibus herba datur.
 Vix mihi dat noster paleas aliquando dominus,
 Barbariem metro barbarus ille dedit.
 Turpe quidem dictu, sed cogit turpia fari
 Turpis herus, proprio stercore pascor ego:
 Stercore pascor enim, sed stercore pascimur ambo,
 Nam tu ne comedas non vir auare cacas.
 Ne ue bibas etiam non meiere Lelphe videris,
 Exitit, vt perhibent, dira Celeno parens.
 Sella carens lanis quæ fecerit vlcera dorso

Lufce vides, caudæ vulnera Lufce vides.
 Cur equitans afpris calcaribus ilia fodis,
 Si vix fat plane debilis ire queam?
 Cur agiles vis dem crudelis in aëre saltus,
 Tibia cum nequeat laffa mouere pedem?
 Ipfe quidem collo mallem vectare quadrigas,
 De gere quàm miseri sub dirione viri.
 Ocius affectem piftrino Lelphe dicari,
 Sub te funeftam quàm tolerare famem.
 Vera quis hæc credat, nifi credunt vera molares?
 Ferrea ftant longa fræna comefa fame.
 Ordea cornipedi dulcis datur efca caballo,
 Sorbuit hos nunquam fed mea bucca cibos.
 Vana loquor, verum quis poffit credere ventrem
 Duntaxat vento viuere poffe meum?
 Eft mihi veh misero macies incognita toto
 Corpore, & infractis artubus offa fonant.
 Sim licet in formis, fimq; aridus, hoc tamen ante
 Quàm Lelphus vacui pectoris efce uelim:
 Eft Lelphus rationis inops, et mentis egenus,
 Cui fuis eft venter, crus feritate riger:
 Cum loquitur boat vt bos, & flat putor ab ore,
 Vt lædat nares tetra cloaca minus.
 Cum ridet, reteggit fauces, vt afellus hiafcens,
 Fit mihi de rifu naufea fæpe fuo.
 Plura equidẽ quereret, quoniã sũt plura, fed heu heu
 Lingua loqui plus nunc debilitata nequit:

Iam morior, socii, stabulum, præsepe valet,
 Me miserum videor debilitate mori.
 Vos procul ite feræ, procul hinc vos ite volucres,
 Quò ruitis? modò vos pellis, & ossa manent:
 Plaudite, nam Lelphum Luscum manderis avarum,
 Ille crucis pœnas furcifer ille dabit.

Ad Librum.

Quid vis inuito domino discedere? quid vis?
 Quis te iam nostra ducit ab æde liber?
 Quò fugis infelix, degunt vbi mille Catones,
 Mille quibus tantum seria lecta placent?
 Cum censore miser rigido lædere rubescas,
 Cum'ue minus poteris læse redire voles.
 Vana meæ forsan sunt hæc præsagia mentis,
 Estq; timor vanus, thusq; piperq; teges.
 Si roget auctoris lucrumq; & nomina lector,
 Immemorem nostri nominis esse refer.

*Epitaphium Antonij Panhormita, quod
 ipse moriens sibi scripsit.*

Quærite Pierides alium, qui ploret amores,
 Quærite qui Regum fortia facta canat:
 Me pater ille ingens hominum sator, atq; redēptor
 Euocat, & sedes donat adire pias.

Antonine decus nostrum latare resurgam.

Iouiani Pontani in tumulum Ant. Panhormitæ.

Siste hospes, fas est cantus audire Dearum ,
Grata mora est, musæ nam loca sacra tenent .
Antoni monumenta uides , hinc templa frequentant ,
Ille fuit sacri maxima cura chori .
Illum sæpe suis medium statuere choreis ,
Duxit compositos arte docente choros .
Sæpe lyram celsit Clio, celsere sorores ,
Concinuit teneros uoce, manuq; sonos .
Extinctum fleuitq; Aon, fleuitq; Aganippe,
Sebetus miseros egit in amne modos .
Sirenes quoq; de scopulis miserabile carmen
Ingeminant, planctu littora pulsa sonant .
Pierides tristem ad tumulum effudere querelas,
Pierides passis post sua terga comis .
Hinc creuit desiderium, nec cura recessit
Vatis, at extincto vate recessit amor .
Conueniunt nunc ad tumulum, celebrantq; choreas,
Et memorant lusus magne Poëta tuos .
En audis, sonet ut lenis concentibus aura?
Ut strepat applausu concita terra pedum ?
Hæc vati memores musæ post fata rependunt,
Carminis hoc meritum est, num satis? hospes abi.

Elisij Calentij in eundem.

Qui molles elegos, & Regum gesta canebat,
Sacra Panhormitæ contegit ossa lapis.

Iani Vitalis in eundem.

Has tibi dat violas, immortalesq; amaranthos
Ingeniorum altrix, & Martis alumna Panhormos,
Non quia torpentis musas excire veterino,
Aut Regum immensas potuisti assumere curas,
Verum quòd Crassos inter, dicesq; Lucullos
Integer Antoni voluisti vivere Codrus.

F I N I S

VENETIIS apud Bartholomæum Casanum.

Anno M D LIII.

LECTURE I.

Considerations on the Nature and
Extent of the Human Mind
as far as it is capable of
knowing the Principles of
Morality and the Duties of
Man.

By JOHN LOCKE, Esq.
of the Middle Temple in
London.

Printed by J. Streater, at the
Sign of the Sun in St. Dunstons
Church-yard, near St. Dunstons
Church, in the County of Middlesex.
1690.

By Authority, Printed for J. Streater, at the
Sign of the Sun in St. Dunstons
Church-yard, near St. Dunstons
Church, in the County of Middlesex.

By Authority, Printed for J. Streater, at the
Sign of the Sun in St. Dunstons
Church-yard, near St. Dunstons
Church, in the County of Middlesex.

By Authority, Printed for J. Streater, at the
Sign of the Sun in St. Dunstons
Church-yard, near St. Dunstons
Church, in the County of Middlesex.



LECTORI.

Quæ præcedunt iam prælo subduxeramus, cum nobis nonnulla eiusdem Antonij carmina ab amico, et docto uiro sunt transmissa, quæ ne desiderarètur, superioribus adiungere libuit. Tu boni consule, & uale.

*Epigramma in laudem Elysiæ, de quo meminit in epistola ad Cremonam, quæ incipit,
Quòd uersus. &c. fol. 13.*

Elysiæ auricomas inter celeberrima nymphas,
Quis ualeat laudes enumerare tuas?
Colla niues, & labra rosas, & lumina uincunt
Sidera: culta Helene, nuda Diana Dea es.
Cum loqueris, pulchro manat tibi nectar ab ore,
Dignaq; coelicolum sunt tua uerba choro.
Quid loquar artifices digitos? quid pensa? quid artes?
Et quibus euitas otia mille modos?
Inter opus tantum dulcè ò dulcissima cantas,
Et cantu ignorans pectora dura feris:
Nam saltu licet ipsa liræ, licet ipsa choræ,
Sis decus, ad thyasos rara uocata uenis.
At si quando uenis paulum cessura labori,
Te charites sociant, te comitatur amor.
Quocunq; incedis, spirant uiolæq; rosæq;

M M

Incedis nocturnox fit & illa dies.
 Quicquid habent omnes diui, diuæq; decoris,
 Quicquid habent laudis, tu quoq; laudis habes.
 Hoc etiam felix, quod formosissima pulchro
 Scilicet, & casto casta puella places.
 Ipsa puellarum decus es, decus ille virorum,
 Clari ambo, clavis moribus ambo pares,
 Ambos, oro, Deus longauos seruet in annos,
 Sæpius et timidos iungat utrunq; Venus.

*Epigramma de quo meminit in Epistola ad Cambiū,
 quæ incipit. Supertioribus dieb. &c. fol. 53.*

Hic Ducis Anguigeri dantur secreta tabellis,
 Quisquis es, à nostro limine verte pedit.
 Flecte aciem, noli nudam spectare Dianam:
 Nec strepe, non atris Luna laborat equis.

*Epigramma de quo meminit in epistola ad Feruffi-
 num, quæ incipit. Dum expecto fol. 73.*

Deliciæ domini iacet hoc Iolia sepulchro,
 Concipis ex tumulo quàm brevis illa fuit.
 Corpore munda, leuis, tum rerum sedula custos:
 Quare illam extremo hoc munere donat herus.

Guarinus ad Panhormitam.

Musarum decus Antoni per secula salue,

Theocritum antiquum Siculae telluris alumnum
 Effingis, propria reuocans dulcedine vatem.
 Sicelides latio per se dabit Aetna Camoenas.

Responsio Panhormitæ.

Quantum Romulidæ sanctum videre Catonem,
 Quantum Cepheni volitantem Perseæ cœlo,
 Alcidem Thebæ pacantem viribus orbem,
 Tantum læta suum uidit Verona Guarinum.

Ad Petrum Ynon.

Scilicet Hetrusci sunt inclyta gesta senatus,
 Et sunt Anguigeri fortia facta Ducis.
 Sunt & Aragonei prælustria prælia Regis,
 Fœminâ Parthenope mascula bella gerit.
 Nec minus Ausonias armis Mars efferat oras,
 Cogitur atq; armis gens peregrina suis.
 Magna quidem sunt hæc, & magno digna poeta,
 Dignaq; percupida posteritate legi.
 Quæq; ego prætulerim nugis, quæq; ilicet ausim
 Atq; suo graui composuisse pede.
 Si nescis is, sum, qui Virgilios, & Homeros
 Malim, quàm Gallos, Calimacosq; sequi.
 Quauis hi Veneres, quauis hi bella reponant,
 Attamen auctori gloria cuiq; sua est.
 In prædio est pulchrè teneros qui fleuit amores,

In pretio pulchrè est arma, virumq; canens.
 Dixeris, ergo canas Martemq; Ducesq; Senatus,
 Siue canas Regem, belligeramq; nurum.
 Verum qualis erit dulcis clangitio uati?
 Qualia dic sodes præmia Regis erunt?
 Aut nulla, aut certè quàm parua simillima nullis,
 Cum quibus haud chartas, quas perarabis, emas.
 Vsq; adeo nostra sub tempestate tyranni
 Pro nihilo sancti carmina uatis habent.
 Sit licet Aeneas Rex, sit Rex alter Achilles,
 Si caret historico uate, peribit uter.
 Illi rauescant citharæ, fors areat illi,
 Quicumq; ingrati Principis arma canit.
 Et me destituant musæ, me pulcher Apollo
 Non amet, indigni si Ducis acta feram.
 At tu Principibus qui iucundissimus extas
 Petre, fac ingenio par mihi munus eat.
 Tunc mea magna nouos, largos, Regesq; Ducesq;
 Euehet ad superos lauta Thalia Deos.

*Ad Io. Lamolam quòd Elegia lachrimis
 Bononia nequirit recedere.*

Desine me placida uerbis abducere terra,
 Desine me domina dissociare mea.
 Vera mones, fateor: pulchrèq; adducis Vlisse
 Fortiter æquoreas deseruisse Deas:
 Fugerit & flentem Dux ut Troianus Elysam,

Multa licet surdo spondeat illa proco.
Addis ad hæc etiam, quæ non ornatius ipse
Tullius, aut grauius scripserit ipse Plato:
Deniq; quod possit firmos mutare Epycuros,
Aut si quid toto firmius orbe fuit.
Me quoq; mutaras: & cor qui læserat ignis
Extingui gelidis est mihi uisus aquis.
Antiquam & patriam, quæ colles inter amœnos
Exiguus Rhenus pinguiâ culta secat:
Et te prisca domus, Siculas quæ effundis in urbes
Progeniem nostram linquere mentis erat.
Iam suberant animo præclari Cæsaris acta,
Quæ modò militia, quæ modò pace gerit.
Tunc & Meccenas obuersabatur ocellis,
Quem Diis persimilem secula nostra ferunt.
Tum simul heroos versus meditabar, & ignes
Atq; elegos animo deseruisse putans.
Sensit amor sensus nostros, nostræq; puellæ
Detulit, heu frustra nitimur in uetitum.
Flens Elegia uenit, sic nostra puella uocatur,
Tum primum nostros uidit amica lares.
Gratia magna tibi sit Lamola, tu facis ad me,
Tu facis ad thalamos iuerit illa meos.
Bella prius fuerat, bella superabat et omnes
Tum facie, uel se uincere uisa mihi est.
Induit ad uires vultus Elegia Dearum,
Siue tuos Iuno, siue Diana tuos.

Facta est splendidior, facta est renitentior, ædis
 Arrisit paries adueniente Dea.
 Sicut eram monitu flexusq; , & certus eundi ,
 Astitit, & nostro tabuit illa sinu.
 Non potuit primò, quanuis his terq; , iterumq; ,
 Atq; iterum fuerit nixa puella loqui.
 Pro uerbis lachrimæ, lachrimæ pro voce fuerunt:
 Quale Dei magni pondus habent lachrimæ.
 Nam me flexere, quàmquàm potuere quadrigas
 Solis, & irati sistere tela Iouis.
 Mens mihi mutata est, heroum gesta valete,
 Meccenasq; tua cum probitate vale.
 Vos quoq; grandisoni longè procul ite cothurni,
 Possidet ingenii ius Elegia mei.
 Utq; elegi imbelles nobis sine fine manerent,
 LUX mea de tali carmine nomen habet.
 Qui potuit primum dominæ contemnere fletus,
 Quisq; fuit, verè saxeus ille fuit.
 Ferreus Aeneas, de tygride natus Vlisses,
 Durus Virgilius, durus Homerus erat.
 Scilicet humano, molliq; ex sanguine natus
 Non hominum mouear luctibus, & crucier?
 Qui tribuit lachrimas homini Deus, inde fatetur
 Ex lachrimis quòd vel mollia corda dedit.
 Desine me placida verbis abducere terra,
 Desine me, domina dislociare mea.
 Postquam mens rediit nymphæ, sic pauca locuta est,

Pauca solet semper, semper hortesta loqui.
I, si certa tuos persuadet causa recessus,
Sed me post abitum mox obiisse puta.
Si steteris uiuam, sin ibis luce relinquer,
Iura meæ vitæ, iuraq; mortis habes.
Vix dum finierat tum, cum mollissimus inquam,
Crede mihi, nil est quod vereare necem :
Enecer ipse prius, certè prius enecer optem,
Quàm tibi vel minimi causa doloris eam .
Latus agam tecum, sine te mihi nulla futura est,
Si qua futura tamen, mœsta futura dies.
Tu mihi tu certè iucunda, & sola voluptas ,
Tu mihi delictum, tu mihi dulce decus.
Tu das ingenio vires, tu suggeris æstrum,
Et vates vatem religiosa colis.
Desine me placida verbis abducere terra,
Desine me domina dissociare mea.
Iamq; oculis nympha tristis decederat humor,
Præstiterat dictis credula nympha fidem:
Inq; meos vultus nitidos erexit ocellos ,
O oculos oculis sidera visa meis .
Dicite Dii vestrum cui defunt lumina, certè
Furata est oculos nostra Elegia Deis .
Illic infidias, illic sua tela Cupido,
Luxurians illic retia tendit Amor .
Mox mea candenti circundat colla lacerto,
Et sua coniungit mollia labra meis:

Quicquid olent uiolæ, spirant opobalsama quicquid,
Tale quid ex bucca noster olebat amor.
Iam modò non Arabes mercator, nec petat Indos,
Hic quid in Eoo littore quærat, habet.
Linquat apis flores, os fugat & huius, ab inde
Mella nec hyblæis deteriora dabit.
Desine me placida verbis abducere terra,
Desine me domina dissociare mea.
Non hac vna Venus, non vnus in urbe Cupido,
Sunt centum, non hac unus in urbe Deus.
Hac & si innumeri sunt vrbe Deiq; Deaq;,
Sola mihi facie bella Elegia placet:
Atq; adeò mihi grata est, quantum non grata Catullo
Lesbia, nec Gallo grata Lycoris erat.
Sunt hic præterea veteres, fidiq; sodales:
Sanctius hic meus est, hic Farafalla meus.
Desine me placida verbis abducere terra,
Desine me domina dissociare mea.



